

20 6 18

Wingia

C $\frac{4}{15}$

8




liotheca
majori Coll. Rom.
Societ. Jesu

20.7.3.

20
1
3

8.-3.d.33.





NICOLAI PARTHENU GIANNETTASY ST
AUTUMNI SUPRENTINI



Neapoli apud Iac Raillard an. 1798

A. Magliar sc. et del.

EXCELLENTISSIMO
P R I N C I P I
T H O M Æ
A Q U I N A T I ,

*Castilionis, Feroleti, Sancti Mangi, ac S. R. I.
Principi, Mamertinorum Comiti, Ur-
binumque Neocastrì, Mamerti,
earumque Statuum
Domino.*

NICOLAUS PARTHENIUS GIANNETTASIVS
PERPETVAM FELICITATEM.



I Nter actuosas, ac se-
rias curas, quibus con-
tinenti meditatione
eruditum, capacem-
que exerces animum,
ludicra hæc nostra, ac
festiva admittere ne
graveris, Vir huma-
nissime. Enim verò si
negotiiis, ac severio-
ribus studiis, aliqua
interstitio, qua relaxari animus, indulgeri-
que possit, concedenda est; habent profectò
a ista,



ista, quod capiat ille, oblectamentum, & quo labore allevari, reficique valeat. Et quemadmodum æstuosis, molestisque diei horis scribenti mihi levamentum præbuerunt, ita legenti tibi fastidia deterfura confido: sunt enim, absit verbo jactantia, jucunda, & amœna. Et cum docta quædam, quædam etiam erudita inter sales, ac Veneres (quod istuc scribendi genus vel maximè exigebat) permixta sint; erit etiam voluptas honesta, & otium lucro cedit. Et licet non illa te lateant (nam quod genus literarum est, quod probe non calleas?) erit tamen operæ pretium memoriam refricasse. Quocirca mirari quis desinat, si ego Autumnos hosce meos, quos in Surrentinis secessionibus, ac temporibus subcissivis elucubravi, viro tam serio, ac gravi, tot studiis, negotiisque occupatissimo ausum nuncupare. Præterà cum tanto Principi insita à natalibus, imo hausta cum sanguine à parentibus præclarissimis mira quædam comitatis vis sit, ac pene regia ad demerendos sibi animos benevolentia, non dubito quin accepta illi futura hæc sint, quæ in obsequii argumentum, implicatique beneficiis animi, exhibentur.

Accedit, quod non ultimo quidem loco numerandum est, futurum abs te illis, Princeps Excellentissime, Præsidium, & Decus, ut
Ve.

Venusius ait ad Mœcenatem suum Poëta. Et sanè quod non sperandum præsidium à Viro, in quo ea est sapientia, ea eruditio, ut vel præclarissimum genus, illustres, tituli maximi principatus infra eruditum, dictumque animum videantur. quippe ea est scientiarum supellex, qua ille investitur, ea literarum ornamenta, quibus cohonestatur, ea peregrinæ eruditionis copia, qua ditescit, ea, historiarum, ac Politicarum rerum cognitio, qua nobilissimi vice torquis præcingitur, ut cætera Fortunę dona, etsi maxima, illorum claritudine offuscentur. Tantus tibi à puero discendi ardor fuit, tantus literarum amor, tantis ad veri cognitionem igniculis exarsit animus, ut totum te literis addiscendis addixeris. tanta verò alacritate, tanta constantia, ut brevi id consecutus sis, quod vix longa alii meditatione, longo tempore obtinere. Juvit ad id bona indoles, optimumque tibi inditum à natura ingenium: illa ad seria, ac docta, spretis puerilibus ludis, incitabat animum, hoc verò ad scientias adipiscendas expeditissimam sternebat viam, adiutumque ad abditissima quæque rerum aperiebat. Quocirca factum, ut is brevi evaseris, qualem nunc omnes admiramur: nimirum naturalis Philosophiæ, quæ tota in contemplandis rerum naturis occupatur, scienti-



tissimum, Mathematicarum item scientiarum, quæ ob suam præstantiam disciplinæ appellari meruerunt, peritissimum, Geometriam, Astronomiam, Musicam, Geographiam tuas delicias, tua otia statuisti. cum quibus & poëseos studium, & politioris styli cultum copulasti; ut tractari facultates illas cum elegantia posse demonstraveris: nec Eloquentiam à Philosophia abhorreere, cumque noscendi utilitate stare voluptatem dicendi. Quæ quidem facultates eo nobiliores sunt, quod earum accessione artium locupletaveris, quæ viri ingenui, quæ generosi Equitis, quæ magni Principis propriæ dotes sunt. quæ omnes, & singulæ ita insignes in te sunt, ut nesciam plusne in his artibus, quam in reliquis disciplinis valeas. dicam tamen, & non assentatus dicam, te in utrisque illis quam maximè valere.

Accedunt ad has animi divitias illæ dotes, quas virtutes nuncupamus. & quemadmodum hætenus enumeratis superamus bruta, ità his Deo similes efficimur. hæ verò ingenui, niveique mores sunt, quibus te affabilem omnibus reddidisti. comitas item, ac benignitas, quibus omnium animos demereris. Munificentia singularis, qua obstrictos beneficiis animos semper habeas: Prudentia, Justitia, & tandem ne tua abutar modestia,

cas

ear omnes virtutes, quæ nobilissimo, principi-
peque viro dignæ sunt . Et hæc quidem de
tuis bonis, quæ ad præsidium operis maximè
faciunt : & in quibus plus meritò gloriari
poteris, tamquam in fructibus industriæ tuæ,
quam in reliquis , quæ Fortunæ sunt, & no-
stro operi decus afferunt singulare . Verum
ea adeò in te benè collocata, ut illa tibi cum
fœnore fors dedisse visa sit . nempe ceteris dat
titulos , divitiasque Fortuna , ut illa bono-
rum supellectile eos exornet ; tibi verò ut
decorem acciperent decora , & illustriores
fasces redderentur . Quocirca si te Aquina-
tium Comitum, Cajetæque Ducum, nobilissi-
mam sobolem , totiusque Domus præclarissi-
mæ Principem : ex qua domo tot summi Prin-
cipes, tot purpurati , infulatique Patres, tot
Duces invictissimi , tot strenuissimi milites,
tot viri illustrissimi : & instar horum om-
nium unus Thomas , quò non tantùm fami-
lia præstantissima , sed totus Christianus
orbis illustratus est , prodivere : si te triplici
principatu nobilem , si tot oppidorum do-
minatione illustrem, si tot populorum famu-
latu conspicuum dixerim : si te S.R.I. Prin-
cipem , si tibi Fulviam ex Mirandulæ Ducibus
nuptam , cumque primis Europæ Principi-
bus affinitatem contraxisse prædicaverim ;
magnum, fateor, quod dixero : sed maximum
est

est quod sine assentatione dicere possum, hæc
nimirum omnia titulorum insignia plus à te
accepisse ornamenti , quam contulerint . ut
plus tibi majores tui, quam tu majoribus de-
beas . Quæ cum ità sint , quale decus futu-
rum non est nostro operi , quod tam illustri
sub nomine in lucem prodit ? Ex hoc certè
uno omnem sibi decorem , omnem laudem,
quando cætera desint, sperare meritò potest.
Superest igitur , ut tu, Princeps benevolen-
tissime , pro tua humanitate illud accipias ,
quod tituli jure tuum est . Vale. ex Surren-
tino Non; Sept. M DCXCVIII.

*Andreas de Mari Præpositus Provincia-
lis Societatis Iesu in Regno
Neapolitano.*

CUM librum, cui titulus, *Autumni Surrentini*,
Nicolai Parthenii Giannettassi à Societate Jesu,
aliquot ejusdem Societatis Theologi, quibus id com-
missum fuit, recognoverint, & in lucem edi posse pro-
baverint, Nos potestate nobis facta ab Adm. Rev. Pa-
tre Nostro Thyrso Gonzalez Præposito Generali, ty-
pis mandare concedimus, si iis videbitur, ad quos edi-
tio librorum spectat, in quorum fidem has literas ma-
nu nostra subscriptas, & sigillo Societatis nostræ mu-
nitas dedimus. Neapoli die 5. Februarii 1698.

Andreas de Mari.

Dominus Canonicus Cicatellus videat, & referat
Die 11. Januarii 1698.

JO: ANDREAS SILIQUINUS VIC. GEN.

D. Januarius de Auria Canonicus Deputatus.

EMINENTISSIME PRINCEPS.

UT Em. V. jussa facerem, perlegi librum, cui ti-
tulus, *Autumni Surrentini P. Nicolai Par-
thenii Giannettassi Societatis Jesu*, in quo tantum
abest, ut quicquam Religioni, aut bonis moribus ab-
sonum offenderim; at singularis eruditionis ubertate,
reconditarum rerum copia, varia argumentorum
amenitate simul, & gravitate, ac styli potissimum fe-
licitate tanti viri nomine dignum invenerim; cujus
celebritas longè lateque Italiæ, atque adeo Europæ
regio-

regiones pervasit. E' re igitur publica censeo, ut ad
literarum, doctiorumque hominum utilitatem pro-
deat modo gravissimum Em. Tuz judicium accesserit.
Em. Tuz

Additissimus famulus

Emanuel Cicatelli Ecclesiæ Neap. Canonicus.
*Attenta superscripta relatione Domini Canonici Re-
visoris, potest imprimi. Imprimatur. Die 4. Men-
sis Septembris 1698.*

JO: ANDREAS SILIQUINUS VIC.GEN.

D. Januarius de Auriæ Canonicus Deputatus.

U.J.D. Joseph Valletta videat, & in scriptis referat.
Die 6. Mensis Octobris 1698.

GASCON R. ANDREAS R. ANDREASSI R.
GUERRERO REG. MERCADO REG.

Mastellonus.

EXCELLENTISSIME DOMINE

CUM legerim jussu Ex. V. Librum, *Autumnorum
Surrentinorum P. Nicolai Parthenii Giannetta-
sti*. Nihil inveni quod bonis moribus, Regiæq; Juris-
dictioni adversetur, imò & Reipub: literariæ maxi-
mè profuturum. Ideò publici Juris illum fieri censeo,
& Ex. V. videbitur.

Additissimus, & humillimus servus

Joseph Valletta.

*Visa supradicta relatione Dom. Revisoris imprimatur,
& in publicatione servetur Regia Pragmatica.*

GASCON R. ANDREAS R. ANDREASSI R.
GUERRERO REG. MERCADO REG.

Mastellonus.

Errata sic corrige.

Pag. 34 versu 11. lege definire pag. 38. v. 18. leg. veræ. pag. 57.
v. 24. l. crastinus. pag. 153. v. 20. l. opprimunt. pag. 166. v. 21. in
illis noxiæ. p. 173. v. 18. l. esse putem. pag. 183. v. 11. l. quæcumus
& v. 12. l. Quibus. pag. 215 v. 18. l. vulgare, & v. 21. l. dicitis.
pag. 236. v. 29. l. tantum. pag. 260. v. 15. l. ferula.



AUTUMNORUM SURRENTINORUM

L I B E R I.

CAPUT PRIMUM.

*Dum per hortum motandi corporis causa deambulat,
carmen recitatum est, cui titulus, Surrenti-
na Tempe.*



Ost Idus Septembris anni
 MDCLXXXVI, quo pluvii
 dies ante Autumnum æqui-
 noctium inciderunt, ex in-
 sperato dies amœna amœ-
 nitate amœnus, ac facilis
 illuxit; quocirca ut placida
 illa cœli clementia frue-
 rer, atque interrupta ob-
 malas tempestates quoti-
 diana corporis exercita-
 tione iterum pro mea consuetudine uterem, Lucilium
 accersisse, cui, cum præsto affuisset, Descendamus, inquam,
 in hortum motandi corporis causa, ne putrescamus
 quasi fungus. Et ille: Lando consilium. verum quidni
 A. Sor-

2 AUTUMN. SURRENTINORUM.

Surrentum usque, vel, si id magis lubet, in Campestria proficiscamur: sic longiuscula ambulatione crudum præ nimia humiditate humorem concoquemus. Tum ego: Quia semita aquosa nimis, aër humidulus; quare potius duco currere per Xystum. Ille verò: Rectè tu quidem; nam semitæ admodum angustæ, & ager nimis frondosus, quippe qui arboribus strictim confusus: apriciora hæc si loca forent, nihil desiderarem amplius. Cui tum: Id ipsum ego vellem: sed vix ullus locus est, cui nihil ad felicitatem desit. Lucil: verò: Nempe nihil est quod vitio vacet. sed descendamus jam. saluberrima istæ erit ambulatio post triduum, quo ob pluvias nos domi continuimus. & sanè innubis hæc cæli facies, pacatissima hæc diei temperies, nos blandissimè invitant. Nihil igitur moræ factum: acceptisque petaso, & baculo, in hortulum perreximus. Dum autem cursarem, sic me Lucil: compellat: Quando autumnale jam appetit Æquinoctium, non erit abs re si tuis de Autumnis te interrogem: quodnam illis exordium facies? nam hæc amœnissima terrarum ora, elegantissimum rus istuc in Æstatibus à te descripta, illarumque exordium fecerunt. Tum ego: Poeticam illis frontem appingam, & fortasse non invenustam. Et ille: Videlicet? Ego verò: Non multis ante diebus, quàm tu me convenires, infanji præter spem; atque illo agitato Phœbi cæstro (hoc enim poëtæ infaniunt) carmen eructavi benè longum: atque ei hunc feci titulum, Surrentina Tempe: hanc operi præfigam epigraphen. probas? Et ille: Quidni problem? quippe egregiè, & ad rem factum. sed, quæso, ut recites. spero illud mihi carmen fore jucundissimum: Cui ego: Atqui versus incudi nondum redditi: ut expoliti mox fuerint, recitabo. erunt sic auribus minus ingrati: te enim fastidiosus esse auribus, non sum nescius. Tum ille:

ille: Fateor me fastidii delicatissimi: nec mihi quidquam ingratus accidit, quam vel ineptias quasdam cantilenas, quibus ne perpauillum quidem salis, vel imperplexas quasdam, ac perdifficiles, quibus, ac si Bœotica essent problemata, Oedipo opus est, invitis auribus excipere: in tuo stylo nihil hujusmodi. Cui ego: Coquinaria verba. Et ille: Imò è tripode: neque tu puer, cui caput demulceam. age, age sis, jam recita. Tum ego: Geratur mos hic tibi, verum sedeamus in Calopside. Et ille: Istuc quàm volebam. mox iterum cursitabimus. cum igitur sedimus, ego carmen hunc in modum memoriter recito.

SURRENTINA TEMPE.

*Aurea Sirenum loca, felicesque recessus,
Et semper placidis vernantia rura viretis,
Quò se, Thessalia nuper, Pindoque relicto,
Agmine cum toto Musarum invexit Apollo,
Fert animus lustrare oculis, & tollere cantu,
Quare agite, & vestros si vates dicere honores
Aggreditur, cōjuncta choro, & nova Numina vestro,
Vos sacrum inspirate animis, Acheloides, æstrum,
Artibus & patriis insignem reddite alumnum.
Quà frontem glauca pracinctus arundine Sarnus
Labitur, Herculeas & fluctibus alluit arces,
Atque suam immiscet lympham Crateride, longo
Ausonia è gremio prorumpit in aquora tractu
Altis terra jugis, circumque interlita ponto.
Altera Crateris pars, qua curvatur ad Austrum,
Solis & occidui petit attenuata cubilo.
Vertice in extremo, Zephyri quà suscipit auras,
Atque oleis circum latis pracincta virescit,
Inclita Tyrrena surgunt delubra Minerva.*

4 AUTUMN. SURRENTINORUM.

Contrà Theleboum stant regna : brevis sonat inter
 Perpetuò refluxens alternis fluctibus æstus.
 Verum ubi se primo tellus sale spargit, amœna,
 Umbrosa que sedent Stabia. dextra altus in auras
 Vertice canenti sese Lactarius infert :
 At virides læva campi, collesque benigni,
 Dives ubi jactat Liber sua dona : neque ipsos
 Præ Stabiis quidquam Dictæos amplius agros,
 Nec Tuscos curat colles, collesque Falernos.
 Atque suas ostendat opes Pomona, virenti
 Semper flore comas, præcinctaque tempora pomis.
 At curvus terra in gremio se circumat arcus ;
 Qualis, ubi cœlo præfulserit Iris, aquosa
 Dum varios pingit Titan in nube colores.
 Inque sinus cornu geminus consurgit utroque
 Mons : humiles circo in medio de gurgite clivi
 Recta ferunt sursum sua culmina : qua super ampla
 Planities extenta jacet, campique patentes.
 Quos alii longo virides curvamine colles
 Circumdant, instar caveæ, pulchraque corona,
 Mirè intertextæ, cingunt herbosa theatra.
 Planitiem sata rura tegunt, & amœna virescunt :
 Latè & odoriferis, & pulchris iride picta
 Floribus, & ramis ornant frondentibus horti.
 Quin etiam distincta nisent, variataque tractim
 Edibus, & villis, altaque ad sydera molo
 Surgunt fana, micant pinnato & vertice turres.
 Umbrosi passim calles, via plurima in anguem
 Extenta, & plures sub aprico vertice pulchri
 Prospectus, quæ curva aperis sua brachia Crater,
 Et placidis crispatur aquis, & murmurat auris.
 At qua frondosi sinuatur scena theatri,
 Principio leni colles consurgere clivo
 Incipiunt ; pomisque virent, & mollibus uvis.

Al-

*Alta tenent olea, densaque cacumina quercus,
 Frondosaeque nuces, & castanea hirsuta.
 Stant & convalles inter viridissima tempe;
 Sera quibus se Flora comis ornare decoris,
 Et seris gaudet Pomona rubescere gemmis.
 It raucus per saxa sonans revolutus ab alto
 Rivus, & electro saliens pellucidior fons.
 At non ulla magis tellus venatibus apta;
 Seu cursare animus campestris: seu tibi colles
 Perlustrare humiles amor est, vel scandere montes:
 Seu vallis per opaca studes agitare molossos.
 Ficedula hic dulces, hic raucus passer, & ulmo
 Turtur ab excelsa resonans, nitidique palumbes,
 Hic & rusticula, & pinguedine lata coturnix,
 Turdique, merulaque & amantes frigora bruma,
 Frigilla falluntur: ali quibus ipse Camænis,
 Cumque tribus possit divis formosus Apollo.
 Hic Milvi, hic Aquila, Vulturque atque Harpa rapaci
 Vungue minax, Percosque fugax, longo Ardea rostro
 Terribilis, Falcoque, ferox: qui remige penna
 Dum properant pradam supra, captantur & ipsi.
 Non lepores desunt sylvis, damaque fugaces:
 Comprensos quos dante ferat tibi veragus acri.
 Sed majora freti succedunt ozia, & aura
 Felices Zephyri per scruposa saxa, per antra,
 Tritonum semper cantu pulsata, choroque
 Nereidum, & blando semper lustrata natatu.
 Quà latus eorum tenuem se flectit in arcum,
 Et rupe abrupta concluditur (alta sub aurâ,
 Et directâ mari surgit, mirabile visu)
 Mand' aura ludunt molles, umbraque salubres
 Latè undas pelagi, scopulosque, & litus opacant.
 Ipsa etiam primo clivi sub margine sylva
 Florentes, longè ramis frondentibus umbrant*

6 AUTUMN. SURRENTINORUM.

Æquora; pacato seseque in marmore pingunt;
 Ut credas ipsa sylvas frondescere in unda.
 Stant sparsi passim scopuli, cautesque per aquor
 Projecta. gremio disiecta plurima rupis
 Est specus: & fluitans in concava viscera missi
 Saxorum: velut in cæcas immissa cavernas
 Stagna: sive pulchro, & tractim variæ figura,
 Prospectus præbent oculis mirantibus alto
 Pendentes scopuli. saxorum plurimus horror,
 Et nox furva loci, latebraque per ima reposita,
 Ac subcaruleus color interpiectus in unda,
 Dum lux per rimas radians illabitur, & dum
 Scissa repercussu causas illustrat opacas;
 Mira animos, mira delectant lumina scena.
 Hic montis abscissis hac, illac rupibus, ima
 Ab radice, jugique patens, fastigia ad usque
 Ascendit; cochleaque sinum de more reservoirum,
 Non imo inflectis gyro, penitusque reducit.
 Perque helicis sese ductus externa refusus
 Fluctibus insinuat Tesths, serpisque recurrens
 Perque cavas rimas scopulorum, perque latebras:
 Et placidè irrumpens immurmurat, & sale cano
 Aspergit latè cautes, atque herbida saxa.
 Namque imi musco scopuli, & lanugine molli
 Intecti, pictique virent: ceu prasa corusca
 Flore novo: gratos & odores naribus halant.
 At medium lati frutices, herbaque virentes
 Prætexunt latè rupem: fastigia sylva
 Summa tenent, sertumque velut sylvestre coronant.
 Interdum summo descendens vertice rivus
 Per scopulos, per saxa cadens, ceu consona fila
 Percurrens, varias imitatur murmure voces.
 Hic verè incurvi medio sub fornice montis
 Excisa in saxo muscosa sedilia surgunt:

Chr-

Currit & undosum scopulus projectus in altum ,
 Illius inque acie, vivoque è murice facti
 Stant, humilisq. gradus, quos, cum crispatur ab aura,
 Leniter assultans rauce Theris alluit æstu .
 Hic matutino considens tempore carchis
 Otia Socraticis, vel cantu fallere: adunco
 Sive hamo poteris vafros comprehendere pisces .
 Qui crebri cursant per saxa herbosa, virentemque
 Attendunt muscum, & densas spatiantur in algas .
 Ast antrum lava scopuli de parte cavatum ,
 Incisa sub caute patet: perque intima montis
 Viscera pralongo tractu se parrigit: ex quo
 Per secreta cava rupis via ducit odorum
 In scopulum, longoque extant subsellia circo.
 Sape hic, in medio dum Sol libratur Olympo,
 Di maris undisoni Glaucus, Proteusque, Palæmon:
 Tritonesque citi, & Phorci, Portumnus, & ipse
 Neptunus, placido componunt lumina somno .
 Illius inque aditu spelunca è parte sinistra
 Incurvant cava saxa solum, fluctusque repostos
 Concludunt placido in gremio: Galatea lavari
 Hic solet, atque Ephyræ, Nisæque, Cymodoceque,
 Pollias, & Lubra, & formosior una videri
 Sirenes inter cunctas Colomelis, & ore
 Purpureo, & niveis mammis, flavoque capillo .
 Est specus umbrosus juxta, quod protinus uno
 Insiliant saltu Nympha, cum gurgite ab alto
 Aspiciunt celeri Glaucos properare natatu .
 Sic rupis medium turrato vertice in aquor
 Irrumpit, scopulisque fretum distinguit odoris:
 Atque sinu terebrata, cavo curvamine, tota
 Fluctibus immissis aperitur pervia: & illam
 Exarmata suis subit horia armamentis .
 At contra quoniam respondent Herculis arces,

8 AUTUMN. SURRENTINORUM.

Totaque vitifero qua subjacet ora Veservo,
 Idcirco rupem subeuntibus ilicet offert
 Prospectu miro species variata, propinquam
 Atque urbem prensare putant, mirabile visu.
 Parte alia, occiduo qua Sol lavat amna quadrigas,
 Et Surrentini sese pars altera circi
 Incurvat, glauca collis praeinctus oliva
 Assurgit: sensimque jugum demissus in undas,
 Arcton in adversam spectat, portusque Dicarchi.
 Planities in prima, quam juxta attollitur alto
 Vertice mons, saxo consurgunt facta vetusto
 Mœnia Sirenum felicia, qua cava circum
 Præcingit vallis rivo, perfusa sonanti.
 Vitiferi circum colles, sylvosaque tempe,
 Et rura, & virides horti, fontesque coronant.
 Urbs exulta loci genio: gens more paterno
 Comis, & officiis animos edocta mereri.
 Nempe refert mores Sirenum, animumque benignum:
 Hinc gemina, atque illinc nautis venientibus ora
 Opportuna jacet: medius discrimine longo
 Stat collis, quem circuitu totum tenet amplo
 Urbs imposita super: fabricata crepidine in ipsa
 Parthenopen contra spectant palatia: & undos
 Despectant errare greges pelucida subter
 Æquora, & herbosas circum percurrere cautes.
 At colle in medio, visvoque in viscere rupis
 Est oblonga, patens specus informata rotundo
 Fornice: quam circum constructa sedilia quadro
 E lapide, immixtique tegunt subsellia fluctus.
 Hic Fauni, hic Panes, hic capripedes Satyrisci,
 Sæpe sedens defessi astu, nimioque labore:
 Collectumque fuga sudorem gurgite tergunt,
 Ast intus formata manet specus altera, circi
 In morem, Dorisque aditus transmissa per arches

Spelantam duro scalpris in monte cavatam
Aluit: & circum visuntur marmore sedes
Eniveo posita: medioque in fornicis orbe
Curva, atq. ampla patens spiracula, se quibus intus
Lux agat, & radiis perlustrares concava. Nympha
Hic, quibus est cordi pudibunda modestia, molles
Sape lavant arvis; se seque abs Sole suentur:
Magnum opus, & populi pro maiestate Latini.
Nam quaecunque jacent Surrenti mœnia circum
Antiqui monumenta avi, posuisse feruntur
Romani, dum divitia, dum regna manebant.
At collis, lava qui surgit parte theatri,
Inclinata dies dum feri vespers horas
Percurrit, leni Zephyro perflat, & umbra
Æstivo Cancris sub sydere gratus amica est.
Herbiferi propter scopuli, cautesque virentes
Consurgunt, placidumque sonant, dum rore refuso,
Alternis veniens sese super ingerit astus.
Hic sinus abscissa medius sub rupe patescit,
Et brevis ora, leves quæ rauco à gurgite cymbas
Accipiat, tutoque cava in statione recondas,
Arboribus celsum redimitur culmen, & unda
Fons medius vitrea vivo de pumice manat.
Extenti hac, illac muscoso murice circum
Præcingunt oram scopuli, quibus otia sæpe
Fallit piscator, vel amaros Phillidis ignes
Solatur cantu, seu piscibus instruit astus.
At contra, undoso quæ gurgite fluctuat altis
Doris aqua, longos disponunt ordine casses,
Et labyrinthæo circumdant æquora gyro:
Curva quibus capiant radentes litora thynnos.
Non longè, extremum quæ collis in æquora clivum
Demittit, Neptunus ubi sua templa (nivali
Marmorè quæ quondam sacrarat Pollin, adis
Magni.

10 AUTUMN. SURRENTINORUM.

Magnificanti custos esset, rarisque superbi)
 Spargebat sale carulee, stat circus, & illum
 Perfundis per stricta fluens Thetis ostia aperta
 Rupis: & in medio quondam gratissimus unda
 Manabat dulci, quamquam profusus amaro
 Equore fons: circum constructa sedilia, curva
 Ad ritum cavea, queis sidens plurima turba
 Equoreos Polli ludos spectabat, amico
 Cum sacros de more Deo celebrabat honores.
 Molliter expenso collem percurrere remo,
 Et lustrare sinus, sertumque videre corona
 Sylvisfera, cautesque manu prensare virantes,
 Multa animis, & multa oculis sincera voluptas:
 Qua turbas animi, & curas mulceat acres.
 Sed quo Fatorum casu, quo numine divum
 Huc se Pieridum cœtu sociatus evanti
 Ex Helicone suo, Pindoque invexit Apollo,
 Dicite, Sirenes, caussa, que aperite canenti.
 Postquam Caucaiseis emissa è rupibus horrens
 Immani erupit ritu gens Caspia, & omnem
 Barbara late Asiam ferro vastavit, & igni.
 Hinc & Abydenas victrix rate vecta per arces,
 Europam petiit, Gracosque aggressa solutos
 Pra luxu, & nostris discordes ritibus, armis
 Quàm faciliè edomuit, regnumque evertit Eoëm.
 Civilesque simul cultus gens aspera, & artes
 Ingenuas, docti & monumenta excindere secti
 Vi conata; furor Scythico stat pectore tantus.
 Cœpere hinc sensim nullo squalescere cultu
 Ingenia, & docta sordescere Palladis artes.
 Nullus honor lauro: sacros non amplius amnes
 Pimplaos ibant haustum, Cyrrhamq. diserti.
 Aurea nec plectro resonabant fila: neque ultra
 Dona ferebantur sacris votiva Camænis:

Sup-

Supplice nec voto Phabum de more vocabant.
Hac secum indignans animo formosus Apollo
Dum versat, pulchrasque dolet contemnere artes,
Musarum acciri cœtum jubet, ilicet illa
Conveniunt, patulaque sedens sub tegmine quercus:
Quam propter fluvio sese Peneus amœno
Devehit, & latas riguo secat agmine ripas.
Ut Musa sedere novem, tum Phœbus Apollo
Aggere ab herbofo sic incipit ore profari:

Non hac, Pierides, tot terra exulta per annos,
Et cunctas inter fortunatissima quondam,
Hospitium post hac nobis dabit; omnia quando
Et ferro, & Scythico squalent vastata furore.
Non hic ingenia, & doctæ non amplius artes,
Ut quondam viguere, vigent: non laudibus ultra
Tangitur, aut clarum quis lauri affectat honorem.
Desolata jacens passim loca sacra: neque ullus,
Ni vastator adit sacratas barbarus umbras.
Nempe, ut fatidicos ima ab radice securi
Succidat truncos, sylvasque incendat: & ipsos
Divinos Fontes scelerato polluat ore.
Ergo agite, inque alias mecum concedite sedes.
Thessala nunc Tempe valeant, sylvaque valete
Pieria, viridisque Helicon, Parnassus, & Oeta:
Atque amnes valeant sacri, Peneus, & Orneus,
Argyraque, Dirceque, & dulce fluens Aganippe.
Ipsaque terra parens quondam generosa virorum
Græcia, & extinctis valeant cum civibus urbes.
Ille hæc, concordī plauserunt murmure diva
Pieria: veteresque animo stat relinquere sedes;
Inque nemus migrare novum, nova rura, novosque
In saltus penetrare, aliosque invisere montes.
Sed loca quæ cursu teneant, quibus & nova fiant
Hospitia, ancipites voluunt sub pectore Musa.

An

*An Zephyri ad fines, an convertantur ad Eurum?
 Anne Notum, Boreamve petant, gelidosque Triones:
 Et mediis sese sistant in vallibus Æmi?
 Hac dum sollicita versabant mente sorores
 Castalides, Phœbusque pater, medio ilicet alveo
 Penet Siren visa est consurgere: & ora
 Sic Phœbum blando, sociasque affata Comœnas:
 Non te, Phœbe pater, non vos dilecta sororum
 Turba mihi, dubios teneat cura anxia: pandam
 Ipsa ego nunc vobis qua sint felicia Tempe,
 Qua pro Thessalicis habitanda; sacrique recessus
 Qui sint, qui culti montes, & amœna fluentia.
 Est locus Hisperia in magna, Cratera Pelasgi
 Appellant; toto quo non felicior alter
 Orbe locus, mare seu spectes, sive aëris almam
 Temperiem, lato vel dites ubere terras.
 Crateris de mora sinum curvatur in amplum
 Collibus extentis tellus Campana: feracis
 Ubertas cui mira soli, cui plurima ponti
 Mollities, tepidaque aura, & clementia cœli,
 Et felix dedit ipse situs cognomen. opaca
 Hic nemora, hic sacri fontes, hic flumina, & unda
 Irrigua, ripas propter, perque arua fluentes.
 Sunt hic & rupes, & amica in rupibus umbra;
 Et lenes vident Zephyri, Soleque benigni.
 Hic culta gentes habitant, devotaque vobis
 Ingenia, & blandi mores, atque apta mereri
 Officiis animos mollissima pectora: & omnes
 Ingenue hic florent artes, studiumque Minerva.
 Verum alias quantum superat Campania terras,
 Atque sinus quantum Crater supereminet omnes:
 Tantum illum pars una super pulcherrima surgit.
 Surrenti sinus hic, hac sunt felicia Tempe,
 Quis non Æmonia sunt componenda, neque horri-*

He-

*Hesperidum, neque Medorum ditissima rura.
Hac loca Sirenes primum coluere, relicto
Peneoque, Amphrysoque, & patrio Acheloo.
Atque etiam nunc illa tenent, semperque tenabunt:
Et felix illis agitabant finibus animum.*

*Ergo agite, & quod terrarum blandissima tellus
Campano Cratere jacet, circumque benigno
Alluitur fluctu, & lata pubescit aprici
Uberrate soli, Zephyrique afflatur ab auris,
Sedibus his, cursum tandem celerate, relictis.
Illuc Parthenope, vos illuc carula Nesis,
Leucopetree, Prochyteque soror, Colomelis, & omnis
Sirenium chorus invitat, blandoque natatu
Obvius occurrit jamjam venientibus, & se
Numinibus jungit vestris, cætuque beato.
Vos docta invitant gentes, moresque benigni,
Et placidi invitat vos indulgentia cæli.*

*Hæc Siren hyala vultum fucata colore
Effata, in medio fluvii se condidit alveo.
Mox & transmissio pernici flumine cursu,
Per medium fugit Ægaum; mediumque per altum
Ionium transvecta, freti spumosa Sicani
Claustra subit, cursumque tenens Scyllæ secundum
Æquora, Tyrrheni findit salis aquora cauda.
Hinc ubi Tillefii pervenit saxa, Ligaam
Ocinarum de fonte vocat, vocat inde sororem
Leucosiam, & quotquot Pæstana per aquora divæ
Sirenes vitreis habitant in sedibus, & quot
Hinc vel olivifera delubra antiqua Minerva,
Illinc vel Capreæ, piscosæque saxa frequentant.
Haud mora, caruleis undosa è Doridos antris
Accita veniunt diæ Sirenes, & unum
Agmen agunt. hoc illa choro sociata sororum,
Craterem ingreditur, primoque à limine magno*

Par-

*Parthenopen clamore vocat Sebethide ab unda ,
 Leucopetramque suo versantem rure Vesuvi,
 Equae altis Nefida jugis, sociamque Dicarchim ,
 Et Surrentino appellat Colomelida ab antro.
 Extemplo diva, socio sermone vocata ,
 Accurrunt, celerique secant vada salsa natatu .
 Unda sonat percussa, fratisque ardentibus omnis .
 Semifero late spumat sub pectore Crater .
 Ut cœtum coiere simul Sirenes in unum ,
 Thessala tum socias lato sermone profatur ;
 Sic ingressa : Choros, ò diva, ducite festos ,
 Et festos vitreo celebrate in marmore ludos :
 Namque hac, qua dudum colitis Crateridos ora
 Herbida saxa, sinus, perflataque mollibus auris
 Antra, petunt Musæ, Musarumque auctor Apollo.
 Quis amor est, Pindo, spretoque Helicone, beati
 Crateris vestri pulchras inquirero Sedes ,
 Excultas hominum ingeniis, & moribus aureis .
 Regnaque vestra dea, Surrentinsque recessus
 Incolere, & doctis hic exercere palaestris
 Palladias cupiunt artes, numerosque canoros.
 Ergo agite, & Phœbo venienti occurite : amico
 Accipite & gremio Musas, plausuque fovete.
 His dictis lato plaudentes murmure diva
 Sirenes, bifida diffundunt marmora cauda ,
 Latitia indicium, & celeri occurrere natatu
 Festinant alacres Phœbo, cœtuque sororum
 Pieridum cursuque citant umbrosa secundum
 Litora, & herbosas fragranti murice cautes ,
 Remigio ulnarum, & concentibus aëra pulsant.
 Hinc resonat cantu tellus, hinc unda natatu.
 Et jam Palladii lustrabant herbida collis
 Blanda cohors pelagi, cum accedere visus Apollo
 Aurata in vectus concha, Musasque traherat .*

*Ipse tenens lava citharam pulsabat eburno
 Pectine, percurrens numeris fila aurea miris.
 Respondere quibus certabant carmine Musa
 Blandiloqua, legesque lyra servare canora.
 Continuo cursum campo Sirenes aquoso
 Accelerant: micat ante alias formosa sorores
 Parthenope; micat ipsa loci regina beati
 Purpureo insignis vultu Colomelis: & omnes
 Virgineum Musarum agmen, Phæbumque salutant.
 Mox blandis cithara numeris, cantuque marinas
 Adjungunt unà choreas: varioque recurso
 Spumosos miscens spumosis orbibus orbes,
 Et labyrinthais depingunt aquora gyris.
 Post ubi fluctivagis diva indulsere choreis,
 Et Musa cantu, & cithara crinibus Apollo,
 Sedibus optatis primam dixere salutem:
 Inque actam lati exiliunt, terraque positi
 Perpetuas figunt sedes: perque arua beata,
 Et Surrentinos agitant grata otia colles.*

Hæc ut memoriter recitavi; tenebam enim carmen-
 tum primum contextum; Bellè, inquit Lucilius, Autu-
 mnos auspicatus es. Poeticum istuc exordium à te
 expectabam: & decebat quidem certè poetam, & tuum
 istuc orium Surrentinum: quo si ego fruerer, fortasse
 etiam insanirem. Plurimum sanè debes tu locis hi-
 sce, in quibus & valetudinem recuperas, ut cælo hoc
 nulla tibi salubrior medicina, & tot elegantes libellos
 scribis, nosque ad studia literarum acerbis stimulis in-
 citas, atque urges: verum multò magis hæc tibi de-
 bent loca, quæ tu per totum terrarum orbem (nam quò
 tui non pervenerunt libelli?) tanto cum plausu cele-
 briora fecisti. Absit verbo adulatio, ut tibi nostri ci-
 ves, ita & Surrentini, in quorum jus civitatis admissus
 jam es, monumentum ponere deberent. Cui statim
 Ego:

Ego: Mittamus istæ, quæ nisi tuum candidum ingenium planè nossem, adulatoria appellarem. Atque hæc ut jam sunt dicta, surreximus, perque Xystum iterum cursum est.

C A P U T II.

Fit mentio Circæ Fani, quod non longe à Surrenti pomærio fuisse memoria proditum est.

MANè ante Id: Octobris accersitis Lucilio, & Vellejo, qui valetudinis causa me pridie convenerat; Eamus, inquam, Surrentum usque. At Lucil: Quidni potius, inquit, in Campestria? Eamus, quæso, in eam semitam, quæ in ipsa montis crepidine mari imminet, atque utrinque arboribus constata est. nihil illa amœnius, nihil alius, prospectu jucundius nihil est: me fateor tanta voluptate afficit, ut nihil ultra. Cui ego: In illam alias, nunc Surrentum ire constitui: etenim nobilis quidam in suam me villam, quæ non longe à pomærio est, qui locus ad Circen dicitur, invitavit, nimirum ut monumenta Circæ fani, quod eò loci fuisse, memoriæ datum, inspicerem. Tum Lucil: si ita, veniam lubens, illa enim videre gestio quam maximè: & erit, ut opinor, Vellejo gratissimum. scio quippe illum veterum monumentorum curiosissimum. imo efficiemus, ut Romanum etiam aqueductum, & cisternas videat. Tum Vellejus: Rem mihi perjucundam facietis. audiavi enim à Sex: Nigro opus illud esse quam per admirabile. Quibus ego: Sed eamus tandem. Et illi: per nos illicet; i præ igitur te pone sequemur lubentissimè. At, quæso, inquit Vellejus, ut modico gradu præeas: nam si secus te minimè assequar. nam tu pedibus, ut & in reliquis, es velocissimus, ut non
sine

sine defatigatione te interdum sequar. Hic Lucil: Optime monet Vellejus. Parthenie, tu celeri admodum gradu cursitas: quod tibi haud scio an salutare sit: ita enim bilis incalescit, atque hypocondria inflammantur. quo malo non leviter laboramus. Cui ego: Imo sic crudum humorem concoquo, & consopitos spiritus excito. verum nolo vobis esse incommodo. quare juxta peregrinantium leges nobis a majoribus præscriptas, Vellejus, qui imbecillior est, præcedat: etsi perdifficile mihi sit passum continere. Dum igitur expenso gradu pergitur, Si ad Circæum promontorium, inquit Lucil: Circen habitasse perhibent, cur hic illius fanum, quod ibi potius esse debuisset? Cui ego: Quid mirum? Etenim cum Circen ex earum numero fuisse, quas Sirenes antiquitas appellavit, verisimile sit, haud equidem abs re factum puto, si gens; quæ à Sirenibus urbi suæ nomen fecit, imo & ab illis primum habitatam arbitretur, illarum uni hic fanum extruxerit. Et ille: Probabilia prædicas. unum tamen habeo, quod obijciam: si ut est apud Lycophronem in Cassandra, tres fuisse Sirenes, quæ à Græcia in Italiam navigarunt, & tu in Nauicis assentiris: quarum unam ad Ocinarum obiisse tradunt, inque Terinæo scopulo tumulatam. de qua tu in Naut. V. sic habes.

Hinc viridem Linum, & Tyllesia saxa relinquo,

Et Baccho latam gemmato in colle Terinam,

Ostiaque Ocinari legimus, tumulumque Ligæ.

Hoc enim nomine appellabatur. secundam ad Leucosiam insulam, ab illa ita nuncupatam, qua de tu etiam in eodem libro mentionem facis, sepultam ferunt. Tertia fuit Parthenope nostra, quæ, ut ais in Bellicis,

excepta hospitibus à ruri fluo Sebotho.

Sirenium genus Euboicis prima intulit oris.

jam Sirenem non fuisse Circen manifestum est. Cui

ego: Acutè tu quidem, & eruditè, ut cetera. Sed me facile expediam. Et si illæ tres, quas enumerasti ex Lycophrone, & meis Nauticis, præcipuè fuerint, verisimile tamen est, multas post illas, imo & antè navigasse. Præterea illas omnes antiquitas Sirenas appellavit, quæ suis illecebris viros allexissent: inter has verò insignem fuisse Circen poëtarum, & Homeri in primis decantatum carminibus est. Atque hæc cum dicerem, pro villæ foribus amicum obviam habemus, qui statim accurrens nos comiter excepit, atque in rus suum introduxit. mox per Xylum in pervetusta quædam monumenta perpauculis passibus perduxit. Erant eò loci juxtà collis crepidinem substructiones templi, quod penè integrum extitisse usque ad abavi sui ætatem affirmabat. illius, deinde avaritia excisum, candidè fatebatur: èque illo plusquam triginta columnas distraetas: quarum quædam erant ex porphyrite, quædam verò ex bisalte. ara è Pario marmore. quæ adhuc Surrenti visitur in via exposita, juxtà sacram quandam ædem. pavementum ex texellis prætoriorum lapidum contextum, cujus pars adhuc extat. sunt item quidam cavi, amplique fornices partim ex lateribus, partim ex quadro saxo compactis miro ordine. ex columnis duæ marmoreæ in ipsa via consæptæ adhuc sunt. Dum hæc monumenta, attentè, curiosèque lustramus; Haud quidem ferendum, inquit Vellejus, tam insignis veterum monumentum, quod per tot sæcula integrum extiterat, avaritia excisum tam brevi esse, ac penè eradicatum. non sane tanto ego me piaculo obligassem: quin potius omni ope, atque opera effecissem, ut instauratum, inque dies expolitum perseverasset. quid enim hac vestra in urbe insignius conspici potuisset? At ille: Ineruditus meus ille abavus, & ad rem potius attentus, quàm ad istiusmodi

di decora. Ego verò illum de figura interrogo. Et ille: Oblongum, ut plerumque sit, fanum fuisse ferebatur: quod ex fundamentis conicere proclive est: & molis quàm vastissimæ. magnam enim hinc marmoris copiam asportatam pro certo scio. Cui ego: Assentior facillè. nam si tot columnæ testudinem fulciebant, & tantæ magnitudinis, maximum fuisse fanum liquidò consequitur. Hoc loco ille: Non longè à mea hac villa maximæ sunt fabricæ ex lateribus, quadratoque lapide; arcus item, & fornices vastissimi, quibus ædes duorum nobilium superædificatæ, quocirca juxta fanum ædes etiam fuisse manifestum est, à quo verò instructæ, minimè proditum est. Hic Lucil: me intuens: Num censes, inquit, & fanum, & ædes, à Pollio Felice facta? Cui tum ego: Haud equidem credo. Id enim minimè Staturus, qui adeò accuratè Surrentinam Pollii villam descripsit, & fana in illa Neptuno, & Herculi instructa, hæc verò, & magnifica quidem, silentio præterisset. Imo facillè inducor, ut credam fanum à Surrentinis fabricatum, ædes ab aliquo Romanorum equitum Tiberii ævo, quo omnis hæc Crateris nostri oravillis, & ædibus, quâ magnificentia, quâ pulchritudine conspicuis, ità consita erat, ut unam tum maximam, tum frequentissimam urbem credidisses. Tum Lucil: Assentior prorsus. At Vellejus: Pergamus, inquit, ad illa monumenta quæ non longè ab hinc sunt: aveo enim illa circumspicere. Eamus, tum ego: At Amicus ità nos comiter rogat: Quæso, ut hic sedeatis parumper: voluptas erit piscatores videre retia ad litus deducere. qui cum mei inquilini sint, si quem ceperint exquisitum piscem, ad nos afferent. nec erit ille non gratus, Saturni dies cum sit. Nos tum illi gratias agimus, atque in conspectu confidimus. Dum autem ille multa à nobis urbanè percontatur, retia, quæ sagenas

vocant, ad litus piscatores deduxerunt piscatu quam plurimo. delectatus sum moperè Vellejus est multitudine piscium hac, illacque per retia salientium, squamisque nitentium miro, varioque modo. quod ille nunquam antea conspexerat, meque intuens, Nunc inquit, teneo tuum illud,

*Hic piscatores soluentes retia in undas
Aspiciat, & captas properare ad litora pradas.
Cernit & inclusos resiliire indagine pisces,
Et nitido squamas argento, auroque nitere,
Atque ostro, minioque, coruscantique smaragdo.*

Interea loci dum hæc diceret, adest piscator cum ci-
stella piscibus benè plena. Erant sex mulli, tres soleæ,
totidemque scorpenæ. menæ duodecim, minutarum
verò loliginum, quas marinas ficedulas appellant, pu-
gni duo. quibus omnibus amicus nos liberaliter dona-
vit. cui cum gratias egissemus pro tanta in nos huma-
nitate, rogamus numquid domum vellet? & ille ut be-
nè valeatis. statimque ad visenda reliqua monumenta,
quæ indicaverat, duce puero, quem comitem nobis de-
derat, haud enim illum venire passi sumus, etsi sæpius
id rogaret, discessimus,

C A P U T III.

*Quorundam amicorum in Surrentinum adventus, à
quibus de fodina ad Nicatem inventa, mentio habita:
& quo aurum, argentumque modo eruatur, expositum.
Atque hinc arrepta occasione nihil admodum esse,
quod in Meridionali Italia parte, non abundè prove-
niat, demonstratum.*

IAm dies ad umbilicum dimidiatus, in alteram pro-
nus partem vergebat, cum me tum primum à me-
ridia-



ridfano fomnulo excitatum , puer adit : nunciatque phafelum quemdam ad oram applicuiffe , quo duo no-
ftrates advekti erant , meque pro poftici antri foribus
præftolari . Tum ego : Accipe clavem , i , oftiumq; ape-
ri . fed vide ne tuo illo grallatorio gradu incedas : id
enim antiquum obtines , ut tardus fis . Et ille : Natu-
ram vincam ; volabo quali avis , ne fuftuarium me-
ream . Et ego : I tandem . mox ipfe te fequar . cumque
abiiffet , ego Lucilium accerfo : qui & ipfe tum pri-
mum erat expecttus : deque hofpitum adventu cer-
tiorum facio . Et ille : Eamus illico in amicorum oc-
curfum . affumptisq; umbraculis , in hortum proce-
dimus . dum autem imus : Quinam , inquit , Lucilius hi
erunt hofpites ? Gui ego : Illos Maſſa ad delubrum ad-
vektos arbitror : eruntque Capito , & Nigidius . At
Lucil : Quid ſi Neapoli veniant ! Tum ego : Haud equi-
dem ita animum induco , id ut credam . ſiquidem pha-
ſeli , qui Neapoli redeunt , tardius appellunt . neque
quiſpiam de ſuo nos adventu admonuit . Tum Lucil :
Dies alſior ſolito eſt , Zephyruſque perſiat vehemen-
tius : quocirca poterat quis tempeſtively profectus , quam
citiffimè appellere . Cui inquam ego : Probabilia
prædicas . verum qui ſint , conjectare . Et ille : Non
dubito quin tibi familiariffimi , qui te inſperato oppri-
mere volunt . Sed jam ſecundo deſcenſu tranſmiſſo ,
ad penſilem pontem deventum erat , cum Lelium , &
Sextum Nigrum obviam habemus . quos ut vidi in am-
plexus irruens , arctiffimè complexus ſum , quos ſimul
ac toto pariter ſinu Lucil : amplexatus eſt , Divinavi , in-
quit , Parthenie . Cui ego : Tu ſēper in ſcopum collineas .
tanti eſt acri ingenio eſſe . Interea loci dum hæc di-
cerem , adest puer , qui ad ſarcinulas deferendas ſubſti-
terat , nunciatque Maſſa ad delubrum duos alios ad-
veniffe . Tum ego : Fauſtiſſimus , inquam , hic nobis
B 3 dies,



dies . erunt hi quidem Nigidius , & Capito : quibus omnes obvii statim imus , mox occurrentes totis ulnis complectimur . Illi verò cum præter opinionem Lælium , & Sextum , viderunt , ingenti gaudio affecti sunt : & Fortunatus , inquit , hic nobis dies est , qui tot amicorum conspectu , consortioque nos exhilaravit . Quibus tum ego , Eamus domum , ut calorem temperetis , siccoque indusio sudorem abstergatis . quia verò Sextus Niger præ reliquis ab æstu vexatus , quippe qui delicatissimi temperamenti , meam illi sciadem , quæ se ab Sole defenderet , in manus trado : suam verò Lucil : umbellam Lælio porrexit . Postinde cuncti modico clivum gradu conscendimus . Ut verò in calopsidem ventum est , jubeo in ea sedere tantisper , ad hauriendum spiritum , prospectumque Crateris amœnissimum contemplandum . quo Lælius , utpote novus loci hospes , mirificè delectatus est .

Cum demum ex horto in peristylum ingressi sumus , Ut elegans , inquit Lælius , ut concinnum istuc peristylum est . puteumque in medio animadvertens , Estne , inquit , ad me intuens , frigida istæ aqua ? Cui ego : Imò frigidissima . Hauriamus , inquit ille . Tum ego jubeo puerum haurire . qui dum trochlea situlam trahit , est enim puteus altissimus , inspicies Lælius totum putei orificium viridi adjanto investitum , Optima , inquit , erit , ac salubris hæc aqua . nam ubi adjantus adnascitur , optimam esse aquam tradunt . Cui ego : Imo saluberrima : Æquanis coimè jugis scatet : perque testaceos canales Surrentum , perque Surrenti pagos inducitur . est etiam vi urinam movendi prædita , atque intestina lavat miro modo , quapropter absq. medicamentis urinam cientibus , quæ *διουρητικὰ* Galenus vocat , hac ego usus una , tantum proteci , ut ex multorum annorum pettinaci viscerum obstructio-

ne liberatus penè sim. Mox ubi Lælius haustam aquam colluisset, idque reliqui fecissent, in superiorem domum conignationem conscendimus; sedimusque ad magnam deambulationis fenestram juxta hypæthæ arcum, quâ placidissimi aura ventuli perflabat. Ut verò in sediculis sessum est, ego Lælium, Sextumque rogo, si quid novarum rerum ad me Neapoli afferrent, & ut amici valerent? Tum Lælius: Amici valent planè benè: teque omnes saluere jubent: atque in primis Eulalius, qui magno me oravit opere, ut tibi suo nomine salutem plurimam dicerem. Unus tamen vel in paucis charus Cn: Bellus, hæctica derepenè febricula correptus est. Cui tum ego: Rem mihi, Læli, peracerbam narras, & si non inopinatam omninò. Jamdiu enim hoc illi malum timebam, quippe delicatissimi temperamenti. sæpe illum admonui ne se tantum literis involveret, suæque valetudinis rationem duceret. at meis ille admonitionibus nunquam paruit. Hic Læli: Quid facias? sic sumus omnes, qui in studio literarum libidinem habemus. tu ipse, qui sana aliis das crebrò consilia, secus agis, ut facta dictis consentire non videantur. neque scio an aliquis sit, qui æratem in libris magis contriverit, præter te. At ego, tum inquam, jam consenui, & robustam corporis valetudinem nactus sum. Hoc loco Sextus; De me certè quidem, Parthenie, queri nequaquam potes, tuis enim monitis semper acquievi, meque à literis, ne in morbum inciderem, diligenter continui. Cui ego: Ut bellè me preoccupasti! tu contrario laboras vitio, ut te calcariibus urgeam, opus sit. sed redeamus ad Cn: Bellum, cujus mihi lues summopere displicet; Reddiditne per os sanguinem? Et Læli: Pauxillum: & tussicula item vexatur. Cui ego: Erat ne sanguis vitiosus? Et ille: Ità aiebat Celsus noster, qui, quoniam in memoriam ser-

mo inciderat tui, ex me petiit, qua tu hic valetudine uterere, & quo in statu Autumni essent, quos dum tuas Æstates legeret, magnopere expetebat. Tum ego: Gratiam homini habeo, quem scio mei amantissimum. sed quid tu illi? Te, inquit Læli: valere, dixi basilicè, operamque omnem in Autumnis scribendis ponere, ac locare. Benè, inquam ego: sed quod tandem de Cn: Bello judicium ferebat? Tum Læli: Non bonum. erat enim excreatus sanguis niger, & crassus. ego, ut de me conjecturam facio, morbum puto gravissimum. Vellem inquam ego, ut illi tempestive consulere: nam si secus inutili consultatione, ut plerumque solent, tempus ducent, amitteremus juvenem tum ingenio, tum indole vel in paucis rarum. semper apud nos illud usu venit, dum Romæ consulitur, Sagunthus expugnatur. sed cedo tandem si quid mihi novi ex urbe apportas. Et ille: Accipe, rem gratam tibi narrabo: Ad Nicatem, qui mons, ut te certè non latet, Apennini pars est; quiq. per Alliphas longo tractu descendens in Massicum vergit, Samnitesq. à Campanis, Volscis; & Ausonibus determinat; ad Nicatem, inquam, infra Æserniam non multis ab hinc diebus argentifodina inventa est: cujus frustum illinc allatum, mihi ad te perferendum dedit Quintus Casio. mox è marsupio educit in manus dedit. Acceptum ego argentiferum lapidem attentè, accuratèque considero. Tum ad me Lucili: Estne, inquit, probatum argentum istud? Cui ego: Ita mihi videtur. quamquam, ut ex hoc conicio, non adeo dives futura fodina sit. Et ille: Vereor ne modicus admodum futurus proventus sit, nec responsurus expensis. At ego: Exiguum lucelli quamvis inde obventurum, è Republica tamen duco erui è fodina. sic enim & argento abundaret, quod quantum conducatur, vos ipsi conicite; & multorum otiosorum operæ occupa-

cuparentur. quod maximum sanè Reipublicæ cimento-
lumentum affert. si ita fieret, quanti dives auri, argen-
tique nostra hæc regio foret? quot miserorum familiæ
sublevarentur? multæ quippe. Hic Lucil: Consulto
tu quidem. verum ubinam hujusmodi aurifodinæ? Cui
inquam ego: Sunt equidem, & plurimæ apud Brutios,
quorum amnes non rarò arenam auream vectant. me-
mini me admodum puero, inventam hujuscemodi are-
nam ad Annibalis castra, & Neapolim ad Prætorem
missam, quam cum in fusorio ad ignem argentarii pro-
bassent, optimum esse aurum deprehenderunt. sunt
etiam quædam citra Silam, in cujus sinu magnas esse
fodinas verissimile est. Nec Garganum vacare auro,
atque argento, nec Apenninum arbitror. Tum ille:
si ita est, ut dicis, cur tantas opes negligimus? Quia,
inquam, ubertas, & feracitas soli nos desides, ac supinos
facit. si minus terra omnis generis frugum, si minus
fructuum daret, tum indigentia industrii, quæ in pe-
nitis latent, perquireremus, inque abditum terræ si-
num pertrumperemus. Tum ille: Vera narras: expe-
rimento enim comprobatum est, eos laboris patientes
magis esse, quos magis pauperies premit. Hoc me lo-
co Sextus interpellat: Verumne quod ajunt, una cum
auro, & argento reliqua etiam metalla procreari? Cui
ego: Ita enim verò. quemadmodum enim una cum
sanguine, humores cæteri, ita cum auro reliqua metal-
la progignuntur. sive quod illa imperfecta naturæ ad
optimum tendentis, opera sint, sive quod ex minus apris
terræ humoribus distincta ab auro corpora concre-
scant. Sed age, tum ille, quando hac in resumus, dic
sodes (nam qui ista melius?) quo pacto à reliquis au-
rum separatur? Cui ego Saturni ope, atque opera,
plumbi nimirum ministerio. scis enim hoc cognomen-
to plumbum à physicis auncupari, quod illi astro ob
simi-

similitudinem subesse feratur. separatur autem tum aurum, tum argentum hoc modo aliquantur confusa illa, atque indiscreta metalla unà cum plumbo. hoc autem cætera consumit, ac devorat: atque hoc modo defæctum aurum, argentumque restant. Hic Lucil: Anne hinc, inquit, voracem filiorum Saturnum perhibent, quod reliqua plumbum metalla devoret? Rem ipsam putasti, inquam, Lucili. miror oppidò ingenium tuum. excole, quæso, illud, atque exerceto: magnus nimirum vir fies. Et ille: Habeo tibi gratiam, quod ità de me sentias. faciam quatenus imbecillæ mihi vires dabunt. At Sextus: Sed omissis officiis istis redeamus ad fodinas. Cui tum Lucil: Ut video, Sexte, te auri recordario delectat, detergitque fastidia illa tua. cave illud adames. id enim nec sapientem, nec religiosum virum decet. Et ille: Non auro ditescere, Lucili, mihi cordi est, scis enim me totum reliquisse, verum erudiri: tenesque illud profectò, cum & sapientiorum, & religiosiorum esse, qui eruditior idem est. Tum Lucil: Credo equidem: verum ego jocari volebam: decebant nimirum inter seria festivi sales, & conditus festivitate sermo gratior auditoribus fit. Et ille: Tuum ingenium probè noram, Lucili; bellus tu quidem homo, & ad gratias, & lepores natus. At Lælius: Verum facta jam iusta jocis intercapedine, redeamus ad seria, ac docta, quæ ego præ jocis, & festivitatibus fægo. Non putabam, Parthenie, tantas in nostro regno divitias procreari. unam Peruviam auro divitem arbitrabar. Cui ego: Tanta terræ hujus felicitas, ut nihil amplius accedere possit. nempe nihil eorum deest, quæ vel ad usum, vel commodum incolarum desiderantur: quæque singula, singulæ regiones gignunt, una hæc cuncta producit: quo fit ut plurima aliis suppeditet, ipsa indigeat fermè nihil. nisi fortasse paucis quibusdam, quæ
ad

ad luxum potius, & morum corruptelam deferviunt. quæ expediret quidem certè si non accerferentur. ità enim fieret, ut non tantum mollescerent animi, nec tanta pecuniæ vis hinc aliò distraheretur. Tum Lælius: Prudenter, tu quidem, & ut *νομοθέτης* decet. sed enumeremus jam, si lubet, quæ tellus hæc nostra ex se procreat. Cui ego: Facerem nisi vererer ne aliis crearem fastidium. Tum cuncti uno ore, Imò rogamus, ut lubeat. quid enim jucundius nostris auribus esse potest, quam terræ, in qua nati, educatique sumus feracitatem audire. neque hi enim sumus, humili qui genio, ac seruii, aliena magis amant, quam propria, ut mirum quantum domesticarum rerum insolens eos fastidium teneat. Tum ego: Gaudeo, quod tam generosa à natura dotati estis indole. morè igitur vestro geram ingenio. cui ut obsecundem par est. accipite igitur, rem numeris omnem complectar meo more: Metalla (ut ab his initium faciamus, à quibus occasio data est) ut modò dicebam, non desunt plurima, & magno futura emolumento, si modo adesset, quæ una desideratur, industria. æs, ferrum, viuumque argentum affatim suppetunt. stamni item, & plumbi non contemnenda vis est. quæ vero mineralia novi dicunt, (quod quidem acceptum usu vocabulum latinitate donatum est) tanta copia proveniunt, ut major desiderari non possit. sulphur, nitrum, bitumen, è quibus alumen, summa quidem industria educitur, abundè Phlegra, & Vesuvius evomunt: aliisque in locis plurimum nascitur. specularem lapidem Brutiorum feracissima tellus magna copia subministrat, ut & reliqua huiusmodi. Pix in Sila abundè coquitur, in qua & Græca cera. Manna item, quæ etiam in Gargano optima colligitur. Mel, & cera nullibi non obvia: Tarentinum optimum. neque deest calaminum, quod in

in Brutiis provenit, et si inferioris notæ, quam sit Indicum. apud hos montanum sal scinditur: commune verò apud Apuliæ litora coquitur, & concrefcit. Bombicum tanta nutritio, atque cultura est, ut jam non solum principes, sed infimæ etiam plebis lanii, factores, coqui olofericis vestibus induantur. Gossypium abundè, præsertim in Brutiis, in Vestinis crocus legitur: inque omnem Italiam distrahitur. Sed ut ab his proximè ad fruges transeamus, tanta in Apulia, quam Dauniam vocant, tanta in nostra Campania, tanta in Brutiis circa Crotonem, ac Metapontum, reliquisque in regionibus etiam montanis tritici omnis generis copia, atque etiam Indici, & leguminum cæterorum: tanta oryza in Picentinis, & Magna Græcia, colligitur, ut non solum alienis non indigeat, sed sufficiat etiam quammultis. Vini, & quidem omnis generis tantum procreat, ut compluribus Italiæ populis suppeditet. Hic Lucil: Sed illud vel nimis validum, ac fumosum, ut Vesuvianum, Herculæanum, Terinzium, Apulum: vel nimis asperum, ut Atellanum, Surrentinum. Fateor, tum ego: Verum nonne Stabienfe, & quod in proximis collibus exprimitur delicatum? nonne verum Nolanum? nonne Paufilypæum optimum, ac sanum? imo subasperum illud si mari devehatur, asperitatem illam exuit, ac fit delicatum, ut etiam vinum Circæo immutari poculo credas. Tum ille: Mira narras, & mihi nova omnino. Sed qua id causa contingat scire avco abste. quocirca exprome quod sentis; quod & Sexto gratum erit. Hic Nigidius, qui diu tacuerat, Imo, inquit, & Capitoni isto. Tum Capito: Quid, inquit, tu Sexte? vide quorsum dicta istorum spectent. Et ille festivus dies est, quis illos jocari veter? per me liceat quantum volunt. Neque ego, tum Capito, adeo severus, ut id veterem, quod tu concedendum

Idum putas. atque me mox intuens, Tu verò si Stabien-
 se illud in promptu habes, jube, quæso, huc puerum
 afferre: cupio periculum facere si verum dicas. atqui
 id ipsum, ut ex vultu conicio, Sextus tuus desiderat.
 Ita verò, inquit Sextus: age, jam prome. heus puer,
 accipe, quod tibi mandat dominus. Tum ego: I, Fa-
 biole: nivim compara: & duo illa vascula, Stabien-
 sis unum, alterum aquæ nivato. fac cito: curatoq. ut sint
 gelidissima. Et ille: Illicò factum, curatumque da-
 bo. Ut puer ad mandata facessenda concessit, tum
 inquit Sextus, Quis te istiusmodi vino donavit? nun-
 nam liberalissimus homo Cajus Nardus? Cui ego: Di-
 vinaſti, Sexte. non multis ab hinc diebus novem mi-
 hi phyalas, quarum singulæ quatuor heminas capie-
 bant, transmiſit. illas ego in vinaria cella aſſervo pro
 amicis: nam me ſcis eſſe abſtemium. Hic Lucil: Sed
 redeamus in viam, à qua nos vinum abduxerat: & quod
 ſcire avebam, expromito. Tum ego: Difficile oppi-
 do eſt huiusce rei cauſſam reddere. quorundam enim
 effectuum, quò mirabiles illi magis ſunt, eò abditæ
 magis latent cauſſæ. crediderim tamen, & motu illo
 navis, & marino aëre nimiam illam acritudinem do-
 mari: itaque dulcedinem induere, ac fieri gratius. ni-
 ſi huiusmodi vino illud evenire putandum ſit, quod
 Perſcis tum nucibus, tum pomis, quæ & præcoquas
 vocamus, accidiſſe memoriæ datum eſt: quæ cum in-
 nativo ſolo noxii humoris eſſent, in noſtrum translata
 vitium omne decoxerunt. atque hinc illud Martialis,

Vilia maternis fueramus præcoqua ramis,

Nunc in adoptivis Perſica chara ſumus.

Hic Lucil: Probabile quidem iſtuc, ſed pergamus
 porrò. Tum ego: Gregum, & armentorum viſtan-
 ta, ut ſi Campaniam, ſi Samnium, ſi Veſtinos, Fren-
 nos; Pelignos, Apuliamque utramque luſtres, ſi ma-
 gnam

gnam mox Græciam, atque in hac Silam, quæ Arcadia Italiæ est, tanta pecudum omnis generis multitudo passim occurrit, ut incredibile dictu sit. Hinc casei tanta copia, & tam varia conficitur, ut majorem non desideres. Hoc loco Lucilius sic me interpellat: Sed non habemus adeo probatum, ut Parmensis: Cui Ego: Imò probatissimum. nonne bubalus, qui ad Calabriæ Appenninum juxta quem Sibaris fontes sunt, Parmense longè melior? hic tanti æstimatur, ut quotannis ad Regem mittatur. non item optimus Martius tum Lucanus, tum Apulus? nonne exquisitissimus Campanus, qui Octobri, cum primæ incipiunt tempestates; unde & nomen sortitur, conficitur? Quin imo, ut non longè exempla petam, hic Massæ ad delubrum, caseus quidam coagulatur, quo nihil delicatius. Hic Nigidius, & Capito, ita res est, inquiunt, ut Parthenius dicit: & nos ipsi testes sumus. qui sæpe palato, penes quem summa hac in quæstione authoritas, periculum fecimus. At Lucil: Verum si ita res se habet, cur tantum Parmensis laudatur? Quia, inquam Ego, ita sumus, ut domestica minus placeant. Et ille: Assentior tandem. quam multa nobis gratiora forent, si longè, & magno pretio compararentur, quæ quia domi nascuntur vilia censentur. Vix hæc cum puer nivata attulit cum pateris filicatis. quem ut vidit Sextus, Porrige, inquit, puer pоторium, & infunde. Cui ego: Mane tantisper: accipiam pauca quædam bellaria, ne vinum noceat. Et ille: Dulcia bilem generant; habesne tantillum illius casei? Tum ego: Lubrensis minimè, sed Calabri illius laudatissimi, quem mihi altero ab hoc die Piso dono misit, homo, ut scis mihi devotissimus. Et ille: Profer, amabo, mi Parthenie. quem statim ego è penu unà cum pane educo: singulisque frustum porrigo. vix in os buccam intulerunt,

cum

cum omnes pari suffragio probatissimum conclamarunt. mox ad vitra sermonem transduximus. Heus infunde, puer, Sextus, inquit, Nardoque propinans hilariter exhaustit. Capito Pisoni propinavit, Lælius mihi: Lælius vero Lucilius invitavit. Ut biberunt, calidis labris vinum perquam optimum pronunciarunt. qua celebrata festivitate, ad alia digressi sumus.

C A P U T IV.

Cum in Surrentino versaretur Cardinalis, Capreis profecti, cuncta Tiberii Caesaris monumenta, quæ adhuc extant, circum lustravimus, deque specu, quam Tiberii appellant.

Versabatur mecum una in Surrentino Cardinalis præsul, qui ut quotannis solitaverat intercapedine aliqua à negotiis facta, brevi vacatione, geniali in agro, ac salubri perfruebatur. cum verò quodam die à meridiano somnulo Suetonii Tranquillii XII. Cæsarum vitas eleganti stylo scriptas legeremus; inque Tiberii tandem obitum, quo exoriri paululum Roma visa est, pervenissemus, ita ad me Cardinalis: Nuper me Caprearum antistes inviscendi gratia convenit. quem cum rogarem quid ad me novi è Capreis afferret? Tum ille: Id, quod gratissimum scio futurum tibi, quippe viro veterum monumentorum studiosissimo. Et ego: Numnam aliquot Cæsarum numismata, & Tiberii in primis? Ille verò: Majus quoddam, & recentissimè inventum. Cedo, inquam tum ipse, quid istuc tandem sit. Et ille: In montis verticè, qui ad Orientem est, ubi Tiberius magnificas illas moles excitavit, statua quædam reperta est penè integra, inque Pario marmore insculpta; cubiculum vero in quo inventa,

humo

humo effossa, qua totum erat oppletum, texellatum, e minutis, niveisque lapillis quadratis visitur. Hic ego Antistitem rogo: Suntne vestigia aliqua Ædium Tiberianarum? Et ille: Plurima, quæ nec Senatus consulto, nec tot millibus operarum, nec ipso tempore, quod rerum omnium voracissimum est, dirui potuerunt. quæ cum sic habeant mihi Capreas proficisci in animo est, & cuncta illa antiqua Tiberii monumenta perlustrare. Qui tibi labor non erit inutilis: poterunt enim illa Autumnos tuos locupletare. Cui tum ego: Jamdiu id mihi in votis erat; quocirca res cadit ex animi sententia. vereor tamen ne pluviz, quæ tota hac æstate ceciderunt, profectiorem inturbent. At ille: Spero rem votis cessuram, mihiq; negotium dat phaselos conducendi: jubetque præsto esse antequam albicaferet: ne incommodum esset à Sole, si tardiuscule solveremus. Ego nihil cunctatus Navarchum accerso, jubeoque benè manè ad scopulum cum expeditissimis phaselis se sistere, ut in Capreas cursum teneremus. quo verò ante diluculum expergisceremur, tempestivè cœnavimus, & quidem cænula tam brevi, quam eleganti: quæ vermiculis cerealibus delicatissimis, bovis medulla elixis, jecusculo vitulæ, non sumine, sed oleo purgatissimo, novo Ligurum more friso, vervece pinguisimo, ac jurento, acetarioque ex lactuca sessili confecta est. pro secundis mensis cydonea conditura, & laurocerasum imbutum saccharo; quæ bellaria stomachum fovent miro modo. mox precario sermo, & Virginearum laudum syl-labo recitato, cubitum concessimus.

Post brevem somnum tempestivè excitatus ad hypæthram me confero, ut è stellis quota noctis hora esset, colligerem. cum verò supra Lactariam emeruisse Luciferum deprehenderem, vestibus induor: audioque

Car-

Cardinalem jam expectatum, uti somni perquam modici, cui cum prosperum diem impertivissem, moneo eundi jam tempus esse. Et ille: Quota hora est? inquit. Cui ego: Tertia à media nocte. Ille verò: Octava scilicet nostro more ab Occasu supputata. Ego tum, ipsissima. Stantne, tum ille, in promptu phaseli? Et ego: Sic arbitror. quod ut certiùs teneamus, famulum visum mittam, interea dum famulus redit, nos horarias preces decantamus. quibus absolutis, nunciatum est phaselos esse expeditissimos. quapropter nulla moras interposita, in scopulum proficiscimur, una cum Q. Marcio, Cn. Galerio, & C. Marcello, quos secum Cardinalis in Surrentinum deduxerat. Sed jam in phaselum recepti, tam procul à litore navigare cepimus; ut & Surrentini collis prospectu delectaremur, & hospites illi litoris amœnitatem, & plurima sparsim antra, & sinus prospicerent. Ut ad promontorium venimus, statim Cardinalis, quæ villa Pollii Felicis, quod Neptuni sanum, quique circus fuisset, compendio docet: & stagna in rupe conclusa digito commostrans, Hic, inquit, Naumachia in solemnibus Neptuno sacris à Pollio habebatur: inque me intuens, Attulisti'n?, inquit Papinium? Cui ego: Est ad manus. non enim eram nescius, fore ut hic loci legeretur. Et ille: lege igitur. audient hi nostri peramantes hospites auribus lubentissimis. Tum ego Statii carmen de villa Pollii lim-pida voce perlego. quo lecto, ad eum locum devenitum est, ubi Herculis sanum extitisse memoriæ traditum est. de quo postquam ad hospites Cardinalis disseruit; lege, inquit, ejusdem authoris Herculem Surrentinum. Ego tum carmen perlegere aggressus sum. Vix dum legeram, cum universo Pollii sinu transmissis, ad Lubrensis promontorii flexum devenimus. hic alterius theatri prospectu, seroque oleatum viridissimo recrea-

ci ad nostri collegii villam properamus. quæ ad mare modico in clivo, longa pergula, duricoria, & Apiana uva undique conuestita, quam maxime conspicua confurgit. Hoc loco me Marcellus interrogat, cujus esset villa, quæ cæteris elegantior videbatur? Nostra, inquam ego. (erat enim Marcellus ex nostro ordine orator vendibilis) at olim ab Romano aliquo equite excultam fuisse ipsum vocabulum argumento est. illam enim corrupto vulgi more cognomine *Pipianum* vocant, an verò *Livianum*, an *Poppæanum* dicendum, definiti non ausim. Quin imò hic loci plurimæ villæ sunt, imò & pagi, quibus istiusmodi Romanorum detorta vocabula insunt. Arque hæc cum dicerem, *Menarchus* rogat, vellemne ut rectà in *Capreas* proram flecteret, an oram legeret usque ad *Athenæum*? Tum *Cardinalis*: Placet, inquit, peramœnam, & opacam oram circumlustrare. Ille igitur, ut iussus fuit, cæpit oram radere, nos verò viridissima scena delectari. Cum verò ad quandam aquulam, quæ ex edito, ac prominenti saxo rectà in mare defluens quasi appensa, unde & vulgo nomen factum est, videbatur, venimus. Hic, me respiciens, inquit *Cardinalis*, rudera sunt antiquæ molis: meministi? Cui ego: Commemini. quæ mox ut propius successimus, oculis complexi sumus. Dum autem illa hospitibus commostrar, Non est, inquit, hisce in locis, situs aliquis vel opportunitate commodus, vel amœnitate amœnus vel prospectu pulcher, in quo substructiones non videntur veterum ædificiorum. Nempe sapiebant Romani, quorum ævo, & *Tiberii* vel maxime, universus istic Crater ædificiis passim confusus videbatur. Quia verò celeri cursu phaselus excurrerat, jam prope *Athenæum* ventum est. Ut primum tenuimus. Summo isto in vertice, inquit *Cardinalis*, *Minervæ* delubrum fuit, à *Tyrrhenis*,
ut at-

ut arbitror conditum. Aain' ? Cui ego; Ajo, enim vero. Atque hinc Staius, qui adhuc in manibus est.

Prima salutavit Capreas, & margine dextro

Sparsit Tyrrhena Marcotica vina Minerva.

Cum enim hiè Græcia in Italiam navigarunt, in has primum sedes allapſi, fanum hoc Palladi consecrarunt: atque hinc Grajam etiam Minervam poëtae nuncuparunt. Tum ille: Eruditè tu quidem: ad hospites verò: Adhuc Fani pavementum è cœcellis pellucidis compactum, visitur, juxta turrin illam speculatoriam, quam videris in edito illo colle; columnæ marmoreæ, in quarum capitellis insculptæ nocturnæ, spectantur in templo etiam in colle, qui Sireusas spectat, ædificato: meque intuens, Meministi', inquit, quanto conatu, & labore conſiſi ex duro illo, ac difficili scopulo in supremum verticem evaſimus? Cui ego: Memini quidem certè, verum quanto majore mox rediimus? me sæpe in præceps ruiturum credidi, cum in nudos, proclives, que lapides offenderem. Quia verò jam die multum erat, æſtusque incœperat efferverescere, recta Capreas contendimus. quoniamque secundo flatu Euris spirabat, vela dedimus: inque Capreas brevissimo cursu delati sumus. Antea verò quam in terram pedem inferremus. Placet, inquit Cardinalis, priusquam in oppidum ascendamus Tiberii specum, quam miram oppidò, visuque dignam accepi curiosè, attentèque circumspicere. Cui ego: Id sane percommodum; nam tranquillum admodum mare est, & latus illud inumbra- tum. si verò pomeridiano tempore Zephyrus afflaverit vehementior, neutiquam introire poterimus: adeò humilis est aditus. imò neque hoc ipso phaselo licebit; quocirca accersamus piscatorem illum, qui suas nos horia in speluncam invehat. Rectè excogitasti, tum ille. piscatore igitur accersito, in specum, qui ad

AUTUMN. SURRENTINORUM.

meridionale insulæ latus est, ire perreximus. Inquem simul ac venimus, illicò in horiam insilivimus, atque speluncam subintramus. hinc tantisper juxta ostium immorati, quo externà ab oculis depulsa luce, opacitati assuesceremus: & sic cuncta clariùs videremus. mox ut subalbidum fieri antrum cepit, illud lento admodum remo totum perlustramus. Est in montis sinu dura è silice rupes: quæ angusto, humilique aditu patet: ex quo in vastum hac, illac sinum se circinat. qui nisi interdum prominentibus hic saxis, curvantibus illic se sinubus, variaretur exacti præse circuli speciem ferret. in fornicem assurgit testudineum verius, quam arcuatum, qui scabra silice dentatus, laciniatusque est; saxorumque striis distinctus. aqua per ostium infusa, omnem latè specum alluit. rupes perpetuis stillis scattet. quæ sensim lapidescentes vario veluti textu fornicem pingunt, atque colorant. qui quasi Attalico factus opere ipso in aditu manifestius conspicitur. imo percussa è mari lux non unam, & versicolore iridem appingit. Postquam igitur omnem antri circuitum perlustravimus, magno delectari opere sumus quâ vario mirabilique situ, quâ horrore, structuque loci, quâ magnitudine: mirati & naturæ artificium sumus callidissimum, & mirum oppidò; quo tam pulchram, mirandamque specum elaboravit. tandem egressi, inque phaselum recepri, in Oppidi oram contendimus. Inter redeundum ità me Cardinalis interpellat: Tiberiine conatu, an Naturæ magisterio excavatum fuisse antrum arbitraris? Cui tum ego: Naturæ, inquam, cui facillimum factu erat. arte verò fieri poterat nullo modo. quo enim scalpro, imò quantis ferramentis, tam vasta, tam profunda specus scindi potuisset. atque incurvari? si fixile saxum fortasse concederem. at durissima cum sit cautes, quâ rigidiorẽ Marpesiam non puto,

puto, nego enim verò. præterea cum profunda sit aqua, manifestò colligitur hominum opera, ac labore cavari minimè potuisse. Tum ille: Probabilia, quæ dicis. sed factam à Tiberio speluncam dissipatissima apud hos incolæ fama est. idque à majoribus accepisse, modò piscator ille narrabat. Præterea mira quidem illa, quæ à Romanis, quorum ea fuit potentia, ut majorem universus terrarum orbis nunquā viderit, nec visurū deinceps puto, tērata sunt. Ego verò: Dictam à Tiberio speluncā existimo, quod in eam ille ventitare solitus, cumq. suis licentiùs agere; & summo in æstu lavari. atque hinc ab eodem elaboratam error dimanavit: quod in re simili cadit non semel. Atque hæc ubi dicta sunt, in oram, in quam jam ventum erat, descendimus. Mox reliqui cum Cardinale sellis gestatoriis, quibus uti eo loci mos est, in oppidum, quod in superiore colle situm est, deferuntur. ego per compendariam, atque opacam semitam mihi benè notam, pedes in altum conniti cēpi. idque ut ea corporis defatigatione sudorem elicerem: quod maximè salutare expertus sum. in oppido ad Carthusianorum cœnobiū divertimus. qui eo, quo par erat, obsequio Cardinalem exceperunt, tractaruntque perquam munificè. Hic postquam confessum est, cœnobii præsidem percontatus Cardinalis est, si quid scitu dignum de Tiberianis monumentis haberet: Ille eadem prorsus narravit, quæ Cardinali Præsul attulerat. Qui, hæc cum dicerentur, interfuit: exceptusque comitèr, ac benevolè à Cardinali, atque ad prandium invitatus. Quoniamque ad umbilicum jam dies venerat, sacris peractis, ad mensam accubuimus. Inter epulas memorabat Præsul, inter rudera illa Tiberianarum ædium ingentes thesauros repertos esse, quos Tiberii familiares infodisse arbitratur. quod cum nobis minimè videretur probabile, ille, uti id pervin-

ceter, ajebat ita senes illius oppidi commemorare, ab aliis senibus auditum. Cui tum Cardinalis: Atqui inanes hæ vulgi opiniones sunt, qui, ut ait Cicero, Ex veritate pauca, opinione multa extimat, quod unus verisimili aliqua specie commentus est, statim ratum, firmumque habet. imò sic illius ingenium est, ut ubicumque vetera rudera sunt, ibi thesauros recondi arbitretur. Tum Præsul; Non repugno, inquit: tamen pleraque vera esse, verisimile porrò. Ut autem quod de hisce ruderibus fertur, verum credam, ex eo inducot, quod non multis ab hinc mensibus, quidam, quos Necromantes vocant, in hanc insulam appulerunt: abductoque clam uno ex incolis, quem magna spe, & promissis oneraverant, in verticem montis perrexerunt: ibique thesaurum reperisse, rumor dimanavit. atque hac occasione reperta est statua illa marmorea, de qua aliàs ad te retuli. Hic Cardinalis: Ibimus, inquit; & monumenta illa, quæ vera sunt antiqui ævi divitiæ, perlustrabimus: thesauros habeant, quibus est amor. Hinc jubet gestatorias sellas cum phalangariis præsto esse, ut postquam meridiatum, precesque dæctæ, in altum montis fastigium ascenderet. statimque ad dissiendum brevi somnulo diem profecti sumus.

Sed jam non longo è somno excitati, vesperarum statim precibus recitatis, quoniam Zephyro, qui multos antea dies spirare intermiserat, vehementius perflante, alior dies erat, & iter benè longum, in montem illiusmodi sellis deferimur. Et sanè tanta pernecitate per salebras illas, saxososque calles, eosdemque angustos, atque impeditos illiusmodi homines percurrabant, ut mirum oppidò videretur. & quamvis interdum sellæ, ut interposita saxa evaderent, altè summo labore attollendæ forent, totique ipsi largissimo sudore defluerent, ab incepto tamen cursu neutiquam desiste-

ſiſtebant. etſi ob nimiam defatigationem ad quingentos quoſque paſſus phalangarios permutare opus eſſet. Tandem duobus exactis admodum horis, in ſuperiorem verticem evaſimus, ubi præcipuè Tiberii Caſaris ædes inſtructæ exiterunt. Commemorant enim quædam alia ad litus ædificia fuiſſe, quod ad Septentriones ſpectat: quorum perpauciſſima id temporis veſtigia extant. Ut verò clarùs, quæ deſcribenda, teneantur, paulò altius exordiar. Capræ inſulæ ſunt Tyrrheni maris, inque ipſo Campani Crateris veſtibulo ad ſpeciem à Natura poſitæ. Major, quæ & præcipua, forma eſt oblonga, & novem millia paſſuum patet circuitu univerſo. reliquæ ſcopuli veriùs, quam inſulæ. major igitur, quæ una nunc nomen obtinet, in geminos montes aſſurgit, altior ad occidentem eſt, qui ſtatim demittitur clivo aſpero, & difficili: in ſupremo planities jugo eſt, fertilis, atque exulta. humilior ad Orientem attollitur, clivo mitior, & quâ oleis, quâ fructiferis arboribus latè inveſtitus. Supremo in culmine planities eſt, etſi non æqua omninò, ambituque à ſerminè paſſus complectitur. hanc verò univerſam Tiberii domum occupari antiquæ pilarum ſubſtructiones argumento ſunt. Ex illo quaquà verſus pulcherrimos proſpectus eſt. Ipſo enim in conſpectu ad orientem Minervæ colles, quâ villis, quâ ſylvis diſtincti, atque interdicti, ipſumque Deæ delubrum conſpiciebantur: altior verò Læſtarius, cum vicinis montibus, qui etiam Æquana joga veteribus dicta, ſupereminet: lævâ Crateris penè univerſi ambitus, & ipſe, qui Campaniam cingit, Apenninus; dextrâ Tyrrhenum mare, Sirenuſæ, Amalphis ora, & quidquid ultra Pæſtanium ſinum Leucoſiam uſque exurit, conſpicuum eſt. Imo ſerunt, cum ſerenum cælum eſt, atque immunis à vaporibus Finiens circulus, Palænurnum uſque

oculorum aciem excurrere . haud sane scio an pulchrior, amœniorue alter eligi situs potuisset. Hoc igitur in plano ædes erant Tiberianæ, quarum rudera lustrare cepimus . In aditu gemina columnarum fragmenta Numidico è marmore extant: à quibus antiquæ fabricæ cerni incipiunt, quoad præcipuas veniatur . Hic vastissimi, immensique fornices in ipso penè montis sinu extructi, pilæque grandissimæ, quæ & impositos fornices, & rotum palatii pavementum sustentabant. in medio cisterna vastissima, quæ adhuc integra, aquam, quæ è superioribus diffluit, sinu colligit, ac servat . Est & usui cuidam solitario, qui hic ad ædiculam degit, stipe à paganis corrogata, & horti herbulis, quem ipse sibi excolit: atque beatus parvo à curis, & tumultu liber, quam felicissimè vivit . ad lævam cisternæ longa itinera, quorum fornices lateritii . è dextrà verò lævaque itinerum cellæ ejusdem structuræ . his servos, & jumenta habitasse rectè Cardinalis opinabatur . Ex hisce itineribus longi canales subter visebantur, per quos aqua in hortos, & ad domestica ministeria immittebatur . circa ædiculam quædam cubicula tessellata, in quorum uno statua inerat marmorea. quam cum attentè, curiosèque Cardinalis contemplatus esset : Hæc certò inquit, Livix imago est; ut ex illius numismate conjecturam facio . Cui ego : Attentior : verisimile oppidò . His perlustratis, in montis crepidinem, quæ rectà mari imminet, progressi . æquum hic planum animadvertimus, & circa murorum vestigia: quoniamque pilarum etiam vestigia visebantur, non improbabili conjectura existimavimus ibi marmoreum olim Xystum, quod æmbulacrum latinè dicimus, extitisse. ex quo amœnissimo illo prospectu Tiberius perfruebatur : atque horis pomeridianis egelidas Zephyri, salubresque autas, qui fere nunquam editissimo illo in colle,

le, apertoque filet, liberrimè capiebat. hic morati tantisper, capti amœnitate loci, prospectuq. illo mirabili. tandem non facilè divulsi, in speculam venimus. In edito ad dexteram jugo, qui quâ Auster spirat; lenè confurgit, ingens visitur fâbrica, quam speculam fuisse, & forma, & situs manifestò arguunt: itaque incolæ commemorant. Ex illo euntes Puteolis, ac redeuntes Alexandria classes, & quotquot Tyrrheno commebant naves, quam longissimè circumspectabat. Tandem posteaquam varia hac, illac rudera illiusmodi vidissemus, quoniamque dies inclinabatur, sellis iterum accepti, in litus descendimus: atque hinc phaselos ingressi, quam citissimo cursu velis, remisque properato, in Surrentinum serò pervenimus.

C A P U T V.

Dum per Xystum deambulatur, Lusitana navis ad ultimum Africa promontorium fuscè naufragium enarratur.

A Meridie, ubi vesperarum preces, sertumque precarium defluerunt, ego meo more ad mensulam sedens eruditis me libris involvo: & jam exacta clepsydra erat, cùm me Balbus, ac Sextus è somnulo excitati aggrediuntur: utque in Muszum pedem intulerunt, Dii immortales! inquit Sextus: tantane tibi discendi libido est, ut ne somnulo quidem, quod omnes factitant, & natura reapse postulat, indulgeas? non tenes id jugulum petere valetudinis? Tum Balbus: Rectè, ut alias, monet Sextus. divelle te, quæso, è mensula ista, quæ hoc tibi tempore nocentior peste est. sine, ut primi erumpentes è stomacho vapores dissipentur, utque prima cibi concoctio absolvatur, quo tandem co-

cto

At, vegetior factus erudito labori par esse possis. si secus faxis, tibi funebri spalmodia quamprimum parentabimus. cum verò suprema tibi solventur, quam paucissimi admodum erunt, mihi crede, qui tibi chari lacrymulas aliquot fundent, quibus suum erga te amorem testentur. ceterorum verò quidam fortasse mœrore afficientur, quidam, quibus simplex, candidumq. ingenium, egregium amisisse virum Societatem nostram dicent. alii, quibus durior indoles, te ribimet fatum conscivisse dicent. ceterum persolutis more majorum officiis, nemo unus erit, qui de te amplius cogitabit, nisi fortasse, qui tuos libellos evolvens, tuum ingenium, tuorumque in illis morum effigiem contemplantur. imò si literarum erit tum interstitio, te humato, læti omnes, atque hilares in villam ad relaxandum animum statim concedent. Tum ego: Vera prædicas. neque ista me latent. Et ille: Verum si ita, tui rationem ducito, & paulò majorem valetudinis curam habeto. Faciam, inquam tum ego. Sed nolo puteris me omnem valetudinis curam deposuisse. soleo quippe somnulo, & quidem brevissimo diem diffindere. à quo preces decanto, quo mox sacro perfunctus munere, ne otio tabescam, inque noxias incidam cogitationes (nunquam enim mens hominis vacare potest) eruditum libellum evolvo, quo intentus studio animus aliò liber non evagatur. Tum Balbus: Morem istum tuum laudo. verum servandus est modus: qui si desit nihil rectè omnino, tenes quippe illud;

Est modus in rebus, sunt certi denique fines,

Quos ultra, citraque nequit consistere rectum

Surge igitur, inque hoc deambulacro tantisper corpus motemus. Tum ego statim assurgo, & Deambulemus, inquam. Ubi ceptum deambulari, ita me Sextus rogat: qui in omnes discendi occasiones semper imminebat:

Cc-

Cedo, quid amœni, curiosique perlegisti? Cui ego: Imo lacrymabilè, inquam, & quam maximè miseram tragœdiam. Et ille: Numnam Euripidem, vel Senecam præmanibus habuisti? Miuiimè, tum ego; verùm authorem recentissimum. Ille verò: Sed quænam illa, quam in novo isto authore perlegisti, tragœdia? exprome, quæso. summo illam avemus opere abs te audire. Cui ego. Lusitanæ navis ex India in Europam redeuntis ad ultimas Africæ oras tam miserum, quàm quod miserrimum, naufragium. Tum ille: Repetas, quæsumus, (ut pro Balbo etiam spondeam) erit nobis gratissimum: en tibi aures attentissimas accomodamus. Dicam, tum ego; verùm ἐν ἐπιτροπῇ, ut Græci dicunt: ut verò Plautino utar verbo, tribus bolis. Tum Balbus: Imò pluribus, & distinctè: & ut dicitur, ab ovo usque ad mala. volumus enim ne quid prætermittas. Tum ipse: Sed res est benè longa: & vereor ne gravis futura sit vestris auribus tam proluxa narratio. Et ille: Minimè verò: imò jucundissima, age igitur, ordire telam: nos te animo, atque auribus dicentem sequemur. Quibus tum ego: Atqui audite: dabo operam, ut illam quàm potero distinctè, ac de verbo ad verbum referam.

V Kal. Februarii anni MDCLXXXVI solveratè Gao-
no portu Lusitana navis ex illarum genere, quas Gaul-
lós vocant. in qua præter innumerum diversarum na-
tionum populum, Siameses legati abs suo ad Lusita-
num regem missi, devehebantur: nimirum ut veterem
amicitiam, & inter utramque gentem commercia co-
vo sèdere renovarent. Et jam toto illo, quod inter
Indiam, atque Africam interjacet, Oceani superato,
ad extremæ Africæ promontoriû, cui ab acubus novi no-
men fecerunt (Acillæum mihi novis terris nova nomina
imponenti liceat nuncupare) pervenerat. Qui in specu-
lis

lis malorū nauæ primi terras deprehenderunt, arbitra-
ti montes, qui in conspectu erant, eos ipsos esse, qui al-
terum Africę promōtorium ad Occidentem incurvant.
atque ob id *ισπείριον κέρας* à veteribus appella-
tum nonnulli opinantur. mihi in Nauticis, ut certò
nostris, Acronotos est. Tenemus, tum illi: imò Bal-
bus versículos etiam recitavit hoc modo:

Ergo pererrato venies cum denique ponto

Acronoton, tu magna alacrè ad certamina pubem

Instrue: luctandum vento, & cum fluctibus aëris.

Cui ego: Laudo memoriam tuam singularem. Sed per-
gamus porrò; haud enim innectere moras licet, cū
iter est benè longum. Ad istud igitur promontorium
ventum esse nauæ vigiles conclamarunt. Dux navis,
& gubernator, quorum intererat accepta ab explora-
toribus diligenter examinare, nulla inquisitione adhi-
bita, in re tanti momenti quammaximè necessaria,
illicò ad illud ipsum se promontorium pervenisse te-
merè crediderunt. Quocirca, ut navigationis ratio
postulabat, à Meridie in Septentrionem iter, de flexo
statim clavo, dixerunt. & quasi pericula omnia se-
curi evasissent, quæ plurima in extremis illis Africæ
oris esse solent, nulla cautione, nulla diligentia, neque
amplius in specula excubantibus de more nautis, su-
pini navigabant. quoniamque sereno cœlo, lucente
luna, secundus è puppi ventus perflabat, quàm celer-
rimè in terras, atque in naufragium properabant.
Hic Sextus: Magnum oppidò piaculum: nempe secun-
do quamvis cursu, & quieto quamvis mari, supinis es-
se nautis non licet. quando tot ex improvviso pericu-
la exoriri possunt, ut nī vigil magno derepentè cona-
tu insurgas, pereas necesse est. Cui ego, Ita enim ve-
rò. sed proh miseros! pēnas statim dederunt. siqui-
dem tam subito in terras impetu, atque unā in pericu-
lum

lum inciderunt, ut nullo modo, & terras vitare, & periculum evadere potuerunt. Nobilis quidam Siamensis, ex quo istæ accepimus, tanta ea nocte animi perturbatione, tanta sollicitudine vexatus est, ut etiam maximè vellet, conciliare somnum potuit ullo modo. quocirca è suo cubiculo egressus, ad navis spondam sedit: & ut perturbatum continua fluctuatione animum aliò diverteret, & sic ægritudinem allevaret, prætervolantem quasi avem, fluctusque magna vi, celerique cursu dividentem navem prospectabat: cum de repente, dum oculos erigit, longiusque obrutum figit, densam se videre umbram visus est. quo aspectu territus, ita gubernatorem ad clavum vigilantem interpellat: Anne terra istæ est, quam in conspectu habemus? ille, cum revera terram esse animadvertisset, ita subito correptus timore trepida voce exclamat: Terra, terra est in conspectu: perivimus. simulque inflectere gubernaculo cursum validè adnissus est: demittiq. jubet vela. quia verò in ipso penè litore navis erat, dum sic temerè flectitur, ter in scopulos tam valido ictu puppis occurso, allisaque est, ut & circumflecti minimè posset, & vitari ictus præ festinatione non licuit. quoniamque violenta concussio, & repetita fuerat, disruptam jam navim crediderunt, ad anthliam idcirco, ut hausta præ vulnere aqua exhauriretur concursum tanta trepidatione est, ut jam quisque de naufragio, extremisque omnibus cogitaret. cum verò mox ne guttam quidem accepisse navim viderunt, refecti tantisper animi nautarum, & ad periculum propulsandum promptiores facti. summo igitur conatu, summa diligentia se naufragio eripere, èque periculosis illis cautibus, quibus ora prætexebatur, subtrahere aggressi sunt. nimirum ita sunt deusdè natura homines, ut non nisi ultimis in casibus diligentiam adhibeant.

quæ

quæ ut principio salutatis, ita inutilis prostrémò est: Sed quæ in tanta animorum perturbatione, summaque desperatione rerum solertia esse poterat? temerè igitur, ut fors ferebat, reseindere malos, jacturam rerum facere, exonerare navim, quò levior assurgeret, quamcitissimè omnes una opera conati sunt. verùm id ità perficere, ut saluti prodesset, haud quaquam poruerunt. etenim immensû fluctus, qui ex alto in procurrentes scopulos magno impetu irrumpebant, navim altissimè attollebant, mox, ut resuantes subsidebant, illam derepentè in cautes, ac saxa demittebant. in quæ tanto præceps occurso, pulsuque valido incidebat, ut diu sustinere impetum non quivit. dissociari igitur, dissui, disrumpique sensim membra, laxatisque mox cuncta compagibus, dissolvi magno strepitu audiebantur: congeries verò illas tabularum, ac trabium distrahi, abripique fluctibus, tantoque fragore frangi, ac dejectari, ut horribile & visu, & auditu foret. Quia verò puppis prima ictus pati cæperat, prima etiam, quassari, distrahi, atque aperiri cepit. & quamquam dissecti jam mali essent, ejecta tormenta, & quidquid tum oneris pro tempore ad manus haberi poterat, nihilo tamen minus præ irruentium vi fluctuum tam validè, tam frequenter in cautes collidebatur, ut jam ad pulveris tormentarii cellam, cui à D: Barbara militare nomen est, aperta tota, atque disrupta pateret. jamque aqua, quæ torrentis instar plurima inundabat, primum victrix tabulatum occupaverat. mox secundo brevi superato, totam penè navem demerserat.

Ad conspectum hunc tam miserabilem, quàm qui maximè, cuncti exhorruere: & quasi in Orci aditu constituri essent, immensum illicò clamorem ediderunt: inque altiores navis partes magno concursu, ac festinatione procursum est. tanta verò, tamque repentina per-

tur.

turbatio animorum fuit, ut casibus in hisce plerumque cadit, ut compluries, quo se à morte redimerent, citius perierunt. Quod autem maximum malorum fuit, op-pleto jam spatio, quod inter primum, & secundum tabulatum interjacet, tota confestim annona corrupta, atque in fluctus dispersa est. Tandem exsuperante mari, ita navis subsedit, ut fundum carina contingeret, totumque diu immobile scopulos inter navigium stetit. Quæ tum consternatio, qui terror, quique omnes luctus pervaserit, qui ululatus exorti, ac fremitus, non modò verbis difficillimum explicare est; sed ne adumbrare quidem aliquo modo possumus. quis enim dicere, vel saltem complecti animo potis est, quod cuique certa ante oculos mors, & tam horribilis, ac misera, inferre in mentem poterat? nullus quidem certè. adeo terribilia sunt, atque insolentia, quæ tum oculis obiici, mentique consueverunt. Nihil enim aliud licebat audire, quam singultus, & lamenta: nihil aliud videre, quam hac, illac cursare, mutuò in sese impingere multitudinem, ac singulos singulis præpedimentum obiicere. hos verò, qui prius inimicissimi se capitaliter oderant, nunc ex animo complecti, & veniam mutuò dare, & petere. nulla nempe tum causa dissidii, quando omnia unà cum vita peritura erant: illos in genua accedentes auxilium, & vitam à Superis implorare: alios, & hi plurimi erant, vacuas in mare capsas, truncos, tabulas, & quid quid naufragis usui esse videbatur, proicere: sequæ unà undarum, sortisque arbitrio committere. tantus autem, & tam immanis cunctorum clamor, ac tumultus erat, ut navis in mille se partes dirumpens horribilis ceteroqui fragor, atque horrendi undarum fremitus, quæ ad rupes incredibili impetu frangebantur, minimè exaudirentur.

Mox ut tumultibus hisce modus aliquis factus est,
qui

qui adhuc naufraga in navi petiscebant, maturo consilio de salute cogitare ceperunt : visumque cunctis est è navigii fragmentis quasi ratem componere , qua tutius in terram appellere possent . priorum exemplo moniti , qui cum tumultuosè tam aspero se saxi mari, & tam furioso dedissent , fermè omnes vel absorpti fluctibus, vel collisi ad cautes perierunt . mirum oppidò, & luctuosum erat tot infelices homines, inque tanto vitæ discrimine, omni ope, omni auxilio destitutos in transversum agi, ac miserabilem in modum pereuntes prospicere . Nobilis ille Siamensis colligatis duabus invicem tabulis innixus, & omni conatunando, in terram incolumis evasit . Ex Legatis, qui secundas partes agebat , uti ætate robustior , & lacertis erat, cum brachiis , tum pedibus connisus enavit : secumque literas ab rege creditas, & acinacè, quo donatus fuerat, asportavit . Hic Sextus; Ego, inquit, in tanto periculo præ vitæ curassem cætera nihil . Rectè tu quidem , inquam ego : verùm ille aliter sentiebat : & credula semper spes est . Nunnam tu, inquit Sextus, de Bellicis cogitasses ? nam tibi illis nihil admodum charius esse pro certo habeo . Cui ego : Utique si potuissem : & me salvo, salva illa voluissem . verùm ad propositum revertamur . res enim, ut dixi, prolixa satis est . At Balbus . Multum ne igitur tragædiæ superest . Cui ego : Multum sanè, nec longè sumus ab ovo . Perge ; Tum ille : dies longus est , & tua mihi oratio gratissima . Tum ipse : Atque audite jam : filumque orationis retexo . Postquam hi ad litus , in quod jam fermè cuncti se Lustrani deduxerant, tandem pervenere, agitari illicò novis curis , nova imminere pericula animadvertunt . nec minus ipsi , quam qui adhuc in navi erant, angebantur . nam etsi extra naufragii aleam se constitutos viderent , quam quidem nondum illi eva-

se-

ferant, quorum vita tantum à morte aberat, quantum ipsi ab undis: nimirum fere nihil. attamen non tam evasisse periculum, quam commutasse videbantur: & in Scyllam, ut ajunt, è Carybdi incidisse: ut scilicet fame, sitique perirent. quæ quò diuturnior miseris mors, eò intolerabilior, atque acerbior est. nihil enim omnino victus apud se habebant, & eò loci se pervenisse conspiciebant, ubi ne pecudum quidem, vel ferarum pabula erant. imò probabilis timor, ne ipsi, quod acerbissimum cunctorum malorum esset, ferarum, quibus Africa abundat, pabula futuri essent. acerrimum insuper frigus eo tempore sæviebat, ipsique tenuissimo amictu, & hoc benè madido, vestiti, neque unquam cælo tam rigido assueti; quocirca mirum in modum vexabantur. Nobilis ille Siamensis, qui animi fortitudine, & fiducia penè incredibili cæteris præcellerat, audacissimum pro tempore consilium cepit, se iterum in navim natatu devehere, ut vestes, quas ibi reliquerat, & si quid nautici panis non dum corruptum, dispersumque esset, & quidquid item pretiosum in superiore navi, ubi suas Lusitani divitias reposuerant, adhuc remaneret, secum in terras asportaret. innixus igitur tabulæ, tanta quâ animositate, quâ agilitate, quâ etiam lacertorum robore per placatiores jam fluctus enavit; ut brevi, atque incolumis in navim, imò velocius lignorum dissutam, ac penè diffractam congeriem, evaserit. quæ tamen, quippe molis vastissimæ, adhuc supra fluctus eminebat. Vix dum tenet, cum omnia occupasse aquam animadvertit. quo viso, non omni spe concidit, neque animo despondit omnino. magnus se supra semper attollit animus, nec difficultatibus retardatur, nec periculis obruitur. In cellam igitur gubernatoris ingressus, telam reperit ex auro texili, cum vini cado admodum parvo, & nautici per-

pauillum panis. quæ in unum composita fascem, ac colligata tabulæ, qua enaverat, adnectit. mox istæ ante se agens, in litus contendit: quod acri tandem natatu, summaque defatigatione sospes prensavit. Hic Balbus: Laudo viri confidentiam, quam tamen imitandam vix duco. Cui ego: At animosus sis in periculis necesse est. plerumque enim cadit, ut non tam periculo, quam opinione periculi opprimamur: nostræque succumbamus timiditati, quæ vim menti aufert, nec cedit consilio locum. Et ille: Non oppedo. sed quid tum postea? Ego verò: Istuc jam ibam: accipite. at timeo ne Sexto, cui hilarior animus, grave futurum sit tam longam, & tam miserabilem historiam audire. Tum Sextus: Imò, quæso, ut enarres: curiosa enim est: & tua oratio, quamvis de re molesta, delectat tamen. Tum ego: Hic, quo de modò dicebam Siamensis, cum in litore videret quosdam populares suos, qui unâ cum ipso in Europam navigabant, nudos algere, & tremere, ob frigoris vim intolerabilem, tactus illorum miseratione, quam adduxerat è navi telam, eis tradidit, quo ut potuissent modo, induerentur: seque ab immani illo frigore aliquo modo defenderent. Et quia planè noverat, quod si illis etiam vinum credidisset (panis nauticus adeo salsedine maris imbutus, ut ne famelicis quidem usui esse potuerit) fore ut brevi absumeretur: idcirco illud Lusitano cuidam, qui cum summam contraxerat amicitiam, hac conditione, dedit, ut ex æquo uterque biberet, cum sitis coëgisset. Hic Balbus: Istic, inquit, nimis sincere fecisse mihi videtur, at minus cautè, quisnam cuiquam fidem seruet, cum improba in rebus urget necessitas; apud quam non amicitie ratio locum habet, non leges, ac iura quidquam valent? Cui ego: Optime tu quidem. quod in re præsentis bonus hic Siamen-

sis expertus re vera est, & malo suo. Et ille: Credo equidem. quis enim secus fieri putasset? Sed perge enarrare, ut facis. Tum ego: Lusitanus, quem ne vidisse quidem aureos Tullii de officiis libros existimo, cum illi triduo vinum, & parcè admodum supeditasset, ea scilicet inductus spe, fore ut aqua ad levandam sitim brevi inveniretur. quarta die cum nulla rivi, nulla fontis vestigia apparuissent, nulla prorsus habita amicitiae ratione, nulla officii, atque humani, divinique juris immemor, ei vinum negavit, à quo ipse totum, quod habebat, prius acceperat. cumque ille datam sibi fidem, rem suam deposceret, perq; Superos omnes obsecraretur, summa ipse ingrati animi nota, summa injustitia, amicum, rei que dominum, ac benefactorem sui, indignè, ac superbè pro more gentis rejecit. & se ne patri quidem suo illius vini guttam daturum jurat. si jurare est id, & non potius pejorare. Hoc Sextus loco: Pessimè hic cum amico, & benefactore egit. præstabat mori potius, quam tanto se scelerè obligare. Sed quora pars hominum virtute, atque honestate ducitur? quam paucissimi admodum sunt, quibus hæc cordi virtutes insunt. Verùm miror, quod madidi, & fere nudi, noctu, & sub divo, & tempore tam rigido, non sint præ frigore eneati. Cui ego: Rectè dubitas. periissent sanè, ni Lusitani milites secum tormètariū pulverem, & sclopos tulissēt, qui nō è recte sulphurea, sed è silice, laxata rota, ignem accipiunt, atque exploduntur. ego in meis Bellicis Calchopyros voco. his enim igne excitato, calefacti sunt ipsi, & vestes siccant. sed pergamus porrò. Postquàm tandiū expectatum quoad omnes è navi in litus conveniunt, inque unum, qui hac, illac dispersi, adunati sunt, census habitus; ducentique numerati. reliqui, qui primi ceco in fluctus impetu se projecerunt, de-

merfſi ſunt. uſque adeò verum eſt, nihil temerè, etſi in ſummo periculo, agendum eſſe.

Altero à naufragio die, qui domino ſacer, primuſque hebdomadæ recurrebat, fuſis ad Deum precibus, quid iſtis eò loci agendum eſſet, conſultarunt. Quia verò tum dux navis, tum gubernator non longè abeſſe aiebant Bonæ ſpei promontorium, ubi Hollandi non contemnendam coloniam habebant, eòque uno, aut altero die perventri poſſe, illuc iter inſtitui omni- bus viſum eſt. quoniamque per breve iter putabatur, complures, quò expeditius ſe in viam darent, quod è naviannonæ aſportaverant, ibi reliquerunt. Hic Sextus: Peſſimo hi conſilio fecerunt: nempe tutius eſt ferò ſaturum venire, quàm citò jejunum. neque unquam imitandus Æſopicus canis eſt, ut ſpe alterius, etſi majoris, præſentem cibum abiciamus. Cui ego: Ità verò. ſed quid facias? ſæpe mens hominum ita malis obruitur, ut vix rationi locus relinquatur. Vexum efficiam nunc ego, quod inſtitui. Iter igitur aggreſſi, in denſiſſimas ſylvas, ſeu veriùs fruticeta, ubi pauca admodum proceræ arbores viſebantur, intrarunt. Cum verò toto die per diffi- ciles, atque implexos calles iter habuiſſent, nonniſi per exigua reſpirandi ergo bis interpoſita mora, adeo vexari ſamque, quæ illa corporum defatigatione vehementius excitabatur, adeo torqueri ſiti, quæ propter Solis ardorem noceentiffimum magis accendebatur, cuncti cœpere, ut jam utraque intolerabilis omninò eſſet: & eo magis, quò grandi, celerique gradu iter fecerant, & circa meridiem ferventiſſimus æſtus eſſet.

Inclinante ſe jam die, nox appetebat, cùm ad ſtagnum quoddam perventum tandem aliquando eſt. quo viſo, tanta omnes lætitia, tanto gaudio affecti, ut incredibile dictu ſit. nec diù cunctati ſumma animi

voluptate, ut nunquam aliàs, ad satietatem usque biberunt. Hic Lusitanis subsistere visum est: quocirca excitato statim igne, confederunt. quidam caneros, quos plurimos habebat lacus, piscari sunt: quibus ad ignem tostis aliquo modo fami consuluerunt. reliqui, & hic plures, postquam iterum abundè bibissent, lassitudine magis, quam fame vexati dormierunt. Hic Sextus: Et hi imprudenter quidem, quoniam in alterum diem tolerara fames, acerbissima esse solet: & nonnunquam cholericæ tormenta, quod genus morbi, & dolorem maximum affert, & fatale est, ingenerat. Cui ego: Ita est, ut dicis. atque hi malo suo experti proximo die sunt. quæ cùm illuxisset, iter iterum aggressi tempestivè sunt. priùs autem, quò se contra sitim præmunirent, liberiùs potarunt. Primi præbant Lusitani, sequebantur Siamenses, quorum princeps legationis propter ætatem jam adfectam, & vires corporis imbecilles assequi primos nullo modo poterat. Ne verò Lusitani, qui duces erant itineris ex ipsorum conspectu longiùs abscederent, gentem omnem in tres manus partiti sunt. quarum una ultimos Lusitanorum assequi, neque illos unquam è conspectu amittere iussa est: secunda, ut primam assequeretur eodem modo: hanc verò in conspectu semper habere tertia conaretur: & ut quà primi iter flexissent, quì proximè sequebantur, signa reliquis darent. Hac igitur ratione iter facientes per æquiores quosdam montes, & minimè difficiles, sed nudos omninò, atque incultos primùm transierunt. quibus tandem superatis, in æquos campos devenere, in quibus nullas hominum, nulla pecudum vestigia apparebant. Verum horridæ circum solitudines, & squalidæ arenæ. in quibus unus dumtaxat puteus repertus est: sed cuius aqua adeò amara, ut ne guttam quidem haurire,

potuerunt. Cum autem primi Siamensium immorari Lusitanos indicassent, cæteri fontes ab illis adinventos arbitrati, alacriores facti, iter celerius conficere conati sunt. verum adeo debilis senior legatorum erat, & adeo lento ob id gradu incedebat, ut nonnisi occidente jam Sole assecuti primos postremi sint. Ad quos simul ac perveniunt, discessisse longius Lusitanos cognoscunt, neque ullis precibus induci potuisse, ut legatum, reliquosque Siamenses opperirentur. imò consultius esse dicere, atque eis etiam salutare, si ad victum vestigandum primi ipsi prævisissent: neque profuturum quidquam Siamensibus si unum cum ipsis fame, siti, totque inter ærumnas Lusitani periissent. Quæ cum legatus à suis accepisset, convocari Siamenses jubet. qui statim circa illum adunati, summo mœnore, parique doloris sensu affecti sunt conspectu senis tam venerabilis, & qui regis præ se vices gerebat; quem penè exanimem tum fame, tum lassitudine conspiciebant. Ille benè eos sperare jubet: & quoniam haud quibat Lusitanos, qui duces itineris præbant, assequi præ languore, ac lassitudine, sequerentur ipsi: & cum primùm ad Hollandorum coloniam venissent, quæ quidem propè esse censebatur, mitterent sibi equum, vel currum cum victu, ut & sustentari, & ferri in coloniam posset, si adhuc in vivis fuisset: sin minus suprema more patrio persolverent. Vix ille hæc, cum illacrymari repente omnes, & non tantum suam, quantum senis sortem deflere, magnis lacrymis, magnis quæstibus cœperunt. Mox quia abundum, etsi inviti, discesserunt. Misera fati necessitas, ubi quis id facere compellitur, quod prorsus nolle. Divelli tamen ab senæ magnæ quidam indolis, animique fortissimi adolescens, quem unice legatus amabat, habebatque filii loco, non quivit.

Hic

Hic Balbus: Rarum, inquit, charitatis exemplum, quod minimè ab homine barbaro expectassem. Cui ego: Quamplurimi inter barbaros sunt, qui majora edunt virtutis, & masculæ quidem exempla, quàm nostri: in quibus non rarò quosdam invenies, à quibus humanitatis sensum, nedum virtutem requiras. Hic igitur (redeo tempestivè in viam, ne serò domum veniam) cum veteri famulo apud legatum restitit, cæteri abierunt, & grandi assequi Lulitanos gradu connisi omnibus nervis sunt. At quoniam Siameses quidam, qui ut Lusitanorum iter observarent, longiùs ante processerant, ex edito colle signis explicatis, ut conventum erat, illac iter dirigendum esse commostrabant, illum idcirco in collem, ubi & Lusitanos confedissee, & rivum repertum opinabantur, reliqui contenderunt. quem tandem sexta hora pomeridiana defessi tenuerunt. Hic verò neque Lusitanos, neque aquam esse, ut statim acceperunt, tanto oppressi merore sunt, ut de vita penè desperarent. Mox factis iterum animis, cum non longe abesse Lusitanos, & jam confedissee verisimile ducerent, in viam iterum tristes, ac defatigati se dederunt. Quæ cum per aspera rupium, & confragâ iniretur, incredibile sanè dictum est, quanto labore vix duobus solidis horis confecta tandem sit. Prima omnium cura fuit de perquirenda aqua, qua de anxii statim socios rogarunt; quam longè abesse ab illis acceperunt; quare angere iterum, atque excruciaci quoad ventissent, se miseri senserunt. Expleta tandem aliquando, qua deperibant, siti, majus restabat à fame tormentum, cui subveniri nullo modo in præsentiarum poterat: imo nec tolerare. ut quisque mori potius elegisset, quàm tam acerbo cruciatu torqueri. Siamesis ille, de quo sæpe mentio habita, sedata tri præter ignem, quem Lusitani accenderant pronus præ-

lassitudine dormire cœpit: & usque ad diluculum, quod
 demum excitatus à frigore est, altissimè condormi-
 vit. Hic Sextus: Qui fieret, ut tanta cruciati fame
 indormirent? ego si incognatus eo cubitum, vix dor-
 mio. Cui tum ipse: Ità plerumque fit. accidit ta-
 men non semel, ut magna lassitudo somnum conci-
 fiet. qui tum non tam refectio animantis quæsitā à
 natura, quàm evigilandi impotentia. quæ in morbis
 ferè semper lethalis. verùm redeamus ad Siamensem:
 experrectus tanto dolore excruciaci præ fame cœpit,
 tam acerbè, ut expedire sibi visum, cò loci permane-
 re mortem opperens, quæ tandem malis omnibus
 finem imponeret. Mox ubi Lusitanos, suosque vidit
 spe vitæ, iterum se vitæ, sortique committere, eadem
 tum ipse animatus spe assurrexit, viamque cum reli-
 quis ingressus est. superat nimirum tormenta vitæ
 amor, & ubi exigua spes lucet, vel desides accen-
 duntur animi: nec pati dura recusamus, quādo eadem
 perpeti alios, quibuscum societas est, animadvertim-
 us. Imò tanta erectus spe est, ut socios cursu præ-
 verterit. cumque in herbidum collem se contulisset,
 statim soli viriditate illectus, impulsusque defatiga-
 tione, super viridicatum primò campum sedere, mox
 cubare, dormire tandem incœpit. At ubi experrec-
 tus est, penè rigidas coxendices, & crura summo
 membrorum dolore sensit: illorumque usum se pro-
 fus amisisse credidit. quocirca despondere iterum, &
 mortem, quam propè esse probabile erat, constanter
 opperiri. fieri tandem posse, ut tantis, & tam duris
 malis maximo malorum mederetur. atque hæc secum
 deliberaus iterum obdormivit. Et sanè somnum mor-
 te, cui similis, brevi terminasset, ni familiaris qui-
 dem unā cum famulo de illius sorte sollicitus diu
 hac, illacque pervagatus, reperisset, repertumque illi-

cò excitasset. Qui mox amici sermone confirmatus, speque brevi in coloniam perveniendi animatus, assurrexit: cumque simul ipsi ad Lusitanos profectus est: qui tum primum ad aquam quandam stationem fixerant. At fames extrema erat, atque intolerabilis omnino: in arida quædam fruticeta ignem idcirco statim conjiciunt; ut sic lacertos, ac serpentes in illis oculi solitos adurerent: atque semitoftos hoc modo comederent. quidam cum ad aquam divertisset, viridantia quædam folia conspicatus, derepentè evellit, & licet amara essent, quammaximè avidissimè devorat. nempe nihil admodum est, vel insuave, vel amarum, quod fames non condiat. Ille verò aliquantulum sedata foliis illiusmodi fame, illicò ad universum cœtum, quasi repertæ salutis nuncius advolavit. quo omnes continuo erecti, ad illa se folia contulerunt tanquam ad ambrosiam. quibus abundè pasti, totam ibi noctem transigerunt. Hic Balbus: Proh miseri! inquit. qui pecudum pabulo saturati, pecudum etiam pro more dormire. Sed quid facerent? tolerandæ fari necessitas. Et ego: Nihil est tam insolens, quod in vita hominum interdum non cadat quocirca paratissimum ad extrema omnia habere animum necesse est. Sed quod restat, statim exequor. Crastina, qui quintus ab incœpto itinere erat, benè manè viam corripere, certa spe ducti, fore, ut illo tandem ad coloniam pervenirent. qua novas spe animi vires acciperet. plurimum enim ad erigendos in malis animos præsentis remedii concepta spes valet: & præsens id facilè sibi quisque fingit, quod vehementer exoptat. Et jam itinere nunquam interrupto, ad meridiem usque progressi erant, cum in edito collis vertice aliquot homines conspiciantur. quos simul atque vident, eos ipsos esse, quos tanto labore, tantoque desiderio

requirerebant, ceterò arbitratì sunt. è longinquo enim quidam moralium essent, non benè dignoscebantur. magno igitur profusi gaudio, alacri, grandique gradu illis obviâ procedût. ac hæc miseris brevis lætitiâ fuit: ex qua ingenti mœrore animi statim decidêtes, in parem doloris sensum inciderunt. Erant enim illi tres Æthiopes, qui ultimas illas Africæ oras incolunt (Ca-fros novi appellant) gens immanis, exlex, nulloque humanitatis sensu prædita: in varios populos dividitur: ex his qui reliquis minus barbari, Hothentones puncupantur: ex quibus isti tres erant. qui cùm ex alto collis fastigio rôt ad se gentes venire conspexissent, speculatum quinam forent mortalium, processerant. nec minore ipsi, quàm hi timore perculsi plurimi enim Lusitani erant, & sclopis armati, barbari verò, & pauci, & unis tantùm jaculis præmuniti. Quia verò Lusitani eos speculatores esse, & non longè universam barbarorum gentem abesse existimabant, ingenti formidine correpti, jam immanem sibi imminere necem ab illiusmodi barbaris prò certo habebant. Quoniam verò magis expedire sibi ducebant, si tot ærumnæ, totque intolerabiles cruciatus honesta morte finirentur, accedere ad se barbaros passi sunt. Qui cùm plurimos eos esse deprehendissent, illicò pedem retulerunt: cessatumque tantisper utrimque est mutuo metu. Mox cum paululum Lusitani progressi essent, tum Æthiopes, ac si duces se itineris præbere vellent, præire pergunt: digitoque casas quasdam, imò veriùs tuguria commostrantes, ut illuc iter accerent, gestu, quando verbis non poterant, significabant. Hi, qui fame, qua acerbissimè cruciabantur, nihil admodum esse, quod pejus cadere in se posset, persuasum jam habebant, nihil cunctati ad casas illas, quas Æthiopes indicaverant, & quas versùs ipsi præbant,

iter

iter illicò direxerunt. Postea verò quàm ad eas, quæ in collis clivo ad tres, quatuorve erant, devenerunt, minimè barbari passi sunt, ut propiùs accederent. erat autem juxtà quidam callis, per hunc illos ad proximum pagum deducunt. quo toto itinere barbari de Lusitanis continuò diffidentes, veritique ne quid molirentur, illorum motus, gestus, verba, nutus ipsos observabant. Tandem ut ad pagum, in quo quadraginta fermè casæ arboreis ramis connectæ, & in quibus ad quadringētos habitabant, perventum est, tum barbari, quasi in tuto jam positi, neque quidquam amplius pertimescentes intrepido, præsentique animo propiùs ad eos accedunt, & pro libito curiosè, attentèque contemplati sunt. Delectabantur maximè Siamensium habitu, atque ornatu, quem nunquam aliàs spectaverant. At hujuscemodi Æthiopum curiositas illis, qui fame validissima torquebantur, satis importuna videbatur, nec defuere, qui in illa reguria pedem inferre ausi sunt, ut si quid esset, quo famem levarent, sibi acciperent. omnes verò tum gestu, tum signis, ut muti solitavere, se extrema fame laborare barbaris significabant. qui sese mutuò intuentes risum ridebant quàm solutissimum. neque se percipere quid hi vellet, videbantur. Quia verò hac, illac per campos magnam bovum, oviumque copiam Europæi animadverterunt, obsecrati per Superos omnes sunt, ut aliquot illorum sibi venderent. id verò cùm tandem illi cognovissent, duo tantum verba identidem repetebant. Nicotianam nimirum herbam, qua pulverem, ejus avidissimi conficiunt, & quoddam monetæ genus, quæ una genti nota est; *Patatham* Hispani vocant. Tum Siamensis de quo supra, duos illis obtulit adamantes, quos à Principe legationis dono acceperat, cum à cæteris derelictus est. at barbari, qui illos

non

non secus, ac lapides reliquos habebant, nihil extimant. Hic Balbus: Nempè tanti res valent, quantitas extimamus: & nos ipsi opinione nostra pretia facimus. quare tu non abs re in Bellicis habes in re consimili,

Rebus in humanis castat, quam concipis ipse:

Et concepta trahit tum te sententia, non res.

sed perge, ut cœperas, res oppidò curiosa: quam audire auribus operæ est: quin & ad vicissitudines rerum humanarum contemplandas mirificè facit. Nullus, tum ego, Nicotianum pulverem, neque monetam illam habebat, præter navis gubernatorem, qui aliquot in marsupio sibi esse deprehendit: quatuorque illiusmodi argenteis bovem, qui viliùs Hollandis à barbaris distrahi consuevit, mercatus est. Verùm quid bos unus tot inter famelicos, qui totos sex dies, nihil nisi quædam arborum folia comederant? Gubernator, qui emerat, ut primùm semitostus, illum cum suis popularibus, & parcè admodùm devoravit. Siameses ne bucceam quidè unam per Superos omnes obsecrati obtinere potuerunt. quocirca hi hominum quotquot vivebant miserimi, in abundantia rerum eadem ac Midas, & Tantalus, ut est in fabulis, patiebantur. Imò Lustani obtestati, quod si ex bobus, vel ovibus, vel unum vi cepissent, se illos barbarorum furori relinquentes.

Quidam Siamesis cum vidisset Æthiopes signato aure minimè duci, neque velle bovem, quem argento distraxerant, aurea moneta vendere, hoc usus commento, ut eos alliceret, tum est. caput aureo textili mire exornavit, atque hoc peregrino more concinnus se in barbarorum conspectum dedit: nempe ingeniosa artium inventrix fames. Barbari illiusmodi ornatu magnopere capti sunt. quod ille, ut vidit, illicò ob-

tu-

tulit. sperabat enim fore, ut saltem bovem, vel oves aliquot, pro illo ornatu, quod plus trecentis aureis pendebat, impertirentur. verum illi, qui præter curiositatem, nihil in ornamento æstimabant, quartam ovis partem obtulerunt. Hic Sextus: Tanti ergo ovis armus stetit? Tanti, tum ego. at quid improba fames, sexque durata dies non extorquebit? avarissimus ſis licet, ita facias necesse est. At Balbus: Cum vita emitur, quanti quanti ematur, bene emitur. Cui ego: Rectè tu quidem, Balbe. sed ferri extra oleas non vacat. Vix armus semitostus fuit, cum illum avidissimi illicò Siamenses comederunt. Verum id acuerre famem, non verò sedare fuit. Siamensis de quo sæpe, cum vidisset Lusitanos bovis pellem projecisse, amicum arcerat, & re communicata, quæritum pellem eunt, majori quàm Argonautæ cupiditate ad vellus aureum profecti. quam mox inventam quasi thesaurum accipiunt, ignique admovent, ut pilos adurerent, ac paullulum torrerent. id simul ac reliqui Siamenses conspicati, derepentè quasi vultures advolant ad prædam: atque unà omnes in pellem irruentes momento devorant. Interea, quidam è barbaris curiosè globulos aureos tunicæ cujusdam Siamensis, quibus in oculos insertis, una tunicæ extremitas alteri adnectitur, contemplabatur: quod ille animadvertens, statim distrabit, eosque barbaro donat, ea ductus spe, ut saltem capram ab illo extorqueret. at barbarus domum ingressus, vas lactis acceperat, deditque Siamensi. quod tamen accipere, & cum gratiarum quidem actione, opus fuit. Postquam autem tam parçè, & ferarum potius more, quam hominum pasti sunt, magnum circa ignem confederunt, ibiq; totâ penè noctem insomnes transegerunt, timore barbarorum. qui & ipsi continuo ulularunt, quasi feræ, barbaricumque in morem cho-

choreas duxerunt, quo sic novos illos hospites, & sibi ignotos omninò perterrefacerent, ne in ipsos, ipso- rumq. armenta inpetum fecissent. nec dubium quin, miseros hosce delavissent, si id posse ipsis visum foret. erant enim hi plurimi, & sclopis armati, quibus barbari terrentur miro modo.

Proximo mox die, primò manè iter aggressi versùs Oceani litus: quod quidem illis salutare fuit. nam cum illuc circiter meridiem pervenissent, magnam juxta litus concharum copiam reppererunt: quibus abundè saturati, sine pretio, sine invidia. Larga nimirum natura est, neque invida. quia verò, ut aquam nanciscerentur, iterum interiora sylvarum petere cogebantur, plurimam sibi quisque earum copiam comparavit, ut cenare commodè posset. mox ire aquatù ceperunt. Et quamquam summa diligentia, ac festinatione iter fecissent, non nisi sub noctem ad perexiguum quendam rivum devenerunt. cujus aquam, & si salsa esset, urgente nihilominus siti, non modò salsam, sed turbidam etiam suavissimè potarunt. corporibus hoc modo curatis, propter eundem rivum noctem transduxerunt. ne verò ab Æthiopibus circumvenirentur, per vices custodiam agebant: atque ex intervallo vigiles altiùs inclamabant, ut sic vigilare eos, si qui circumcursarent barbari, intelligerent. quem morem toto illo infelicissimi itineris tempore servaverunt. Sequenti die, qui nonus recurrebat, ad pedes altissimi montis devenerunt, qui incredibili penè labore exsuperandus fuit. quo tandem transmissò, adeò vehementer miseros fames invasit, ut nunquam aliàs, et si atrocissima. nec sanè verbis explicari, nec mente concepti facillè potest, quam varii, quam formidabiles cruciarum miserorum erant, quibus horrendum in modum torquebantur. divelli sibi viscera, distorqueri,
in-

inflammari, consumique sentiebant. dum sic penè dispercunt, seque hac, illacque circumvertunt. videntes quasdam herbas, floresque conspiciuntur. vix vident, simul trumpunt, nullo delectu evellunt: neque animadvertentes noxiæ, necne essent, summa aviditate, quantumvis amaras comedunt, pecudumque more famem exsaturant. at sitis restabat, quæ pastu amaræ herbæ magis irritata intolerabilior evaserat. verùm etsi talis, & tanta foret, toleranda tamen usque ad vesperam fuit, cùm tandem ad illius prærupti montis radicem aquam invenerunt. Habitum hic inter omnes concilium, in quo de ratione itineris capessendi diu disputatum est. tandem in eam omnes sententiam ivere, quam prudentissimi quique in medium intulerant, carpendam secus litora viam, & quàm maximè fieri posset, vitanda interiora loca, ac difficiles sylvarum aditus: ne spe compendii, longius errarent, & vel in barbaros inciderent, vel fame, omni cruciatu terribiliore, tandem perirent, atque in hanc sententiam adducti, tum ex eo, quod interci omninò essent de Baravorum colonia: quæ cum juxta litus Oceani esset, sic facilè inveniri denique potuisset: neque dux navis, neq; gubernator spe se falsa deceptos negabant: deque illius distantia se omnino ignaros esse. imo neque satis tenere, quàm iter habendum esset, ut securò ad illam pervenirent: tum etiam quia secundùm litus gradientes facilè conchas, canctosq; cæteraque istiusmodi insecta reperirent: quibus cicurare famem aliquo modo quirent: neque difficile fore in rivis, amnesque incidere: siquidem ratione constare rivos, fluviosque universos in mare tandem deluere. Hoc igitur capto consilio, ut primùm creperæ illuxerunt, collectis fascibus, in viam sese statim dederunt: & præter Oceani litora gradiebantur. Iam dux supererant

terant ad meridiem horæ, cum ad amnem quendam devenerunt, ex quo larga admodum planities visa est, quæ ad altissimum montem pertinebat. qui mons longo se in mare dorso exporrigebat. quo viso mirum oppidò quanta omnes letitia affecti sunt. etenim affirmabat gubernator montem illum, cum ipsum esse, quem tanto desiderio, optaverant, & quem tam laborioso, & tam referto periculorum itinere exquisiverant. His dictis, festivum statim omnium murmur exortum est: & tanta spe cuncti animati, ut alacres, vegetioresque vel defatigatissimi quique facti (nihil enim, quod magis erigat animos quam spes præsentis jam boni) ut totam illam planitiem, quæ ad duodeviginti lapides excurrerat, eo, quod supererat dici confecerint. ventum igitur ad montem est paulò ante solis occasum. verùm prohi miseros! una cum sole præconcepta spes occidit. Et quoniam quò major à spe lætitia præcessit, eò etiam major tristitia oboritur, sublata mox spe, mirum oppidò quanto omnes mœrore oppressi, cum montem illum, non cum esse, quem tot ærumnarum, tot calamitatum, & tam molesti, infau- stique finem itineris opinabantur, deprehenderunt. Hic lamenta, hic quæstus, hic in sortem, ut plerumque fit, exortæ querelæ, hic desperatio, vitæque tædium, quæ morte pejus videbatur, sensim animos universorum invaluit. Non deerant tamen quidam religiosiores, inter quos unus ex nostris hominibus, qui cuncta patienter ferenda esse, seque divinæ providentiæ committere reliquos hortabantur. Hæc me Balbus loco ità interpellat: Poterat nostras iste optimè fungi suo munere, & tot miserorum animis summo opere prodesse. Cui ego: Haud sanè passus est in se pientissimi viri officium desiderari. circuibat quotidie per universum cœtum, & quâ hortatu, quâ monitu, quâ etiam

excm-

exemplo, omnes ad virtutem, & patientiam adhortabatur. Dum autem, (redeo ad institutum) magna cuncti tristitia oppressi ingemiscunt, nauta quidam, qui paulò ulterius speculatum processerat, ut ad suos reversus, nunciat non longè insulam quandam esse concharum refertissimam, & saliente etiam percommendam. quo nuncio refecti tantisper, recreatique sunt. statim igitur in illam, in qua jam pernoctare cogitabant, profecti. verùm adeò illecti & situ, & cibo, & aqua sunt, adeò etiam defatigati, ut & sequentem diem, & noctē etiam alteram in illa otiosi cōsederint. Hic Siamenses cum seorsim à Lusitanis suos cœtus agerent patrio more, unum ex nobilibus, qui præ cæteris diligebatur, abesse animadvertunt: quare illico quæsitum hominem profecti. verùm postquam diù in diversa errassent, & ad ravim usque exclamassent, nec quisquam responderet, mortuum conclamarunt. ad quod etiam eò faciliè adducti, quod tanto florum, herbarumque fastidio afficiebatur, ut nunquam induci potuerit, ut aliquid saltem illorum gustaret. manifestò igitur fame periisse consiciebatur. ob quod fastidium quatriduò antè alterum amiserant. Quibus posteaquam lacrymis multis, magnaue amoris significatione pro tempore parentassent, ad quietem capessendam ipsi concesserunt. Hic Sextus: Istæ certè tragædia tam luctuosa est, quàm quæ maximè. miseri mortales quantis, & quam per acerbis ærumnis obnoxii sunt. ego proculdubio in tam calamitoso itinere haud longum durassem. Intereà loci dum hæc diceret, puer intervenit, nunciatque tabellarium quendam venisse Stabiis. Cui ego: Duc intrò. Qui ubi ad me accessit, literas porrigit. erant hæc missæ à Præside, qui mihi phialas aliquot vini delicatissimi dono miserat, & surpiculum pyro falerno benè plenum. Tum ego,

E

Sext-

Sexto, & Balbo: Sinite, quæso, ut humanissimo viro, atque amicissimo respondeam, & gratias plurimas agam pro munere, quod vobis spero fore gratissimum. Tum illi: Impò rogamus, ut facias, & nostro illum nomine plurimum salutes, verùm hoc pacto, ut reliquum deinde fabulæ enarrare contendas. Quibus tum: Narrabimus crastina, quod enim superest, multum est. Et illi: Placet. Statimque ad epistolam conscribendam me confecto.

C A P U T VI.

Dum in hypæthra ad placidissimos Zephyri auras consistimus, interrupta ab istius die de Lusitana navis naufragio, falsa enarratio continuatur.

DE vexo jam ad vesperam die, longior domus umbra multam hypæthrae partem occupat: & quoniam eò loci & prospectus in hortum, & mare patet omne natus & ventorum aura liberis petillant, solio ut temporis, ibi gestatorium mensolam collocare, & quæ scribendo, quæ legendo reliquam die non sine lecto transigere, etenim cum solus dego, vix domo pedem effero, sed totum Mox me habent: si verò socii apud me versantur, ibidem sedemus ad eruditos sermones minimè otiosi, ac frigidissima illa in umbra æstus levamus. Hoc igitur in loco ego, Sextus Neger, & Balbus selesamus eo die, qui proximus à postremo Septemberis est, quæ cum penè totus calidissimus dies esset, tum lenem placidissimo exorto ventura, alioquin non coepisset, quocirca ad eum locum nos alium nostraverat.

Vix sedimus, cum Balbus: Age jam, Parthenie, sol-

solve reliquum, ut tandem tuum nomen expungatur. nam tu nunquam reliquator vocari passus es, quod quidem paucissimi admodum faciunt: qui nisi in nervum coiliantur, nunquam reliquationem persolvunt. Cui tum ego: Intellego quorsum spectet tua oratio rogas ut interruptum de celebri illo naufragio sermonem, instaurem. verum res est satis longa, & vereor ne tandem vobis fastidium creem. Et ille: Imo calidi huius diei fastidia deterges sermone tuo tam facili, tam mundo. Cui ego: At ista benevolè à te dicta, cæterum non sum ego nescius quàm exilis, quàm exucca mea oratio sit. Sed ut ut est, geratur mos hic vobis (erit hoc unum laudabile quidem cerrè) quos unicè amo, tum vestram ob indolem penè divinam, tum propter observantiam, qua me colitis. sed telam retexo jam. Postquam ea in insula (tenetis enim quò loci confederant) diem unum, geminasque noctes transduxerunt, illecti, ut dicebam, copia pabuli, iter iterum orditi sunt secundum litus Æthiopici Oceani, & ut ipsi credebant promontorium versùs, ubi Batavorum colonia ædificata erat. Verum antequam viz adeo incertæ, & eorum, quæ ad vitam saltem pecudum more tolerandam necessaria, nihil penè habenti, se committerent, magnam concharum copiam collegerunt. ad levandam verò sitim salutare consilium excogitarunt; Erant in insula quædam siccæ arbores non exiguæ magnitudinis, quæ instar arundinum inter utrumque nodum cavæ erant. his igitur ruborum vice usi ad ferendam aquam sunt. firmato igitur inferiore nodo, ne aqua diffunderet, quod vacuum erat internodium repleverunt: ut haberent singuli toto illo die, quo sitim explerent. qua nullum majus tormentum in toto illo itinere perpessi fuerant. Hic Balbus: Solertissima, inquit, inventrix necessitas: qua

monstrante, plurimæ homini artes datæ: unde ortum
vetus illud ,

Χρηὸν διδάσκει, καὶ ἄμυστος ἦ, σοφὸν.

At Sextus: Acutè, & eruditè Balbus: & ut tanti magistri discipulum decebat. Cui ego: Omittamus nugas. neque ea res est, ut jocos patiatur. Visum gubernatori est (ut equum stimulem juxta lineam) præruptum illum montem, qui planitiem terminabat, conscendere; ut ex illius vertice circumspectantes speculari possent omnem circa regionem: & sic vel coloniam conspicerent, vel aliquod saltem de illa indicium haberent. Hac spe proposita, haud difficile cunctis suadere fuit, ut montem quantumvis arduum, atque altum illicò scanderent. ceptum igitur magnis animis, magnoque conatu in suprema montis juga conscendi. quò verò faciliùs conniù evaderent, dextrà iter institutum, quà non adèò præruptus, atque difficilis mons erat. quo in monte præter paucas herbulas, & flores hac, illac sparsos, nihil omninò repertum est. neque è summo jugo coloniam, neque promontorium Bonæ spei conspexerunt. quocirca tristes, & minus alacres ex illo in subjectam planitiem descenderunt. Hic Elephantum gregem non procul pascentem vident: erant ad viginti: inter quos quidam insolentis oppidò magnitudinis. fluebat juxta montem rivus: ad cujus ripas appetentem jam noctem transigere commodum visum est; tum propter aquam, tum quia, cum ad alteram ripam Elephantes essent, videbantur ab illorum incurû bustuti. Hoc loco Sextus: At Elephantes mitis indolis. Cui ego: Postquam domiti, cicuresque facti: prius enim quam dormientur, ferociunt miro modo. at pergamus porrò. Hic cùm diu oculos circumtulissent, nihil omnino cibi invenerunt. quædam enim herbæ tam amaræ erant,

quam

quàm absinthium, ut illis vesci, et si maximè velle or, neutiquam potuerint. Quidam Siammensēs serpentem venati, vix semitoctum unà cum pelle ossibus, & capite avidè manducarunt: tantaque affecti voluptate, ut nunquam aliàs tam delicato se pastos cibo meminissent. Hic Sextus: Serpentem? phy! Ego, certè numquam illum edissem, edissem autem? imò ne attingissem quidem. Cui ego: Manducasses libens, si te fames, quæ Diomedæa necessitate fortior, ad id faciendum compulisset. dummodò vivas, quid manduces parum interest. verùm ea res est, & tam breve tempus, ut properandum censeo.

Secundo mox die, ex eo loco paulò tardius, quàm consueverant, digressi sunt. quoniam enim circiter Auroram ingens, & densa nebula latè finitorem occupaverat, ut vix se mutuò cernerent, differre ideirco profectiōnem compulsi sunt. At mille vix passus confecerāt, cum derepente impetuosissimo ventus turbine exortus est, qui præterquamquod gelidissimus, inque os rectà perflaret, adeo vehemens, ac violentus erat, ut ultra progredi præ impetu minimè quirent. Hic Balbus: Vehementior fortasse illis præ fame languidis, ac penè flaccidis videbatur. Cui ego: Verisimile quidem certè. ut ut verò se res habuerit, coacti sunt modò ad dexteram, modò ad sinistram obliquum iter tenere, ut sic obliquo pariter vento, atque ob id minus valido obistere potuissent, atque ulterius progredi. Secunda hora pomeridiana, vehementissimus ventum imber subsecutus est: & tam largus, & continens, ut nonnisi cum Sole desierit. tam gravis, tam violenta, tam præceps aqua decidebat, ut omnes quod daretur modo in tuto se ponere pro viribus conarentur. quidam in concava rupium sese trudebant. quidam sub siccis arboribus occultebant, quidam alii,

quibus nullum dabatur perfugium, dorsum arboribus applicabant, ut tempestatî, pluvizque minus expositi, obnoxiique forent. incredibile profectò est, quot miseri cruciatus tum à vento, & frigore, tum à pluvia, & humore toto illo die, & proxima etiam nocte perpessi sint. accedebat tot malis longior appendix, fames, quæ vacua prorsus viscera crudelissimè distorquebat. sicim pluvia illa (hoc unum commodi attulerat) aliquo modo sedeverant. Quæcumque præteritis diebus toleraverant, etsi acerbissima, haud equidem in malis numeranda videbantur, si cum his componerentur, quibus eo tempore divexabantur: tremere, algere perflui, vigilare, imò nè cubare quidem perpetuum ea nocte fuit. Latrabant præterea inanitate viscera, artusque consumebantur: nec tantis, & tam maximis ærumnis lenimen aliquod præsens erat. tam prolixa miseris nulla unquam nox illa visa est. Qua tandem exacta, quàm debiles, exucci, macilenti essent, vos ex vobis met ipsis coniicite. At illud Siamensibus ultimum profectò malorum accidit, quod Lusitanos, qui multo antè digressi erant, minimè cernerent: & licet hæc, illac circumspectassent, atque identidem exclamassent, ne postremum quidem illorum videre licuit, neque unquam vocem respondentis ullam exaudire. imò nec quàm viam tenebant, conjectare valebant; quare illos ass qui desperabant - quod summum illis mærorem, summam attulit solitudinem. quot quot antea ærumnas, ac mala passi erant, cuncta tum in eos uno impetu ruere videbantur. fames, sitis, lassitudo, tristitia, formido, ira, desperatio, facto velut agmine in illorum pectora irruerunt. sese mutuo tristes, taciti, ac penè mortui intuebantur. nec quisquam affari socium præ animi solitudine audebat. Tandem legatus magni vir animi, & facundus apud suos loqui orsus

orsus est: atque his illorum animos exivit.

Satis bene percipitis, socii, in quàm calamitosum, ornatumque miserrimum nos rerum statum fortuna conjecerit. post durum illud, atque infelix naufragium, ex quo non quàm præfenti Numinis ope, ac miseratione servati sumus, quamvis multa, & ea non pauca perdidderamus, restabat tamen aliquid solatii, quo aliquantulum ærumnas levaremus: dum enim nobiscum futurani erant, habebamus duces itineris, comites malorum, & præsidium tum contra Elephantum cæterorumque monstrorum immanitatem, quæ plurima hæc vastas solitudines incolunt: tum contra barbaras terrarum harum gentes, quæ feris ipsi crudeliores atque immaniores sunt. cum vero tam bene de nobis litæ usque meriti sint, haud sanè credendum, siæ causæ, ac necessitate nos tandem reliquisse. Nunc nos præ principem legationis, sciam cum auctoritate, cum non litate quam maxime veneramus, & cum nos omnes primas deferrebamus, in horrida illa, ac vastissima litidine fortis arbitrio, & tum ferarum, tum barbarorum immanitati deferere coacti sumus: ea certe, si illi esset spe, fore, ut brevissimi succurreremus: quin undè aliorum nostratum, qui nobis, quàm sui caritate, cum moribus erant chari simi, amissione expectamus? tamus, quàm ingens telum necessitas, & quàm durum legem perirebat, qui urgente subvene quibus ut non possis: ut & perire illis poterat, & nullum omnino opem ferre tum concessum, paratis. Quia nos non accito, nec insperato de suavis profectus consilium damno, quod fuisse laudabilem, & salutem potius nosti, ut avertire: sed qui legem de nobis met ipsis, nostraque pericula querit, hanc, quæ una in causa est, cur de horum discessu nihil per sensimus, ut illis sequeremur. De festo munione

officii, & charitatis, nos, quos de profectioe monere debuissent, reliquerint; haud equidem querelarum nunc tempus: neque impendentibus malis obviamus declinaturi, cum de illorum non servata erga nos fide, deque animi, levitate ne dicam, an duritie? conquerimur. Omittamus, quæso, istæc, quæ nihil prorsus ad inveniendam viam, nihil ad salutem profunt: dilacerant certè animum, minusque ad labores tolerandos promptum, alacremque faciunt. Et quod necessitate pati cogimur, virtute feramus: atque ita in præsentī casu nos geramus, ac si nunquam illos comites habuissemus. Anne id illius numinis consilio factum est, qui cælum, & terras sapientissimè moderatur, ut sic nos omni humana destitutos ope, sua nos providentia gubernaret? id verò ob nostri regis merita, cujus jussu navigationem in Eutopam tam perarduam, ac perdifficilem, tot per Oceani sinus, & tot periculorum refertissimos, suscepimus, fieri potuisse credo equidem. nihil enim temerè, & sine Dei consilio evenire quis ambigat? Quæ quidem opinio ita mihi animo insedit, ut ad benè sperandum inducar miro modo. arripiendū igitur iter est, ne pluribus vos morer; quando periculum omne mora est. Quod verò rebus omnibus præferre debemus, de quo si certus essem, cætera, quæ me manent, acerba quantumlibet, nihil omnino curarem: testes vos mihi universi, quanta ego observantia, quanta cura, sollicitudineque magni nostri regis literas, quas Lusitano mittit, colue- rim, custodierim, atque à tot casibus vindicaverim. In illò immani naufragio prima, atq. unica mea cura fuit, ut illas ab undarum injuria defenderem; ita ut meam illis vitam minimè prætulerim. quin etiam illis præ literis cuncta posteriora habui: & debebam equidem. meam enim salutem, quam tam præseorsim bene-

beneficio impertitus mihi Deus est, nostri regis fortunæ, meritoque acceptam refero. ad quem qui semel accessit, vidit, eoque est dignus honore habitus, ut terram, quam ille sua præsentia sacraverat, deoscularetur, beatus certò, fortunatusque censendus est. Ex quo itineri nos dedimus, vidistis vos ipsimet. quanta ego reverentia, illius literas, divinum pignus, mihi creditas, tractaverim. cùm in montibus confedebamus, ego illas in editiore vertice collocavi, ut suprà omnium nostrorum capita essent; meque inferiùs locabam tanta distantia, quanta satis esset, ut illas tueri, ac vindicare ab insultu potuissem. cùm verò in campis stationem figebamus, in altissimorum arborum verticibus alligabam. interfaciens meis illas humeris impositas, quovis thesauro pretiosiores circumferebam. Quia verò dubius de salute sum tot inter discrimina constitutus, jubeo, mandoque meo collegæ, qui tertius in legatione est, ut me è vivis sublato, eandem ipse curam suscipiat, ut tandem salvæ, atque incolumes ei reddantur, cui inscriptæ sunt. quod si neque ipse, ferente sic fato, ad Batavorum coloniam vivus perveniet, alio è nostratibus curam committat. si verò contigerit (eò enim loci sumus, ut una omnes fors verferet, & periculis expositi ex æquo cuncti ad unum sumus) ut universi in hisce desertis vel fame, vel ferarum dentibus, vel Æthiopum manibus mortem oppetamus, qui postremus fato concedet, sacram hoc pignus editiori in loco infodiat, ut sic ab insultu securum: in eodem mox ipse loco beata sorte moriturus occumbat: ut hujusmodi officio summam, quam regi debet observantiam, testetur. His autem ità constitutis, bonis velut avibus iter auspicemur: & quò nos Fata, & regis Fortuna vocat, præsentī animo, alacrique gradu eamus. Hic Balbus: Magna pro-

perfectò regem observantia Indi colunt, ut tantam de illius epistola curam suscipiant. utinam sacras nos literastanti faceremus. nempe sic hominum natura est, ut plus superstitione, quàm religione ducantur. Cui ego: Egregiè tu quidem, Balbe. At Sextus: Miror sanè ingenium hominis: nec certè aspernanda in barbaro eloquentia. Cui tum ego: Natura homines facundi omnes: ut & ingenio præditi omnes sunt, quod si exercitatio accedat, nihil est, quod desideres. Et ille: Ità verò sed quid tum postea? Et ego: Hæc oratione, quasi cithara ad bellum, ut dici solet, adeo erecti, confirmatique sunt, ut alis statim additis, mira alacritate iter aggredierentur, Erat lævâ objectus itineri altus, ac longus mons, collis verò dextrâ, quoniamque mons nimium præruptus, consensuque difficilis videbatur, arbitrati Siameses, neutiquam Lusitanos adeò debiles, ac defatigatos illac iter tentare potuisse: & licet per montem recta via videretur, tamen quia illum superare se posse minimè sperabant, dextrâ stectentes, collem conscendere adorti sunt. Et quamquam ipsi magnis itineribus se progredi viderentur, nihilo tamen minus, haud multum spatii conficiebant, quippe viribus penè destituti; Jam dimidiatus ad umbilicum dies erat, eum nescio quem amnem reoverunt. Hic animi dubii, an fluvium Lusitani transmississent, parum per hæserunt. nam etsi non adeò largus, vix enim LX. pedes patebat, altus vero ad VII: vehementissimo tamen cursu profuiebat. mox resumptis animis, captoque. ut ajunt, in arena consilio, vadum tentare decreverunt. aggressi statim animosissimi quique, & præ cæteris minus debiles. verùm adeò rapidum experti sunt, ut ni statim pedem retulissent, abrepti illicò à profuente, procul dubio fuissent, verùm adhuc dubii de transitu

Lu-

Lusitanorum, hoc inventu superare amnem posse arbitrati sunt. nimirum facile credimus, quod volumus. in unum omnes, quotquot habebant, fascias colligarunt, mox robustissimus cunctorum, dicam verius inter tot macilentos minus debilis, in alteram ripam enare iussus, unà cum capite illius ex fasciis funiculi, ut scilicet illud ad aliquam arborem, quæ plurimæ ripas obumbrabant, alligaret, alterum verò caput ipsi tenerent. deinde hoc adminiculo facile fluvium reliqui tranarent. At hic vix ad medium amnem venit. cum in transversum præaquarum violentia penè actus est, quocirca fasciam relinquere coactus est, ut in alteram se ripam deduceret: quam quidem summo labore, & periculo, nec omnino incolumis tandem apprehendit. siquidem ingenti vi aqua, fluxuque decurrens in prominentem illum ripæ angulum tanto impetu collisit, ut penè humeros confregerit. Mox fluvio egressus, & secundum ripam ascendens ex adverso sociorum, alta voce admonet, neutiquam fieri potuisse, ut amnem tam præcipitem Lusitani transnassent. tandem cum superiora fluvii loca, ubi minus rapidus credebatur, ad suos rediit. at tanto vitæ discrimine, tanto connisus labore, ut majore haud quaquam potuisset. Cum igitur Lusitanos fluvios nequaquam transmississe pro certo haberent, secundum illius ripam fontem versus ire decreverunt. At igitur aqua fluvii levata, cibo famem non quivere: nihil enim toto illo die, quod gustari vel à brutis posset, invenerunt. propter amnem, ut constitutum erat, iter fecerunt, atque in ulteriora profecti, mo passibus exactis, in declive vestigiis hominum tritum inciderunt; quò facile persuasi illuc Lusitanos iter habuisse: quæ læti, atque alacres opinione, ire perrexerunt. inque montis cujusdam radicem delati sunt. Mons in ima

radice cavatus erat: idq. ut verisimile, natura factum, quo nimirum commoda interficientibus sedes præberetur. Hoc Sextus loco: Facile id in animum induco: provida quippe natura est, & plurima, quæ homines casu evenisse dicant, ego illius facta consilio, ac magisterio arbitror. Cui tum ego: Prudentèr tuquidem, Sexte: semper enim Natura in mortalium commoda, atque utilitates imminet. utinam sic homines grati erga tam providam parentem essent, ut illa est in nos benivolentissima. Hac igitur in specu, quæ satis ampla erat, omnes ea nocte, quæ jam ingrebar, stationem habuere. quæ quia frigidissima fuit, pœnarum sat miseris attulit. Quidam ex ipsis fuisse, quibus adeò crura intumuerunt, ut nec caligas, nec calceamenta induere valuerunt. quod molestissimum morbi genus quammaximè crevit præ nimio frigore illius noctis, præque rupis, in qua requieverant, humore. imò excirari, pulverem quendam è pedibus exhalatum, aqueum, spumosum animadverterunt, nempe præ frigore pedes quasi lapidescerent. & sanè vix illorum uti munere poterant: nec nisi summus vitæ amor stimulos addidisset, ultrà progressi forent. Mirabile illud profectò, quod ipsimet fassi sunt, quò plus pœnarum exhausserant, eò magis vitam tueri, ac producere summo conatu, diligentiaque studebant. Nihil mirum, hic Sextus: nempe misera quantumvis vita sit, chara tamen mortalibus, quibus nihil illas optabilius, nihil præstantius datum est. sed perge porro, cætera expectamus. est enim historia mira, & curiosa: ut non vulgaris de illa tragædia scribi possit. Tum Balbus: Fortasse meditatur id Parthenius. certè aliquid in hoc genere ab illo desideratur. Cui ego: Hanc aliis spartam relinquo: satis enim (ut de me ipso aliquid gloriè, ut senes consueverunt) ligata oratione scri-

scripsimus. Et illi: Id tibi negabit nemo. imò unum ex tot tuis operibus satis erat ad unius ætatem hominis. et illud miramur magis, quod adversa semper valetudine, & tot curis distentissimus tot libros scripsisti. verū nimis citò vis senescere. scimus enim præsentē annum, qui senescentis jam seculi xcvii est, ætatis tuę esse xlix. Quibus ego: Non inficior. at ego illum senem puo, cui non multum vitæ superest, tot ego morbis, tanta corporis imbecillitate laboro, ut diu vivere, sperare non possim. At nos, tum illi, ut quàm diutissimè vivas, deque nostris tibi Superi quàm plurimos annos adjungant, votis omnibus opramus, & magno, ut faciant, rogamus opere. ut qui non tam te tibi, quam nobis, patriæque vivere intelligamus. Tum ego: Mittamus nugas: joculari tempus non sinit. contendam ergo statim ad cetera. Et illi: Hic stamus. Ad narrationem ego, à qua deflexeram. rediens, sic illius filium iterum retexo: Profecti post Solis exortum (obstitit rigor aëris ne tempestivius iter exordirentur) eundem præter amnem, quem præterito die, quasi viæ ducem secuti erant, iter susceperunt. ea etiam adducti spe, fore ut tandem Lusitanos assequerentur: quos non procul abesse non sine probabili conjectura existimabant. ex intervallo enim quædam illorum vestigia, ac signa observabant. Ad vcc fermè passus à rupe in qua noctem duxerant, quidam scelopum cum bursa pyrio pulvere benè plena nactus est, quem sine dubio è Lusitanis militibus aliquis, qui illum præ lassitudine gestare non amplius poterat, eò loci reliquerat. Sic disponente Numinis providentia, ut & ille relicto levaretur onere, & hi invento sublevarentur. & mirum oppidò quanta hi læticia affecti sunt: & quantam ex illo utilitatem perceperunt. relicto illico ligneo canali cum ærea canna: quæ & onus erant, & usui esse non

op-

poterant, igniarium cum pulvere ad accendendum ignem acceperunt. Quoniamque ex quo fluvii cursum fontem versùs sequi ceperant, nihil omnino gustaverant, ut jam præ fame exangues laberentur; idcirco accenso statim igne soleas calceamentorum, quæ usui ob pedum tumorem plerisque esse non quibant, & ferre onus illud cogebantur, singillatim dissuas torrere adorti: utque benè tostæ, avidè deglutiunt; nullo tamen gustu: quippe pelles adeò siccæ, ut nihil admodum succi haberent: sed satis voluptatis afferre videbantur, quod non essent amaræ. Hic Sextus: Usque adeò imperiosa fames: nec quidquam tam insolens, ad quod homines non cogat. quare tu optimè in Bellicis hæc habes; quæ patiare, quæso, ut recitem.

*At quia non vallum, non urbes faxeus agger,
Plurima nec turris potis est cuneata tueri,
Non acres animi, non robora dura lacertorum
Atra fames quando (qua nulla potentior urbes
Vis inimica quatit) validos non ariete muros:
Non igni, aut ferro, non fulmine: sed fera molli
Languore, & macie pallescens irrui: & se
Tardando licet insinuat moritura sub arcus.
Fortia quæq; domat, petit ardua: cuncta recludit
Occlusa, & contra licet obsistensia frangit.*

Cui, ut recitavit; laudo memoriam, cui si exercitationem adjungeres, plurimam sanè eruditionem adipisceretur. Et ille: Tam citò te vindicas? sed mihi lucrum est à te admoneri, & corripi, quem scio benevolentissimum mei. tum enim corrigi, castigarique durum oppidò, & nihil prorsus utilitatis affert, cum non id patria charitate, sed vel impotente ira, vel acri vindictæ stimulo fieri certò animadvertimus. sed quid facias? velis, nolis, quando Themidi non est locus, æquo feras animo necesse est. cui ego tolerantie jamdiu

diu assuevi. Tum ego: Benè facis: ita enim paratum animum habere oportet. At non illos intra fines semiserorum fames continuit (ut ad illos redeamus, à quibus digressi sumus) verum vehementius urgebat, ut pileos etiam comedere tētraverint: sed inutili conatu. quamquam enim ad cinerem usque decoxerint, nullo pacto comesse potuerunt, nam adeò amari, atque odiosi, ut stomacho quantumvis famelico, magnum fastidium crearent. sed in viam se quoniam rursus commisere, sequamur. Non multum spatii absoluerant, cum juxta fluvium ad cujus ripam gradiebantur, unum è tribus interpetribus, quibus antea usi erant, quique Lusitanos secuti fuerant, mortuum invenerunt: qui genibus terræ nixus, manibus supra caput compositis, reliquo corpore cespitibus incumbens, jacebat. &, ut conicere facile erat, non multum ante diem obiverat, quo aspectu territi, & quasi jam quid de ipsis brevi futurum esset, oculis, animoque contemplantes, tristes admodum subistere. mox levati paululum, quod eo iudicio certiores fierent, illac Lusitanos iter habuisse. Hic Sextus: Nempe animus in miseriis ad boni speciem, offeratur si forte, facile divertit. unde illud Lucani,

Sens sine bonorum

Anxia venturis ad tempora lata refugit.

Cui ego: Eruditè tu, Sexte, & acutè; euge, palmam obtinuisti. Et ille: Nimirum mihi caput demulces quasi puero. sed properemus domum. Et ego: Attendite igitur. Tam procul à fluvio campus tum amœnus, cum viridis, rarum oppidò in illiusmodi solitudinibus, erat, quare ibi tantisper gradum figere visum est. ut ex herbis, quæ minus amaræ essent, colligerent pro cœna, appetente jam vespere. deinde eandem ingressi semitam, illac iter prosecuti. quod
ma-

maximo jam tædio esse cæperat: & eò præcipuè, quod nunquam Lusitanos, qui continuò præibant assequerantur. nemo unus erat, quem susceptæ navigationis non pœniteret. Hic Balbus: Qui secus fieret? sic sumus homines, ut rei malè susceptæ statim pœniteat. at si periculum evadimus, quasi nunquam subiissemus, ad eadem redimus. atque hinc illud in vulgus, Nautarum vota. Cui ego: Ità prorsus est, ut dicis. Sed pergamus ad reliqua. Ingens miseros; desiderium invasit illius insulæ, quam quatrìduò ante reliquerant: & ubi magna concharum copiam, & salientem quàm pergratissimam repererant. nunquam enim in toto illo calamitoso itinere, vel suaviùs potaverant, vel delicatius pasti fuerant, quam ibi. magna igitur cunctos ægritudo, magnus mæror corripuit: hinc querelæ, lamenta, luctusque exaudiebantur. quæ factò jam vespere, latius increbuerunt, cum in bivium inciderunt: ex quo duo itinera difficillima, & utrum Lusitani arripuissent, noscere poterant nullo modo. hinc præruptus mons, & verticosus, adituque difficilis, illinc effusæ è proximo fluvio paludes, quibus planities universa obruebatur. Hic cum noctis plutimum in deliberando consumpsissent, in hanc tandem sententiam itum est, regredi ad insulam, ibique triduo, quatrìduove refici, ac recreari cibo illo delicatissimo. Hoc loco Sextus: In quam miseri calamitatem delapsi erant, ut illiusmodi insula, in qua præter aquam, & marinas conchas, deserta in Oceano nihil omnino erat, quod optari posset, illis Elysium, Tempe, Alcinoi, Hesperidumque horti, etsi quis alius est beatus locus, videretur. sed age, quid inde factum? Sperare interea, ut de Lusitanis, inquam tum ego, aliquid audirent. quod si nullus de illis rumor percrebuisse, barbaros illos, Æthiopes quæsitù ire, seque illis mancipio-

cipiorum loco tradere, si tamen admitterentur. nihil enim adhuc restabat, quod fame illa, qua ad necem acerbissimam torquebantur, pejus expectarent. misera sanè conditio, nobiles homines, principes viros, spe vitæ, et si miserrimæ, felices se existimare, si vilissimorum mancipiorum loco, genti omnium quoque vivunt abjectissimæ, atque abominabilissimæ servirent. Hoc igitur capto consilio, ubi primùm albicavit, statim iter moliti sunt. tantumque alacres, robustique insulæ illius desiderio facti, (alit spes animos, & vires facit) ut quod vix quatrīduo prius iter confecerant, nunc intra trīduum absolverint. Ut tandem insulam, prospexerunt, tanto repente gaudio affecti, ut non majus percepissent, si transmissio Euphrate, in fortunatissimos illos primi parentis deliciarum hortos pedem intulissent: Nihil moræ interpositum, continuò quisque summa diligentia, summoque conatu in insulam vadare adnissus est. verùm omnis diligentia, conatus omnis incassum cecidit: refluens enim Oceani æstus aditum intercluserat. Est autem hujusmodi insula, seu veriùs scopulus, ni rupem malis dicere: quæ humilis est, & rotunda, cujus circuitus, cum æstu refluente, crescunt aquæ, passuum est circiter c: ubi verò aquæ subside, plurimæ circum cautes assurgunt, quæ rupem intercurrunt. è continente in insulam arenosus est isthmus, qui influente mari, totus obtegitur. & id temporis, quo illac pervenerunt, ad Oceanus pedes attollebatur: refluente mox mari isthmus universus conchis, cancris, cæterisque hujus generis refertissimus. Transmisso igitur isthmo, simul atque æstus recessit, in insulam miseris hisce naufragis verè fortunatam itum est. Prima cunctorum cura, (urgebat fames vehementissima) conchas comparare, seque illis saginare, fuit. copiosam igitur illarum vim

collegerunt . cuius partem ad Solem siccandam exposuere , ut nautici vice panis secum asportarent . quod consilium postea perquam salutare experti sunt quia verò nonnisi perpaucula admodum arbuscula in illis circum rupibus adnata , vix tantum alere ignis poterant , quantum ad coquendas illiusmodi conchas satis esset , vimque nocturni frigoris , quo maximè algebant , propellendam , quidam lignatum in interiora solitudinum profecti : nihil tamen nisi dentes Elephantū , eosque plurimos invenerunt : adeo circum regio illa deserta erat , & squalida . undique vel nudi , ac prærupti lapides , vel arenosi , squalentesque campi omni prorsus frutice vacui conspiciebantur . nihilominus modicum ex eborescentem ignem triduo alere concessum fuit . Hic Balbus : Pretiosus verè ille ignis erat . Cui ego : Nempe miseris illis vitam fovebat : ceteroqui fumidus , & graveolens .

Postea verò quàm quinque in illa insula dies versati sunt , de profectioe cogitare cesserunt . expellebant namque eos nimia vis frigoris , atque lignorum inopia , proficisci igitur , etsi egro animo , cunctis visum est , & barbaros illos Æthiopes vestigatum ire , ut apud illos precario viverent . si tamen vitam sperare ab iisliceret , quos omni natura humanitate exuisset . quæ quidem cogitatio mitum quantum illorum animos lacerabat : se nimirum eorum arbitrio committere , & suam illis operam ad vilissima quæque ministeria locare , quos magis efferratos , ac barbaros universus terrarum orbis non alebat . verum tantus erat vitæ amor , quàm è tantis periculis , & cruciatibus hactenus vindicaverant , tanta spes fore , ut tandem è præsentibus malis evaderent , ut nihil tam immane , tam barbarum , quod non subiissent . Postquam igitur sex dies deserto illo in scopulo ad orium sederunt :

si m-

stramen orium est, quo vix vita traducitur, septimo discesserunt summo dolore animi, quo copiam illam concharum, & gratam sibi salientem, quibus unis re-
fecti aliquo modo erant, defererent. futuro tamen providentes (docti præteritis erant) tantum siccatum concharum, atque aquæ secum tulerunt, quantum portare singuli poterant. Primo die ad salsum juxta montem stagnum, ubi antea stationem fixerant, ventum est. quo die, cum nihil pabuli reperissent, viatico illo maritimo, vixerunt. Secuto deinceps die, ante quam se in viam darent hac, illac sparsæ herbas scrutati sunt. nam etsi viatici reliquias haberent, illas in posterum, cum major urgeret necessitas, servare cogitabant. quidam lacum perscrutati, si quid piscium aleret, operam luserunt; nihil enim nisi putidum muscum invenerunt. Interea loci dum hac, illac vagi ad pabulum more pecudum errant, qui secus stagnum erant, tres ad se venientes Æthiopes conspicati sunt. quare illico signo dato, ut sese inter convenerant, congregati sunt. atque ita Æthiopes magnis ad se gradibus festinantes opperiuntur. ut propius accessere, ex illis esse, qui cum Europæis commercia exercent, Siamenses deprehenderunt. Hic Balbus: Sed quibus indiciis id conjectare poterant! Cui ego: Mane, istuc ibam. ferebant calamum Nicotiana fumantem fronde, quo hi tantum Æthiopes utuntur, qui cum Hollandis, ac Lusitanis, qui Africæ oras incolunt, societatem inivere. Principio summopere, utrimque laboratum est propter linguæ diversitatem. neque enim Siamenses quid sibi vellet Æthiopes, neque hi quid illi, intelligebant. mox Æthiopes sex digitos erectos commostrantes, Hollandiam, Hollandiam inclamabant, atque iisdem digitis iter indicantes, ut se sequerentur certis quibusdam signis admonebant. Anxii Siamenses quid

tum sibi agendum esset, diu steterunt. quidam existimabant hos speculatores esse illorum, in quos primum inciderant, qui eos proculdubio trucidassent, ni multitudinem, & sclopos pertinuissent. alii quorum credula spes erat, nec sanè à veritate errabant, illos sex digitis erectis significare velle sex dierum itinere Batavorum coloniam abesse, existimabant. tandem postquam diù deliberatum est, cunctis Æthiopes sequi placuit: quidquid inde futurum esset, æquo animo ferre. eo enim rerum statu erant, ut nihil pejus timere possent: & quidquid passuri fuissent, infra ea fore, quæ iam perpassi erant, atque in præsentiarum patiebantur. Attulerant secum Æthiopes arietis quadrantem, quem ab illis Siamenses perierunt. nec abnuerunt barbari, dummodo pretium solverent: cumque hi sine præmio se esse iudicassent: illi globulos aureos, atque argenteos, quibus tunica adnectitur, postularunt. quibus illicò datis, arietis carnem acceperunt. quam statim semitostam manducaverunt.

Vix refectioni jentaculo tam sobrio, ac frugali (quid enim unius armus arietis inter quindecim ex longo famelicos?) iussi sunt ab Æthiopibus iter instaurare. & quo gradus grandirent suos, ut primi præirent. verum etsi inhumani illi homines (sì tamen homines appellandi, quibus præter figuram, humani nihil inerat) omni studio conati sunt efficere, ut præcederent, id tamen nullo pacto assequi potuere, adeò debiles, & defatigati erant. quare ipsi ire primi perrexerunt. Quoniamque lentissimo, atque expenso veluti gradu, Indi incedebant, retrò conversi quæ ululatu, quæ gestu urgere conati sunt. at frustrà annosum, & præ fame languidum cantherium stimulis urgemus. tandem ad montis cujusdam radicem ventum est. hic Siamenses requietem capere decreverunt: at Æthiopes, qui ro-
bu-

bustiores, & cursui assueti, in jugum evaserunt : & ut illuc Siamenses conniterentur, magno clamore hortati sunt. hi verò omnibus penè viribus destituti id conari quivere nullo modo. Imo septem ex universo cætu secuto mox die vix movere pedes, imò vix cruribus insistere valebant. & licet semel iterum, ac tertio se movere conniterentur, ne pauxillum quidem progredi potuere. quocirca reliqui consilium inivere, quid ipsis in re tali agendum esset. tandem post pauca (neque enim tempus, & res ipsa plura patiebatur) eò loci socios relinquere statuunt. sic enim salvari omnes posse, si secus cunctos perituros nullo communi lucro. cumque ipsi in coloniam venissent, quam certò non longè arbitrabantur, missuros statim ad eos, qui tutò, & commodè deducerent. assensere debiles dura impulsu necessitate, quando vellent, nolent, aliter fieri nequibat. His igitur non sine mutuis lacrymis valè dicto, quod & extremum esse poterat. reliqui ad Æthiopes, qui benè manè eos excitaverant, conversi. priùs tamen, quò socii sustentari interea possent, siccarum partem concharum reliquerunt: si quid aliud opus esset, ipsi quærerent.

Interea Æthiopes acceptis ex igne, quem diluculo, ob frigus rigidissimæ noctis excitaverant, extinctis carbonibus in foveam, quam ad id extemplo effoderant, illos conjecerunt: deinde postquam (scdum oppidò, ac barbarum: est tamen operæ auribus audire, ut hinc quàm salaces, atque immundi illiusmodi homines sint, cognoscatur) unà omnes in foveam minxerunt, urinamq. cum carbonibus tandiu permiscuere, quoad liquidum quasi ungentum effectum est. hoc deinde quasi balsamo totum corpus unxerunt, more patrio, ut verisimile est. adeò in brutas pecudes degenerant homines, ubi vitilis obruta ratio, atque extin-

Ita est. Hic Sextus: Barbarus sanè mos, ac sordidus. At ego neque eos laudo (paucissimi admodum sunt) qui ad veletudinem tuendam, ut falsò putant, se totos oleo perungunt: & nescio quo odorum suffitu graveolentissimo delectantur. adeò enim graveolent, ut modè dicam, ut ne aspectum ipsorum ferre possis. hi, nime fallo, ab Æthiopibus hisce, non longè absunt. Cui ego? Quid facias? trahit sua quemque opinio, & interdum etiam sapientes errant. & ut tritum illud, suus cuique crepitus benè olet. Sed redeamus ad Æthiopes. Elegantissimo illo, ut dicebam, modo compti se in Siamesium conspectum dederunt, & ut tandem iter aggrederentur, admonuerunt. quoniam verò hi lento gradu incedebant, illi huiusce moræ impatientes, ut sese ocys moverent omnibus modis impellebant; sed nihil obtinebant. quippe ex illis morbus erat, quibus frustra medicina adhibetur. qui enim fieret, ut penè mortui curriculo currerent? id erat velle, ut testudo volaret. verùm quis à barbaris æquum expectet? Tandem Æthiopes indignati, patientiam abruptunt: dique inter se collocuti, duo celeri gradu abierunt, tertius remansit. qui paulo humanior ità Siameses comitatus, ut illorum se passibus accomoderet: & cum illi defatigari tantisper subsistebant, continebat se pariter ipse ab itinere, & quantum illis videbatur. atque hoc duce sex dierum itinere, quibus acerbissimos cruciatus, nec minores præteritis tolerarunt, ad Hollandos devenerunt quo tempore siccis conchis, & herbis victitarunt. habuere etiam in deliciis locustas, & quoddam insecti genus, quod in cœnosis nascitur, crucis simillimum. plurimos istiusmodi vermes repperunt juxta Elephantorum dentes, quos leviter tostos saporis experti sunt exquisitissimi. Hoc loco Sextus, cui palatum delicatius:

tius: Ego non ita animum induco, ut *sapidos vermes* esse putem: at illis miseris *fames*, quæ, ut ait *Comicus*, optimum est condimentum; illos *sapidos* faciebat. cui ego: Atqui nonne plurimi, qui *vermibus* è *casco* erumpentibus mirificè delectantur? Et ille: *Intelligo*. verum ego istam illis voluptatem libenter remitto. Tum ego: Prohibeant superi ne id experiaris. *audi* enim te de navigatione in *Indiam* cogitare. Et ille: *Nihil minus*. at si majores jubeant, contendam illicò. verum te olim ad *Sinas* ultimos *Asiæ* populos destinatum *audivi*: itane verò? Cui ego: Non inficior. verum dū iter adornor, *subsistere* jussus sum: nempe tantæ felicitatem non eram promeritus. Illi verò: Imò id factum *sapientis Dei* consilio: nam secus non haberemus tot elegantes libros ad *juventutem* erudiendam. Cui ego: *Credite* (ut etiam ad *Balbum* loquar, qui ut *video* tibi suffragatur) *nugæ* istæ sunt, & *puerorum* *nucæ*. plus valet unius *animulæ* *lucrum*, quàm quor quor *hucusque* edidimus, & edituri unquam sumus, *libri*. Et ille: Non oppedo. verum, ut ait *Paulus*, Non omnes *Profetæ*, non omnes *Apostoli*, sunt etiam *doctores*. Tum ego: Quid dicam? *occlusisti* os. verum *absolvamus* tandem aliquando *postremum* *tragœdiæ* actum.

Postquam igitur totos sex dies per altissima, præruptaque juga, quorum vel solus aspectus maxime formidabilis, per profundas vales, & confragosas, per quas præcipientes ire veriùs quàm descendere videbantur, incredibile labore pererrassent. quarto die, ex quo illi duo *Æthiopes* præcesserant, uno verò & trigésimo, à quo iter illud calamitosissimū post naufragium exorsū fuerant, circiter decimam antemeridiā, in summo montis fastigio, quem superare contendebant, quatuor homines cōspicati sunt, quos *Æthiopes* primò

crediderunt . non enim distinctè præ distantia discerni poterant . neque alios esse , quàm Æthiopes unquam sibi animo persuassissent . mox cum utrimque obviam itum est , se falsos summo gaudioprehenderunt . siquidem duo erant Batavi , duo illi ipsissimi Æthiopes , qui quatrduo ante , ut de ipsis ad Batavos nuncium ferrent , magnis itineribus præcurrerant . Quo aspectu tanta lætitia derepentè perfusi sunt , ut mitum oppidò dictu sit . jam enim se esse extra fati aleam , jam ad servatores sui pervenisse , eumque diem ultimum malorum esse , quo velut iterum exorti meliorem in lucem essent . quæ quidem lætitia , in ipsorum pectora pleniori se alveo effudit , cum Batavi , qui celeri gradu properabant , eos assecuti sunt . Qui statim petiere si Siameses essent , & quis ipsorum legatus regis vices obiret . Tum illi , & se Siameses esse , & qui legationis munere fungeretur , indicant . Quem Batavi statim convenientes summo honore acceperunt . mox jubent cum obsonio accedere Æthiopes , comiterque hospites hortantur , ut se reficerent , quando fames , quam tam longo tempore duraverant , moram non patiebatur . illi simul , ac recentem panem , pultes , elixam , vinumque conspexerunt , haud continere se potuerunt , quin statim accidentes illorum genua deoscularentur : eosque parentes appellarent , & quas pro tempore poterant gratias persolverent . Nobilis ille Siemensis , ex quo hanc historiam accepimus , captus tanta Batavorum humanitate , & benevolentia , ut aliqua grati animi significatione acceptum beneficium eodem loci vestigio , & temporis compensaret , singulis singulos adamantes in auro compositos donavit , acceperat hos ille à principe legationis , cum illum sub ipsum penè itineris exordium reliquerunt . Tandem relecti , quod exiguum restabat viæ absolvere conati sunt ,

▲

sunt. verum cum iterum, iterumque procedere tentassent, tanta lassitudine tenebantur, ut ambulare nullo modo potuerint. Et quamquam Batavi eos hortarentur, ut qui tot spatia famelici confecissent, per exiguum illud jam saturi conficere ne gravarentur; nullæ tamen ad id vires fuerunt. iussi igitur Æthiopes in proximam domum ire curriculo, & jumenta deferre. illi haud morati, unum curriculum conficientes: pollent enim mira pedum pernicitate: perque illos abruptos vertices volare verius, quam currere assueti, infra binas horas rediere cum duobus curribus, & equis aliquot, qui usui non fuerunt, nemo enim præ imbecillitate illos ausus conscendere. curribus igitur in proximam habitationem devecti sunt. Est hæc commerciorum causa in montis declivitate adificata, inquam simul, ac veniunt, prima eorum cura Batavos rogare, ut currum mitterent ad eos socios reducendos, quos nuper reliquerant, & vivere eos certe sperabant. quod statim impetravit. missus illico Æthiops cum curru, & iis, quæ ad vitam erant necessaria. ipsi duobus aliis in alteram habitationem delati sunt, Huc statim atque pervenerunt, excepti à militibus, quos eis præsidii loco Batavicæ arcis Præfectus miserat. quibus cum ad coloniam tandem post tot exantlatos labores, post tot decumanas arumnarum undas, quibus jactati, & certa tot mortis discrimina, quæ subiverant, quasi ad salutis portum, refugii aram devenerunt. Atque in hæc Nauta Neapoli rediens cum fasciculo literarum incidit. quem, cum accepissem statim resignavi, quæque Balbo, Sextoque inscriptæ, erant, tradidi. mox singuli ad legendas epistolas, ut siquid novi ab amicis scriptum, animos applicavimus.

C A P U T VII.

Quid Lusitanis in itinere acciderit, ex quo Siamenses reliquerunt, & ad Batavorum coloniam pervenerint. ducisque ipsorum lacrymabilis casus enarratur: & quædam alia quæstionum digna disputata.

BEnè manè de more operatus, Sextum, & Balbum accerso: qui ut præsto adfuere, Descendamus, inquam, in scopulum, ut à prætereuntibus piscatoribus perpàuxillum piscium comparemus. Tum Balbus: Ità, quæsumus (ut etiam pro Sexto respondeam) siquidem ova non sunt nostri stomachi: quamvis enim tu illa butyro condias mitro modo, & recentia sint, & decumana, vix tamen quadrant. Cui ego: Non id me præterit: quapropter eamus. Et illi: I præ: te illicò sequemur. Ut igitur in hortum processi, illi statim secuti. hinc in scopulum perpauculis passibus descendimus. pro cuius mœx acie ad undas sessum est. dum autem expectamus, ità me Balbus interrogat: Quid Lusitanis illis, ex quo à Siamensibus discesserunt? nam heri vespere propter adventum nautæ literarum fasciculum afferentis interruptus sermo fuit. age, quid illis acciderit, exprome. avemus enim (sentio id Sexto pariter gratum esse) illud ex te audire. Tum ego dicam equidem, ne hic otiosi omnino sedeamus: vel nè sensim in domestica obrepat sermo. qui si non lacerat animum, pungit quidem certè. Hic Sextus: Rectè præcaves. age igitur, ad eruditiora illum applicemus. Tum ego: Atque audite: jam telam retexo. Vitacis palustribus ad montana iter flexerunt. tenetis loca? Et illi: Commeminimus, perge porrò. Tum ego per aspe-

aspera illa loca iter facientes incredibile sanè dictu est, quanta lassitudine debiles effecti, ut jam sub ipsius gravi corporis pondere oppressi caderent. tantum membra cuncta intumuerant, ut intolerabilis omnino ex eo morbo dolor exortus sit. additi mox famis, ac sitis cruciatus quammaximi. qua enim via progrediebantur, nec pabuli quidquam, quo cicurare famem, nec aquæ stilla, qua fallere sitim possent, inveniebatur. tam miserabiles erant gemitus, tam horrendi miserorum aspectus, ut vel tigres ad misericordiam compulissent. ad singulos fermè passus plures cadebant, implorabant opem sociorum, sortem accusabant, aquâ cupiebant, cibum inelamabant, ac penè in desperationem acti fremebant veluti insani. & nihilominus ceteri ad torlamenta, & ejulatus erant fermè insensibiles. Hic Sextus: Vix credibile. & fieri poterat, ut reliqui non moverentur tam miserabili sociorum casu, quo & ipsi premebantur? Cui ego: Ne crudeles, ac barbari viderentur, cum quispiam quasi moriturus caderet, qui proxime erat, eum hortabatur, ut se Deo committeret, divinam exposceret opem, quando nulla ex hominibus sperabatur. nec plura addens, præteribat. multi vultus avertebant, ne tam misero conspectu turbarentur: alii occludebat aures ne gemitibus morientium terrentur. magna verò morientium multitudo erat. mortui in illo itinere ad sexaginta. Hic Sextus: Nostras ille certè suo numeri non defuit. Cui ego: Admodum senex erat, cumque laboribus, & cruciatibus sufficere non potuisset, inter primos post plurima edita pietatis signa mortem oppetiit. At lacrymabilis oppidò, & miserabilis casus fuit, qui cecidit in ducem navis, virum apprimè nobilem, divitem, ætate gravem, & magnæ auctoritatis apud suos. huic unicus erat filius, quem in spem domus summa cura,

ac

ac studio alebat . ut verò à teneris annis (vix XII attri-
gerat) mari assuesceret, & mûneri, quo ipse fungeba-
tur sensim idoneus suo sub magisterio evaderet, secum
in Indiam advexerat. erat autem adolescens mira in-
dole, miro ingenio, pulchro corpore, doctus pro æta-
te, & in parentem observantissimus: quare ab illo uni-
cè amabatur. in infelice illo naufragio ipsemet suis
manibus in terram detulit, neglectaque sui cura torus
fuit, ut filium in tuto collocaret. in itinere ab Æthio-
pibus mancipiis, quibus Lusitani utuntur, deferri ius-
sit. At cùm plures hujusmodi Æthiopum interiissent,
reliqui vix se ipsos ferrent, coactus est puer suis pedi-
bus incedere. Tercio die à quo Lusitani, ut citiùs ad
Batavorum arcem pervenirent, Siameses deserue-
re, miserrimus hic adolescens in tantam defatiga-
tionem, & lassitudinem incidit, tanto corporis tumore
correptus, ut cùm circiter meridiem cum reliquis ad
quietem captandam super saxum se prostravisset, nul-
lo mox pacto consurgere potuit: imò adeò crura ob-
riguerant, ut ne flectere quidem illa valeret. istic
aspectus tam miser, quàm qui maximè, tanto doloris
sensu parentem intimè affecit, ut lethali illum vulne-
re sauciatum credidisses. hæsit, indoluit, miroq. cru-
ciatus modo congemuit, ac penè exanimatus est. mox
prævalente patria charitate, attollere illum conatus,
& loco movere: & illi utut potuit, animos fecit. at ri-
gidus ille quasi lapis, nullo modo consistere, ne mo-
veri dum poterat. Tum miserabilis pater gemens, ac
ejulans per Superos omnes aliquot precatus est, ut fi-
lium suum adjuvarent, ac tantisper deferrent: at illi
liberè professi ne semetipsos quidem præ imbecillita-
te, qua una cuncti laborabant, deferre posse. nec
ei quidquam profuturum si unà cum filio morerentur.
Quid tum miserrimus parens? ait Sextus. Cui ego:
Quod

Quod unum restabat patriæ charitati præstandum, illico conatus est: suis tandem humeris filium imposuit. verum etsi pius, ut Æneas, si poëtæ credimus, non tamen fortis, robustusque fuit. vix parumper progressus, cum subito charo simul cum pignore procubuit. Hic Balbus: Proh casum verè lacrymabilem! utinam potuissem ego in tam amantis parentis locum succedere! et si defatigatissimus, tulissem tamen. Cui ego: Laudo pietatem: sed nescio quid eo rerum discrimine fecisses. optimè Comicus, cum benè valemus, optima consilia ægrotis damus. extra aleam constituti Achilles, Hercules sumus omnes: qui mox periculo ingruente timidissimi fugimus quasi lepores. sed redeamus ad miserum adolescentem, cui magis à patre dolor erat, quàm à suo fato, quamvis acerbissimo: virili igitur erectus animo, totumque colligens spiritum, qui in labris jam erat abscessurus, patrem orat, ut quando ità Superis videretur, sineret se mori, sui verò curam ipse susciperet cuncta Dei providentia fieri, & quod ille disposuisset, libenti animo ferre; illique obtemperare opus esse. sibi mortem haud gravem, si superstes ipse de se curam ageret. quod ni faceret, tum acerbio rem mortem futuram. nam se plus amantissimi patris cruciatus, quàm sua ipsius tormenta dilacerare. Verum tantum absuit, ut hisce filii verbis pater recederet, ut potius impelleretur, ad unà cum filio moriendum. Quod cum filius; intelligeret: nec se precibus obtinere à patre posse, ut abs se recederet, susciperetque sui curam, quando sibi auxilio esse non poterat, Lusitanos reliquos, qui juxta erant enixè orat, atque obsecrat, ut patrem abs se divellerent, cujus dolentis præsentia sibi morte ipsa, ac maximis illis cruciatibus, quibus miserè torquebatur, durior magis, atque intolerabilior erat. His verbis permoti
duo

duo viri religiosi, unus ex divi Augustini, alter ex divi Francisci familia, ad patrem accedunt: & multis argumentis ei suadere conantur, id, quod meditabatur, nullo modo licere. Lege enim tum divina, tum humana teneri cum servare vitam quoad posset; & posse tum manifestò videbatur, quid aliud hærere, apud morientem filium, quam sibi necem consciscere? imo & ipsius filii mortem acerbiorē reddere: quod nec justè, nec piè fieri poterat. perpenderet animo, quod si in sua sententia peristeret, futurū, ut unā cum filio & vitam, & animam perderet, seque sempiternis pœnis addiceret. cumque verò nihil verbis, ac ratione obtinere viderentur, Lusitani vi illum à filio divellunt: & tandiu longè abegerunt, quoad extra obtutum filii fuit. Sed quid? adeo acerba hæc separatio, tantus exortus animi mœror, ut omnino contabuerit. tandem altero post die, quàm in coloniam ventum est, filium miserabili fato subsecutus est. Hic Balbus: Miseret me tam duram tum adolescentis filii, tum patris senis vicem: qua acerbior haud scio an altera. Deus sancte, in quātam calamitatem tot homines unius gubernatoris inertia coniecit! Dedit ne pœnas inertissimus homo? qui certè Nautica tua non dum legerat; quæ tamen multo antè in Lusitaniam appulerant: vigilasset certò, & solertissimè. Cui ego: Dedit præcipuus inertiz pœnas: ductusque in vinculis in Lusitaniam est: alter qui vicariam exercebat operam, & ejus fuerat tum major culpa, in Brittanorum navem, quæ tum ibi in anchoris stabat, profugit. Tum Balbus: Haud quaquam hominem tot hominum necere reum admittere debuissent. verùm quis à nautis æquum exigat? è ferociente mari nescio quam induor feritatem. Sed transferamus ad eruditioras animum: satis cum miseris versati sumus. Non ego mi-

miror, Parthenie, senem præ fame, siti, ac lassitudine debilem, totque laboribus attritum filii mærore contrahiisse, ac demum diem obiisse suum, est enim tristitia impotens animi motus se deicientis, deque spe aliqua, vel bono desperantis: quo motu suam amittunt humores temperiem: ac prævalente melancholia, atram bilem nostri dicunt, præ illius vi sanguis inficitur, ac circa præcordia coagulatur, ac congelascit: quo tandem præcordia, vitæ nimirum arcem, occupet, opprimatque: & sic pereunt præ tristitia miseri, quique animos facile despondent. nam erectis qui sunt animis, quos magnanimos dicimus, haud facile hujusmodi morbo superantur. Hic Sextus: Rectè ego; qui haud facilè dò mærore locum: hilarem me natura fecit. quam ego hilaritatem perpetuo studio, conatuque foveo, ac roboro. Cui ego: Optimè facis: vives sic diutissimè, & ut dicitur, Nestoris annos. istam ego animi tranquillitatem, hæc enim vera læticia est, quantum fas est, adipisci nitor, & perpetua semper constantia roborare. neque aliam ob causam rebus omnibus vale dicto, in hanc me solitudinem conjeci, & unis literis, quæ hanc pariut animi beatitatem, me continuò involvo. sint alii felices: honores, plausus, præfecturas sibi unis vindicent, una me quies animi delectat; ut præ illa habeam nihil. Tum illi: Ne labores; tenemus enim ista. tanti tu illa facis, quanti vitiosam nucem. Quibus ego: Certè quidem, scitis profectò me latinè loqui; hoc est aperto pectore, cuncta illa, quæ magnifica vulgus putat, ipse nihil moror. nulla enim res est, quæ cum animi tranquillitate conferri possit. stultum oppidò arbitror, cum pacatè vivere queas illiusmodi te rebus immiscere, quæ etsi speciem magnam afferant, reapse nihil sunt, nisi speciosa quædam verbis, re verò inania vocabula, & meræ nebulæ

bulæ in pariete depictæ. Sed perge, Balbe; nam, ut video, quid scitu dignum in medium inferre paras. Tum ille: Haud equidem miror, inquit, si dux ille atrociora Sambico, ut est in proverbis, perpeffus facile contabuerit: at illud mihi mirū oppidō vifum eſt, quod tu heſterna oratione expoſuiſti: memini enim, nimirum illud animo notavi, & eram ſciſcitaturus, niſi Nardus cum literarum fasciculo ſuperveſiſſet. Ajebas Siamenſes poſtquam ad Batavorum domum pervenere, ibique abundē reſecti ſunt, nullo deinde poſt modo progredi valuiſſe. Qui fieret, ut hi, qui famelici, ac deſtigati, tot itinera confecerant, tanto animi, corporiſque conatu ē tot, tantiſque laboribus evaſerant, nunc ſaturi, ſecuri, ac veluti in portu, ne paucos admodū paſſus conficere, atque exiguum illud, quod ſupererat, laboris ſuſcipere valuerint? iſtud ſanē mirum, ac paradoxo ſimile mihi videtur. age, exprome, quid ſentias: namque à te hæc (ut pro Sexto etiam pollicear) expectamus. Cui tum ego: Mirabar id etiam ipſe, Balbe; & mihi etiam perſuaſeram, fore ut à te rogarer: reſponderem ſanē niſi vererer, ut inverſum in me illud jaſtaretur, Pro eleganti medico malus poëta. Et ille: De hoc ne ſis ſolicitus: ad amicos loqueris. quin poëtam, medicum, philoſophum, imò & artium omnium ſcientem eſſe oportet. Tum ego: Geram tibi morem: & faciam etiam in gratiam Sexti. Tum Sextus: accipiam id beneficii loco: nec cunctam iſtam gratiam ingrato facies. Et ego: Præbete igitur aures. at quoniam non hic in ſcholis ſumus, omittam nimiam illam dicendi ſubtilitatem, quam familiaris ſermo non patitur. Illi verò: Iſtud deſideramus: ſatis tricarum in ſcholis audivimus. habeant illi clamores ſuos, quibus altercari voluptas eſt. verū pergo ad rem: vereor enim ne navicula illa ſu-

superveniat, & orationem, quam futuram nobis gratissimam confido, inerrumpat. Tum ego: Rectè precaves. contendam igitur, & quàm paucissimis verbis, accomodatè tamen, ut potero, ad veritatem percipiendam. Dum illi persuasum sibi in animo habebant (exemplo è re ipsa clariùs explicabo) se omnino perituros, ni omnibus viribus, nervis omnibus conarentur iter, quod susceperant, absolvere, quoad salutis portum attingerent: certa hæc persuasio, terribilis hic timor, adeò illorum mentes occupaverat, ut novas semper vires sufficeret, novos semper nervos intenderet, quibus obstantia quæcumque pertumperent, ac superarent. siquidem, vos testes volo, quid non subitur, quid non tentatur, licet arduum quantumlibet, ac difficilè sit, ut ab imminente mortis periculo ignominiosissimæ, atque acerbissimæ quis se subtrahat? nihil quippe. cum igitur illi toto itinere nihil aliud somniarentur, nihil versarent animo, ni quo se modo à miseriis illis molestissimis, èque atrocissimis doloribus liberarent: & quò magis ulteriùs procedebant, eò magis in ipsorum animis hoc desiderium augebatur, quietis scilicet à miseriis, & salutis repertiundæ. Quin imò sociorum, quos relinquebant memoria, aliorum, quos fata sustulerant, acerbissimi casus urgebant, incitabant, alas addebant, ut se ipsi conatibus suis à simili sorte redimerent. cum verò, inventis jam Batavis, se extra fati aleam positos, inque salutis portum tutò pervenisse viderent: cumque resecti, nihil jam esse, quod à fame, sitique timerent, desistere tum illi timores, atque illæ animorum certæ sententiæ, quibus vires sufficiebantur. spe jam tandem potiti, ac salute in tuto collocata, tota se in gaudia præcordia dissolvere: quocirca haud mirum si cor tanta perfusum lætitiâ, si suis animus potitus vo-

tis, languesceret. Hic Balbus: Non id certè inverisimile. Addam, tum ego, & aliam causam, quæ etiam ab ipsa natura petitur: Postquam cibo saginati abundè sunt, id statim effectum est, ut virtus stomachi nutritiæ, quæ tot dies penè effusa, ac consopita fuerat, tum impar concoquendo cibo omnes è reliquo corpore spiritus advocaverit, ut sibi suppetias fecerent: itaque factum est, ut reliquæ spiritibus illis destituerentur; atque idcirco se movere non possent. Tum Balbus: Et id etiam probabile, fateor. placet utrumque. quid tu, Sexte? Et ille: In tuam, Balbe, sententiam descendo. Atque hæc dum diceret, piscator ad scopulum applicuit, meque rogat, si pisces emere vellem. Cui ego: Proter, ut videam quinam sint. Ille verò: Unus est Glaucus, penditque libras decem. Bene est, tum ego: sed quanti indicas? Tum ille: Ne ego stultus, qui pretium taxem, cum tu Cerealis ædilis esse possis. Ego verò: Comiter tu quidem, & perurbanè. Solvam ergo argenteos quinque. Tum piscator. Accipe tanti, quanti voles. at quaeso, ut Americani pauxillum pulveris impertias. Cui tum ego: Illo ipse non uxor, hunc juvenem, Sextum intuens, roga. Obtulit statim Sextus. Accepit ille pulverem, & numeratam à me pecuniam, Surrentumque facessivit. nos verò assurgentes domum pergimus.

F I N I S.

AUTU-



AUTUMNORUM SURRENTINORUM

L I B E R I I.

C A P U T P R I M U M.

*Pluvia impendente, juxta alvearia confectum: qua-
situmque quid esset mel, quid cera: & quadam
scitu digna commemorata.*



Rimo manè eùm fecissem,
precesque horarias canti-
tassem, jam aquam, in qua
Arabica faba scitè tosta,
inque minutissimum con-
trita pollinem, incoctas
benè fuerat, hausturus erā
meo more, eùm me Luci-
lius cōvenit, & Quid istuc,
ait, potionis est? Cui tum
ego: Faba Arabica. vis ut

illius tibi vasculum propinem? Ille verò: Apage sis, in-
quit, cum ista faba: non enim quadrat meo stomacho,
utpote quæ barbara: & apud barbaros, ut audio, pri-
mum usum invenit. Tum ipse: At salutaris illa quidem

ceriè . nonnè cinnamomum , nonnè piper , atque aromata cuncta? nonnè sal Indicus è solo barbaro proveniunt? Tum ille : Ità verò , non inficior : dulcia tamen illa , istæ verò oppidò amara . At ego : Atque idcirco perutilis : siquidem illa amaritudine ventrem contrahit , atque corrugat : quo fit , ut cibi coctionem juvet ; halitu verò odoroso cerebrum fovet , mentemque expeditam reddit , dum illam ab halitibus vaporosis è stomacho erumpentibus vindicat . Hic Lucil : Næ tu medicus , qui istæ tam benè calles . Verùm ut ut se res habeat , de illa tibi facio gratiam . Eamus ad deambulandum : sic enim crudos humores , quibus literati abundamus , facilè concoques , defatigatamque mentem paululum allevabis . Tum ego : Haud equidem hoc manè deambulandi tempus . viden' ut dubium cælum est ? timeo ne si longiùs hinc facessamus , perbenè madeamus . imò ni oculis hallucinor , jam tenuis incēptat pluvia . Tum Lucil : Hallucinaris certò : ne gutta quidem cecidit . verùm , age , si times ne perpluas , cursitemus per hortum . Cui ego : Æquisissimum id rogas . ità enim nos facilè in secura recipiemus . feram mecum sciadem , si quid facto opus erit . Et Lucil : Rectè præcaves . nihil igitur cunctati , in hortum descendimus : cepimusque cursare per Xystum . Nec diù cursitatum est : etenim è vicino monte nigerrimus imber , eo strepitu , quo Autumno solet , descendere continuò cepit ; ut ni statim umbella explicata nos operuissēmus , largè perfudisset . nos igitur in proximum fornacem testudinatum , citatissimo gradu recepimus . Hic me Lucilius , rogat ; Undenam per amplam istam sciadem , atque oppidò commodam comparasti ? Cui ego : Cùm Sena interfacerem , animadverti cives illos quotidie umbellam gestare solitos . quem ego morem laudavi , mihiq̃e ruri , nam
in

in urbe esset omninò insolens, imitandum duxi. sic enim hyeme à pluvia, æstate te à Sole defendes. & quoniam parulæ, plutes regi, defendique possunt. habent etiam & illud commodi, quod cùm levissimæ admodum sint, nullo negotio circumferri possunt. Tum Lucil: Et si nostra in urbe id novum omninò futurum esset, illis ego libenter uterer. Et ego: At quod insolens, minimè honestum. non renes, quod vulgò jactatur, ede, & bibe tuo more, alieno vestias. Interea cùm aliò imber delatus esset, in villici casam imus. sedebat hic sub pergula, quam pergulanę cornicularę spissè investiebant, & ceram, quam è proximis alveatibus eduxerat, perpurgabat. simul ac nos vidit, binas à puero sedeculas afferti jussit: & sedete, inquit, tantisper. Cui ego: Benè tu quidem, Melisæ: laudo urbanitatem tuam, quam etiam ruri servas. habesne aliquid, quo nos dones? Et ille: Numnam vobis acceptus est favus mellis perquam puri, atque odorosi? Cui ego: Imò, inquam, acceptissimus. illum ego inquirebam nec Surrenti venalem puer invenit. quocirca accipiam illum libentissimè. habesne in horto buglossum? Habeo, inquit Melisæus, sed brevibus foliis, ut quæ minimè hortensis. Colligito mihi fasciculum, inquam ego: rem mihi facies oppidò gratam. ex illa enim, melle, & farina edulium hoc manè scitissimum adornabo. Hic Lucil: Quo id modo? Et ego. Accipe, in testudine fictili recentium, aut alterum farinæ pugnum imponam, tantillumque salis spargam: deinde frigidam infundam, & cochleari tandiù diverberabo, quoad mollis intrita fiat. interea sartagine oleum trimum, defæratissimum frigam: quod simul ac frigi ceperit, folia buglossi intrita illa farinacea involvam, inq. oleum iniciam: ut mox defricta, in lancem jmittam. tandem mel liquatū cum foliis marini

roris infundam. Lucili, præ scitamento digitos perdestuos. At ille: Vereor ne stomacho noceat istiusmodi edulium. Etenim cum domi istic cibus apponitur, à plerisque contemnitur, atque idcirco, ut arbitror, ab illo se continent, quia stomacho non quadrat. ego certè vix concoquo: imo toto die oleum ructo, quod mihi fauces perstringit, atque adurit. Tum ego: Ità est, ut dicis. id verò idcirco accidit, quia sola farina fiunt, & plerumque crudæ sunt illiusmodi armillæ farinacæ. quo fit, ut oleo sint nimis imbutæ. & oleû, ut plurimum infimæ notæ. ego incrustata illa folia ità frigam, ut incipiant rubescere; hoc enim modo minimum olei ebibunt. buglossum item misceo, quo præcordia juvantur miro modo. hinc illud Lucani corraginem, ut & vulgus nostratium, appellavere, litera una immutata: quocirca ille cibus intritæ minus habet. tandem nostri rosmarinum non adiungunt, quo & stomachus, & cerebrum maximè foveantur, quippè odoroso.

Dum autem alvearia contempletur, Dudum mihi, inquit Lucil: illa hæsit in animo dubitatio, crearentne apes mella, an illa ex arbutis colligerent: quam velim te tandem auctore, deponere. Eja age, & quando ostentata occasio est, non omittamus. Cui ego: Laudo studium tuum, qui in omnem sciendi occasionem intentis animis quasi è specula semper immines. ut igitur istud tuum studium foveam, conabor velis, equisque quæsito satis facere: & quæ hac de re mihi in mentem venient, exponam strictim: provectus enim dies est, neque omnis de pluvia timor abiit. prætexo igitur telam. Et primò compertum quidem est, apes mella in suis alvearibus æstate reponere, atque asservare, hyeme verò illis pro alimento uti. nam cum exacta admodum hyeme, vacui reperian-

tæ

rur favi, eo mel tempore ab apibus comestum, manifestò consequitur. quod quidem iterum ventura mox æstate reponitur, vacuique replentur favi. Ex hoc autem, quod jam à te mihi conceditur, statim illud existit, nimirum mel excrementum apium non esse: neque succum è floribus collectum, atque ab illis concoctum. Hic Lucil: Sed quo tu id conficis argumento? Hoc inquam ego: quod animantium excrementum est, cedere illis in cibum non potest, ut minimè idoneum. etenim si excrementum, nutritioni inferre nequit: nempe ex illo non valet stomachus partem aliquam decerpere, quam utique, antequàm excreta deponeret, in sui alimentum vertisset. quidquid verò à nutriente facultate segregatur, atque egeritur, alibile non est. quocirca si melle aluntur apes: illud earundem excrementum non esse, liquidè conficitur. Prætercà observatum ab his est, qui huic rei sedulam navarunt operam, mel non exugi ab apibus, sed in coxis reponi. Hoc loco Villicus, qui nos attentis animis audiebat, istuc oppidò certum, inquit. quod ego comperi sæpenumero. Si ità, tum ego, ab illis decerpi, ut in futurum reponatur, perspicuum est: nempe non minus providæ apes, quam formicæ sunt. Assentior, inquit Lucil: siquidem dilucido id abs te argumento confectum est: atque à Melisso nostro experimento etiam confirmatum. est illud scire avaro, si ex arbusculis, floribusque mel legitur, estne deciduus è cælo succus, uti ros, pruinaque, an verò è plantis exudat? Tum ego. Ajo mel non esse succum è rore, pruinae concretum: sed ex plantis, præcipuè floridis progigni: & eo quidem modo, quo thus, & gummi, quoque balsama odorosi à truncis procreantur. Hic Lucilius: Facile animum induco, ut id credam: probabile quippè. Sed age quo tu id argumen-

to. Et ego : Dà mihi aures : plurima in promptu ponam, quæ rem perspicuam facient . Et primò observatum est apes mel carpere non benè manè ,

Cùm ros in tenera pecori gratissimus herba est .

ut ait poëta, sed maturo jam die, quando humor ille roscidus exiccatus omninò est. carpunt item mel non ex summis foliis, in quæ ros depluit, verùm ex ipso coliculo, ut à plerisque compertum est . non igitur à cælo decedit, sed in ipsius plantis ingeneratur. Hic Lucil: Assentior prorsus, rem omnem brevi, ac liquidò confecisti. Ego verò : Mane : sunt & alia, quæ hætenus dictis fidem adjungunt . At Lucil: Profer eas : hic sto Ego tum : Ferunt ut certum, apes non ex omnibus plantis mella, sed ex certis quibusdam, & floribus potiùs, quàm ex truncis: at si ros esset, secus eveniret: ros enim in omnes plantas decedit . Imo ex uno flore plus colligunt, quam ex alio, quin etiam pro florum indole, quæ varia plerumque est, sapores mel induit, & quàm varias ducit habitudines. ex odoriferis collectum herbis, odorum est, & exquisitissimum, ex aliis non ità : imo in quibusdam noxium, atque hinc poëta

Sic tua Cyrræas fugiant examina taxos.

nempe venenatum ex Cyrræa taxo mel est. id verò neutiquam caderet, si è cælo delapsus humor esset. quippe unus, idemque invariatus. neque ex solo contactu noxias illas qualitates contraheret, ut re veras ros ipse minimè ebibit. Atque hic, quoniam cadit in rem, narrabo historiam oppidò miram. in Tapobranc insula, quam Ceylanum incolæ dicunt . Hoc loco Lucil: ità me interpellat: Nimirum illa est, de qua sic tu Naut: VIII.

*Hinc & Tapobranen linquens, Corinq. jacentem,
Gemmiferum juxta litus vada spuma sulca.*

Cui

Cui ego: Ipsissima. hac verò in insula sylvæ cinnamomiferæ quàm plurimæ sunt. in harum sylvarum summis verticibus lanugo quædam concrevit, in qua mel, & cera generantur. & tum mel, tum cera cinnamomum redolent. Lusitani cum superiori ævo ad ipsos & insula, & sylvæ pertinerent, in præsentia sub Baravorum ditione sunt, ex illiusmodi cera candelas cerabant, & ad Regem Lusitaniz in Europam transmittabant. Hic, quoniam quàm paucissima admodum efferebantur, nō nisi in suo sacello illis urebatur, accensis verò fragrantissimus cinnamomi odor evaporabat, qui universum sacellum mira, ac jucunda replebat suavitate. Hic Lucil: Mirabile quidem, quod mihi accidit omninò novum. Sed age quodnam mel optimum censetur? Cui ego: Hispanum probatissimum, roremque maris suavissimè redolet, & granosum est. in Italia Tarentinum laudatur, Siculum non multum Hispano cedit. quod verò hic generatur meo iudicio laudatissimum, ut quod flavum, fragrans, & granosum, etsi exigua admodum illius copia proveniat. Tum Lucil: Haud mirum equidem est. quoniam enim odoriferæ hic passim herbulæ, optimum ex illis mel apes decerpere necesse est. Cui ego: Rectè autumas. Celebratur etiam Sarmaticum, & Dacicum. in quibus regionibus ingens mellis copia, ut illo gens præcipuè victitet. Alpestris Daciz regulum, ferunt quotannis plusquàm centum mellis plaustra ad Scytharum regem tributum loco mittere. imo perhibent reperti immensos truncos cavaros, in quibus plurimam mellis copia, lacunas diceret. Sed pergamus porro tum Lucil: de cera quid sentis? Cui tum ego: Puto illam ab apibus pariter colligi, ut nimirum ex illa saccecta, favos nimirum ea arte compingant, quæ certè divina est. illa verò lentore prædita cum sit, & dure-

scat,

ſcat, quo illæ velint eam modo extendere, atque in-
formare commodè queunt. Eſſe autem truncorum
etiam humorem concretum, qui ſummis foliis adna-
ſcitur, exiſtimo nam, ut ſuperius dicebam, è lanugi-
no cinnamomi ceram legunt, liquant, & candelas
cerant. id verò in aliis evenire veriſſimile eſt. Hic
Lucil: Quid ſi tum mel, tum cera metcorum eſſe di-
eam è cælo concretum, ut veteres opinabantur? Cui
ego: Non rectè tu quidem cum illis opinarere. & ſa-
nè de melle liquidò mihi videtur demonſtratum. Fa-
teor, inquit ille. At compertum ſæpe eſt reperiri fo-
lia viſcoſa, & melle ſapida. id verò ex eo contingere
ajunt, quod ex aëre utrumque decidat. Cur non po-
tius, inquam, quia exudat è foliis? id verò, ut omnem
tibi ſcrupulum adimam, conficiam hoc modo. Non
in cujuſquemodi, ſed in certis tantum foliis reperitur:
non igitur è cælo eſt. de cera facilior conjectura, cum
enim magis tenax ſit, ex arboribus, ut gummi, cætera-
que huiusmodi gigni liquidum eſt.

Hæc loco Lucil: Non eſt igitur, inquit, cur te am-
plius vexes: do manus. Illud tamen unum ſcire tan-
dem vellem, cur nam è taxo venenatum mel? Cui ego:
Quia ea taxi natura, ut ejus humor noxius ſit animan-
tibus: mella verò pro ſucci qualitate naturam in-
duunt. in Trapezuntis agro, mel è buxis creatur, ut
ait Ariſtoteles, graveolentiſſimum, ut ſanos in inſa-
niam agat, inſanos verò menti reſtituat: quo quid ma-
gis inſolens dici poſſit? mira quidem natura, in cujus
penitiſſimas fibras ire omnes effectuum ſcrutatum
cauſas difficile oppidò. Sed recipiamus nos domum
ne imminens itetum pluvia nos comprehendat.

Nonnulla de marinis vitulis, ac pelamydibus quaesita: deque pisce quodam vexillario.

Quodam manè in crepidine scopuli Surrentini nostri sedebam cum Vellejo, ibique amicum quendam opperiebamur, qui ad illam diem se nos conventurum per tabellarium significaverat. Dum igitur vacui sedemus, sic me Vellejus interpellat: Parthenie, verumnè quod Halieut. vii scripsisti? Cui ego: Quidnam illud? fac, quaeso, ut in memoriam reducas. Et ille: Marinos vitulos, quos etiam Phocas græco vocabulo dicimus, interdum in terris somnum capere: visosque ad Massam ad Delubrum, & in Tiberii Cæsaris specu, sic enim habes: teneo nimirum versiculos,

*Dum nocte sub alta
Stellarum radians orbes, sunique uda serena,
Egressa surpes spumoso è gurgite Phoca,
Consuevere graves captare in litore somnos.
Sape etiam cæli metam dum lustrat anhelis
Phæbus equis, placido componunt membra sopore
Arbore sub patula, aut exesa rupis in anstro,
Ut sape ad colles nostri videre Minerva,
Et cava Teleboum per saxa sonantia fluctu.*

Certè cava istæ saxa, Tiberii tibi sunt specus. Rectè Cojectas, tum ego. Quod verò ad quaesitum attinet, dico me verissimum, ne dum verum scripsisse: Turpe enim, & præter artem poëtam doctem comminisci. cum enim fingimus, libera nobis potestas est quidquid velimus scribere. at cum artem quampiam versu tradimus, aut historiam referimus, nulla nobis scri-

scribendi libertas conceditur. Præterea ita tradit Plinius : & ante illum Homerus, qui sic cecinit in Odyssi:

Ἀμφὶ δὲ μιν Φῶκαι νέποδες καλῆς Ἀλυσύδνης
Ἀθρόαι εὐδασι, πολλῆς αἰλὸς ἐξαναδῦσαι.

Tum ille: Ità est ut dicis, sed qui sit, ut illiusmodi ventia marina cùm sint, in terris vivant? Cui ego: Quia amphibia sunt: nimirum nata vivere tum in aquis, tum in terris. quippe quæ ætèrnam respirant. quocirca mirum non est, si interdum extra aquam noctu, interdumque dormiscant. Est Massæ ad Delubrum nauta quidam mihi benè notus, cui à pedum vitio, si-ve labe tibiarum factum agnomen est. ut apud has gentes plerumque sit: quibus nihil frequentius quàm cognomenta hominibus addere. referam hic quod mihi olim accidit, ridiculum oppidò; & ideò dicam, ut rideamus: non enim semper contrahenda frons est. Et ille: Expecto avidissimè fabellam. à risu redibimus facilè ad seria. Tum ego: Sedebam ad mensulam; totusque eram in eis versiculis limandis, quos tu, cùm scripta legeres mea, plurimum laudasti. Et ille: Intellego, illos nimirum

*Sed quia dimidium cùm plumbi interfecat arcum,
Tum tormentorum longissimus effugit ietus.*

Et ego, istos ipsissimos, inquam, radebam, cùm me puer convenit, nunciatque esse ad januam Pontificis filium, meque conventum expetere, & nescio quid Neapoli deferre. Ego in limando carmine distractus, quid diceret non satis adverti, audito tamen pontificis nomine, illicò assurgo, pileum assumo, in januam convolo. dum verò pergerem, sic mecum: Deus sanctel quis hic filius pontificis? An nothus? sed quodnam mecum negotium? quid illi cum Surrento? heus puer, intel-

intellexisti rectè? Et ille: Rectissimè. Descendo igitur, invenioque ad januam puerum seminudum cum tabella: tum ego suspicans quod erat, tu ne, inquam, filius Pontificis? Et ille: Ego: deferoque tibi hanc tabellam, quā meus pater heri vespertī Neapoli detulit. Nonne lepidè factum, ac ridiculè? Et ille: Lepidissimè. at tu totus eras cum Musis. Tum ego: Id mihi cū junior essem, accidebat non semel. & quoniam ridere cēpimus risum, foveamus tantisper illum, ut libentiùs deinde seria agamus. Docebam Capuæ Rhetoricam, tantaque solertia (quæ quidam id temporis quā maximè desideratur: nempe in senium vergens ætas sensim extrahescit) ut nihil supra. vix somnum cēperam, & interdum in sedicula, cū statim, vi mihi facta, assurgebam, excusaque igniario favilla, lumen è fomite sulphurea recte accendebam, transmissoque in ceream spirulam, statim lucernam incendebam: factisque de more precibus, literariæ mensæ assidebam. in quam interdum incumbens, exiguum soporis præ lassitudine suffurabar. Accidit semel, ut perturbata mente, nescirem ubi ipse, ubi lectus, ubi igniarius esset. quocirca referatis foribus pedem effero, ut ex lucerna, quæ in deambulacro tota nocte ardet, lumen acciperem: & certus, me habere in manibus è sicco gossypio myxum, intingo in lucernæ oleo digitum, lucique admoueo: statimque veluti expectectus adustum sentio digitum. Hic Vellejus magno exclamans risu, O errorem lepidissimum! At illud, Vellei, tum ego, quod meo præceptorī accidit singulare, & dignum, quod referam. Et ille: Dic, quæso, mirum quantam ex his haurio voluptatem. Tum ego: Gaudeo, quod nostræ tibi nugæ voluptatem afferant, qua nolo te fraudare. Meditabatur hic carmen ex longo, neque illi Musæ ex sententia procede-

cedebant , ità ut jam penè de exitu desperaret . quodam manè publicæ mensæ inserviebat , ut moris est , ferebatque orbem æreum , in quo nos scutellas cum cibis gestare in mensam solitavimus . at totus erat in carmine illo , in cujus umbilicum jam venerat . at hærebat in quadam sententia concinnanda . cùm en tibi in medio triclinio dum fert manubrio orbem scutellis polentia oleracea benè plenis , onustum , verba in mentem veniunt , sententia exprimitur , metrum concinnatur , perficitur versus : tantaque læticia affectus est , ut dextram , ut sit , præ gaudio attolleret . cumque non adverteret præ mentis alienatione se tenere orbem , manubrium dimisit . excitatus exemplò fragor , ruptæ scutellæ , versatæ in pavementum pultes , ac jus , & magnus exortus discumbentium risus est . ipse verò quasi statua , immotus obmutuit . Hic Vellejus tantum ridere risum cepit , ut vix se tandem contineret . mox haud scio , inquit , an magis ridiculum acciderit unquam . At ego : Sed redeamus ad currum . satis lulum est . Nauta igitur ille , à cujus agnomine jocandi occasio dedita nobis est , narravit mihi , (accersebam enim sæpe illum , ut multa de piscibus , in quibus erat instructissimus , interrogarem) vidisse se ad oram maris inter magnum saxorum cumulum dormientem vitulum . idque etiam observatum à villico nostri ruris , quod oræ imminet longissimæ pergulæ prospectu amenissimum . cui ruri , ni me fallo ab antiquo quodam Romano equite nomen est . Tum Vellejus : Vidi rus illud peramœnem : deque illius cognomento in tuam sententiam descendo . sunt pleraque ibi loca , quibus indita Romana vocabula à cognomine familiarum illustrium : & rudera in illis visuntur vetustarum ædiū . Et ego : Ita enim verò ; & verissimile quippe . Tiberio enim Capreas inhabitante , complures viri principes

in

in hæc loca convenere. Quin & antrum, istuc Surrentin: nostri, & magnificus hic per rupis viscera descensus Romanorum opus est quidem certè. Tum Vellejus: Credo equidem: neque hæc fieri poterant sine magno sumptu. Sed pergamus porrò, tum ego: Ille idem natura, se quondam in Tiberii specum, quæ in Capreis est, externos quosdam homines vexisse narravit. qui ut ipse dicebat, videbantur eruditi, & veterum monumentorum studiosissimi, magnoq. avebant opere celeberrimam illam speluncam circumlustrare. vix facibus accensis intraverant, cum gemini vituli, (erant mas, & fœmina, ut nauta coniiciebat) qui ibi erant, facium splendore territi, tanto impetu eruperunt, tanta aquarum agitatione, ut nihil propius factum est, quam phaselus mergeretur. Hic Vellejus: Id ego libens vidissem. At ego, tum ipse, tanti non emerem simili spectaculo interesse. Sed ut ad vitulos redeamus, visi sæpe sunt per colles litoribus imminentes inter vineas errare, uvisque pasci mira voluntate, mox cum deprehensi fugiunt, in globum se glomerant, præcipientesque in uodas aguntur quasi cylindri, quod quidem visu pulcherrimum est. Hic Vellejus: Mira sanè narras. at verumne etiam illud, quod xi libro habes hisce versiculis.

*Maxima sollicitas curanda industria prolis
Exercet Phocas: medio non aquore foetus,
Sed sicca pariunt tellure, cavisque sub antris.
Diffusos circum distenta per ubera lactant.
Emammis niveum quoniam lac effluit: ore
Certasim catuli potant, luduntque per ulci.*

Tum ego: Ita perhibent gravissimi authores: idque non semel experimento compertum esse asseverant. quod ego adiungere possum, est huiusmodi: Narrarunt, mihi complusculi visos esse identidem vitulos cum

catu-

catulis in antris, & collibus: illucque ventitare frequenter: ex quo conficitur, illud verum esse. Tum Vellejus: Assentior. Sed transcamus à vitulis, ad Pelamydes quo pacto accidit, ut manibus in arena capiantur Rhegina in ora ad nostrum rusculum, quod eò loci est, ubi Mamertini freti augustiæ sunt. Habes enim lib. 111.

*Haud mora, vibrantur conti, curvique tridentes,
Fuscinaque, & celeres unci: fitque ilicet ingens
Pelamydum cades, fusoque crure rubescunt
Spumantes late fluctus.*

Tum ego: Et si innuam eo loco à te notato, & cujus etiam versiculos memoriter recitasti, repetam hic fusiùs, & enucleatè. Rus nostrum Rheginum, quod ab arundinetto vulgò nomen obtinuit, in eo Italiæ situm est angulo, qui Pelorum unum ex tribus Siciliæ promontoriis spectat. Sunt autem amœnissimi colles, qui à litore sensim assurgunt leni clivo, mox altius attolluntur, inque Apenninum tandem altissimi elevantur. partim autem vitibus constiti, partim pomis, partim moris: quibus tota quæ in litore planities convestita est. sunt etiam opacissimæ in verticibus sylvæ quercubus, & castaneis refertissimæ. tellus ipsa adeò peccita, ut nihil admodum sit, quod accedat. Dextrà Scylla est, & Scylleum, læva Rhegini campi, & Cērys amnis: contra in prospectu Sicilia, à Mamertinis montibus, qui & Neptunius, ad Æthnam patens: & quæ Siciliæ princeps Messana, cujus portu quâ natura, quâ arte haud scio, an quid majus reperias. quasi falx curvatur, Naturæ artificio tam mirabili, ut præstare majus haud scio an possit. cingitur superbissimo palatiorum theatro, ut nihil sit invenire pulchrius. Et debebatur illa theatri magnificentiæ, ubi mare continuo adversis quasi fluctibus con-

Ricta-

fiſtatur. Atque hic venit mihi in memoriam dyſticon ingenioſiſſimum acuti cujuſdam Siculi, quod te auდიſſe non pigebit.

Ampla Theatra vides; quaris ſpectacula? Pontus

Hic geminus geminis digladiatur aquis.

Nonne acutum, & elegans? Imo & acutiſſimum, & elegantiſſimum, inquit Vellejus. & ideirco gratias ago, quod recitaveris. faciam, ut nunquam excidat memoria. At pergamus ad reliqua. Cui tum ego: Siculi freti æſtus, qui ſenis quibuſque horis it, reditque, è litore ruris noſtri fluere incipit Taurominum verſus: mox rediens, magno aquarum impetu in idem reſluit: videnturque aquæ tam manifeſto profluere, ut præterlabentẽ amnem crederes. Majo menſe cùm ad nos ab Euxino Thyſſi commigrant, veniunt & unà Pelamydes, quibus Delphines infeſſiſſimi: quocirca perpetuò ab his agitantur. Cùm autem in Siculo freto Delphini Pelamydes inſequuntur, hæ fugiunt ab illis velociſſimo natatu, & ſecundo æſtu, atque ob id, in litus irruunt. inſtant Delphines, utquicitiſſimi; tum Pelamydes quaſi inter malleum, & incudem poſitæ, in litus inſiliunt; & ne Delphinis in prædam cedant, amant capì ab hominibus: qui in arena nullo negotio innumeras comprehendunt. Hic Vellejus: Vidisti ne unquam feſtivam iſtam venationem? Vidi, tum ego, cùm eo in rure eſſem, & ſumma voluptate: tanta enim Pelamydum, tanta Delphinum erat copia, ut magno tractu, magnaſque aquarum agitatione mare ferveſceret. pluſquam centum in litus inſiliete, totidemque à Delphinis devoratz momento ſunt. noſtras quidam, cui ruris cura erat, binas manu cepit. quæ tamen illi carò ſteterunt: totus enim & benè madefactus eſt: cœnavimus nihilominus genialiter.

H

Sub

Sub hæc quidam piscator ad scopulum applicuit: rogatque si piscem quendam perquam rarissimum, & adeo mirum, ut videre oculis operæ esset, emergere vellemus. Tum ego, illum proferri jubeo. Accepit ille, inque scopuli acie explicuit. erat oppidò mirus, & insolens: longitudine sex pedes æquabar, vix dimidium amplitudine, aliquantulum repandus, ex planorū genere: crassitie vix majori solæ suppar, color ex cæruleo purpurante, eratq. paululum perlucidus, & perquam lævis. ut vidi, piscatorem interrogo, quo nomine appellarent? Et ille: Vexillum, sive vexillarium piscem nuncupamus. Quadrat, inquam tum ego, figuræ cognomen. similis enim erat vexillis illiusmodi, quæ ad mali verticem suspendere solitaverunt. Quem cum duodeviginti asses vendidisset, accipe, inquam, pecuniam, & si quid dubium erit, immutabo. ille cum vidisset, Optima, inquit, piscatumque iterum abiit. Tum Vellejus: De pisce isto tu nihil in Halieuticis. Fateor, tum ego: Verum illum nunquam videram: neque de eo quidquam apud Ichthyologos observatum reperi. quanta sunt quæ nos latent? quanta pars rerum nobis cognita? minima quippe.

Interea loci dum hæc loqueremur, nos amicus oppressit: cum enim crederemus marino cursu ad nos venturum, terrestri itinere, mulo vectus devenit: perque rus transiens in scopulum descendit, nosque illic præstolantes improvisus aggressus est. quem cum amplexati essemus, nobiscum sessum recepimus. Mox, si quid Neapoli novarum rerum ad se allatum esset, interrogo. Et ille: Gratam mihi ab eruditissimo viro Antonio Magliabeco (qui tibi, tuisque Musis devotissimus) missam Florentia epistolam accepi, qua me de nova editione Petri Francii, quem ego auctorem numquam legi, certiorcm facit, illiusque elegans
in

in ea epigramma transcripsit. quod etsi non tibi (scio quippe ingenium tuum) erit certò Vellejo isto tuo perquàm gratissimum. Cui tum ipse: Qua de re scriptum? Et ille: In tua Nautica, & Halieutica. Ego vero; Omittas, inquam, quæso, neque velis me rapere in invidiam. At Vellejus: Si Parthenio non placet, recites mihi, amabo. Tum ille meis ingratissimò recitavit:

*Nomine Parthenius dictus Maro carmina scripsit
Formoso recubans litore Parthenopes:
Carmen ad exemplum docti, geniumque Maronis
Parthenopes scribit litore Parthenius.
Rura Maro cecinit, pecudumque, hominumq. labores:
Lina, plagas, pisces, & mare Parthenius.
Nobile Parthenopes ambo decus, ille per agros,
Iste per aquoreas usque canetur aquas.*

Ut recitavit, Beasti me, inquit Vellejus, carmine tam mundo. At ego: Coquinaria istiusmodi verba, quibus mihi blandiri vultis, me de prandio admonent: sine igitur, ut illud accuratum eam. statimque, illis pro scopulo relictis, domum me corripui.

C A P U T III.

Occasione cuiusdam pærelia ab auctore visa, quomodo fiat explicatum, & nonnulla cursim de Iride quasita, & exposita.

Appetente jam vespere, ego, & Lucilius ad otium in Calopside sedebamus Homerum lætantes, inque illud ventum erat

Αὐτὰρ ἐπεὶ κατέδυ λαμπρὸν Φάος ἡέλιος.

Cum Lucil: En, inquit, ut numerosè cantat poëta, purus, nitidusque Sol nobis occidit, visurus Indos. nec

visitenuēs circū nubes auro veluti interpingit : ut bellè Actius noster.

*Et jam plena dies fluctus vergebat lberos,
Purpureas pelago nubes, aurumque relinquens.*

Illum tu imitatus in Nauticis hisce versiculis : memini enim. libellos nam ego tuos identidem lectito, nec facile è manibus elabi patior. Cui ego: Tantumne tibi abs re tua est otii, ut meos centones lectites? ille verò versiculos cantitavit:

*Et jam Sirenū scopulos proventus adibam,
Cum roseas Titan nubes, aurumque relinquens
Conditur Oceano.*

Vix dum carmen recitavit, cū de improvīso mirum oppidò, & pulchrum sese nostris oculis intulit ostentum, insolens certè, & nunquam antea spectatum nobis. dum enim paulatim sese Sol in mare demitteret, alter ex adversò, & ut ajunt Geometræ, è diametrò, rubescere miro modo, atque attolli videbatur. qui quidem fictus Sol, primo, ac vero prorsus extincto, conspicuus usque supra finitorem apparebat, ac sensim sursum emori cernebatur; ut refugere potius in aërem, ibique se occultare, quàm in aquas descendere credidisses, tenuissimus tandem factus, evanuit omnino. Hic Lucil: Vidistin', inquit unquam, quidquam elegantius in cælo pingi, quod pulchriorem hac præ se speciem ferret, quodque summa in se oculos voluprate alliceret, traheret admiratione? Cui ego nunquam tam pulchrum, tam elegans me vidisse in cælo ostentum recordor. Geminos interdum Soles nubes inter lucidas apparere, si non frequens, certè non insolens, ac novum, verū ipso in finiente, aëre tam sudo, ac sereno, atque in hunc modum si non insuetum, perquam rarissimum admodum visu est. At Lucilius, qui in omnem semper discendi occasionem im-

mine-

minebat ; Age ſis , inquit , de ratione nunc videamus : ſiquidem tui hæc muneris ſunt : teque petit hæc Sparta . ne pigeat ergo quibus de cauſis id contingat , enucleatè explicare . ſcis nimirum me ſummo noſcendarum rerum deſiderio teneri . Cui ego : Faciam aliàs , in præſentiarum tempus non ſuppetit , & res perplexa admodùm eſt . Et ille : Quà oſtentata eſt porta , ingrediamur : non enim ratio eſt huiusmodi occaſionem amittere . Eja ſis , age , dum vespertinum crepuſculum tam ſereno , nitidoque cœlo diem nobis , & orium producit . Tum ego : Geratur mos hic tibi . & quæ ex temporario ingenio è Minervæ noſtræ penu proferre poterò , expromam : præſè tamen rem perſtringam . At Lucilius : Age , age , ſubitis in caſibus multum , & acre eſſe ingenium ſoler . Tum ego ſic orſus telam , ut dicitur , pertexere . A Sole , (quem ego unum & auctorem , & fontem lucis exiſtimo) innumeri prope modùm radii magno impetu evibrantur , & temporis perpauciſſimis admodùm momentis ſuperato , quod interjacet , immani ſpatio , in vapores , qui plurimi circa Finientem circulum inſidunt , ità offendunt , ac ſi in obiectum , ſolidumque corpus inciderent : quocirca derepentè reſiliunt : eo prorsus modo , quo luſoriæ pilæ , quas Hiſpanienſes vocant , folliſque pugillatorius , eùm in læve æquè , ac durum planum impingunt . Teneſiſtæ ? Et ille : Teneo : non enim adeò duriuſcula . perge porrò ; reliqua expecto . Tum ego : Mox illiuſmodi radii è nubibus , ac vaporibus repereuſſi in aquas incurſant . quoniam verò hæc non adeo perlucida , ac transparenſ , ut etiam opaca non ſit ; idcirco ex radiis plurimi reſiliunt ; nempe quot quot in opacas particulas ceciderunt : plurimi , qui in per lucidas , permeant . verùm obliqui , utque Optici dicunt , reſtringuntur . Hic Lucil : Curnam iſtuc ? Quia , tum ego ,

denſiorem in aquam ex aëre minus denſo inciderunt. Atque ita fit, ut in aëre, qui repercuffi reſilivere reflexam præ ſe Solis imaginem gerant. quæ quidem reappeſe nihil eſt, ſpeciem tamen offert, quã *ιδῶλον* Græci dicunt. indeque eſt, ut Sol alter ſupra aquas appareat. Quia verò, occidente Sole, repercuffi ad nos radii magis, magisque convergunt; idcirco ad nos ſpecies illa accedere videbarur, quæ ideò pariter diutiuſculè viſendam ſe exhibuit, quia radii adhuc vapores illuſtrabant. Hoc loco Lucil: Rem habeo: ſed ut planè, ac latinè fatear, ut ſcis me ſolere, quaſi per nebulam in pariete pictam. Cui ego: Res eſt, non nego, perdifficilis; ut nec ego planè verbis, nec tu animo complecti poſſis. Efficiam tamen, & ſi non ſim Theſeus, ut te ad intelligentiam perductum. utar pro ſilo, inſigni ſimilitudine, qua ſpero futurum, ut benè rem animo concipias. Et ille: Eris mihi & Theſeus, & Apollo. Atque audi tum ego: Vi-diſti, & quidem non ſemel, è pelvi poſita in fenestra, atque aqua benè plena, repercuffum Solis, Lunæve lumen in conclavi apparere: & modò hac, modò illac, vago, irrequietoque curſu pervolitare. Hic ille: Id puer vidi ſexcenties, & non ſine animi voluptate luſi. Tum ego: Benè eſt, attento ſis animo. lumen illud, quod intus in pariete, vel fornice pingitur, nihil ſanè eſt, quàm Solis, Lunæve radii, qui in aquam incidentes, atque è veſtigio repercuffi, in parietem, tectumque pervolitant. quoniamque tremulo æſtu agitur humor in pelui; idcirco fit, ut radii, tum hac, tum illac reſugiant, depictaque ab illis imago diverſum vaga pervolitet. Id verò quàm graphicè, quàm bellè poëta depinxit! non dubito quin teneas verſiculos: eſt tamen recitare voluptas. Et ille: Ità, quaſo. mirum enim quantum in me à Muſis voluptatis affluat. Tum ipſe:

ſicnt

*Sicut aqua, tremulum labris ubi lumen abenis
Sole re percussum, aut radiantis imagine Luna,
Omnia pervolat latè loca: jamque sub auras
Erigitur, summiq; ferit laquearia tecti.*

Hic Lucr: Fecisti, inquit, ut pulchra hac similitudine, quæ quo usu tritior, eò minus ratione nota, rem planè consequeretur. Verùm age, quando in hujusmodi res sumus, doceas me quæso, quonam modo Iris pingatur in aëre. id enim jam diù scire desidero, & quoniam ostentata occasio est, abste requiro. quamquam enim hisce versiculis quos habes v Nauticorum

*Phæbeos velut ipsa sinu cùm roscida nubes
Accepit radios, circumque remisit in arcum:
Extemplo curvata polo micat aurea summo
Thaumantis soboles, centumq; coloribus ardet.*

explicatum concinnè sit, & concisè: velim tamen, dummodo ne minimum quidem negotii tibi exhibiturus sim, ut soluta oratione rem paulò uberius complectaris. Cui tum ego: Faciam: geratur hic etiam mos tibi. adeo mihi charus es, ut nihil præ te grave ducam. quamquam hujusmodi res sine figuris mathematicis, & exponi verbis, & concipi animo arduum oppidò est. contendam nihilominus id efficere, quoad potero, ad facilem captum accommodatè. Ut igitur disseram enucleatè, scias primùm Solis radios in roscidas aquarum guttas (roscidum quippe sit cælum opus est, ut in illo Iris depingatur) incurstantes statim refringi, ac veluti deflectere à via: subinde verò hoc obliquos modo in aërem ex aqua permeare, infringique iterum; lux enim suapte natura sic est, ut ex uno in aliud corpus means, si diversa illa sint, nimirum plus, minusque crassa, iter statim flectat, atque aliam semitam progrediatur. Habes istæ: Et ille: Ita verò: sunt enim exposita dilucidè. Benè est, tum

ego: contendam ad reliqua. Jam verò illiusmodi radii hunc in modum refracti, atque obliquam progressi viam, certo quodam sub angulo opacitatem induunt; atque hoc modo colorantur. Et quod mirum oppidò est, juxtà variam anguli mensuram, varios sese pariter variant in colores, ac diversimodè interpinguntur. Id verò quò facilius percipias, experimento proclive tibi, imò & perspicuum faciam: atque in vitro triangulo, sive in phiala aqua benè plena explicabo. Etenim si triangulare illud vitrum, vel si phialam Soli obiciamus, videbimus illicò, radios in vitrum, phialamve irrumpentes, refractos statim ex illis exilire, atque Iridem quasi versicolorem exhibere, vario colorum ordine, quàm pulcherrimè depictam. luteolo nimirum, cæruleo, & purpurante. qui colores reapse nulli sunt, coloratæ tamen lucis speciem offerunt. Hic Lucil: Istuc admiratus sum sæpenumero: sicque animum inducebam, ut præter lucis coloratæ speciem, nihil omnino essent. Tum ego: Si hæc mihi concedis, & concedenda quippè; jam quo Iris modo pingatur in nube (quæ rosida sit, ut dicebam) perspicuum fiet: & perquàm facilè animo complecteris. Et ille: Perge porrò: attento te sequar animo. Ego verò: Jam telam ordiar. Cùm stillum cælum est, èque roscidis nubibus quamplurimæ continuò guttæ depluunt: Sol verò finientem supra circulum xl partes elevatus irradiat. (idem fit si minores, si majores verò non ita) tum radii in guttas illas incidentes, colorati mox abeunt, inque aëre versicolorem Iridem arcuatam instar orbis depingunt, hoc tamen colorum ordine, in superiore scilicet limbo purpureus, mediò viridis, in inferiore tandem cæruleus color internitcat. Quia verò omnes eodem sub angulo colores induunt, & contiguæ sese inter guttæ sunt depluentes, inde fit,

ut

ut in arcum bellè, fabrèque variegatum, atque inter-
 pictum se Iris decircinet. Hoc loco Lucil: Dilucidè,
 & paucis, quoad potuit, res est explicata. Sed age
 (parcas, quæso, si tot te ego interrogatiunculis fætigo.)
 Pluviam ne Iris, an serenitatem prænunciat? Cui cum
 ego: Certè aqueum signum est: nempe sine pluvia
 fieri nequit ullo modo. Et ille: Jocaris? non enim,
 ut hoc teneam, Oedipo opus est. quod autem noscere
 aucto est, secururanè sit pluvia post Iridem, an futura
 serenitas? Tum ego Hebeo id Ili Nautæ & mitor sanè
 te præteritisse. En tibi quid sentiam.

*Ipsa tibi pariter picto Thaumantias arcu
 Signa dabis: pluviam cælo si fulseris ante,
 Fundes aquas; lasos si post curvabitur imbres,
 Auricomos aperis Soles, cælumque serenat.
 Purpureis si tincta notis nimis illa rubebit,
 Æolia flabunt anima: dare vela per altum
 Ne dubites: tua vela canent felicia Coris.
 Verùm caruleo si fulserit illa colore,
 E cælo largos demisses Juppiter imbres.
 Si gemina geminos latè curvantur in arcus,
 Ingenti torrente cadent de nubibus undæ.
 Versicolor tepidum cùm se diffudit ad Austrum
 Iris, aquas, tonitruq. & concita fulmina mittet
 Si verò in Boream, fulgebis candida summo
 Lux cælo; cælique simul convexa nitent.*

Hic Lucil: Abunde inquit: nec quidquam profecto est,
 quod amplius desiderem. Interea loci, dum sic La-
 cilius, en Fabiolus pavens, ac pallidus supervenit. ut
 vidi, Quid rei est? inquam. Et ille: Perii, mi here.
 Tum ego: Cedo, quid istuc tandem est? Et ille: Haud
 equidem fari audeo. Cui ego: Quidquid sit incom-
 modi, dicito, mihi odiosus non eris. non me planè
 nosti? Ille verò: Novi equidem; & idcirco dicere
 non

non audeo . nam tu iracundulus es . At ego : Tu certè malus es : neque tibi sanum est sinciput . fare tandem . & ille confidentior factus , Canis quidam , inquit , è via domum ingressus , in culinam irrupit . Hic ego : Quid ? Et ille . Me miserum ! disperii : faxint Superi , ut hinc sanus abeam . Quid ? inquam tum ego . Et ille : Audias , quæso , pacatis animis . canis aululam subvertit , & jurulentam carnem ipso simul cum jusco devoravit . malè sit cani illi . Tum ego : Malè tibi erit , verbero . non te pluries admonui , ut fores semper occluderes ? Et ille : Occlusi : imò etiam clave , & veste obfirmavi , quis verò postea reseraverit , haud scio . Dii me perdant , si mentior . At ego : Tua certè negligentia id factum . sed faxo , ut in te damnum recidat . Hic Lucil : Imò vercor , ut ne in me recidat pueri negligentia . quid obsonabo , si canis vitulam subripuit ? Tum ego : Aliquid fiet , quo damnum compensem . Et ille : Videlicet ? Tum ego : Libulum ex ovis frixis butyro : teneo enim tuo stomacho delicatissimo oleum non quadrare . vel , si mavis , ex dispersis in ferventem aquam sine putamine : quæ præ reliquis salubriora sunt . vel , si potius tibi est , ex inasfatis in cymbulis cum caseo bubulo edulium apparabo . si verò ames frixa globulata , aut succidiata , apponam tibi illa . Tum Lucil : Satis est libulum ex frixis butyro cum tantillo casei , infundes etiam tantillum aquæ ; fiet enim sic tenerimum : spargas super libulum momentum sacchari , & cinnamomi . Sed næ ego stultus , qui piscem natare doceo . Sub hæc amici viri famulus me convenit : & Dominus meus , inquit , prosperam tibi noctem ominatur , rogatque , ut in suæ ergo te observantiæ testimonium sex hæc ficedulas , quas in retibus captas è vestigio ad te mittit , accipere ne dedigneris . Tum ego : Dic illi meo nomine salutem

tem plurimam, meque gratias plurimas ei agere ob munusculum, quod mihi cadit peropportunum. Mox puero dimisso, Lucili, cuncta tibi in sinum cadunt. an tu gallinæ filius albæ? ut dicitur. Et ille: Imo tibi id dandum, cui verè semper feliciter cadunt Jovis taxilli. Sed vide ne missum facias libum. illo ego libens vescor: & in hisce avibus vix unciola cibi est. Cui ego: Numnam me Diogenem putas? Heus tu, furcifer, i, cito, & emito quatuor ova: sunt decumana, & recetia. cave ne singula paria emas plus quàm duobus assibus. actutum redi. mox ad Lucilium. Recipiamus nos hinc domum: jam enim extabescere die, nox humida nos comprehendit. neque innoxium est esse sub divo.

C A P U T IV.

Amicissimi viri rus, & resia circumlustrantur; & sumpta à venatione occasiuncula, multa scissidigna de Ficedulis, & marinis Conurnicibus notata.

Vesperarum precibus pro more recitatis, ad orium, ut aliquid laxamenti caperem, sedebam, cum me Sextus Niger, qui valetudinis causa non multis ante diebus in Surrentinum venerat, à somnulo excitatus adit. ut vidi, Contulitne tibi, inquam, buculusque hæc nostri cœli pacatissima temperies? Et ille: Propemodum. siquidem, non tanto. ut prius, teneor cibi fastidio, nō adeò crebri me torquent ructus, nec tam frequens ventris me vexat dolor: quæ quoniam languentis stomachi vitia erant, nunc illum minus laborare conficio. neque mi tanta gravedo est, qua penè deperibam: quocirca spero fore ut brevi con-

convalescam. Tum ego: Gratulor tibi, mi Sexte, mihi summopere gaudeo. nam, ut planè nosti, te filii loco duco, atque unicè amo. Et ille: Id mihi plurimis argumentis jamdiu perspectum est: & hoc præcipuè, quod me in rus vocasti istuc tuum: quare si valebo, tui beneficio valebo. ne verò ingrati animi arguar, curabo nervis omnibus, ut totus tibi valeam. At ego: Quod aveo, est ut bona utaris valetudine. ceterum quidquid à me tibi præstitum, tibi debes: tui enim merito factum. Verùm eamus, in vicinum rus, ut tantisper animum relaxemus: nolo enim te longas ambulatione vexare, ni prius integrè convalescas. Est ibi amicissimus vir, idemque venator insignis, si aves aliquot fefellit, dabit mihi certò: & ego tibi apponam hoc vespere: nihil enim domi mihi hodie ad manus. Tum ille: Veniam libenter: mirum enim quantum mihi ad valetudinem conferat per aperta, & amœna spatia: quin & ipse novi aëris haustus perquam saluberrimus, verùm de avibus curam omittet: fac erit puls candida ex vermiculis edulibus, vel medulla, vel butyro elixis; quos meus stomachus recipit sine fastidio. si salernum pyrum addas, & frustum casei Martii Lucani, cenabo basilicè. Tum ego: Istuc adornare nullius est negotii. laudo tuam temperantiam, quæ medicatissima res est: nec quidquam tuo morbo magis prodelle poterit. Sed eamus tandem. Et ille: Præsto sum. Assumpto igitur baculo perasati procedimus. Ut verò ad ruris fores pervenimus, illas baculo pulsare cœpi: nempe cornix exciderat. Adfuit paululum post puer: rogatque quis fores pulsaret? Cui ego: Amici quidam, qui dominum conventum expetunt. At ille: Intempestivè venistis: nam dominus venationi, quam habet in deliciis, intentissimam dat operam. ut neque se à prætorè con-

vni-

veniri vellet. At ego: Reclude tu fores, illud ego viderim. Tum ille: Si ita, ingredimini. cumque fores aperuisset, finite, quæso, inquit, præcurram, ut de vestro adventu admoneam. Tum ego: Ne facias: illud improvisi volumus opprimere. transmissio igitur limite, in hortum irrumpimus: illumque ficedulis imminet, nec quidquam de nobis suspicantem aggredimur. ille simul ac nos vidit, eodem temporis momento, & istum dirigit, sclopumque explodit (quo duas ficedulas confecit) & ad nos advolat, & comiter complexus, benevolentissimè salutat. Et felix, inquit, fortunatusque mihi dies procedit, adventu vestro. ut illud usurpare possim tam tritum, contigit & malis venatio. sed quod meo meritò non debebatur, datum est auspicio vestro. ut & quæ malis avibus inceperam, nunc bonis perficiam venationem. Imò tum ego volumus, ut illam continues; & quoniam secundus æstus, navigandum. nolumus enim, ut nostrum gratia tanta te voluptate fraudes. Jam satis, tum ille, & abundè venationis est vestra præsentia, qua hunc mihi diem facilem, luculentum, atq. impetrabilem dedistis: illudque signabo, ut dicitur niveo lapillo: ejus profecto memoria mihi semper erit jucundissima. Tum ego: Mittamus istæ studiorum officia: scis me hominem simplicem, & moribus antiquis. Insiste venationi, ut cæperas. & quoniam bona spes ostensa est, utere. Ille vero, utpote vir hominum quotquot novi urbanitate limatissimus. Næ ego, inquit, malemorigeratus, qui, vobis relictis, venationi navem, charissimam quantumvis mihi, operam. Tum ego: Imò, quæso, ut insistas: nobis voluptas est te venantem videre. sequemur summa voluptate. imò si etiam in partem prædæ veniemus. nam, ut militiæ lex est, non solum qui manus conserunt, sed etiam hi, qui ad

sar-

sarcinas sedent, in partem prædæ, & victoriæ admittuntur. Tum ille: Quando sic jubetis, morem vobis geram. utinam mihi, ut jam ceperant, fortunent Superi hanc diem. Verùm, si vobis id potius est, eamus prius ad retia, quæ per hortum tetendi: fortasse inveniemus prædam. Tum ego: Eamus: cadit quippe ex animi sententia. cupio enim, ut meus hic juvenis, qui præpeditur diutino morbo, per hortum recreetur. Tum Sextus: Veniam certè lubentissimè, istuc enim, Parthenie, ut dicis ex longo desiberabam: neque unquam copia fuit, nunc oblata occasioneculam arripiam utraque manu. Ego vero: Tibi Sextus hic dies luculentus fuit, habebis, spero, quo lautè obsones. Ubi verò ad primum rete per quàm amplum venimus, totum oculis perlustramus, si illo aves implicarentur. verùm postquam hac, illac oculos, animumque versavimus, nihil omninò prædæ deprehendimus. Hic Sextus: Triste principium, inquit. malo quippe aliter auspicamur. Tum ego: Imo nec bono, nec malo, nempe nullo. Sed bona spe esto, nam ut optimè Naso, quem lætitare te frequenter scio, & tibi similitudine, perquam charum esse.

FleBILE principium, melior fortuna sequetur.

At Sextus: Iocaris, Parthenie, meque afficis scommate. Tum ego: Nempe ut sic te mærore levarem. At Amicus; Inferamus gressum in illud, quod inter illas arbores, cujus baccæ gratissimæ ficedulis sunt, explicatum est: uberem sæpe ibi prædam inveni. Ut brevi perventum, statim aves prospicimus: quocircas læti, atque hilares rete demittimus. Divinavi, tum Amicus: En quattuor ficedulæ majusculæ, pinguissimæ. Imo, sex, inquam, ego: en ibi duas alias implicatas. At ille: Illiusmodi aves frigidæ sunt. verùm id temporis, quo maturis se ficiis sagineant præpingues
etiam,

etiam, nec multum à ficedulis discrepant. Hic Sextus: Hem, inquit, passerculus. hic certè mea erit præda. Tum officiosissimus, idemque liberalissimus noster àmicus: Imo, quæso, ut & has, & quas sub vestrum adventum occidi, etiam accipias. Tum ego. Minimè verò: partiemur ex æquo. Ille vero: Neutiquam id patiar: neque tibi hac in re morem geram. quippè quam paucissimæ admodum, ut si partiri velimus, nec mihi, nec vobis suffecturæ. præterquamquod hac ego die, ex antiquo voto à carnibus abstineo. Tum Sextus libenter officiosam illam vim devorans, Gratias ago, inquit, quammaximas: propinabo tibi ex animo. Interea loci dum hæc diceret, advertit ille in summo ficulneæ ramo binas ficedulas insidere. quocirca cùm nobis digito st, illico scelopum dirigit, collimat, explodit: & quidem tam dextrè, ut ne transversum unguem oberraverit: ambasque confecit. accepitque tanta læritia, ut nihil supra: & hoc, inquit ad Sextum, erit auctuarium. Accepit ille, & gratias egit quamplurimas. At ego: Amice, ut video tibi Procridis telum: quodcumque vis, assequeris; ut meritò de te illud Euripidis dici possit,

ΒΕΒΛΗΚ' Α'ΧΙΛΛΕΥΣ ΔΥΟ ΚΥΒΕΣ, ΚΑΙ ΤΕΣΣΑΡΑ,

Ille verò: Nimirum? Tum Sextus, explicabo ego illud; At Amicus: Rem gratam mihi facies: nam Græcis literis operam non navavi. Cui Sextus:

Jecit Achilles duas tesseras, & quatuor.

Tum ille: Totum id vobis debeo, quando vestro auspicio factum est. sed eamus, quæso, ad prospectum maris, ut ibi sedeamus tantisper. non enim amplius venationis tempus. Tum ego subridens; Nempe parva gloria contentus, non vis illam sinistro aliquo ictu corrumpere. benè facis: nempe tenendus semper in rebus modus: aurea enim, ut ait poëta, mediocri-

tas est . statimque ad prospectum maris ire pergimus .
ibiq tandem in paratis à famulo sedibus cuncti con-
sedimus .

Hic ille , cum de avibus illiusmodi sermo illatus
esset , quædam , inquit , de ficedulis observavi , scitu
quidem digna , & quibus Autumnos tuos locupletare
possis . Cui ego : Cedo , inquam quæso : referam illas
in meos Autumnos , quibus infarciendis operam do .
Et ille : Observatum primò est Ficedulas , ut novæ in-
colæ in hæc nostra tura commigrarunt , biduò , vel tri-
duò formicis victitare : & sic purgare alium venato-
res ferunt . deinde ficis , uvis , baccisque aliarum
arborum se uberius saginare . Tum ego : Quo id tu
experimento ? Et ille : Hoc , quod mihi in promptu
semper est . In extremo illius pulvini juxta horri li-
mitem , quercus est perverusta ; ubi formicæ suas ca-
sas struxere , & in quam ex proximo pariete , nigro
agmine , ut ait poëta , progrediuntur : ibi ficedulas , ubi
primùm ad has oras convolarunt sæpe deprehendi
formicas venati , atque avidissimè deglutire . id ipsum
sæpius comperi , in alta illa populo , quæ etiam in li-
mite constituta est : & ab aliis pariter observatum , qui
in hæc aves quotidie imminet , accepi . Atque id-
circo , opinor , novitiæ cum sunt nostri ruris , macilen-
tæ , & minus sapidæ . Tum ego : Probabile id quidem .
Ille vero , Atque Audite : Biduo antequam transmari-
nas in oras hinc commigraturæ sunt , visæ cibo absti-
nere , ac solitarie in altissimis arborum verticibus ,
quasi tristes admodum immorari . Crediderim ægri-
tudine affici , quod peramœnas hæc oras relicturæ
sint , inque longum exilium profecturæ . Tum ego :
Credo equidem : quis non ægrè ferret ab Elysiis hisce
amœnissimis divelli ? verùm cur se à cibo continent ?
numquam , ut saginam illam præpinguem decoquant ?

nem-

nempe ut graciliores factæ, expeditius, depositis veluti sarcinis, avolent. Et ille: Rem ipsam putasti. usque adeo mira est in brutis natura. imo tanta interdum cautione, cautione autem? imò prudentia bruta animantia ad propriam utilitatem uruntur; ut ne tantâ ipsi homines adhibeant. quippe in his cecit nonnunquam ratio pravis affectionibus obfuscata: à quibus tamen bruta sunt immunia. Cui ego: Ita est, ut dicis. haud equidem videbis pecudem supra mensuram, quam ipsius natura ferat, se saginare: quando homines ita modum excedunt, ut sæpe præ nimia crapula intereant.

Sub hæc puer adest, nunciatque domino jam nau-ras cymbam deduxisse, atque illum ad oram opperiri. Cui tum ille: Fac, ut iterum subducant. nunc humanissimis hisce viris par est, ut inserviam, qui me invisere dignati sunt, meque sua præsentia cohonestare. Tum ego illi: Quoniam constitutum tibi erat, cymba vehi animi gratia, quæsumus, ut pergas: & ni grave tibi futurum sit, veniemus tecum animis lubentissimis. imò gratias agimus quod nos ad relaxandum animum marinis auris deducere digneris. Et ille: Quando sic jubetis, morem geram. Verùm antequàm descendamus, quæso, ut cucumim deliberetis: qui quoniam biduò ad frigus concipiendum in antro repositus, erit frigidissimus: & sanè in hisce caloribus quadrat stomacho. Statimque in lance argentea, in orbem dissectum inferri iussit. cum igitur dimidium orbis gustassem, Exquissitissimum, inquam, est, tum sapore prædulci, quo sapit palato, tum colore purpurante, quo etiam oculos pascit. est pariter tam gelidus, quàm qui maximè. fateor me rarò admodum quid simile gustasse. Mox ad oram maris descendimus. ille scelopum secum ducens, Ne grave sit, inquit,

I
me

me venatorio apparatu venire; venabimur fortasse coturnices aliquot marinas. Cui ego: Imo, quæsumus, ut sic venire placeat: facies nobis rem optatissimam. statimque cymbam insilivimus, jussusque est navicularius propter scopulos porro cymbam agere remo suspenso, ut siquæ per scopulos cursarent aves deprehenderemus. Cum verò in acie cujusdam saxi quinque aves conspicatus esset, jubet ille navicularium inhibere remos, atque ita ad nos: Attendite, nam si fortunanaverit, hic ictus erit memorabilis. Cui ego: istuc expectamus intentissimi. Dum verò ille collimaret, aves unà omnes avolarunt, inque alterius scopuli crepidinem sese demittunt. haud mora, illuc cymbam impellimus. collimatque iterum arte tam mira, ut nihil supra. cumque illic scopum explosisset, ex quinque tres confecit. confestim horiam ad scopulum applicamus, & summa animi voluptate aves accipimus. quarum una erat jam mortua, dux vulneratæ hac, illac per aquas saliebant, ut non sine labore assequeremur. mirum quantum gestire visus est: & nos simul cum illo lætati magnopere sumus: plausimusque magna acclamatione. Post deinde cum avem unam ex faucibus accepissem, rogo quænam illiusmodi aves essent? nunquam enim illas me vidisse memineram. Et ille: Hæ aves marinæ coturnices vocantur: quæ ex transmarinis etiam regionibus ad nos commigrant, sed non tanta copia, quanta reliquæ coturnices. marinæ appellantur, quod secus litora præcipuè scopulosa pervagantur: visitant plerumque muscis, quibus mirum quantum inhient: & marinis item insectis, ut sunt, culices, lumbrici, cæteraque hujuscemodi animantia. atque idcirco marinum redolent odorem. Tum ego: Si ita nec vescæ, nec gratæ erunt. At ille: Imo edules, & gratissimæ. nam si exenteratis tritum alli-

allium in visceribus condas, castigatur ille maris nidus. pectusculum carnosum, & solidum: nec adeo pingues, ut alix coturnices, quibus haud libenter vescor. hisce verò, fateor, plurimum delector. quæso, ut in his vos periculum faciatis. quas ut in mei grati animi significationem accipere ne gravemini, quæso, atque obsecro. Tum ego: Nobiscum hodie venaris? nonne commodum tantum laboris? obsonabimus ne hodie tuis jacturis? Et ille, ut qui singulari vir comitate. Nunquam sane, fateor, tantum me lucri fecisse, quantum hodie, quo vos me singulari beneficio complexi estis. At ego: Quando sic jubes: geratur mos tibi. Mox aves iterum contemplor: erant quippe visu pulcherrimæ reliquis coturnicibus paulò minores sunt, rostrum habent longius, atque aduncum, pennæ læves, & nitidæ, color circa collum ex cæruleo purpurans, in reliquis partibus violaceus dilutior. Postquam autem multum per scopulos pervagati essemus, quoniam jam dies extabescebat, domum reversi sumus.

C A P U T V.

*Recitatur quadam epistola ab amico data, ubi perridicula quadam de pignoratitia sue fabula enarratur: usque leones facibus, quas perime-
scunt capiantur.*

A Meridiano somnulo ad umbram cum Quintio confabulabar, & de Lucilio, qui nihil ad nos litterarum dederat, conquerebamur. & quidem acrius in illum Quintius, cui ardentior bilis erat, & mordax ingenium, invehebatur. Audistin', inquit, quantam nobis, cum discederet se facturum spondidit? ve-

rùm hucusque ne syllabam quidem transmissit, ut quid Neapoli agatur, quomodo amici valeant, quid ex tranfalpinis regionibus allatum sit novi, ignoremus omnino. Cui ego: Quid facias? sic hominum ingenium est. cum præsentes sunt, præsentiq̃ue obstricti beneficio, montes aureos, ut dicitur promittunt. mox ut se ex oculis substraxerunt, occiditque memoria præsentis beneficii, quasi lethen bibissent, vel mandragoram, ut ajunt, obliviscuntur omnino. Sed, quæso, ne carparamus absentem, quem præsentem non cerè contristaremus. fortasse vel negotiis præpeditus omisit, vel, ut plerumque fit, tabellarii negligentia literæ interciderunt. Ego sic in animum induxi, ut non nisi tardè, & maturo judicio de aliis judicem: nimium enim properata judicia falsa plerumque sunt. Præterea cavendum, ne de amicis sinistrè loquaris: quippe tolerandum in amico vitium. Et ille: Amandum igitur nobis vitium est? Cui ego: Minimè verò. Amandus enim cum vitio amicus: non vitium in amico. Cæterum, tecum sic statuas, velim, quemadmodum ego cum memet ipso jamdudum constitui, multa esse, quæ alii in te tolerant. nullus enim quamvis probus, culpa vacat: notatur quisque suo nævo, ex quo illud conficiet, multa esse, quæ à te in aliis tolerantur. Tum Quinctius: Vera loqueris. nam, ut optimè poëta, Quisque suos patimur Manes. Interea loci dum hæc diceret, adest puer: nunciatque ad fores esse quendam cum fascæ literarum satis magno. Cui ego: I, atque illum ad nos introducito. ad Quinctium verò, hic venit à Lucilio; quare mox rem totam sciemus melius vate. At puer cum vestem amovisset, tabellarium introduxit. Quem ut vidi, Vndenam, inquam, venis? Et ille: Massa ad Delubrum, ubi hunc mihi fascem ad te perferendum illius domus œconomus dedit.

dedit. Hoc loco Quinctius: non igitur veniunt à Lucilio inscriptæ tibi literæ. Tum ego: Mane adhuc. fascemque accipio, & satis, inquam, Quincti, ponderosa hæc epistola, erit cetrò plena omnium rerum. mox resigno, invenioque binas alias; quarum una erat maxima, altera verò minuscule. primum illam recito, quæ alias inclusas continuerat. istæ autem scriptæ:

EULALIUS PARTHENIO SUO
S. P.

Accipe, ò mihi amicissimum, & Musis caput, hanc epistolam festinationis plenam, & pulveris, quam eodem loci vestigio, & temporis, quo in litus appuli, ad te scribo. Impetrata à Prætoris facultate, recta ad te venire constitueram, ut triduo apud te essem; diutius ut manerem, extorquere non potui. Quoniam verò phaseli, qui istuc veniebant, omnes certis hominibus locati erant, coactus sum Massam ad Delubrum divertere. ex qua statim ad te venissem, nisi longiusculum iter absterruisset, & lassus etiam essem à nausea, quæ magnam mihi molestiam intulit. Veniam igitur crastina die, ut primum iliuxerit, uti Solem evitem. interea nolui prætermittere, quin te de meo adventu certior facerem. mitto tibi binas literas, quas ad te perferendas mihi dederunt Lucilius & M. Junius, multa tibi habeo, quæ dicam, & ea perquam lepida: interim legito Lucilii epistolam, habet fabulam oppidò deridiculam. Vale. Massæ ad Delubrum xix Kal. Octobris. MDCLXXXV.

Ut recitavi, statim Quinctius: legamus, quæso, Lucilii Epistolam; aucto audire quæ sit lepida illa fabula. Tum ego: Id etiam desidero. nam solet ille amœna, & festiva transcribere. Illicò, igitur epistolam solvo: recitoque hoc modo

LUCILIUS PARTHENIO suo
S. P. D.

Si tu, & Quinctius valetis, benè est: gratulor ex animo. Ego non plane benè. vix Neapolim redii, cum me stomachi fastidium iterum invasit, & quædam tussula, qua non parum torqueor: insolens item gravedo, quæ plurimam mihi molestiam affert. si morbus ingravescet, redibo ad te quantocyus, ut in cælo isto saluberrimo perfectè convalescam. Atque id causæ fuit, cur ad te nō statim literas miserim, quod & pollicitus in discessu meo fueram, & tot in me à te collata beneficia postulabant. Quid Quinctius nunnam de me conquestus, quod non statim epistolam saltem pusillam conscripserim? inquires quippè. novi profectò illius ingenium. expectabam sanè ab illo ardentes literas, & aculeatas: & scripssisset, opinor, nisi tu, cui mirissimum ingenium, prohibuisses. Hic ego: Audin' Quincti? divinavit certè Lucilius. nonnè ego rectè admonebam ne iudicium festinares? age suscipe sis virtutem animo: neque unquam posthac iudicium feras, nisi rem planè noveris. Tum ille: Erravi, fateor: ad frugem me recipiam. Verùm ille me non leviter tangit. Cui ego: Ne egrè feras si tibi ingenium paulò ardentius esse dicat. id enim ad me scribit, quem scit tui amantissimum. Neque enim piaculum est quædam amicorum vitia amicis credere, præcipuè quos secreti tenaces noveris: sic etenim illos juvare quàm maximè possumus. sed redeamus ad epistolam, quæ quidem est benè longa.

Verùm utut se res habeat, illum fac plurimum salutes meo nomine, eique hanc, quam scribo fabulam recitato. operæ enim auribus erit percipere, adeò lepidam auditu est. illam autem idcirco ad vos scribendam

dam duxi, ut rideatis, & solitudinem istam aliquantulum allevetis. velim tamen mihi parcas, si epistolam non elucubravi: id enim etsi maximè vellem (nempe scio cui scribo) valetudo minimè permisit. Sed venio nunc ad fabulam tam lepidam, quam quæ lepidissima. & ut rem planè intelligas exordior ab ovo. Quidam olosericus infector noster inquilinus debebat pro locario aureos duodeviginti, cum verò annus jam esset elapsus, & ipse exactori verba daret: deque die in diem solutionem differret, hic, lictore ab edile impetrato, in fullonis officinam venit, ut vel pecuniam solveret, vel in vincula à lictore coniceretur. Tum infector inter saxum, & sacrum, ut dicitur, constitutus, ad preces confugit: hominemque orat, atque obsecrat, ut famæ suæ, parceret, miseræque familiæ consulere. perque Superos omnes precatur, ut non nisi triduum sibi ad pecuniam, quam ipse etiam ab aliis exacturus erat, comparandam concederet. interea si dictis fidem non præstaret, pignus acciperet. Tum exactor petiit, quid pignori poneret: Cui fullo: Suam hanc oppignoro. Accepit statim exactor, domumque inducit. ibique Pistori servandam tradit; quod quidem præter pistorem rescivit nemo. Jam omnes cubitum concesserant: & ut fit in prima vigilia, indormiebant altissimè. tum sus pignoraticia è furni stabulo, ubi unà cum molario mulo inclusa à pistore fuerat, loci illius insolens, illicò erupit: perque valetudinarii gradus cepit ascendere immanè grunniens. Hoc loco Quinctius, Jam incipit, recluso, inquit, proscenio, dari fabula: audiamus: nam ut conicio, erit quammaximè deridicula. Cui ego: Auscultemus, quæso. literasque recito iterum. Cum verò in magnam deambulationem, cui à Toletana via nostris magnificum pro more factum nomen, venisset, dextra defle-

Atens per proximos gradus, in supremam domus ambulatiunculam conscendit. Forte fortuna (vide, ut ridicula ferat interdum casus) quidam ex junioribus eum socio in confabulatione, quæ animi gratia post cœnam haberi mos est, de spectris sermonem instituerat bene longum: deque metamorphosi Dæmonum in porcos, quam referunt sacræ literæ. Hic quippe melancholicus recordatione spectrorum vix somnum conciliare poterat. Hic ego: Quoties admonui juvenes, ne antequàm ad somnum eant, de tetræ rebus sermonem inducant: siquidem tristis animus haud facillè in somnum labitur. Tum Quinctius: Rectè ego, qui amœna, & faceta in medium infero. sed pergamus porrò. Ego verò, ut cœperam, epistolam perlego. Quocirca statim grunniens animal exaudivit: & quoniam suspitione præoccupatus erat animus, illicò Dæmonem illudesse sibi persuasit. cœpit igitur pavere, tremere, Superosque omnes invocare: & cùm lustrali aqua, ab amula, tum salutari etiam signo se hostem adversus teterrimum communire: quo sic imminens ab illo periculum sibi deprecaretur. Interea sus rursum, prorsum per angustam illam ambulatiunculam excurrens altè grunniebat. & quoniam perangustum, ut scis, iter illud, grunnius hac, illac repercussus resonabat miro modo. Excitati omnes brevi sunt, qui in transitu illo inhabitabant. Quia verò sciebant nullos domi ali porcos, & tamen grunnius audiebant, portentum subesse rei arbitrati sunt. quapropter nemo erumpere è cubiculo audebat. quisque tamen suspensis auribus, atque animis, ad januæ limen hærebat. tandem unus præ cæteris animosior, placidè fores aperit, nec crepat grunniuntque clarissimè excipit. effert mox foribus gradum. verùm vel præ somnolentia, lippientibus oculis, vel præ obscuritate longi

gi itineris, suum minimè videt, strepitum tamen fugientis manifestò audit. sus enim sive territa ipsa, quæ reliquos exteriebat, sive casu fugiens se iterum per gradus proripuit, inque amplam coactionem reversa est. Interea omnes è cubiculis egressi sunt; & quisque à socio quid illuc rei esset percontatur. Tum ille, qui jam sibi persuasum habebat, illum esse Cacodæmonem: Oblecta, inquit, proculdubio domus est genis terribilissimis. Audite, quæso; post cenam mihi cum socio, de spectris, ac transmutatione, seu potius invasione malorum spirituum in porcos, mentio facta est. Id certo ægrè tulit teter genius: seque porci figura induens voluit nos perterrefacere. Tum illi: Credimus enim verò: etenim cum nulli sues domi stabulentur, certè quidem maius genius ille est. Sed quid illi qui in ampla contignatione? rogas. in eadem perturbatione, & timore erant. nec quisquam satis seu virium, seu animorum habebat, ut è cubiculo pedem efferret. Cumque Ius C. Petronii, viri, ut scis, meticulosissimi, fores pulsaret, ille tanto timore correptus illicò est, ut nihil propius factum est quàm enecaretur. Hic Quinctius: Væ misero! utinam illi aquam aspergere potuissem! at redeamus ad epistolam. Et ego: Atque audi. Sed jam quotquot juniores erant in utraque ambulatiuncula, in inferiorem facto agmine descendunt. Tum sus illa pignoratitia per ampliores gradus in mediam se contignationem proripuit, cumque ad januam Cn: Ericii venisset, illam vehementi oris illisu excussit, horredumque edidit grunnitum: quo omnes illicò excitati. injectisque raptim vestibus, ad amulam contugere, ut se lustrali aqua aspergerent. At sus per posticos gradus iterum ascendens in superiorem deambulationem, in qua tu inhabitas, se vertit: inque postremum cubiculum

lum patens, & vacuum, cujus, ut scis habitator, non multo ante diē obiverat (vide quid ferat casus) irrupit, januamque circum quaquaversus excursans occludit. qui viciniam tenebant, tanto terrore perculsi, ut tantum non exanimati: jam enim grunitus domum universam repleverat, cunctosque excitaverat.

Jam universus penè sociorum numerus, præter emptorum obsonii, qui & exactoris munere sangitur, pistorem, paucosq. alios, qui juxta pomarium degunt, convenerat: & partim rogabant, quo se res modo haberet, partim verò narrabant: universi tamen perterritimescebant. Quoniamque demortui cubiculum, sus ingressa erat: mali id ominis loco ducebant: et si de probitate viri, sanctimoniaque certissima haberēt experimenta. Dum ita animis hærent, grunitus sus immanē emisit, incēpitq. cubiculo cursare vehementius, inque januam impetum facere. quid vidisses? cēpere illicò huc, illuc fere omnes diffugere, uti singuli in sese Dēmonis impetū extimescebant. quis crederet? tot una viros, & cordatos, & sapientes sus perterrebat. At, inquires, præcōcepta illos de Dēmonē terrebat opinio. Ita enim verò. larvæ, quas nos ipsi rebus appingimus, non res huc, illuc ferunt. Tandem factò paululum animo, redeunt, & quid agerent seniores consultabant. & ferè una omnium sententia, expediri sacra ad Dēmonem adjurandum. cū quidam junior tibi benè notus, imò & familiaris. Hic Quinctius: Num ipse fuit? verū non adeò animosum Lucilium duco. Ego verò: Imò vir confidentissimus, idemque prudentissimus. redeoque ad epistolam. Ità socios interpellat: Nunnam Elephanti nos sumus, quos porcina vox terreat? statimque januam recludit. Tum sus, ridiculum sanè, tanto imperu exilivit, tam ingenti grunitu, ut iterum cuncti diffugerent; magisque
ani-

animo persuasi Dæmonem esse, (nec deerant melancholici, qui flammæ se vidisse fatebantur) summo opere extimescebant. Cum tandem, venio ad fabulæ catastrophæ, adest pistior, sociosque monet de sue pignoratitia. Hic illicò risus simul, & indignatio oborta: risus ob fabulam oppidò ridiculam, indignatio in exactorem, qui porcæ in domum introduxerat. Demum multa post mutuò dicta læti, atque hilares cubitum abierunt. Usque adeò verum est, nihil tam insolens, quod non interdum cadat. Sed jam epistolæ ad umbilicum usque benè plena. ride, & plaude.

Ut recitaveram, Viden', inquam, Quincti, ut lepida res est? Et ille: A capite ad pedem tam ridicula, & festiva, quam quæ maximè. verùm dic, quæso (nolo id excidat) curnam Lucilius dixit: Nunquam nos Elephantæ, quos porcina vox terreat? Quia, tum ego, observatum Elephantæ adeò grunnitum suillum pertimescere, ut illo audito, illicò in fugam vertantur. Tum Quinctius: Mirum sanè bestiam tam immanem, unius grunnitu suis exterreri, fugarique posse. Cui ego: Ità natura comparatum est, ut fortia quæque, & ferocia animalia, haberent, quo superari possent. & quoniam vana vanis terrentur, ut ait Seneca, sic, ut idem refert, curriculi motus, rotarumque versata facies leoni, qui quidem fortissimus, terrori est. Imò observatum etiam est accensas faces miro modo expavescere. ita ut illis à venatoribus quàm faciliè capiantur. Hic Quinctius: sed quonam accèssu subigi facibus, comprehendique modo leones queunt? dic sodes: id scire summo opere aveo. Tum ego: Attende, dicam numerò, nam ad preces decantandas jam vocor. Ubi locorum angustia, & juxtà caveas, quibus inhabitare leones solitavere, retia, & casses instruunt: quibus solerter adornatis, leones persequuntur, ut verò nacti sunt,

sunt, obviam eunt magnis facibus, magnisque animis. tum leones facibus illis exterriti pedem referunt. quia verò generosissima animantia turpe ducunt terga vertere; ideo frontem hosti obiciunt etiam fugientes: transversisque retrocedunt, ut cancer solet. itaque fit, ut in casses se inscientes inducant. quibus statim irretiti, & si frustra luctantes capiuntur. Hæc ut dicta sunt, ego ad vespertarum preces recitandas, Quinctius ad precarium Virgini sertum offerendum, abivimus.

C A P U T VI.

*Post deambulationem sub quercu viridi, & amena
sessum est: ibique aliquot versiculi ex III Naut:
recitati: ex quibus dedita occasione, de ven-
torum procreatione fusè disputatum:
deque authoris penè naufragio
mentio facta.*

JAm dies ad vespertam declinabat, cum motandi corporis causa. & reficiendi tantisper animi, domo egressus ambulationem arripio. aderant mecum juvenes duo Cotta, & Balbus, qui quoniam castomachi, à studiis vacationem impetraverant, hæc tamen conditione, ut simul atque à stomachi fastidio convalescerent, se Neapolim ad bonarum artium studia reducerent. optimum sanè consilium arbitror, ut adolescentibus, qui diutino morbo vexari ceptant, statim vacatio concedatur: ne posteaquàm contabuerint, nec literis addiscendis, nec familiarum commodo apti sint. Nonnunquam præstantissima ingenia, ac divinas penè indoles amissimus magno damno: quibus si in ipsius morborum exordiis impensa hæc operæ fuisset.

fuiſſet, ingens rei literariæ decus, ingens familiæ commodum acceſſiſſet. Cum igitur in viam domo egreſſi eſſemus, ita ad illos: Quò ambulationem inſtituemus? Nunnam Surrentum verſùs? Et illi: Surrentum hoc manè viſimus: & via illa eſt etiam inſolara: due, quæſumus, in-Campeſtria. verùm per umbroſum iter perductes, iterum, iterumque rogamus. mirum oppidò quantum à Sole nobis creetur incommodum. Tum ego: Atque mihi pariter Sol eſt perquamnoxius. malim rigidiffimum quamvis frigus, etſi frigoris ſim pariter intolerantiſſimus, quam momentum unum temporis Solem perferre. Agite, me ſequimini, vos per ſemitam tum umbroſam, tum amœnam perductabo. Mox perpauculis paſſibus, brevi tramite ſuperato, ingrediamur, inquam ruſ iſtud: ibimus hæc per compendiariam. Quoniam verò cornix præ vetuſtate tota penè corroſa erat, ac dericta, baculo fores pulto, & colonum etiam inclamo. adſuit tandem ille, & foribus illicò reſeratis, nos comiter introducit. ſimul rogat, ut illi parceremus, ſi paulò ſerius accuſſiſſet: id enim factum, quia erat ſuper quandam ſiculneam, ex qua ficus, quas nobis deſtinaverat, decerpebat. Cui ego: Benè factum: moram iſtam æqui, bonique conſulo. curato, ut ſint mitiſſimæ. de numero ne labores ſint perpaucæ, ſed ſelectæ. cùm mox domum duxeris, dic à me puero, ut ſtatim in puteum demittat: erunt ſic craſtinò gelidiſſimæ. ſi maturi jam tuberes, aliquot decerpito: hiſce meis adoleſcentibus grati oppidò: illiſque excitant appetentiam. quod ubi ille ſtatim ſe curatum, factumque daturum ſpondit, arreptam deambulatiunculam contriuamus, expenſo gradu, ne maderemus: erat enim dies æſtuoſiſſimus, anniq. temperies in æſtate impluvia nimium ſicca. dum autem ex uno, in aliud ruſ, per inter-

terpositos tramites pertransimus, ego ad juvenes, Nonne amœna, & perquàm pulchra istæ ambulatio? Tum Balbus: Imò amœnissima æquè, ac pulcherrima. quin & illud commodi mihi habere videtur, (quod quidem ego primo loco numero) nimirum secreta est, & libera ab occurſu hominum: & ut planè dicam, nescio quid sacri silentii habet. quocirca illam tibi charissimam puto, & in deliciis esse. nam, ut in Æstatibus scripsisti, hanc tu libertatem pluris, & meritò, facis, quam Corcyræ suam. Tum ego: Rectè autumas. Nec post multos passus, in jucundam visu convallem devenimus, cui opaca super sylvâ imminet, infra verò suo nativo horrore investitæ rupes amœnissimæ. Hoc loco Balbus: Quidni, inquit, tantisper ad amœnam hanc umbram sedeamus? Cui ego: Si Cottæ grave futurum non sit, per me licet. Tum Cottæ: Imò rogo, ut lubeat: delector hac umbra, ac per amœno vallis prospectu. Juxta convallis crepidinem silens quædam vinea erat: inque illius limite, ultra quem nemus frondebat, ingens quercus, & benè patula, totâ latè crepidinē obumbrabat: subter verò molle solum paulo extuberans: quocirca Sedeamus, inquam, hic, ubi tellus nobis veluti in subsellia consurgit. Tum Cottæ: Rectè excogitasti. commodè nimirum hic sedere possumus. Nihil igitur cunctari herboſo in thoro confedimus. Tum Balbus libellum à marsupio educit, & Pellegamus, inquit, verſiculos aliquot: sic enim, & fallemus otium, & animum allevabimus. Cui Cottæ: Ità, quæso. sed cedo, quis istic libellus est? Tum Balbus: Quem perinde tu, atque ego lectitare soliti. Cui Cottæ: Intelligo: gratiam mihi facis: lectita. At ego quod erat interpretatus: Teneo & ipse qui sit. nunnam mihi vultis caput demulcere? Nunnam ficus vultis? sed illas jam colonus decerpſit.

Tum

Tum Balbus: Non vivam, si talis mihi animus unquam fuit: & voluisse haud sanè opuserat. nam neque tu gloriolam venaris: neque quidquam est, quod in convictu amplius expectamus. Nonne ita, Cotta? Et ille: Ità enim verò. Non enim id assentandi causas dixi. nunnam meum ingenium ignoras? Cui ego: Planè teneo ingenium tuum: verùm ea est hominum conditio, ut interdum torquentes naturam, ab instituto declinent. Tum Cotta: Age sis, Balbe, lecta Parthenii nostri aliquot versiculos: Nauticane ista, an Halieutica? Et ille Nautica, inquit. statimque librum aperuit; & sive ex compacto, sive casu factum sit, hic locus lib: 111 oblatus est:

*Sed jam me Zephyri, & felicior evocat aura:
Ire animus: faciles concedite carminis aestrum,
O Musa: & celeres properate per ardua mecum;
Namque iter in nubes intendimus. Est locus ingens
Ætheris in medio, rigidis ubi plurimus horret
Aër frigoribus, volucrique impervius omni est.
Proximus huic flammis ardētibus imminet altus
Juppiter: Ima tenet dulcis mortalibus agris
Temperies, magno superum data munere divum.
Pendula se circùm regio diffundit in omnes
Terrarum, pelagique plagas: sed major in axe
Arctoo: gelidisque riger stipata pruinis.
At sol Æthiopas quàm ferventissimus urit,
Strictior illa, nimis vicino pressa calore.
Sed gemina in medio quàm zona habitabilis Orbis
Temperiem, & mixtâ faciunt cum frigore flammam;
Stat justis extensa locis. Hic aethere regna
Æolus alta tenet. veniunt his sedibus Euri,
Et Zephyri, Corique, & nibiferi Aquilones.
Hic etiam nubes concrescunt tenuior imo
Cum vapor è terra gremio consurgit in altum:*

Ca-

Caruleique cadunt submotis nubibus imbres :
Ergo age, nunc caussas mecum tentare latentes
Aggredere, & prima revocemus origine ventos.
Tantisper, Palinure, licet divertere clivo :
Haud equidem labor incassum, nec inutilis error.
At tu, quo nostra latantur Apolline Musa,
Cardenide, generoso prai, tenuisque per auras
Sterne viam vasi facilem, inceptumque secunda.
Sol maria, & terras radiis vitalibus omnes,
Aëraque irradians, animantia cuncta calore,
Cunctarumque fovet caussarum exordia prima:
Semina compingis rerum: concretaque versit,
Atque novas cogit paulatim sumere formas.
Rerum quippe parens Sol est. sic humida Tellus
Phœbeis sensim radiis tepescit & relaxat,
Expanditque sinum: tenni volat halitus aura
Nimborum in sedes: hic frigore pressus iniquo
Stipatur: cœn parva phalanx, cùm fortior inflat
Hostis ab adverso, cuneo densatur acuto.

Hoc loco Corta: Ne, quæso, inquit Parthenie, in de-
 teriorem partem rapias, si hic ego te interrogem: non
 enim id facio quasi te admonere vellem, sed ut potius,
 quod non planè per me percipio, per te prorsus intel-
 ligam. Cui ego: Imò gratissimum mihi facies: ne-
 que ego sic sum, ut aliorum iudicium contemnā. Et
 ille: Cur, inquit, cuneo dixisti? audi vi alias si benè
 memini, quadratam esse aciem. Tum ego: Non levis
 scrupulus; verùm te illo facilè expediā: Macedo-
 nica phalanx in trianguli formam instruebatur; idcir-
 co cum tres haberet cuspides, sive acies, veluti cuneo
 densari videbatur. ad quam antiquam consuetudi-
 nem respeximus. etsi id temporis quadratis, seu veriùs
 oblongis agminibus utamur. Tum Corta: Intellico.
 Perge porro, mi Balbe. verùm, quæso, ut lentè, &
 lim-

limpidè legas , ne verbum aliquod intercidat : nimium scis oppidò quanta voluptate huiusmodi me versus afficiant. Cui Balbus : Intendam ad id animum : geratur mos hic tibi ; Quibus ego subridens . Salve te, inquam, equorum filix . At Cotta : Tu ludis bellicissimè . & non certè illud mercenarium præconium, ut ait Cicero . Cui Balb : Audi.

*Colligit & viros, atque arma, globosque ruentes
Objectis contra scutis, hastisque repellit .
Sed gravis ille venit concretus: pondere quo se
Confestim patrias iterum demittit ad oras .
Hic rursus repesctus, abis resolutus in auras :
Et sensim major, majorque acerescit eundo .
Cum tandem spatiis nimium conclusus iniquis,
Quà via per medias nubes, perque aëra latè
Sese aperis, cius irrumpit, velut acta sagitta,
Stridulus, & circum rapidus se trudit in auras :
Atque auras premit obstantes, premiturq. vicissim
Stare loco nescit : celeri secat aethera lapsu , (tu
Dū fugit, immiscetq. fretū, & nemus omne tumult-
Non secus admotum rapidis si forè favillis
Vas fuerit, cui stricta manent, oblognaque colla,
Æneus & venter magnum turgescit in orbem :
Intus paulatim fervescens humor ab igne
Solvitur, & tennes rarus se vertit in auras :
Ac majora petens latè loca, it halitus alto ,
Colla per oblonga erumpens, tractimque volando
Attenuatus abis, sonituque effertur acuto
Stridulus: & multo fugiens nisu premit auras
Objectas , raucoque imitatur murmure Coros .
Non intermissi flantes sic aëra venti ,
Continuis agitant flabris, & carula vertunt .
Quippe sinu terra semper vapor exit ab imo .*

Hic Cotta : Desine jam , sat, Balbe, decantasti , nam

ostentata quando occasio est, illam elabi è manibus non patiar. Tum Balbus: Videlicet? Et ille: Hic Parthenius, ut vides, universâ Ventorum procreationem perpauculis hisce versiculis complexus est, non modo poëta, sed phycus: quamquam Zouli quidam ὀμνηρομὰς, *yes* hanc illi laudem derogent. Hic ego: Benè faciunt. quanta enim verò sunt, quæ nos latent. Cotta verò: Prudenter tu quidem, ut multar: at illud ego vix decoquo, sed veniamus ad limen ostiis: & quia res est oppidò mira, & tam digna scitu, quàm quæ dignissima, fusè de illa disputare placet. Tum Balb: Idipsum ego desiderabam; quare res mihi cadit ex animi sententia. At ego: De his aliàs, nunc verò surgamus, ut inceptam deambulationem perficiamus. Tum Cotta: Absolvemus die crastini, qui fortasse tepidior, nunc ab hac umbra, amœnoque hoc prospectu egrè divellor. non ita tibi quadrat Balbe. Et ille: Quadrat vel maximè. Veniam & ego in vestram sententiam, quando sic lubet, inquam ipse. neque ego adeo inurbanus, qui eo graver, quod vobis placere sentio. Tum Cotta: Age sis, quando tanta nos benevolentia complecteris, & quibus ex causis, & quem in modum venti procreentur, expone: verùm non presè, ac strictim, sed fusè, & enucleatè: id enim scire summo avemus opere. fortasse torpentes hodie Zephyros conciliabimus; ut excitati suis nos auris à calore vindicent. imò tuus nobis sermo æstus allevabit. Cui tum ego: Num utrem Ulyssis me habere ducitis? utinam! ventulos vobis facerem frigidiusculos. Erravi. scis quorsum dictum spectet: nimirum meus sermo tantū frigus, ut vice flabelli vobis sit, quo ventulum excitetis. Hic Cotta: Hui! itane, Parthenie, dictum in deteriorem partem rapuisti? id sanè tibi insolens. At Balbus: Næ tu tardus ingenio es, cui jo-

cari

cati Parthenium non subolet . Sed mittamus puero
nucis: neque tempus hisce nugis præterire patiamur.
Age jam, & quæſito fac ſatis: nam ſecus ibit dies ſine
lucro . totum enim ſermè nugando tranſegimus . vi-
den' ut jam extabescit? Tum ego : Mones rectè, Bal-
be: conferamus igitur pedem . ut verò accurate fa-
ciam , quod vos velle ſentio, rem aliùs aggrediar, &
ut dicitur, à capite . Velim igitur primùm , ut mihi
detis nullum concitari ventum, quin aër huc, illuc agi-
tetur . Tum Balbus: Iſtuc facile impetras. vel ocu-
lis enim ipſis videmus commotum ſtabello aërem
ventum exitare . Tum ego : Dabitis præterea non
quemcumque motum aëris ventum eſſe, ſed peren-
nem, & tactu ſenſibilem . Tum Balbus: Et id etiam
tibi concedimus, (nam ſpondeo etiam pro Cotta, qui
annuit) ut petis . non enim quamlibet aëris agitation-
nem, quæ fortuito ſæpe cadit, ſed perennem, & certò
perſeverantem tempore , continuòque aërem verbe-
rantem, ventum vocamus . Eſt iſtæ lis de vocabu-
lo eſſe poſſit , ut ex plerumque ſunt , quæ in ſcholis
tanta contentione agitantur, ut de Romano Imperio
certari credas: quando revera de lana caprina, ut
ajunt, diſceptratur præterea ſi tactu percipi nequit, cer-
tè ventus non eſt . id verò efficitur manifeſtò . Siqui-
dem ſolares radii, cùm ad nos allabuntur, aëremque
pervadunt, agitant quidem, commoventque, nihilo
tamen minus, ventum non creant: quippe illiuſmodi
motus ſenſibilis non eſt . Tum ego : Acutè Balbe, &
preſſè, ut rem acu videaris tetigiffe . Sed pergamus
ad alia . Fieri interdum poteſt, ut halitu ſine ullo com-
moveatur aër, ventus adſibilet . Hic Cotta: Id non
planè liquet . Efficiam, tum ego, ut appareat liquidifi-
cime . Age, tum ille, profer argumentum . Ego ve-
rò : Attendite, quæſo, inquam, meque animo in cami-

fūm illum, qui proximè in rustici casa sub vesperum
 umat, sequimini. Hic Balbus: Sequeremur etiam
 gressu, siquid pollucti villicus adornaret. Cui tum
 ego: Si pulte ex capitato cepe, vel fascolis contentus
 es, ilicet. sed nescio quomodo iterum excidimus. re-
 deamus ergo in viam. Dum ignis in camino succen-
 ditur, ventum ad fores deprehendimus. hunc verò si-
 ne exhalatione fieri sic conficitur: hujusmodi ventus,
 dum per fores in casam perflat, productam ab igne
 exhalationem expellit, non verò secum infert. sic igitur
 sine illa. Tum Cotta: Dò id facilè, sed quo eveni-
 at modo, velim explices. Cui ego: Accipe. Dum
 ignis vi sua lignum absumit, illum partim in cinerem,
 partim in exhalationem, quæ aëre levior, immutat.
 Hæc autem exhalatio suapte natura sursum ab aëre
 extruditur: extrudi verò non potest ab ère à camini
 spiraculo veniente, quippe jam fumo circumobstituto:
 quocirca ab eo extrudetur, qui à foribus itrumpit: &
 sic ventus ea parte exoritur. Tenes? Et ille: Teneo:
 liquidum quippè, contendo nunc efficere, quod istitui-
 sti. & primò causam ventorum effectricem, ut ajunt,
 expone. nam de hac magnam esse litem audio. plurimi,
 quorum dux est Stagiritès, exhalationem esse acerri-
 mè contendunt. complurès verò alii vaporem sta-
 tuunt. tu ab quibusnam sentis? Tum ego: Cum utrisque.
 Ajo enim tum halitum, tum vaporem ventos efficere..
 Hic Cotta: Sed quam inibis viam, ut id efficias? Cui
 ego: Hanc, quam ratiocinio præcunte, mihi dux fi-
 dissima, ratio præmonstrat. At Cotta: Placet hanc
 inire, quæ quidem plana est, & recta, ingrediamur.
 At Balbus, qui diu tacuerat, sic interpellat: Duram
 Parthenie, provinciam suscepisti, dum enim ambabus
 partibus favere studes, neutri acceptus eris, imò hostis
 duceris ab utraque. Scis olim apud Lacedæmonas ho-

stem patriæ habitum, qui neutri se parti addixisset: Cui tum ego: Habeant Spartani suos mores: nullius ego sectæ: nullas partes sequor: quippè indignum semper duxi, se certis factionibus addicere, quæ ut publicæ, ita literariæ rei jugulum petunt. Ratio sequenda est, quæ homini à Natura idcirco data, ut illam vice facis ad indagandam veritatem adhibeat. Tum Balbus: Ita verò, non inficior, verùm si sic nullius favorem promereberis, solusque jacebis ignotus auctor. Cui ipse: Verum, inquam, animique tranquillitatem quaero, in quibus unis beatitatem omnem collocavi: cetera, quæ infra me posita esse duco, tanti facio, quanti cassam nucem. Hoc loco Corta: Sapis tuquidem, Parthenie; istic enim ingenui hominis generosus animus, istæ divina indoles. nihil magni in humanis ducere, nullius favorem aucupari, nullis angustis: uno verbo (ea enim hora est, ut compendio loquendum sit) non precario vivere, sed liberè: & his uti dotibus, quas natura nobis elargita est. Sentiant alii, ut velint, se ego beatum duco: cui illud lyrici belle quadrare puto,

*mihi parva rura &
Spiritus Graja tenuem Camæna
Parca non mendax dedit, & malignum
Spernere vulgus.*

Sed rem ipsam cominus aggrediamur: satis, etsi cum voluptate, extra lineam transilivimus. Eja age, effare: liberam tibi loquendi, ut sentiendi est, potestatem facimus: atque aures tibi vacuas dabimus quantum voles. neque hic, ubi non nisi silentes agri, & tacitæ sylvæ circumstant, captator aliquis verborum est, qui nos deferat: Tum ego: Atque audite. Cùm magnus ignis accenditur, sive dumeta, sive arundineta conflagent, ventus illicò exoritur: id verò sicca ignis exha-

nam modo vel exhalatio, vel vapor ventos creet, ediffere. Tum ipse: Ad id me convertam: & faciam quàm maximè potero ad brevitatem accommodatè. jamjam enim advesperascit. Et primò ea est, tum halituum, tum vaporum natura, ut cùm rara sunt immensum penè locum sibi vindicent. eodem prorsus modo quo pyrius pulvis (qui milleclupo fit major) sunt enim similia. Hoc autem præsumpto, uti verò, ajo è terris halituum vi solis elevari, inque suprema aëris loca, quæ suapte natura frigida sunt, pervolare, hic quoniam in adversarium occurrit, nimirum frigus, constipatur, & veluti se colligit in se: atque ob id gravior evadit: quia verò gravia sic sunt, ut ferente genio ad inferiora relabantur; hinc fit, ut illiusmodi halitus in eandem sedes, è quibus emerferat, revertatur. hic à calore attenuatur iterum, rarusque fit: rarus autem, ut dicebam paulò ante, immensum sibi locum petit; quem ut statim occupet, aërem extrudit, ac propellit. ex quo motus illicò, agitatioque fit aëris: qui quidem motus ventus est. Hic Balbus: Acutè tu quidem: quod & recitatis versiculis eleganter depinxeras, & coloribus suis. Cui statim ego: Num ego Apelles, quem tu tantis laudibus exornes? sed age, est ne tibi ad manus, quod opponas? Et ille cur non id, inquit, ab halitus gravitate fieri dicamus? Hic enim dum ex alto recidit mole sua aërem loco movit, atque impellit: hic verò propulsus hoc modo, ventus ipse est. Cui ego: Responsio est in promptu: siquidè pluvia majori ruit impetu, & graviores aquæ sunt guttæ, quam halitus: nec tamen imber ventum procreat. imò cessant plerumque venti, cùm depluit. neque igitur suo descensu halitus ventum excitabit. Tum Balbus: Do manus: res est ab exemplo manifesta: Verùm, dic, sodes, cur intra latera venti perflant? id enim mihi oppidò mirum vi-

detur. Tum ego: Aliquamulti sunt, qui motum hunc transversarium, idè progigni opinantur, quia recidens exhalatio gravitate, aër verò levitate præditus; itaque fieri, ut duplici ex causa contraria, motus ille transversus oriatur. Sed hi errant tota via. nam si ita se res haberet, perstaret pendulus in aëre halitus: non secus ac nubes. creatur igitur motus ille transversus, quia exhalatio in aërem incurSAT, aër vero in terræ superficiem, quæ solida cùm sit, obstitit, reluctaturque: atque ita fit, ut in latus, quâ via facilè datur, ventus irrumpat. Hic Balbus: Assentiôr: nam si non verum, verissimile quidem certè. Pergamus porrò, quando in viam nos dedimus; magnanè halitum copia, an quæcumque satis est, ut venti excitentur? Et ego: Magna profectò, ut validus, parva, ut tenuis exoriat. etenim cùm rarefacto ab halitu illa aëris agitatio conciat, qua oriri ventos ostensum nuper est, pro illius mensura progigni etiâ ventos necessum est. Si verò ingens cadat halitum, ac repentina inflammatio tum vehementissimos oriri turbines, excitarique procellas dilucidè consequitur. Cum Panormo Neapolim redirem. sereno cælo, Austroque secundo in velum flatu perflante, circa Vsticam, quæ una ex Æoliis est ad Occidentem posita, ingens de repentè fulgetrum ad Subvesperi plagam (Rhombum nautæ novi dicunt) effulsit, ac totum illac cælum conflagrate visum: simulque ex eadem cæli plaga, nubecula è pelago assurgere conspecta nobis est. Tum ego ad navarchum, vidi sin', inquam, fulgetrum? viden' nubeculam illam? Et ille: Ità enim verò: Cui mox ego: Horribilem ex illa plaga turbinem expecta. faxint superi, ut salvi, ac sospites reneamus nostram Neapolim. Et ille: Ne dubites, inquit, signa istæ caloribus sunt. Cui ego: Atque idcirco horrendæ tempestatis. Quæ bre-

vi adeò vehemens incubuit, ut totam noctem illam in summo vitæ discrimine transduxerimus. tot effusissimi imbres, tot tonitrua, tot fulmina, ac coruscationes tota nocte sævierunt, ut cælum ruere credidisses. primò manè cessavit ventus, nosque Capreæ exceperunt. Hoc loco Cotta: Tam citò Capreas tenuistis? Cui ego: Quidni teneremus vento adeo vehementi, inque puppim perflante? Ille verò: Haud equidem ventum ego tam prosperum, tam secundum exoptarem. tritum quippe illud, Festina lentè. Cui ego: Quid facias? cùm jacta est alea, inque medio mari improvise comprehensus es nimbo, ea utèduna fortuna, qua uti datur. Quid si contrarius, & cui obniti minimè possis, ventus percrebuisse? necesse erat cursum retrò flectere, & in quas, tu nolles, terras appellere. Tum Cotta: Quanta te formido corripuit? quot exorasti Superos? quot pro salute vota nuncupasti? Cui tum ego: Fateor tibi planè, ut scis mihi moris esse, haud sanè multum pertimui. sic ego mecum versabam animo: Humanis nimium angì, nec cordati est, nec philosophi, sed plebeculæ, quæ omni vento hac, illac jactatur. tantus quisque est, quantus fuerit animus, quo adversa generosè ferat. infortunia eos opprimant, qui succumbunt, non vero, qui si pellerè nequeunt, infringunt tolerando. Neque si timori locum cedam, idcirco remittet se ventus, cessabit periculum, & res melius habitura erit. præstat igitur generosè subire aleam, quam vitare non est amplius in nostra potestate. atque hac cogitatione erigebam animum, & cùm ceteri pertimescerent, ego unus illis animos faciebam. Erant in celoce præter nautas duodeviginti, vectores unde quadraginta, & ex his feminae duodecim, quæ à viris separatæ in interiori puppis cubiculo versabantur. erant etiam equi quatuor

Affi-

Africani, quos Siciliae prætor ad Neapolitanum do-
 uo mittebat, mercibus verò adeo onusta navis, ut ni-
 hil amplius accedere potuisset. quocirca haud satis
 expedita videbatur, ut tempestati par esse posset: atque
 ob id jam nauæ iacturam facere cogitabant. at quo-
 niam credula semper spes, & bona difficilè proicimus;
 adhuc paulisper expectandum decreverunt; si forrè
 surgente Luna (erat ille dies decimustertius ab inter-
 lunio, cum gibbosior apparet, ac fermè plena) ventus
 se tantisper fregisset. At incassum vota reciderunt;
 nempe vehementior tempestas incubuit, tanto ven-
 torum conflictu, tanta undarum iactatione, atque æstu;
 ut quisque jam moriturum se crederet. Tum denique
 de illis, quæ minoris erant pretii, & ad manus iacturam
 fecerunt. at mihi maxima ea fuit; nam capsulam, in
 qua ego libellos aliquot, omnemque habebam appa-
 ratum mathematicum, & quidem copiosum, seu for-
 tuitu, seu ex compacto projecerunt. Hic Cotta: Acer-
 bam hanc Matheseos vicem dolemus (id video senti-
 re Balbum) quammaximè. sed Superis gratia, quod
 te sospitem ad nos reduxerint. si valeas ipse, & unus
 tibi calamus superstes sit, affatim habebis machina-
 rum, quibus te supra mortalium conditionem evehas.
 Cui ego: Num ego numen sum, quid me immorta-
 libus æquas, Cotta? sed interim nimium extra oleas
 delati sumus. Et ille; Redibimus mox in viam; nunc
 quando divertimus, quæsumus (ut spondeam etiam
 pro Balbo, qui id ipsum cupit) ut quid postea factum
 sit, enarres. Ego verò: Quid? ingens tumultus in-
 ter vectores exortus est, & immaturum quisque fatum
 conquerebatur. meque omnes adeunt pectora pugnis
 tundentes, veniamque noxarum multa prece, multis
 lacrymis postulantes: utque ipsorum piacularem con-
 fessionem exciperem cuncti rogant. At ego, quo-
 niam

niam id ingratum nautis fore: neque in extremo discrimine nos constitutos videbam, jubeo illos bono animo esse: Deumque animo, & mente affari, non verò ejulacibus illis, quibus nautarum animi perturbarentur, ne solertes, atque animosius suis ministeriis incumberent, cum opus esset me omnes à piaculis absoluturum. Erat inter vectores homo quidam ex religiosa quadam, illustrique familia adeò meticulosus, ut nihil supra, qui me, & confessionem identidem inelamabat, atque omnes perterrefaciebat: neque eum monitis, neque precibus inducere potui, ut quiesceret. Tandem navarchus cum diù hominem tolerasset, & continuisset sese, his tandem aggreditur: Quæ te agit intemperies? quis te malus genius invasit, ut in hæc deliramenta divenites? non vides ut cuncti quiescant? non vides ut taceat hic? meque manu indicat, an pluris tui unius vita, quam omnium istorum facienda? tu certè mihi patientiam abrumpes. Sub hæc magnus à feminis ululatus subortus est, & omnes aquam, aquam inelamabant. Tum ego solutis jam repagulis fatiscere navigium credidi. Accurrit statim navarchus vie magni animi, ut quid rei esset, inspiceret. Hic Cottas: Quid tum ille meticulosus? Cui ego: Quid? Nihil propius factum est, quàm præ timore enecaretur. cæpitque tanto gemitu absolutionem à me petere, ut quotquot erant animis conciderent. Ego tum, more majorum, una omnes absolutione à piaculis expedivi: Deumque enixè precatus sum, ut me ipse sua clementia mundaret. Interea redit navarchus, nosque bonas spe esse jubet, nihil omnino discriminis esse, neque labem ullum navigium fecisse: unam tantum fenestellam, quæ juxta remonem erat, vi undarum apertam, quâ ipse jam concluderat, atq; obfirmaverat. Fateor hic me paululum exortum, meliusque sperare cæpisse.

Taa-

Africani, quos Siciliae prætor ad Neapolitanum do-
 uo mittebat, mercibus verò adeo onusta navis, ut ni-
 hil amplius accedere potuisset. quoeirca haud satis
 expedita videbatur, ut tempestati par esse posset: atque
 ob id jam nauæ jacturam facere cogitabant. at quo-
 niam credula semper spes, & bona difficilè proicimus,
 adhuc paulisper expectandum decreverunt; si fortè
 surgente Luna (erat ille dies decimustertius ab inter-
 lunio, cum gibbosior apparet, æc fermè plena) ventus
 se rantisper fregisset. At incassum vota reciderunt;
 nempe vehementior tempestas incubuit, tanto ven-
 torum conflictu, tanta undarum jactatione, atque æstu,
 ut quisque jam moriturum se crederet. Tum denique
 de illis, quæ minoris erāt pretii, & ad manus jacturam
 fecerunt. at mihi maxima ea fuit; nam capsulam, in
 qua ego libellos aliquor, omnemque habebam appa-
 ratum mathematicum, & quidem copiosum, seu for-
 tuitu, seu ex compacto projecerunt. Hic Cotta: Acer-
 bam hanc Matheseos vicem dolemus (id video senti-
 re Balbum) quammaximè. sed Superis gratia, quod
 te sospitem ad nos reduxerint. si valeas ipse, & unus
 tibi calamus superstes sit, affatim habebis machina-
 rum, quibus te supra mortalium conditionem evehas.
 Cui ego: Num ego numen sum, quid me immorta-
 libus æquas, Cotta? sed interim nimium extra oleas
 delati sumus. Et ille; Redibimus mox in viam; nunc
 quando divertimus, quæsumus (ut spondeam etiam
 pro Balbo, qui id ipsum cupit) ut quid postea factum
 sit, enarres. Ego verò: Quid? ingens tumultus in-
 ter vectores exortus est, & immaturum quisque fatum
 conquerebatur. meque omnes adeunt pectora pugnis
 rudentes, veniamque noxarum multa prece, multis
 lacrymis postulantes: utque ipsorum piacularem con-
 fessionem exciperem cuncti rogant. At ego, quo-
 niam

niam

niam id ingratarum nautis fore: neque in extremo discrimine nos constitutos videbam, jubeo illos bono animo esse: Deumque animo, & mente affari, non verò ejulacibus illis, quibus nautarum animi perturbarentur, ne solertes, atque animos suos ministerijs incumberent. cum opus esset me omnes à piaculis absoluturum. Erat inter vectores homo quidam ex religiosa quadam, illustrique familia adeò meticulosus, ut nihil supra, qui me, & confessionem identidem inclamabat, atque omnes perterrefaciebat: neque eum monitis, neque precibus inducere potui, ut quiesceret. Tandem navarchus cum diù hominem tolerasset, & continuisset sese, his tandem aggreditur: Quæ te agit intemperies? quis te malos genius invasit, ut in hæc deliramenta divenires? non vides ut cuncti quiescant? non vides ut taceat hic? meque manu indicat, an pluris tui unius vita, quam omnium istorum facienda? tu certe mihi patientiam abrumpes. Sub hæc magnus à feminis ululatus subortus est, & omnes aquam, aquam inclamabant. Tum ego solutis jam repagulis fatiscere navigium credidi. Accurrit statim navarchus vir magni animi, ut quid rei esset, inspiceret. Hic Corra: Quid tum ille meticulosus? Cui ego: Quid? Nihil propius factum est, quàm præ timore enecaretur. cæpitque tanto gemitu absolutionem à me petere, ut quotquot erant animis conciderent. Ego tum, more majorum, una omnes absolutione à piaculis expedivi: Deumque enixè precatus sum, ut me ipse sua clementia mundaret. Interea redit navarchus, nosque bonas spe esse jubet, nihil omnino discriminis esse, neque labem ullam navigium fecisse: unam tantum fenestellam, quæ juxta remonem erat, vi undarum apertam, quæ ipse jam concluderat, atq; obfirmaverat. Fateor hic me paululum exortum, meliusque sperare cæpisse.

Tan-

Tandem sub Auroram remissa aliquantulum procellæ vis est. verum adeò præ immenso undarum æstu, huc, illuc navis jactabatur, ut omnes perpetua vertigine circumagerentur. & quamquam mihi mare fastidium minimè creet, nihilo tamen minus tanta tum nausea vexari cæpi, ut nunquam aliàs. Postremò ridiculum quid accidit, quod et si invito, mihi risum extorsit. Ascettrius ille queri cæpit magnis gemitibus se amisisse patientiam: meque rogat, ane illam vidissem? Ego tum illum insanire ducens, tantus ne, inquam, te timor occupavit, ut non sanus somnieris? Quiesce, quæso, vir bone, neque velis nobis rumpere patientiam. Ille verò: Non ego insanus, sed mentis sum compos meæ. certè aliquis mihi patientiam subripuit, qua nistatim induar, nobis piaculare est. Tum ego: Quam patientiam dicis? Et ille: Tunicam superiorem, quam ferre nostro ordini religio est. Hic ego, non sine risu, Isto nunc scrupulo ego te absolvo. si tolerans tibi animus, illo vice tunicæ uti poteris. nunc quiesce porro: neque velis tot hominibus, ut tuam quæras, patientiam abrumpere. Hoc loco Balbus: Lepida, inquit, fuit fabulæ catastrophe. sed ad amœnam illam semitam non venimus. Cui ego: Ibimus cras illuc: nunc quoniam in ultimum diei serum sermonem perduximus, domum redire tempus est. statim igitur assurreximus, perque compendiarium rus grandi gradu fa-
cessivimus.



C A P U T VII.

Amœna semita describitur: in cujus mox crepidine sessum est: ibique reliqua, qua ad ventorum procrationem spectare videbantur, accurata disputatione perquisita.

V Espere sequentis diei dum quasdam literas, quas missurus eram Neapoli complicarem, me Corta, & Balbus adeunt, ingressique Muszum: Eja age, inquit, surge tandem aliquando, satis, superque Musis datum est: remittendus nunc pudicis, honestisque voluptatibus tantisper animus. eamus igitur in amœnam illam semitam, summa enim nos cupido illius incessit. erit certò, ut conicimus genialis. Tum ego: Jam de hoc cogitabam, vosque, plicatis hisce literis, atque obsignatis, accersurus eram. Manete tantisper dum vesicam exonerè: nam ni me fallo, fici illæ perquam mites, quibus supra modum nos saginavimus, mihi urinam cierunt. Tum Balbus: Idem mihi accidit: nam hodie mi&urivi præter consuetum. At Corta: Id neutiquam ego expertus sum. nec mirum non omnibus eadem temperatio corporis est. mox ubi calceos induimus, accepto pileo, & baculo per compendariam incedentes, ad convallem pervenimus. hac brevi descensu per pontem lapideum transmissa, in superiorem collem evasimus. mox per ejusdem convallis crepidinem deambulantes, quæ hinc florido rure præcincta, illinc sylva, quæ per confraga vallis cuncta est, convestita, mirum quantum oculos alliciat, animosque delectet, iter in ultimum marginem direximus. Huc ut perventum, atque in prospectum maris est: Hæc, inquam, semita illa tam amœna, quam quæ

quæ amœnissima. videte, quæso, si quid pulchrius, si quid amœnius, excogitari potest? Tum illi: Expectationem nostram longè superavit. Est hic oppidò elegans naturæ lusus. est autem longa semita in extremo collis margine, quâ mare subjectum spectat, plana, ac fermè recta, & de circiter passus excurrit. hinc, inde altis quercubus, atque ilicibus præcingitur, atq. inumbratur, ut solaribus radiis minimè sit obnoxia. nisi quod ex intervallo per certa arborum, ramorumque frondentium divortia, Solis radii interciſi, inque solum repercussi, illum versicoloris instar Iridis, seu potius Atracici operis, depingunt. quod quidem pulcherrimum visu, & quàm perjucundum est. Læva mare est, & totius fermè Crateris prospectus amœnissimus, dextra amplissimum rus, agricolarum industria, quæ ibi summa est, excultum miro modo. patent passim in unguem largissimi, rectique limites, quos frugiferæ arbores intercurrunt: & quibus ad voluptatem deambulare commodè possis. Dum autem hanc per semitam suspenso gradu pergitur, illiusque pulchritudinem admiramur, Quid, Balbus, inquit, si mirabili huic naturæ operi, suam ars industriam, suam homines operam adjunxissent? Non Tusculanis quidem hortis, non Tuscis cederet. Imò, inquam, ego, qui illos vidi, longè superat, si simplicem Naturam spectemus. fucos illos, atque ascitam ab externis elegantiam non amo: simplicem stylum, simplicem mundiciem in rebus quæro. Hic Corra: Optimè tu quidem: Hic tamen ego è dextrâ buxeam sepem prælongam plantarem, inque varias figuras, ut moris est, effingerem. ex intervallo, nimirum ad 2 quosque passus, sedilia ex quadro lapide instruerem, & fontem etiam adderem. Quid sic illa pulchrius? Ita non Tusculanis, non Tiburtinis Thuscisque ruribus invideret.

ret : Cui ego : Imò sic placet, & magis placet. quippe pluris ipse naturæ simplex ornatus faciendus est; quem toris licet nervis insudet, totum impendat ais ingenium, ne adumbrare quidem potest. contentur illa, quibus natura non risit: accersant ab arte ornamenta, qui domi non habent. Amœnissima semper Tempus habira, & tot laudibus celebrata: & tamen illorum sola artifex natura fuit. Pulcherrima juxta Pisas Olympia, in quam quarto quoque anno ad celebrandos ludos universa fere Græcia conveniebat. totus autem Olympæ ornatus, amœnitas, pulchritudo, simplex natura erat. quippe haud fas est arti, naturæ addere ornamenta. Tum Balbus: Vera prædicas: plus delectationis, ac voluptatis habet nativus hic decor, quam quidquid emendicato ars adjungere fucò potest. Tandem cum ad finem venissemus, Sedeamus hic, inquit, Balbus: nam lignea hæc subsellia, quæ hic sunt posita nos invitant: & habent etiam simplici suo ornatu nescio quid voluptatis. Sedeamus, tum ego: namque etiam hic pulcher prospectus. subjecta colli ora est, in quam venientes Neapoli phaseli appellant: naves ibidem fabricantur, quare populo frequens: contra Æquana juga, dextra Surrenti Campestria, quæ ultima in collem conspicua assurgunt. Hic igitur, ubi volentes confedimus, ita ad me Balbus: Ne tibi grave sit, Parthenie, quam deventis externo vespere habuimus, quæstiunculam absolvere. Erit id nobis (ut pro Cotta etiam tibi spondeam) perquam gratissimum. scis enim nos ad te unum primas referre. Cui ego: Faciam, non modo parienti, sed etiam volenti animo: nihil enim antiquius habui, quàm vobis morem gerere. Et nos, tum Balbus, pro tanta benevolentia, qua nos novis semper vinculis implicas, gratias agimus quammaximas: & equis, velisque, ut dicitur,

tur, adnitemur, ut nulla unquam dies nos immemores arguat. Sed omittamus officia, scio nimirum ingenium tuum. uti enim tu rerum largissimus, quamparcissimus admodum verborum es. quippè generosus est animi plus præstare amicis, quam dicere. quod rarus admodum inventu est. Si igitur ex halitu rarefacto venti procreantur, fientne iidem ex vapore condensato? Tum ego: Ajo enim verò: etenim si magna vaporum copia, vi frigoris, aliave ex causa constipetur, in unum derepenè locum coacta, magnum certè spatium, quod prius occupabat, derelinquat necesse est. quod illico repleturus vicinus aër accurret. id verò sine motu fieri nequit: motu verò ventus exoritur: igitur coactione vaporum fieri ventos necessario consequitur. Hic Balbus: Assentior, liquidum quippè. Verùm pergamus porro: cur interdum dum pluit, venti ex pluvia perflant? & cur item post pluviam iidem exoriuntur? Cui tum ego: Accipe: paucis expediam, dum imbres decidunt, aërem lapsu extrudunt suo: hic extrusus, atque agitated, ventum creat. hinc compertum plerumque est (idque in mari quàm frequenter) ea parte, qua pluviz descendunt, ventos afflare. Præterea cùm vapores è terra emergunt, inque sublime evolant, unà cum illis igneæ particulæ (sive halitus calidos mavis dicere) exiliunt: resolutis mox in aquam vaporibus, illiusmodi halitus ab aquis segregati, diversumque distracti rari fiunt, aërem pellunt, ventum excitant. Tum Balbus: Et his etiam assentior, Parthenie. Verùm si ita, cur non ex sola aëris dilatatione oriri ventos concedamus? Quia, tum ego, id ex illis non existit. nam etsi rarus aër occurso suo vicinum aërem expellat: id tamen eadem modo usu veniat, necesse est, quo liquidis contingere, res usu trita est: nimirum cùm illorum unum sub-

subsidit, alterum subsilit: sic dum gravior aër levio-
rem propulsat, in superna hic, ille in inferiora conce-
det. quinimò aër adeò tenuis, rarusque est, ut vix ra-
rior fieri queat. Hoc loco sic me Cotta interpellat:
Quid tu de salibus? nolo ut illos elabi patiamur, uti
volatiles. Cui tum ego: Nempe ut tenuis istæ mea
oratio, atque insulsa asperso sale condidatur: & sic pa-
lato displiceat minus. verùm ea præsens res est, ut
scitamentis, atque embammais adornari, ut lepidè
sapiat, est oppidò difficile. Tum ille: Graphicè, tu
quidem facetus, Parthenicè. & sanè variandus hilario-
ribus verbis paululum sermo erat: qui quamvis du-
riuscula institutus de re, tu tamen facilitate illa tuas
delicatum reddidisti. Cui ego: At coquinaria istæ
verba cum suis intinctibus coquis relinquamus. Hic
Balbus: At si ita, ad te unicè pertinebunt. Cui ego:
Gratias ago pro honore, quo me cohonestas. At Cot-
ta: Eja omittis nugis, rem experiamur. Quid tu, in-
quam, de salibus illis, quos è metallis, nitro, sulphure,
atque istiusmodi aliis erumpere, inque superna evola-
re confessa res est? ex his enim nonnulli, si benè com-
memini, oriri ventos voluere. & ni mea me fallit opi-
nio, non id certè quidem inverisimile. irrequieti enim,
& violenti cum sint, aërem facilè concitabunt Cui tum
ego: Rectè colligis. ajo enim verò illiusmodi sales è
metallis, atque his agnatis corporibus eductos, quas
vaporibus, quas halitibus permixtos, in aërem tolli,
atque elevari. hic mox à circumstante frigore coactos,
paulatim fermentescere, donec fermento benè imbu-
ti rarefiant, circum obstitentem extrudant aërem, at-
que abire in ventum motu cogant. Atque hinc potis-
simum oriri turbines, ac procellas facilè crediderim.
enim verò si è nitro, sulphureque tantam tormentario
inesse vim pulveri videmus. eandem ab iisdem im-

L

per-

pertiri vim ventis manifestò consequitur. Imò è mon-
 tibus, ubi fodinæ sunt, oriri sæpenumerò tempestates,
 ac de repente turbines, experimento compertum est.
 Majo mense, decimo ab hoc anno, cùm per Apenni-
 num, quâ hic altissimis rupibus Lucanos ab Apulis di-
 stergit, inque proximos Brutios ingreditur, ac per-
 petuis fermè jugis in ultimas Italix oras procurrat,
 quibus in locis fodinas esse deprehensum, intertacerè,
 tantus ex improvviso obortus turbo est, tanta grandine,
 tantis mox imbris, ut nisi in vicinũ tugurium comis
 quidam pastor, excepisset, certò periissem. narravitque
 mihi pastor, illud ibi frequentissimè evenire. ex quo
 id, quod modo ego dicebam, liquidò existit; nimirum
 è sulphure, nitroisq; halitibus, ventos, ac turbines
 excitari. Hic Balbus: Intelligo. Verùm ipse: Ad-
 dam amplius, inquam, ut hæc hactenus ostensa manifestius
 confirmem. Observatum sæpe ex intimis terræ visce-
 ribus, in quibus metalla gigni, eaque omnia, quæ no-
 vo vocabulo mineralia jam dicunt, ventos quàm fre-
 quenter erumpere. Hoc loco Balbus: Istuc, inquit
 certissimum, vidi ad Vesuvii radices, quâ hic ad So-
 sianum nostrum convergit, perangustam quamdam
 specum, ex qua perpetuus fermè ventus erumpit; un-
 de & nomen obtinuit. illam verò te vidisse credo; et
 rarò admodum te agrestes Vesevi nymphæ aspiciant:
 adeò te Sirenes, & elegantiores hæ Musæ delectant.
 benè facis: laudo palatum, quod delicatissimum tibi
 est. Sed age, quo illud pacto autumas evenire? Tum
 ego: Quia calor metalla, cæteraque illiusmodi con-
 coquens, magnam salium copiam educit (suppeditant
 affatim hujuscemodi sales nitrum, sulphurque, quo-
 rum feracissima tellus est.) eductam frigus cogit:
 coactam sese fermento imbuat, atque excrescit;
 tum demum miro rarefacta modo ventos creat: dum
 per

per illiusmodi spitacula aërem expellit. Hoc loco Cotta: Nolo, inquit, ut te semper Balbus fatiget: De Sole quid? habetne illo aliquid in ventorum excitatione? illum enim rerum ferè omnium parentem physici faciunt, & fortasse suo jure. imò tu in Naut: 112 versculis illis, quos memini hesternà à Balbo lectione excitatos, sic habes:

Rerum quippo parens Sol est.

Cui ego: Habet certè, ut illis ego versculis innui. Etenim cum calore suo tum vapores, tum halitus è terrarum sinu educat, author etiam ventorum vocari merito potest. & quamquam ipse re vera ventos non procreet; quia tamen ut illi evaporent halitus, qui mox rari ventos concient, auctor est, talis etiam ventorum vocari potest. Tum ille: Teneo: & sic ipse arbitrabar. plurima te hic rogarem, res enim est oppidò curiosa, verùm quia jam advesperascit, & ambulatio longiuscula, in aliud tempus illa reiicio. Cui ego: Certè tardissima hora est, & aër humidulus, camus igitur. cumque statim surreximus, domumque nos capessentes gradus grandivimus.

C A P U T VIII.

Quæstum de aura serotina, quid esset? & cur illam nonnulli noxiam experiantur, alii verò non idè: cur item varia variis in locis esset.

Q Uodam die posteaquàm Sol occiderat; & que nostro orbe in alterum Antipodes illustraturus concesserat, ego, ut corpus aliquantum exercerem, animumque remitterem (federam totum penè diem in Musæo ad mensulam) in subdialem ambulationem egressus deambulare cæpi. ne verò se-

rotinæ auræ nocerent, pileatus processeram. Vix dum cursare incipio, cum statim Cotta, & Balbus ex ultimo Surrenti pago, cui Metæ nomen idcirco factum arbitror, quia planitiem, quæ ad Æquana juga pertinet, ultimus suo positu concludit, domum reversi me in subdiali ambulatione cursantem conveniunt. cumque lætam mihi vesperam impertiissent, Quid rei est, inquit Cotta, quod pileo isto benè amplo caput operuisti? Cui ego: De hac re Balbum interroga. Tum statim Balbus: Nimirum ut te à serotinis auris defenderes. teneo enim illud tuum Eclogæ ultimæ.

*Surganius, nam prima gravis cætantibus umbra
Vesperis, atque aër gelidi nocet humidus antri.*

Tum ego: Euge, euge Balbe, eruditè semper, ut soles. At Cotta: Nempe tibi adblanditur: Mulcebo ego etiam caput, ut laudem aucuper. Cui ego: Si rectè feceris, laude te exornabo, si assentandi gratia, haud te illa cohonestabo. Tum Cotta: Omittamus istæc. Quoniam verò ad quæstum animi mihi portæ data est, sine ut ea utar. Cui ego: Laudo studium tuum, utere igitur: per me licet. imo. nihil mihi gratius accidit erudito sermone. scio quippe quid cogites? Tum ille: Non me fugit acre tibi ingenium, ut cogitatum prævertas meum. Age igitur, & quæ serotina aura sit, ediffere. id ipsum Balbus scire magnopere cupit. nonne ita, Balbe? & ille: Ita enim verò. Tum ego: Faciam lubentissimè: nam præterquamquod res scitu digna, suo non vacat commodo, & valetudini quammaximè conducit, vobis præcipuè, qui diutino morbo vexati estis. date igitur aures vacuas. rem ego perstringam verbis perpaucis, dicamque pressè, ne verè noceat. Et illi: Fac, ut tibi placitum, nos tibi aures dabimus attentissimas, ac perpurgas. Tum ipse; Ut vestro igitur sciendi desiderio

derio obsecundem, telam pertexam hoc modo. Eter-
ræ gremio vapores continuò exiliunt, qui aërem ad-
ventu suo statim inficiunt, vapidumque reddunt. ho-
rum tenuissimæ quædam particulæ post Solis occasum
præ subito illo tepore concresecunt, mox concretæ
deorsum relabuntur, nostrumque hunc aërem, quem
respiramus, frigidiorē faciunt, temperiemq. illam,
quam tota die retinuerat, derepentē immutant. at-
que hæc est aura illa vespertina, quæ plerumque no-
xia est. Hic Cotta: Ut video, inquit, eo prorsus sit
modo: quo rorem, pruinaque fieri, non multis ab
hinc annis nos docuisti. Cui ego: Rectē intelligis.
quinimò rorem ipsum, ipsam pruina hanc interdum
esse auram, explorata res est. Dum enim illa hunc in-
fimum aërem inficiunt, eosdem omninò effectus creāt.
Fit verò cū sūdum est: non secus ac ros sereno in-
guttas cœlo concresecit. Tum Cotta: Ergo, cum plu-
vium cœlum est, istiusmodi aura neutiquam genera-
tur. Rectē colligis, tum ego. Ille verò: Sed qua id
caussa? Cui ego: Nempe pluvia vapidus hosce hali-
tus, deprimit secum, inque ortu ipso veluti jugular:
atque ita fit, ut illi vel circa terram dispergantur, vel
abeant in aquam. Tum Cotta: Rem teneo perspi-
cuam. Tum Balbus: At si id concedamus, & conce-
dere necesse est, sequeretur manifestò perflantibus
generari ventis non posse. Cui statim ego: Si vhe-
mentes venti perflent, ita profectò continget, ut di-
cis: tum enim prævalido ventorum flatu dissipantur:
si verò tenues, ac frigiduli, non impediunt, quin mi-
nus illiusmodi vapores auram generent: imò iuva-
bunt, ut faciliè vapores concresecant, quippe frigidi.
Assentior tum Balbus. At Cotta: Sed age, cur nam
hujuscemodi auræ noxiæ ut plurimum? Quia, tum ego,
illiusmodi vapores è terris vel fœtidis, vel sulphureis,

vel alia vitiatas labe emergunt plerumque, quò sit, ut illis in noxiæ sint vespertinæ auræ, uti nò sanis imbustæ qualitatibus. Si ita, tum Corra, siccis in locis, puroque solo illæ auræ eruat tam innoxia, quam quæ maximè. & quia solum istuc tuum siccum est, & labe minimè vitiatum, serotinæ auræ haud nostræ nocentur valetudini. Tum ego: Primum do faciliè, quippe ex positis manifestò existens: secundum non concedo: Nam et si solum hoc sit nonnihil siccum, habet tamen humorem suum: & licet labe minimè corruptum; nihilominus quia latè arboribus, maximè nubicus adco spissè inumbratum, ut solaribus radiis sit penè impervium. Hic Balbus: Ita vero: quare non immerito cecinisti,

Et Vici colles, & pampineum Surrentum.

Sed quid hinc conficis? Tum ego: Ausculta modo, neque meis mihi versiculis præpedimentum obiicias: istuc enim jamjam ibam ratioeinatione. Ex spisso illo arborum textu, præcipuè nucum juglandium, quarum vel umbram noxiam perhibent, ut illas à nocendo dictas plerique velint, sit ut aer sit humidissimus, inque illo vapores statim concrecant in hæc auras, de quibus inquitimus. atque hinc sit, ut reumata, fluxiones latinè dicimus, ingenerentur: maximè noxium nempe est humidum. idque meo malo didici tertio ab hoc anno, cum apud me esset Taurinus adolescens. nam quodam die ad ambulandum progressi, adco longè discessimus. (ambulabat ille gradu grandi, & expedito, quasi cursorio) ut in serum redire domum constiti simus; quia verò æstuosus dies inciderat, ego haud cycladatus meo more egressus fueram: præque nimia defatigatione, dieque æstu largè sudaveram, illicò præ vespers frigore, solique humore congelatus sudor est, perque patentia corporis spiramenta se altius

in-

insinuavit, tanto valetudinis damno, ut statim me acerbissimus dentium dolor invaserit, quo penè enectus sum. Hic Cotta: Vicem illam, mi Parthenie, quammaximè doleo: fas enim mihi dicere, quod ad Æneam quondam Dido:

Non ignara mali, miseris succurrere disco.

Nam mihi etiam interdum dentes præcipuè columellares acerbè dolent. cedo igitur, quo medicamento convaluisti? Tum ego duo mihi genuini dentes dolebant, quorum alter cariosus, alter labans. primò adhibui cinerem cervini cornu, quo confirmari dentes, mitigarique dolorem Plinius tradit: verum lusi operam, nempe nihil levamenti mihi attulit. mox ex medici præscriptione caryophillum aromaticum admovi, deinde philonium, quod Romanum dicunt: sed & hæc frustra reciderunt. postea amicus quidam balsamum nescio quod, xylo haud neto dentibus imposuit, ac benè imbuuit: sed vel hoc tantum profuit, quantum nihil. Hoc loco Cotta: Adeone immedicabilis hic dolor? verùm quid tandem. Tum ego: Jamjam dicturus eram: molaris radicem Soli exposui: mirum oppidò! derepentè cessavit dolor. At Cotta: Nugasne loqueris? haud equidem tibi nunc dentes dolent, non esset profectò jocis locus. Tum ego: Loquor seriissima. Ille verò? Ah, ah, ah, vah! ut bellè jocularis. quo enim modo fiet, ut dentis radicem Soli obicias? At Balbus: Næ tu tardus, Cotta, qui istuc non tenes. quid facilius, quàm erutum dentem Soli exponere? cum verò exemptus dens, cessat dolor. Et ille: Itanè Parthenie? Tum ego: Ita enim verò. At hoc est malum radicitus convellere, inquit Cotta. Sed quid facias, inquam ego, quando nulla alia est medicina? Agite, quoniam occasio sese attulit (placet revera, joculari, ut arbitrabatur Cotta) fabellam vobis ridicu-

Iam narrabo. Tum Corta: Ita, quæso: juvat exilare tantisper animum. Tum ego: Auscultatè, ridebitis quippe, est enim lepidissima. Pia quædem mulier, ex iis, quas ascetrias dicimus, nostræque familiar, cujus habitum gestabat, additissima, sævissimo intimi dentis dolore cruciabatur. & quamvis plurima adhibuisset medicamenta, nullo modo leniri dolor, nullo levare poterat: nam penitus expellere non sperabat. forè ad illius domum suæ artis gratia confor, quo nostri homines utebantur, accessit, vir lepidissimus, & non magis facie, quam facetiis perdidiculus: ingenio etiam acris; quocirca ex tempore quamfacillimè comminiscebatur: tanta verò gravitate vultus, ut etiam prudentes, atque callidos in errorem inducebat. hic cùm gementem miserabilem in modum virginem conspexisset, Nuonnam, inquit, à dentibus doles? Et ille: Ita verò, bone vir. sed cedo, si quid medicamenti in promptu habes. nam plurima tibi cognita medicamenta jamdudum accepi. Tum ille, vultu gravi, ac serio: Bono sis, inquit, animo, mea filia, tribus non amplius, verbis, ab isto dolore, quàm scio esse acerbissimum, te statim eximam. Tum illa: Hui! verbis, nimirum præstigiis. habeas tibi istiusmodi medicinam: nolo ego pietatis jactura mederi malo. At ille: Hos scrupulos deponito: nullum quippe in verbis hisce piaculum. Ex illa: At cedo, quæ sint ea verba? Tum confor: Audies cùm recitavero. At mulier, Ex quonam didicisti? Ille verò: Ex Jesuitis, quos tu meritò veneraris: & quibus fidem præstare possis, quippe piis, & eruditis. si ita est, ut dicis, tum illa, scrupulum depono. age jam, dolore me libera. Tum confor: Vindicabo quàm citissimè, tribus nimirum, ut dixi, bolis. verùm indica mihi quis tibi deus doceat. Ecilla: Ultimè hic molaris superioris maxil-

xillæ. Ille tum attentiè inspicit, attrectat digito, periculum facit, sitne facilè mobilis, hæretque tantisper animo. mox, Attento nunc, inquit, sis animo, quæque ego verba pronunciavero, tu statim repete. vide ne aliquod excidat, pronunciato clarè, & distinctè. Et illa: Attendam nervis omnibus, effare jam: te sequar. sed, quæso, vide ne quid superstitionis istis verbis subit. Tum tonsor: Næ tu pervicax, inquit, quæ nec mihi, nec religionis illis, ac doctis hominibus fidem adhibeas. age, age eiice scrupulum. Dic ita: Dolet mihi dens. Tum illa repetens, Dolet mihi dens, ille verò iterans rursus, dic, dolet mihi dens. Tum virgo voce perquam lamentabili, dolet mihi dens, repetit. Hic tonsor, Heu tu, attento sis animo, jam res agitur. Dic ita: Non dolet mihi dens. Et Virgo excipiens: Non dolet, inquit, mihi dens. Tum tonsor, vultu hilari, sed gravi: Non dolet igitur tibi dens? ergo sana es, & salva. Hoc loco quantus fuerit circumstantium risus, & erant plurimi ad spectaculum acciti, vos ipsi coniicite. Tum Corta: Conjectamus facile, nam quis, vel maximè tetricus risum non risisset solutissimum? festivus sanè tonsor. Imo tum ego, totus quantus, quantus erat ab unguiculo ad capillum summum festivissimus.

Sed tamen amoto quaramus seria ludo:

Ut ait, Lyricus. Quid tu, Balbe? nam te ad interrogandum paratum video. Et ille: Vellem, inquit, scire cur quibusdam nocent auræ serotinæ, quibusdam verò non ita? Tum ego: Quia plurimi cutem habent tenuem, & poris, ut ajunt, physici, patescunt plurimis; atque hinc facilè auras illas excipiunt. tales verò sunt literati, qui præ studio calidiorem cervicem habent, & idcirco spiraculis quamplurimis laxatam. Qui verò duriores cutem, & labore duratam induci suot:
& quo-

& quorum caput frigidum, & sic spissius, & rimis minimè patens, hujuscemodi auris minimè obnoxii. Viden' ut noster ille villicus capite vix tecto brevi petaso, imo interdum detecto omnino, & plerumque seminudus, nulla aëris intemperie, nullis vespere auris vexatur. Tum Balbus: Video sanè, & miror oppidò. illi nihil omninò noxium: nos vel levissima intemperies, aura tenuissima, statim lædit, ac vexat. Tum Cotta: Sed jam tempus est è sub divo in tectum se recipere, ne scientes in malum incidamus. sentio enim humescere vestimenta; delabuntur nimirum, de quibus disputatum, auræ serotinæ. Tum ego: Benè Cotta submonet. Eamus: cumque ex hypæthra in deambulacrum introissem, secuti illico Cotta, & Balbus sunt. Vix dum intramus, cum Fabiolus funalem afferens, placidam nobis noctem impertivit. Cui ego: Benè est. Fabiole, atque amicos intuens, videte, inquam, hujus pueri solertiam, atque urbanitatem. illi statim laudantes caput demulserunt. Ego verò, cedo, quid in culina? Et ille: Cuncta, quæ mandasti diligenter curavi. aqua cum butyro est in testudine, ut cum tempus, cereales coquam vermiculos: ficedulæ verrunculo transfixæ in promptu sunt. Cui ego: Addidisti inter singulas singula lauri folia? Ita verò, tum ille. Cui tandem ego: I, cuncta adornato, dum nos libellum asceticum lectitabimus. Hinc ille in culinam, nos in cubiculum pedem intulimus.



C A P U T IX.

*De vita quieta, ac solitaria, quàm felix sit, disputa-
sum. mox occasione hospitum, de modo ador-
nandi, condiendique quadam edu-
lia tractatum.*

SEdebamus quodam manè in scopulo ego, & Eula-
lius, vir quo nemo comitate, nemo lepore, nemo
gravitate conditior; quare mihi semper charissimus,
& ex intimis familiaribus fuit: & dum mira cœli seren-
itate, marisque placiditate, atque insueta quadam
sacri silentii suavitate frueremur, ità ad me ille: Quò
magis, Parthenie, hujusce amœnitatem loci oculis
complector, quò salubrem hanc aëris temperiem li-
berius haurio, & ut dicitur, toto pectore, quò requie-
tem hanc, beatumque silentium mente contemplor,
eò magis me urbis, & rerum omnium, quæ in illa ma-
gni æstimantur, ingens fastidium capit; ut jam solita-
rix vitæ insolens invasit amor: ut nihil vigilans, nihil
somniaans, nisi de quiete meditor, ut Theocriti illud
usurpare possem,

καὶ γὰρ ἐν ὕπνῳ

Πᾶσα κύων ἄγρῳ πανένεσται, ἰχθύα κ' ἡγών.

unde factum adagium, Canis panes somnians. uno
tantùm verbo mutato, ut quemadmodùm canis pa-
nem, ille piscem, ego quietem somnier. Rideo sanè
nonnullos, qui istam tuam solitudinem non capiunt:
neque te hic felicem vitam agere, sed miseram arbi-
trantur: procul nimirum ab humano consortio, & ab
iis voluptatibus, quas plurimas societas affert. fallun-
tur oppidò: & error illorum tantùm abest, ut de tua
feli-

& quorum caput frigidum, & sic spissius, & rimis minimè patens, hujuscemodi auris minimè obnoxii. Viden' ut noster ille villicus capite vix tecto brevi petaso, imo interdum detecto omnino, & plerumque seminudus, nulla aëris intemperie, nullis vesperæ auris vexatur. Tum Balbus: Video sanè, & miror oppidò. illi nihil omninò noxium: nos vel levissima intemperies, auræ tenuissima, statim lædit, ac vexat. Tum Corta: Sed jam tempus est sub divo in rectum se recipere, ne scientes in malum incidamus: sentio enim humescere vestimenta; delabuntur nimirum, de quibus disputatum, auræ serotinæ. Tum ego: Benè Corta submonet. Eamus: cumque ex hypæthra in deambulacrum introissem, secuti illico Corta, & Balbus sunt. Vix dum intramus, cum Fabiolus funalem afferens, placidam nobis noctem impertivit. Cui ego: Benè est, Fabiole, atque amicos intuens, videte, inquam, hujus pueri solertiam, atque urbanitatem. illi statim laudantes caput demulserunt. Ego verò, cedo, quid in culina? Et ille: Cuncta, quæ mandasti diligenter curavi. aqua cum butyro est in testudine, ut cum tempus, cereales coquam vermiculos: ficedulæ verrunculo transfixæ in promptu sunt. Cui ego: Addidisti inter singulas singula lauri folia? Ita verò, tum ille. Cui tandem ego: I, cuncta adornato, dum nos libellum asceticum lectitabimus. Hinc ille in culinam, nos in cubiculum pedem intulimus.



C A P U T IX.

De vita quiesca, ac solitaria, quàm felix sit, disputatum. mox occasione hospitum, de modo adorandi, condiendique quadam edulia tractatum.

S Edebamus quodam manè in scopulo ego, & Eulius, vir quo nemo comitate, nemo lepore, nemo gravitate conditor; quare mihi semper charissimus, & ex intimis familiaribus fuit: & dum mira celi serenitate, marisque placiditate, atque insueta quadam sacri silentii suavitate frueremur, ità ad me ille: Quò magis, Parthenie, hujusce amœnitatem loci oculis complector, quò salubrem hanc aëris temperiem liberiùs baurio, & ut dicitur, toto pectore, quò requiescentem hanc, beatumque silentium mente contemplor, eò magis me urbis, & rerum omnium, quæ in illa magni extimantur, ingens fastidium capit; ut jam solitaria vitæ insolens invasit amor: ut nihil vigilans, nihil somnians, nisi de quiete meditor, ut Theocriti illud usurpare possem,

καὶ γὰρ ἐν ὕπνῳ

Πᾶσα κύων ἄγρυς μανένεταί, ἰχθύα κ' ἡγών.

unde factum adagium, Canis panes somnians. uno tantùm verbo mutato, ut quemadmodùm canis panem, ille piscem, ego quietem somnier. Rideo sanè nonnullos, qui istam tuam solitudinem non capiunt: neque te hic felicem vitam agere, sed miseram arbitrantur: procul nimirum ab humano consortio, & ab illis voluptatibus, quas plurimas societas affert. falluntur oppidò: & error illorum tantùm abest, ut de tuas
feli-

felicitate detrahat, ut etiam conducat. Hic ego: Sentiant, quæ velint, dicant, quæ sentiunt, non laboro: stultum profectò foret, missas facere res omnes humanas, quæ etsi umbræ (est tamen nescio quid veluti latens post tabulam) & verbis, quibus nihil levius, & quibus nihil omnino subest, tangi, ac moveri. Hic Eulalius: O verbum sapientiæ, & prudentiæ plenum! At miseram ipsi vitam, & tot tumultibus turbidam, tot ægritudinibus gravem, tot vicissitudinibus variam, tot difficilem casibus ducunt. Enim verò, si ad beatitatem nati sumus, quæ vita felicior esse poterit, quàm illa, quæ animi tranquillitate, corporis valetudine, in quibus humana felicitas, abundè fruitur? Et sanè hic loci animus sibi satis, nihil desiderat, nihil appetit, nihil odit, nihil metuit: quocirca immunis est ab iis perturbationibus, quæ ex desiderio rerum humanarum nascuntur. nunquam turbatur, non ardet ira, non meret invidia, non flagrat cupiditate, non turgēt honoribus, non falsus spe, deicitur: non simulat, non machinatur, non mentitur, non decipit. breviter, nihil eorum patitur, quæ vitiatæ naturæ sunt. Accedit ab æris salubritate, & frugalitate victus, quam in solitudine velis, nolis, amplectaris necessum est, sana valetudo, quæ promptum, atque expeditum facit animum ad ea meditanda, quæ felicem istam tuam quietem fovent, ac promovent: nimirum studia literarum, quibus animus pascitur, eruditur, ditatur, & se ab otio, & voluptate fortiter, & suaviter vindicat. quæ quidem duo præcipui sunt scopuli, in quos homines plerumque impingunt. Et quamquam hic videaris solus, atque otiosus sedere, tamen & otium maxime operosum, & solitudo tot habet comites, quot eruditi, magnique viri ex Græcis, & Latinis, nimirum ex doctissimis generis humani, hi sunt quorum

ope-

opera , atque illustria monumenta quotidie præ oculis , præ manibus habes ; ut meritò illud usurpare possis , à Scipione dici solitum , ut refert Tullius , Nunquam se nimirum minus otiosū esse , quàm cū otiosus , nec minus solum , quàm cū solus . Beata certè solitudo , quæ una facit , ut tantorum hominum consortio fruaris . Versiculos tuos ego , ut scis , summo perè amo ; at illi , quos habes 14 Haliecut : mea mulsæ sunt . & id eò libentius dico , quod sciam te non ex iis esse , qui se magnificè circumspiciunt . quibus tu versiculis nihil admodū esse , quod ames , quam quietem hanc rebus omnibus præstantiorem , professus es .

*Nam me non animi spes vana , & inania vota ,
Nec favor instabilis vulgi , plaususque theatri ,
Nec fæda ambitio movet , urbanique tumultus .
Gaudia pacis amo liberrimus .*

Omitto reliquos ne fastidiosus modestiæ tuæ sim Hic ego : Rectè facis : non quod illos aliquid esse , etsi informes etiam partus pulchri parentibus videantur . & est hæc providentia naturæ , nempe ut amentur . atque hinc tritum illud , suum cuique pulchrum , emanasse arbitror . sed ne mihi assentari videaris . Et ille : Nihil minus . sed teneo ingenium tuum . redeamus in viam , à qua tui me versus deduxerunt . Crescit mihi , inquam in dies amor solitudinis : & pacata istæc vita , qua nihil potest esse mitius , quantum mihi gaudium cumulet , haud facillè verbis explicare queo . Cui ego : Ne labores , credo equidem , ac de me ipso conjecturam facio . Siquidem tota difficultas , eò vertitur , ut rectam quis de rebus opinionem concepiat . quod ubi obtinuit , statim res humanæ , fictæ nimirum imagines , ac splendida quædam vocabula , ex animo decident . Hic Eulalius : Et hoc parum esset . quot spinæ , quot aculei sub magnificis illis vo-

cabulis latent? plurima quippe. Rosam dicerem. pulchra quidem illa, & frondium luxurie nobilis: sed paucarum admodum horarum ille decor, illa nobilitas, & ut tetigeris, punget. egregius flos ille, virefcit, nitet, purpurascit, ut decerpas, allicit, invitat, sed quid? latet sæpe anguis, ut optimè poëta:

Quis legis flores, & humi nascensia fragra,

Frigidus, o pueri, fugite hinc, latet anguis in herba.

Assequatur aliquis magistratum, splendidum, magnificentum nomen. ceteris eminere, coli, agere pro arbitrio, complecti amicos beneficio, competitores, & quibuscum nulla est gratia, submovere è gradu: deicere, magna potentia. verùm quantam affert tum animi, tum corporis ægritudinem? quot mala? sollicitudine angi, conscientia torqueri, curis distrahi, premi turbis, non benè audire, rumoribus lacerari. nonne id vitam est agere plusquam miseram? nisi miseram; mutato rerum vocabulo, felicem vocent. Idem dico de reliquis honorum gradibus: quos ut assequaris, quot necesse est, ut devotes? versari ad aliorum arbitrium, iniqua ferre, simulare, subiici, adulari. quæ ab animo ingenuo, quàm sint aliena, & quantum etiam indigna, etiam cæcus videt: ni etiam mente cecutiat. Mitto ea, quæ perpeti opus est, ubi obtinueris: muneris obeundi laborem, & sollicitudinem, emulorum invidiam, cynicorum censuram, & quibus cum muneribus exerceas, indocilem plerumque indolem, & mores tuis non consentaneos. Quid verò, si collata munera, ut non semel cadit, supra vires, supra ingenium sint? quanta meditatio, quanta diligentia, quantus conatus, ut si ea non decorè, at quàm minimum indecorè obeas? Sentiant alii quidquid velint, ego quietem vitam præoptarem, & eligerem etiam, si possem. Et hæc quidem, quod attinet ad munera: venio

nunc

nunc ad societatem eorum quibuscum vivis: Sunt vel hic scopuli, in quos allidas, sunt syrtes, in quas impingas: & ni fortem habeas animum, ingenium quam per dexterrimum, naufragium facias necesse est. Et primùm quanta circumspectio in rebus adhibenda, ut aliorum offensionem vites? quanta in sermone, ne verbum fors excidat, quod statim ab iis decerptum, quibus cum versaris, ad aliorum aures deferatur, qui si erga te non benè affecti, quantam creare molestiam tibi possunt? si benè, illorum amicitiam, atque benevolentiam perdas. quidquid enim de te rescitum fuerit, ab illis delatum certò scias, qui apud te versantur. tritum enim illud, Aut municeps, aut vicinus nunciavit. quare nulla major cautio, quam à domesticis. Quanta præterea solertia ne de re aliis suspicionem præbeas? quanta dissimules, quasi non visa? quanta, quasi non audita? quanta toleranda vel maledicè, vel contumeliosè, vel per impudentiam, vel per ridiculum prolata? quanta ab insipientibus temere vel dicta, vel facta devoranda tibi patienter sunt? Quod si tibi non tanta tolerantia (talìa interdum accidunt, ut vel sapientissimis patientiam abrumpant) quot rixæ orientur? quot jurgia? quot simulates? quantæ hinc animi perturbationes? plurimæ quippe, & graves. quantis, & quamvariis hominum moribus, te accomodes vel invitus necesse est? quàm diversa feras ingenia, & tuo consentientia ullo modo? quot casus accidunt, quibus pro tempore consulere difficile: & quodcumque elegeris, in deteriorem partem ab aliis rapiendum sit? quantas pati repulsas? quantas item dare, cum ea postulantur, quibus assentire non licet? Sine, quæso, ut exclamem,

Gaudia pacis amo liberrimus.

Interea loci dum hæc diceret, nuncius venit, nunciatque

que non longè abesse duos nostrates , qui ad me Massa ad Delubrum invisendi gratia veniebant . Tum ego , audito tali nuncio , Eulalie , neque hic nostro otio , nostra solitudine frui licet . Et ille : Quid facias te extra orbem locare minimè potes . es et tu mitis ingenio , & non illiberalis ; quocirca quid mirum si te facile convenient ? Est etiam quædam intercapedo ad reficiendos animos necessaria . Cui ego : Esto , non refragor . at enim illud me angit , quod eò loci sumus , ut in promptu habeas firmè nihil . quo igitur illos apparatu excipiam ? De hoc non multum labores , tum Eulalius : quod ad manus est , apponito : & ita satis officio factum . debuerant illi tibi diem dicere , si paulò lautius tractari voluissent . Sed quique ego currenti addo calcaria ? promptissimus tu ad officia : neque tibi modus deest , quo brevi , nec multo labore (nam celeritatem cum ingenii , tum manuum tuarum mirantur omnes) non inelegans prandium adornes . Cui ego : Bona verba : excidisti , ut video ab equo : nempe post seria nugandum tantisper . Sub hæc puer adest è vicino rure cum quasillo , & salve , inquit , mi domine , bonumque tibi diem auguror . dominus meus te salvere jubet , rogatque , ut duas hæc turtures , quas modo venatus est , accipere ne graveris eumque excusatum habeas , si plures non misit , nam dies venationi non admodum felix . Tum ego : Meo illum nomine fac salutes , mihiq; gratissimum fuisse munus , & opportunissimum , nam cum me duo hospites oppressissent , misit ipse aves lautissimas , quas illis apponam . ut verò puer discessit , Eulalius : En ut Superi tuæ obsecundant comitati . Et ego : Plurima illis gratia reddenda mihi est . at age , maneto hic tu , ut illos excipias , ego ad videndum de prandio , me conferam . Hæc puer , quas tu lepadas , ex istis scopulis col-
legi-

legisti, affer ad me, dabo tibi premium. statimque domum concedo. In quam ingressus, Heus tu, Fabiole, inquam: Ecille: Præsto sum. Cui tum ego: Suntne cuncta parata? Et ille: Paratissima, inquit. Neque hic ego manus habui sub pallio. Et ego: Benè est, scitule: sententias etiam addiscis. Ille tum: Caudex essem, si nihil ediscerem, te magistro. Et ego: Tace, audacule: non decet puerum lineam transilire. Elixistin' cerebrum bubulum? Ità, inquit ille. sed vereor ne sit decoctum. Accipe, inquam ego, ut mittam digitum. mox cum allatum attrectassem, scitè, inquam, coctum. Illud mox ego in frustra quadrata oblonga, disseco, similaque conspergo. accipio deinde duo ova, inque carino, tum vitellum, tum albumen diverbero, inque spamam ire facio. Interea iubeo puerum frixorium cum butyro ad ignem applicare. cerebri ego frustra ovis involvo, inque sartagine mitto, ut frigerentur. quod genus edulii inauratum dicunt, quod ovi colore flavescens, aurum imitetur. frixa tali embammate scitè condio. accipio mel (habebam Siculum probatissimum, ab amico mihi dono datum) infundoque in aulam (quidam defructo utuntur, quidam saccharo) misceo mox tantillum apeti: adjungoque uvam passam minutam conditaneam (Tarraconensem appellant; ex illa enim Hispaniæ parte ad nos primùm delata) cunctaque simul coquo. coctum mox salsamentum super cerebrum effundo. servo tandem lancem operculatam in hypocausto.

Exinde, heus tu, inquam, Fabiole, fac ut puer ille, qui detulit lepistas, turtures, & pullos quatuor, ex his, qui in corte aluntur, deplumer tu accipe coculum planum grecum, & sumine inungiro. Et ille: Habeo ad manus butyrum, liquabo illicò: Ego verò. Ipse de alliis loquor, tu respondes de cepis. tenes adagium. Et il-

M

le:

le: Teneo quidem, sed butyrum minus noxium. Næ tu doctior, qui delphinum natāre doces? tum ego fac ut iustum butyrum farinæ immiscebo. Mox ego scriblitam salgamariam adorno: accipio similaginē, sal Indicum, butyrum, & ovi luteum: cunctaque permixtim depso, mox intritam dissectim partior. extendoque unam partem cylindro lævigato, conformoque in circulum, quem coculæ ærez impono. Accipio mox bellaria, minutimque trito, immixtoque plurimo lauroceraso saccharo imbuto, super extensum circulum expando. tandem facto ex altera intricæ parte circulo altero, supra primum salgamis tritis plenum extendo, atque superioris limbum, cum inferiore adnecto, limbumque dentatum facio. seponoque mox scriblitam, ut succenso clibano coquerem; meque ad offam adornandam accingo. Jus fieri jubeo ex medulla, & lepades aceto elixari. ita enim caruncula illa è testa per se divellitur, ego boletos, ac terrestres tuberes aliquot, quos hesternò vespere ab amico Neapoli missos acceperam, minutatim contritos in testudinem mitto, sumineque frigo. quibus tritum alium admisceo, quo noxii tuborum, boletorumque humores temperentur. Sub hæc panem candidum pumicosum durum in frusta dissecō: torreoque mox frusta super prunas. inque amplissima testudine, misceo jus, lactesque vitulæ jurulentos, arietisque coles, boletos, tuberes, cuncta promiscè. lancem deinde amplissimam accipio ex nobiliori argilla fictam: infernoque panis frusta semitosta, mox acceptum cochicare jus illud cum admittis fartis infundo in lacem. strata mox alia panis superficie, jus iterum infundo, quo tandem totam benè lancem adimplevi. quam operculatam mitto in hypocaustum, jubeoque puerum brevi educere; ne siccaretur, jarulentam enim vo-


lebam, non siccam. Hic me ille sic interpellat: Jubes ne præparem pulcem ex brassica capitata? Cui ego: Asine, videturne tibi decorum hospitibus brassicam apponere? Ille verò, ut est promptus. Quidni? inquit. Maritabimus illam nostro more, perasone nimirum admisto, glandio, lucanica, caseoque bubulo: & si ad manus foret vaccæ lactantis mamma, quid suavius? digitos perroderent suos. Et ego: Saperet, fateor, sed stomacho nostro non quadrat. Accipe, stipes, mundato pyra illa non dum mitia, & cidonium malum; inque minuta frustra incide: postea verò præcoque, & Appium malum. ex his pulcem faciemus delicatissimam. vide, jus ut sit pinguiissimum. Cum cocta (adverte, insulse, cidonia primum, & appiana, quæ duriora, mox pyrum, præcoquum tandem in ollam mitito) accipito quatuor ova; inque patella dilue: exin premito limonium quoad succus omnis in patellam effluxit, cave ne unà semina confluant. sumito postea ex olla jus, & in patellam versa, & permisceto, totam tandem patellam in ollam versato. atque hæc polenta sapit nostro stomacho, non brassica. Accipe, asine, lepidam fabellam: Quidam egnobii cujusdam præfecti is quotidie brassicam scholaribus apponebat; quocirca illi tanto brassicarum fastidio tenerentur, ut illas oderant angue pejus, & cane, ut dicitur. Hic ille: Merito quidem. Nihil enim est, quod faciliè nauseam creet, quam repetitus idem sæpe cibus. sed perge, quæso. Auditi sum ego: Quadam die apud magistrum querebatur præfectus, quod discipuli non ea alacritate, qua par erat, in studium incumbere, neque tantum ingenii specimen darent, quantum ipse desiderabat. Tum magister: Ne, quæso, mireris, pater, inquit; quippe non benè conveniunt brassica, & ingenium. Nonne lepidè, & argutè dictum? Hic Fabio-

lus tantum cepit risum ridere, ut penè emoreretur. mox facta intercapedine, sumptoque spiritu. Festivissimum, inquit, & cum sale. At ego, ut ad nostra redeamus, illum limonii succum non probo. Cui tum ipse: Curnon? Quia acidum stomacho nocet, inquit ille. Et ego: Nunnam tu ex nova medicorum schola? Accipe, stipes, succus ille facit, ut ova non tota coalescant; sed grana velut distincta videantur, quo elegantior polenta sit, Sed cur ita? tum ille. Quia, inquam ego, illius natura sic est, ut, disgreget. Et ille: Non intelligo. dic, quæso, planius. Mixtorum partes separat sua acrimonia, inquam ego. At puer: Multo minus. Tum ego: Næ ego stultus, qui asinum ad tibiam voco. Quia verò jam gradus hospites ascendeant, obviam procedo.

F I N I S.



AUTU-



AUTUMNORUM SURRENTINORUM

LIBER III.

CAPUT PRIMUM.

Dedita occasiuncula, perquam lepida advenienti amico fabella narratur: mox eodem recitatum de Pace Carmen est.



Edebam quodam die ad mensulam, qui si rectè memini, erat primus ab Id: Octobris, cum me Vellejus ne cogitantem quidem oppressit: quem simul ac vidi, arctissimè complexus, affabiliter excipio. mox curam non per scopulum brevi compendio venisset, interrogo. Et ille: Surrentinus

nauta (nam tuos illos Cotam, & Nardum, qui è Campesribus sunt, nancisci nullo modo potui) noluit, et si

M 3

homi-

hominem sæpius rogarem , præmiumque etiam promitterem , ad scopulum Surrentini nostri applicare . ajebat se impediri à nescio quo nobili , quem ferre affirmabat . at ego præter religiosum hominem lacinia indurum veste , & tres , quatuorve è plebis fœce homunculos , neminem videbam . ni fortè sues (ferrebat enim porcellum) hic nobiles vocentur , & me uti hospitem vocabulo luderet . Ne mireris , tum ego : sic sunt hic homines istiusmodi : cùm aliquid facere nequeunt , quod ipsis commodum non videtur , se à nobilibus , quorum hic summa apud plebem potentia , impediri ajunt . quod tu verò suspicaris , verisimile & illud quidem certè . stolidi enim , & immunda animalia , jocandi gratia , nobiles vocant . Verùm hic , Vellei , oblata quoniam occasio est , dicam paucis , quod mihi quondam accidit oppidò ridiculum . at sedeto priùs hic , nam tu certè defatigatus . madesce nam dabo siccam subuculam . Ille verò : Minimè . fabellam expecto , quam futuram lepidam credo . novi te quippe horarum omnium hominem , quamquam per paucorum sis hominum . Tum ego : Exornabo me lepidè tui gratia . accipe lepidissimam fabulam . Messana Rhegium Julium rediturus cum viro amicissimo , ac nostrate , domo ad portum descendendo , phaselum , qui quotidie ex una in alteram oram navigat , subintravit , verùm , ut ambo venimus , tantis onustum vectoribus , ut nunquam tot Charon transvexerit , animadvertimus quoniamque æstuosum etiam mare erat , è re nostra duxi profectionem in diem crastinum , quò necya celebrabantur , differre . At amicus , qui Rhegii Humaniores literas docebat , & habiturus eo die orationem erat , quam in studiorum solemniis recitari usus obtinuit , me rogat , ut phaselum alium conducere . quod mihi à re minimè esse videba-

debatur. Instat ille: Honestius esse, si ego totum ad meum arbitrium, meumque commodum phaselum conducere. Cui ego: Amice, si vis ludere tuo, non meo corio ludito. istiusmodi ego speciem ne sitivilio emerem. interea nauta ad nos propius accedit, rogatque nunnam Rhegium ire vellemus? esse in promptu phaselum, in quo perquam paucissimi vectores erant. Tum ego: Veniemus, inque phaselum gradum ambo inferimus. cumque unum, aut alterum vidissem, Eja, agite, solvamus, inquam. At nautæ expectate, quæso, inquit, dum nobilis quidam veniet. Cui tum ego: Vos pro more luditis. post nobilem accedet famulus, fortasse & famula; mox alius: & sic major erit thylaco accessio, ut est tritum. Tum illi: Minimè, inquit. unum dumtaxat expectamus. jamjam aderit. Postea verò quàm parumper expectasemus, venientem quendam cum asino conspicio. tum ego jocandi gratia, Nunnam, inquam, hic est nobilis, quem præstolamur? Nautæ partim verecundia, partim timore, ne discederem, honorem præfati, Ipissimus hic est. verum parce, quæsumus, inquit; nam necessitas, quæ quidem ingens telum est, nos cogit, ut hunc asinum, sit honor auribus, transvectemus. Tum ego cum risu in stomachum erumpens: Nobiles igitur, inquam, apud vos sunt asini? ite cum vestris hisce magnatibus, nolo vestrum præclarissimum cœtum mea ignobilitate dehonestare. atque hæc dicens pedem referebam. Cum familiaris, cui fixum animo erat ad constitutam diem Rhegii esse, me orat, atque obsecrat, ut cum asino ire non dedignarer. Sed quid ego, inquit, asinum? Pegasus hic est: quare gloriari poteris te cum Pegaso Siculum fretum trajecisse. quod quidem præter te haud scio an contigerit nemini. arripe occasionem,

quæ fortasse aliàs erit calva, Cui ego: Tunc etiam deliras? an me ex illorum poetarum grege extimas, qui pro Pegaso, asinum conscendant? Et ille: Id tu opinari nullo modo potes: scis quippè quanti te faciam. nam etsi fastidii delicatissimi, tuos versiculos audio cum appetentia. verùm ita humanarum rerum conditio est, ut tales sint, quales nos esse ducimus. quare si hunc asinum Pegasus credamus, perinde erit, ac si revera Pegasus esset. Hic Vellejus: Non multum sanè à veritate aberat. nos ipsi rebus opinione nostra speciem fingimus. verùm quid tum postea? Et ego. Quid? adeò me urgere institit, ut tandem unà cum asino navim conscendi. Sed quidè cum nautæ vela facerent, inque alteram partem navis inclinaretur, asinus tanto timore correptus est, tanta item nausea agitatus, ut ore & (parco auribus) eructans, totam navim conspurgaverit. Hoc loco Vellejus adeò solutè ridere cepit, ut penè ilia disrumperentur. Ut vix tandem se continuit, Miræ, inquit, Parthenie, sunt quæ tibi acciderunt, ut haud scio an nemini. vellem ut tuam vitam scriberes: esset oppidò mira, & jucunda. Cui ego: Faciam, si erit otium. Sed age, redeamus domum. Quid novi Neapoli ad me attulisti? amici omnes benè ne valent? Et ille: Valent pugilicè: præcipue Balbus, & Sextus Niger, qui ut te sua vice, iterum iterumque complecterer, summopere rogarunt. Cui Bellus valet me liulculè, teque summo gestit opere videre, atque asfari. Tum ego: Hactenus de domesticis, sed quid de extrariis? Quid? tum Villejus: Magnus rumor de Pace inter Europæos Principes sancienda. quem uti festivissimum ad te deferro: & ut certus sit vehementer opto. Cui ego: Jam de hoc me Cardinalis certiore fecerat; & tanta voluptate affectus sum, ut statim in-

sani-

sanire libuit. Tum ille in mensam irruens, Num istuc, inquit, carmen de Pace? Cui ego: Divinasti tu quidem, Vellei. Tum ille: Quæso, inquit ut, è vestigio recites; tanta me cupido invasit carminis istius, ut nunquam aliàs. Rudis, tum ego, truncus, ut è sylva venit, sine doletur, excipies tum, minore fastidio. At ille: Non est opus ascia, utut est, recita: certè non asinum illum, sed Pegasus redolebit. Ego verò: imò vide ne ab illo defluerit asino. Mitte jocos, tum ille, occine; nam secus non omittam te urgere. Cui ego: Accipe, tu videris. statimque de scripto recitare cæpi hoc modo.

PRO PACE DIUTINIS POST BELLIS FACTA
C A R M E N.

*O agite, & magnis, Diva, succurrere cæptis,
Aonides, properate, quibus pacata Lycaï
Est amor incolere, & savos odisse tumultus:
Auxilio mihi fas vestro de vertice Olympi
Tandem in desertas Pacem deducere terras.
Magnum opus: at magna vobis ad grandia vires
Orsa, dea; tentare quibus placet ardua, & altum
Difficiles per conatus decus addere fronti.
Ite duces igitur tanti decorisque, operisque.
Jam per tot clades, & per tot funera victor
Versarat rapidum Mars implacabilis enses.
Terrarum pars nulla Dei secura furore,
Nulla erat & lacrymis, & fuso sanguine sicca.
Marsia nam latè in populos pervaserat omnes
Contago: simul una omnes insania gentes
Torquebat, stimulis agitando furialibus iras;
Ut cæci in cades ruerent, & mutua fata.
Hic fremit irrequieta, diuque insistere eisdem*

Ne-

Nescia limisibus gens Gallica: proximus urget
Belga ferox: Batauique suas ad pralia vires
Adjungunt, terrisque simul, pelagoque ruentes
Decertant. medius ardet Vulcanus in undis,
Extentis & rauca tonans fremit areus arvis.
Illine, divisi à nostro licet orbe Britanni,
Haud tantos segnes aspèctare tumultus;
In pugnas, inque arma ruunt. Mars sevus ubique
Sanguine tot populùm, tot cadibus astat, & se
Per mare, per terras violentis invehit armis.
Nec sedet infrenis longè Germanus: ahenis
Ipse etiam riget in telis, riget undique campus
Cornipedum crebris hinnitibus, & tonitru vi
Fulminea, qua pulsa ruant, & mania, & arces.
Horrescunt Rhèni ripa: stat & horridus ipse
Rhenus aqua, fluvioque immissa cadavera voluit.
Non tantis & Iberus iners desistit ab armis:
Nunc hostem contra movet hæc, nunc & movet illac:
Atque animis certat magnis. Incincta securi
Ardet Hyperborea Lechi gens clara sub Vrfa:
Et conjurati descendunt agmine magno,
Inque Scythas, Thracesq. agitant certamina Moschi.
Et pacata licet nunc divum munere, tantis
Haud procul à bellis Oenotria: sape cruore
Turbidus Adriacis sese Padus intulit undis.
Parte alia bellis Oriens, & cladibus omnis
Savit atrox, savitque rigens Maoris, & Hebrus:
Et faciunt animos civilia bella tyranno.
Barbara nec Libya tellus, nec turbidus Auster
Cessat iners: Numidaque ruunt, Maurique rapaces,
Et terris latè portant, & fluctibus arma.
Intutum mare, & insuta pradonibus ora;
Vel deserta jacent, vel deturpata rapinis.
Hæc ubi Relligio neglectis vidit ab aris,

Et

Et tristi delubra simul squalescere ludu :
 Totque urbes, tot regna una convulsa ruina,
 Tot populos, gentesque trahi, legesque regi ;
 Has secum effudit vultum demissa, querelas :
 Tantum igitur Enriis licuisse impune malignis
 Concessum? tantumne Erebo, turbaque nocenti,
 Tartareoque datum Diti? succendere bella,
 Inflammare animos, odiisque urgere cruentis
 Tot cades hominum moliri, & funera tanta :
 Totque urbes potuere armis, totque inclita regna
 Pastare, atque unà totum subvertere mundum .
 Nempe sacris etiam communi sorte prebensis,
 Excidium latè inferrent, ac funditus aras
 Eruerent? tanta Enriis crudelibus ira :
 Tanta odia in Superos, rabiesque insana nocendi.
 Haud equidem scelerata ultra producier ausa,
 Neve nefas patiar tantum . mihi certa labanti
 Jam mundo, & populis mens est succurrere tantis.
 Quaque ferat fessis requiem, qua sacra reducat,
 Conabor Pacem summis accersere ab astris .
 Hac ubi dicta, fugam niveis subvoluta quadrigis
 Arripuit, Pacisque petis celsissima regna .
 Est locus astringeri super alta cacumina Olympi,
 Lux ubi perpetuò fulget purissima, & omni
 Nube vacas, streperisque vacas pacatus ab Enris.
 Nubila sed subter, animasque flamina, ventos,
 Fulminaque, nubesque, & rauca tonitrua calcas .
 Hic dextra de parte, rubens quàm surgis Eous,
 Et vitam cum luce refert mortalibus, alta
 Divino assurgunt structu palatia, ubi alma
 Pax habitat, sevos terrarum exosa tumultus,
 Et fera bella, nefasque armis furialibus Orbi
 Illatum: & placida fruitur bona diu quiete .
 Crystallo ex albo paries formatus, ab ipso

Mul-

Multus ubi, nitidusque venit disiectus Olympo :
 Ast adamante fores, atque atria prima nescunt,
 Et superum limen, quatuorque imposta columnis
 Tessudo, stellis interdistingta coruscis.
 Et stella totidem sunt scintillante pyropi
 Lumine. qua circum stat projectura corona,
 Et qua capitulis ex fulva jaspide factis,
 Et docto insculptis cœlo, subnixa columnarum
 Eos ardescit sapphiro, & fulgurat aureis
 Interstricta oculis, & gemmis dives, & auro.
 Ast imum penetrale, capit quo dia quietem,
 Effictum solido, nitidoque effulget achate.
 Plurima cui sparsim fulvis arbuscula guttis,
 Natura pingente, virent: maculaque per omnem
 Sponte sua gemmam serpentes texile ductu,
 Atque notis variùm circum cursantibus, ipsas
 Cum Phœbo referunt Musas. intonsus eburnam
 Phœbus habet citharam, sua cuncta insignia Musa,
 Se gemma pingente, tenent, mirabile visu.
 Non procul aeterno vernantes gramine campi
 Dadaleo rutilant textu, Phrygioque labore.
 Nulla quibus rapidi nocet inclementia Cancrî,
 Nec gelido nocet afflatu implacabilis Vrsa.
 Sunt & multigenis lucentes floribus horti,
 Natura ridentis opus: variata superbo
 Namque opere in foliis fulget pictura colore
 Multiplici: croceo, nimirum, alboque, rubroque,
 Cyaneo, viridique, & purpureo intermixto.
 Et discors vario concordia spirat odore.
 Non tales, quamquam celebrati carmine vatum
 Alcinoi quondam Phœacum in finibus horti,
 Nec sylva Hesperidum, ferrent licet aurea trunci
 Poma: nec Indorum, flavo licet omnis ab auro,
 Omnis & à gemmis passim fulgesceret arbor.

Hic

*Hic Pax Uranidum cœni comitata sororum,
Per virides spatietur agros, camposque beatos:
Atque choros agitat sacros, optataque ducis
Otia, qua nulla possunt trîstare procella
Terrigenum, nullique unquam turbare tumultus.*
*Sed jam Relligio veloci invec̃ta quadriga,
Piniferi juga celsa reliquerat Apennini.
Hinc trans Jonium per summa Ceraunia, perque
Ardua clivosi Parnassi culmina fertur.
Præterit & Pindum, Musis loca cognita, & altum
Pelion, atque ossam, & lucis frondentibus Octam.
Et celeri tandem cursu pervenit Olympum.
Hic habiles sistit bigas dea protinus: & mox
Exilit, & Pacis gressum detorquet ad ades.
Forte sacro slipata choro Pax alma sub ipsum
Vestibulum stabat festas ductura choreas.
Nam solennis erat Superis lux illa sub astra,
Qua dea terrenis victrix remearat ab oris.
Quæ simul ac grandi properantem ad limina gressu
Sacrorum divinam aspexit, venit obviam: & illam
Circumdans per colla manus complectitur artè:
Charyæque sinceris delibat basia labris.
Mox qua cussa, rogat, superi super ardua Olympi
Impulerit? socio fœdatis sanguine terras,
Jusque datum sceleri, & totum impia fugerit armat?
Qua dudum aversa, furentes liquerat ipsa
Mortales, odiis se inter, bellisque petentes.
Cui sic Relligio miti sermone profata,
Est ingressa: Soror mihi Pax gratissima cunctas
Uranides inter divas, quaque una serenas,
Una & per totum diffundis gaudia Olympum.
Una etiam, si diva voles miserescere, terras
Undique bellorum nigra caligine mersas,
Stragibus & tantis hominum, lætæque gementes,*
Luce

Luce tua, actutum tenebris, & nocte fugatis,
 Illustrare potes, subitamque afferre salutem.
 Illarum nunc ipsa graves miserata labores,
 In tua regna, super stellati culmina Olympi,
 Ipsa tua spatiaris ubi secunda quietis,
 E desolatis divorum altaribus, eque
 Dejectis lasæ sacris, adytisque refractis,
 Abs te, diva soror, lapsis deposcere rebus
 Auxilium, veni, & requiem tot gentibus, & tot
 Concussis bello regnis, & atrocibus armis.
 Ne patere, ut toto victor Mars impius Orbe
 Amplius exultet, miscens stragesque necesseque,
 Et tot cum miseris evertat civibus urbes.
 Ne sine, ne quaso, rabidas baccharier ultra
 Eumenides, Dirasque omnes immanis Averni.
 Qua face Tartarea cursantes undique terras,
 Accendunt odiis animos, irasque ministrant;
 Vasta quibus foveant bellorum incendia, & atris
 Omnia corripiant flammis, atque omnia perdant.
 Haud equidem, fateor (neq. enim sum nescia rerum)
 Immerita tantum gentes meruere favorem.
 Quæ caca stimulo vindictæ, atroque furore
 Prædæ capta, diraque cupidine regni,
 Non sanctas curant leges, non jura deorum:
 Cuncta per & scelera, & per mutua funera currunt,
 Precipites, quocumque ferus trahit impetus, & quod
 Eumenides retrò flammis ardentibus urgent.
 Sed te, Præses ego quæ divum altaribus adsum,
 Relligio, per sacra rogo delubra, per ipsas
 Desertas Superorum aras, misere benevola
 Diva, fatiscenti mundo, veniamque profana
 Da genti: extremoque ruentes exime casu.
 Teque mea id poscunt comites Pictasque, Fidesque.
 Quorum, diva soror, justissima vota, precesque

Ne

*Ne patere incassum recidant: scis semper ut illa
Sint benè promerita de te: tua numina semper
Vt cuncta colerent gentes curavimus, & te
Plausibus amplexa latis, festoque triumpho.
Quare age, luce tua bellorum nocte fugata,
Divinis tandem illustra fulgoribus Orbem.
Te, dea, redde: dabis pacem, & bona gaudia terris:
Et sacra restitues delubris, & decus aris.
Aspice ut egregiis Pater Innocentius orsis,
Undique turbatum studeat componere mundum.
Mitiges ut flammæ odiorum, ut leniat iras,
Vt savas dirimat lites, ut iurgia pulset.
Paulatim ut flectat mentes, animosque feroces
Conciliet: vinctasque trahens ad fœdera gentes,
Vt populos, ut regna manu nutantia firmet.
Aspice, ut insignes Capitoli in vertice pompas
Apparet, atque dies terris indicere festos:
Vtique triumphales meditetur in athera moles
Tollere, & antiquos Patrum renovare triumphos;
Vt te, blanda soror, pacato numine, ab alto
Accipias reducem, & sacrata in sede reponat.
Ergo age, rumpe moras: has mecû inscende quadrigas:
Et quod sacra Fides, Pietasque benigna reposcit:
Et te tot votis Genitor ter maximus optat,
Solennesque parat pompas, bona diva, veniso.
Dixerat. has contra placido dedit ore loquelas
Pax tranquilla. Soror mea maxima cura, meum cor,
Quamvis optatam teneam securo quietem
Ædibus his, nulli quas perturbare tumultus,
Non ira possunt hominum, non bella nocere.
Ausaque terrigenum quamquam, scelerataq. facta,
Non sibi, non equidem tantum meruere favorem;
Non tua, diæ, tamen mihi fas contemnere iussa:
Quaque etiam dant sacra Fides, Pietasque: Quirini
Ne ex*

*Nec pia fas Patris frustrari vota, precesque
Nam viget in cœlo semper clementia, & ipsi
Sunt semper faciles hominum miseresce divi.
Tecum igitur veniam, & rursus pacata revisam
Mortales, dioque replebo lumine terras.*

*Hac postquam roscio Pax alma ex ore locuta,
Religionis adit bigas, scanditque. Iugales
Illicet alipedes cœpere per aëra cursum.
Atque fuga montes nunc hos, nunc prapete & illos
Prætereunt. circum dispulsus sibilat aether,
Interea, mirum! tenebrosus cogitur aer
Threicios retrò in fines, Rhodopenque nivosa,
Addensatur ubi cœlum, pall' scit Eous.
Horrida nimirum Pax illuc bella relegat.
At contra occiduo fulget lux clara sub axe.
Mars fugit expulsus, fugiunt unâ agmine facti
Eumenides, rabieque comas, ira que frementes
Anguineas lacerant: & tatarco ululatu
Antra petunt Stygia, & nigris clauduntur Avernis.
Nuncius interea Romam pernicibus alis
It Zephyrus, ramumque ferens frondentis oliva,
Syderio properare Deam de vertice Olympi
In terras iterum, optatamque afferre salutem
Nunciat, & requiem, & constantia fœdera Mundo.
Illicet ex adytis se Pastor Olympicus imis
Effert, purpureo Patrum comitante Senatu,
Omnis, & extemplo quem plebs Romana secuta est.
Obvius & Diva venienti occurrit. Vbi Pax
It terris propior, divina & luce refulget,
Tum summus Pater, & Procerû chorus omnis ovât;
Omnis & inflexo Divam gens poplite adorant.
Et dignas referunt grates: & murmure festo
Per medias pompas, perque alta trophæa, per arcus
Insignes opere, & gemmis, auroque superbos,*

Man-

Mansuram aternùm Capitolia ad alta reducunt.

Annuit his votis bona diva: atque omine lato,

Pacta iterum pulsus firmavit fœdera bellis.

F I N I S.

Ut recitavi, Placetne, inquam, Vellei, carmen utut rude, & incudi non dum redditum? Et ille: Placet summo opere. & ut dicam quod sentio, non est quod amplius limes, atque expolias, adeo mihi rasum, tornatumque videtur. Cui ego: Itane verò? Et ille: Ita enim verò. Scis me latinè loqui, & nihil magis odio habere quàm fucos, & fallacias. Atque id cùm diceret, puer adest, nunciarque venisse Stabiis amicum quendam, cui ut obviam iremus, illicò assurreximus.

C A P U T II.

Litera ab amico transmissa recitantur; mox occasione arrepta ab Homero quasitum, cur hic Æthiopes inculpatos vocet: Unde niger in Æthiopibus color oriatur.

SEdebam quodam vespere in Calopside, & libellum sublegebam, cùm me Nardus convenit (est hic adolescens, qui literas interdum, & vidulum manè defert Neapolim, vespere verò rediens, literas ab amicis acceptas, & quæ ad me mittuntur, deportat in vidulo) & salve, inquit, mi poëta. At ego: Vidiſtin' Eulalium? Vidi, inquit, ille: èque manibus literas in manus dedi, ut tu mihi mandaveras. ille verò has mihi ad te perferendas dedit. hanc verò epistolam quidam ex vestris adolescentibus, ut in manibus Lucilio darem è meis manibus jussit. Cui tum ego: Teneſne illius nomen? Neutiquam, ille. Est autem juvenis, statura, quæ commodam excedit, capillo succi-

N nco,

neo, & aliquantulum vibrato, colore inter aëquilum, & candidum, naso oblongo, cujus crepido altè prominè. juxta dextræ auris alam nævus in cinerem descendens, auribus patulis, voce gravi proxima. Tum ego: Hem! ut graphicè pinxisti hominem. Habeo illum mihi perquàm notissimum. statimque accersiri jubeo Lucilium. interea resignatas Eulalii literas perlego. & erant multiuges, & ponderosæ. vix ad umbilicum veneram, cum en Lucilius, cui ego: Accipe has literas, quas, à Balbo scriptas certò existimo: adeo enim mihi illum ad vivum descripsit Nardus, ut nihil dubitem. Ille, accepta epistola, cum inscriptionem vidisset, non hoc, inquit, Balbi autographum, fortasse ab alio inscribi jussit. mox soluta, ille, inquit, est. Rectè igitur conjectavi, inquam ego. sed videamus quid scribat. ille verò cum tacitè literas perlegisset, Nihil admodum, inquit, quod tua scire referat. Recita, inquam ipse: aveo stylum illius inscribendo cognoscere, nunnam simplex, & purus. Tum Lucil: tergiversari cepit usus verbis ambiguus: sunt quædam, inquit, quæ ad me amicitie scripsit, & pueriles quidam lusus; quibus de postea: dabuntque ansam lepidè jocandi. Cui ego: Næ ego simplex, quem tu deludas. certum est mihi illas angas è vestigio audire. Ille, quoniam sic jubes, morem geram. audi, modo, atque attende.

BALBUS LUCILIO SUO

Εὐπράτῃν.

Craftina die benè manè ego, & M Junieste, & Parthenium conveniemus. quia verò illum ex improviso opprimere volumus, quæso, ut hac de re nihil illi significes. nolumus enim, ut nostrum causa se vixet.
per-

perpauillum contenti sumus. non enim isthuc ad curandam cutem, sed ad invisendū amicos veniemus; quorum consortium dulcius quavis cēna, quantumvis dubia. gratum verò nobis facies si ficus aliquot in puteo rēponas, ut frigus benè concipiant. illis nos, ficedularum more, (quas cave ne cōpares, nam ingratam rem nobis facies) saginare animus est. Nos hinc feremus gallum Numidicum scitissimè conditum (ab amico dono accepimus) & quædam bellaria, quæ mihi ad manus sunt. plura per tempus, non vacat; sunt & plurima alia, quæ dicam, & festiva quidem illa; sed præsentī sermoni reservantur. Vale Neapoli, Prædie Id: Sep: MDCLXXXIV.

Hoc ego loco: Faciam, inquam, ut sentiat Balbus, se me revera insperatum oppressisse. nolo ut ficus rēponas, neque, ut ficedulas compares, quas ille elegantī præteritione petit. sat illi erit suus gallus Africanus. Tum Lucil: Haud equidem inducor, ut id eredam. scio quippè quàm tu erga amicos comis, ac liberalis. facies ex te certò cum mox iram concoxeris. nunc enim, ut video in fermento es. Age sis, transferamus hinc aliò sermonem. Quis istic libellus? Cui ego? Homerus. Nempe mihi genialis, tum ille. Lectita igitur levabimus tantisper animum. jam reviviscens Zephyrus blandè nobis adflabat. Tum ego Homerum recitare cēpi: tenebam enim plurimos versiculos in memoria. cum verò ad hos veni,

*Ζεύς γὰρ ἐπ' ἄκτανδ' ἀνέμους Αἰθιοπῆας
Χθιζὸς ἔβη μετὰ δαίτα: θεοὶ δ' ἅμα πάντες ἔποντο.*

Sic me Lucil: interpellat: Cur poëta Æthiopes inculpato vocat? nunnam quia Deum sanctè colant? verum hi, ut ait Diodorus Siculus, nullos esse Deos arbitrantur: & Solem ipsum, quem gentes penè omnes

veneratz, ipsi in loca palustria fugientes exorientem execrantur. an fortè quod humano ritu, & æquissimis legibus vivant? verùm hi ferino ritu, nullis legibus, summa barbarie, atque immanitate vitam agunt. ut tu in Geographia adnotasti. Tum ego: *Æthiopū gens varia, & larè per universam pene Africam diffusa eo modo, quo per Asiam Scythæ pervagati sunt innumeris fermè familiis. & quemadmodum hi quidquid terrarum ultra Caucasum est: ita isti quidquid Africæ ultrà Atlantem ad Oceanum usque Æthiopieum est, occuparunt. Ex his verò, qui sub Ægyptum incoluere religiosi habiti, ut idem Diodorus refert, & ab Ægyptiis cultus Deorum, ritus, & ceremonias acceperunt. imo singulis annis ex urbe Diospoli Jovis simulacrum, cæterorumque Deorum, qui summa ibi religione colebantur, accipiebant: perque universam Libyam circumferentes duodecim dies festum celebrabant. ad quam consuetudinem respiciens doctissimus poëta subiunxit.*

Δωδεκάτῃ δέ τοι αὖθις ἐλεύσεται οὐλυμπὸνδε
 Hosce verò Æthiopus meritissimò inculpatos Homerus appellat. Imò ipsi (ut me legisse certò memini, nescio apud Herodotumne, an Diodorum) in argumentum suæ innocentie illud sæpe jactare soliti, quod nullis unquam gentibus servivissent. Aliquāmulti, autumāt legi oportere *μετὰ μέμνονας αἰθιοπίας.* Quia à Memnone nimirum Æthiopes orti sunt. Ego, si fas est dicere, quod sentio, puto idcirco ab Homero innocuos appellatos, quod cū longè ab aliis gentibus præcipuè Græcis habitaret; quocirca *ἑκατοὶ ἀνδρῶν* ab eodem dicti: nulla unquam cum illis bella, nullæ contentiones: neque quid inter se agerent satis compertum erat. atque ob id innocui voca-

vocari à principe poëtarum meruerunt. Hic Lucil:
 Assentior, verisimile quippe. Sed age quando in
 Æthiopes incidimus; undenam fieri putas, ut Æthio-
 pes adeo nigri sint: quare & nomen obtinuerit, ut te
 non præterit; & factum item adagium Æthiopem la-
 vas. quod de re inutili, & quæ fieri haud potest, jacta-
 tur: nempe illi tota cute nigricant, ut frustra illos la-
 ves. Cui tum ego: Scripsit Historiæ pater Herodotus
 Æthiopes nigrum semen promere; atque idcirco ni-
 gros, à radice nimirum procreari. id verò, quod ille
 vel vulgi opinione, vel aliorum relatu scriptum tradi-
 dit, falsum est omninò; quare suruum Æthiopum co-
 lorem à genitura minimè oriri in manifesto est. ego
 id à calore esse arbitror, qui cutem inficit, nigramque
 reddit. contra frigus album inducit. id verò quotidia-
 na experientia exploratum, compertumque est. etenim
 qui mediam mundi plagam, quam ob nimium calo-
 rem torridam dicimus, & inhabitabilem veteres cre-
 diderunt, latè incolunt, nigri omnes cute, nigris ca-
 pillis, & vibratis: at qui Septentrionales mundi plagas
 perpetuo ferme frigore algentes, æternaque obsitas
 nive, habitant, nivei sunt, promisso capillo, simplici,
 & flavo. qui verò medias plagas temperie præditas co-
 lunt, hi medio inter album, & nigrum colorem gene-
 rantur: & quo magis, vel ad Septentriones, vel ad Au-
 strum convergunt, eò magis vel candicant, vel nigri-
 cant. quocirca à calore nigrum, à frigore candidum
 progigni colorem liquidè consequitur. imo apud nos
 in eodem atque invariato climate, qui montes inha-
 bitant candore, qui litora fuscitudine insigniti. nempe
 frigidus in montanis aër, in litoralibus verò calidus.
 Hic Lucil: Probabilia prædicas: nec multum admo-
 dum dissentio. Verum tamen est, qui me pungit scru-
 pulus. Et ego: Videlicet? Ille verò: Qui circa Æqui-

noctialem in ipso terrarum umbilico, ubi calor vehementissimus, minus nigri, quàm *Æthiopes* esse perhibentur. qui quidem *Æthiopes* longiùs absunt, & circa æstivum Tropicum pastorum ritu pervagantur; quare Nomades appellati. quibus in locis in ipso temperici confinio paulò remissius fervescit calor; quare non adeo satur esse color deberet. Cui tum ego: *Nigerrimos esse Æthiopes*, quam sint *Americi*, *Indi*, & quotquot juxta *Æquidiale* habitant, do facilè: vehementiorem verò apud hos calorem effervesce, nego enim verò. illi maritima, ut plurimum incolunt, quæ ventis perflantur, tellus crebris imbribus irrigatur, montosa item loca quamplurima; quibus conficitur remitti calorem, atque sua frui gentis temperie. imo tum in media *Africâ*, tum in *America*, præsertim *Peruvia* altissimi montes nive semper oblecti, atque ob id circum aër frigidior: quique hæc loca tenent, atro dilutiore sunt. At verò *Libya* interior, atque immensa *Africæ* deserta, quæ hujuscemodi *Æthiopes* loca incolunt, mediterranea cum sint, atque arenis squalentia, nullis perflata auris, nisi Austro calidissimo, nullis irrigata imbribus immenso calore æstuant, ut scintillare aërem credas. id ipsum apud nos experimur; siquidem valles per quas hyeme torrentes refluunt, æstate quia ventis impervix, & percussæ è lapillis quàm necissimis Solis radii ardentissimi, immensum sanè in illis calorem sentimus. fateor me quondam in una hujusmodi vallium nō tantum enectum. Hic *Lucil*: Cedo, inquit, quæso, quo id casu accidit? Et ego: Narrabo quàm libenter. Rhægio *Julio* discesseram, ut ægrotantem amicum virum nobilem inviserem, qui in pago cui à *diva Christina* nomen factum est, non procul ab urbe *Oppido*, quæ mediterranea in *Brutiis* est, incolobat. jamque extremam il-

lam

lam Apennini pattem, quæ ad Leucopetram excurrit, Jonioque alluitur, superaveram, cùm in vallem descendi, descendi autem? imo præcipitatus ipso cum mulo sum miro modo. Hic Lucil: Deus sancte! quo id pacto? Cui ego: Da aures: rem oppidò miram audies. erat angustus trames, quem geminæ hinc, inde sepes complectebantur, illac se mulus intulit, nullo impellente. ego viam, quæ eundum esset arbitratus sum, ea ductus opinione, quod illiusmodi jumenta peritissima locorum sint. neque agaso, qui pedes sequebatur me admonuit. Erat autem trames præceps in vallem, & profundus. quocirca, vix plusculum processit mulus, cum repentè per declive præcipitatus est, quia verò sepes tramitem angustissimè coarctabant, me, mulumque veluti manibus tenentes hinc, atque hinc constipabant: factum est, ut sensim præcipitaremur, neque ego ab ephippio excuteter. uno verbo tum ego in mulo, tum mulus in plano erectus stetit, ne leviter quidem offensus. certè id divina factum ope duxi. Et Luc: Haud secus fieri potuisset. gratias ago Superis, & tuo in primis bono genio, quod te nobis servaverint, & ut diutiùs servant, rogo, quæsoque. Sed quid interea agaso? Tum ego: Quid? nos conclamata quasi corpora dessebat. suum identidem mulum nominatim inclamabat, quo de magis, quam de me dolebat: seque pugnis tundeat arcerbissimè. neque ille quid factum esset eo loci videre poterat. Tum Lucil: Major illi de muli jactura, quam de tua vice dolor erat. Ita sanè, inquam ego. nam hujusce infimæ sortis homines plerisque bestias, quàm nos faciunt. ut verò in vallem per rectam, non verò, per compendiariam illam, venit, & nos vivos, sospitesque vidit, nec quidquam accepisse incommodi, tanto stupore perculsus, tanta perfusus lætitia est, ut vix sui compos

pos esset. Ego verò ex fumo, ut dicitur, in prunas intiderā, tantū enim illius cōstu vallis succēsus sum, ut penē torrerer. credidi certò fore, ut acuta me febris corripere. quocirca adeo calcaribus urgere mulū cēpi, ut parum abfuit quin me præ furore excuteret. tandem transmissa ea celeritate, qua potui longa admodum valle, in pagum veni. hic statim ægrorum visi, meque acerbiorē morbo laborare, cōstu nimirū ardentissimo, illi professus sum. qui statim nivare aquam famulum iussit, quam brevi benē nivatam tanta animi voluptate unico haustu exhaustū, ut nunquam aliās. At Lucil: Certē quidem tibi illam in ea corporis affectiōe saluberrimam fuisse credo, & medicatissimam. Haud dubium, inquam, me ab imminente febre vindicavit. Si in Libyæ desertis infelices illi homines huiusmodi potum in promptu haberent, non ita frequenter perirent, etsi patientissimi sitis sint. atque hic quædam historiola in mentem venit, quam tibi narrarem, ni vereretur ne te nimia dicacitate opprimerē. Imo, tum ille, quæso ut enarres; audiam non modo patienti, sed etiam libenti animo. Atq. audi, tū ego: est operæ prætiū audire adeo insolens est. Per immane quodā interioris Libyæ desertum, ubi vastæ solitudines, nudęque arenę passim occurrunt, mercator quidam unā cum famulo itersaciebat, secum undamque, laremque ferentes, ut ait poëta. nam cum nullæ per solitudines tabernę, fontes nulli, ni tecum ea omnia, quę ad vitam conservandam necessaria sunt circumferas, brevi vel fame, vel siti intereas, necessum est. nam etsi quidam interdum putei reperiantur, tamen quia hi rari admodū, & pestilentem ut plurimum equam continent, & à latronibus sæpe obstructi, ut viatores siti enecti ipsi in prædam cedant vel mortui, ni tecum habeas, quam bibas percas tandem oportet. Hoc loco

loco Lucil: Suntne qui negotiandi causa per istiusmodi deserta peragrant. Cui ego: Tanta est hominum avarities, ut nulla tam horribilia loca sint, in quæ non irrumpant. Ego tum Lucil: neque si Midæ opes, aut Cræsi divitias comparaturus essem, in illas irem solitudines, nec ego, inquam, tam stultus, qui auti spe in tam vasta, atque horrida deserta pedem inferrem. sed redeamus ad infelicem mercatorem. jam post multorum dierum iter, ceperunt aquæ inopia laborare, nec ulli fontes, neque ulla mapalia viscebantur. quocirca tanto merore affecti sunt, ut jamjam contabescerent. ipse deserti horror, ipsa cæli intemperies, continuus ferarum timor, ipsa morte etant acerbiora. tandem eò ventum est, ut nonnisi unus aquæ cyathus in famuli utre superesset. petiit illum dominus ardentissimo æstu effervescens. at famulus, mea, inquit, industria, mea parsimonia, imo tolerantia, servatus ille est, mihiq; debetur. neque minus chara mihi mea vita est, quam tua sit tibi. præterea æquum est, ut ego superstes, tibi ultima officia persolvam. nempe me insepultum jacere decet, ut tu more patrio sepeliaris. Hoc loco Lucil: Næ iste famulus officiosus. at istæ ego officia facere, non fieri mihi voluissem. sed age, quid postea? Quid? tum ego. cum frustrâ precibus hominem flecti mercator intellexit, avaritia evincere adortus est. Impetravit igitur, tum Lucilius. nullum quippe avaritia telum potentius est. Cui ego: Recte conjectas. multis aureorum millibus unum dumtaxat aquæ cyathum domino servus vendidit; ea spe captus, fore nimirum, ut brevi puteo potiretur. verum, sive id errore viæ, sive locorum ariditate factum, haud scio, nullos puteos, nullam aquam invenerunt, quocirca ambo ardentissima correpti siti interierunt. Hic Lucil: Stultior hic certè famulus, quàm

quàm Lyſſimachus, ille regnum cum uno aquæ haſtu, hic vitam commutavit. Sed age quo id pacto reſciri poterit, ſi ambo perierunt? Jam iſtuc ibam, inquam ego: quod reticere ſine nota vix poterat. perhibetur antequam ſamulus ſato concederet, totam in arenæ tragœdiam ſcripſiſſe. & ſic à viatoribus cognita res eſt. qui illa ipſa pecunia monumentum ſtruxerunt, cum epigraphe, qua tota hiſtoria breviter narrabatur. Benè factum, inquit Lucil: ut reliqui admonerentur. ego ut dicebam, per illas ſolitudines, & ſi ad Solis hortos, & beatitatis perventurus tandem eſſem, haud proficiſcerer. At ego: Imò eſt & aliud malum, nec raram illud, nec minus pernicioſum (mitto beſtias partim venenatas, partim feroces: quæ quidem frequentiffimæ) interdum vehementiſſimi venti perflant, qui inſelices Æthiopes uno eodemque momento temporis, & necant, & obruunt. Quo id modo? ait Lucil: Cui ego: Adeò calidi, æſtuoſique ſunt, ut ſtatim homines præſocent, interdicta illicò, ſublataque penitus reſpirandi facultate. quia verò immenſos arenæ turbines commovent, atque impellunt, illos de repente obruunt. Tum Lucil: Intelligo: habes id tu Naut. VII

*Arabia deſerta velut, Libya & loca circum,
Cum gemini adverſo ſpirant flamine venti:
Hinc Notus abreptam magna vi voluit arenam
Inde levem Boreas nubem ciet horridus: ingens
In medio cumulus ſuſſollitur: atque ubi quondam
Campus erat, magnus congeſti pulveris exiit
Confeſſim mons, & miſeros premis alius enntes.*

Sed redeamus ad inſtitutum. Si à calore Æthiopes nigritiem induunt, cur nigra naſcuntur cute? Et ego: Fateor, colorem illum primos illarum regionum incolæ à calore contraxiſſe; contractum verò, primigeniam quæſi labem, in nepotes propagaviſſe. idque ex eo

ma-

nalescētē conficio. nimirum si Europæi in Africam commigrent, incipient sensim nigrescere: & quò magis à primis nepotes distant, cò nigriores nascuntur. contra si in Europam Æthiopes veniant, eorum filii paulatim nigritiem illam exuunt. clarum igitur præ nimio Solis ardore Æthiopes nigrescere. Atque hinc etiam est, ut barba, & capillo crispo generentur: quare meritò Plinius: Æthiops, inquit, vicini sideris vapore torrerī, adustisque similes gigni, barba, & capillo vibrato, non est dubium. Hic Lucil: Ità est, ut dicis, non oppedo. Verùm cedo cur ungues nigræ in illiusmodi populis, dentes verò magis candidi, quàm in cæteris, qui albi nascuntur? Quia, inquam ego, ut ait Aristoteles, à cute procreantur, ut illius sint veluti appendices, adeoque mirum videri non debet, si nigræ etiam sint ungues. Sed de dentibus major difficultas. qui à cute minimè proveniunt. quare non est cur ex hoc capite nigricent. idem Aristoteles capite x Problematum id ait evenire, quia illis calor humorem omnem detrahit, & nihil est admodum, quo illos superinficiat. sic ceram, humore exhalato, videmus albescere. cutem cùm calor inficiat, nil equidem mirum est, si furva sit. Tum Lucil: Verisimile quidem. sed pergamus porro. cur iidem Æthiopes blævi pedibus, & ut Latini dicunt, Valgi nascuntur? quotquot enim vidi ex Æthiopia devecta ad nos mancipia, hoc vitio laborare deprehendi. Cui ego: Imo ferunt etiam Ægyptios valgos esse, cruribus nimirum in diversum actis. id autem ex eo fieri crediderim, quia quemadmodum calore ligna distorquentur; ita & Æthiopum crura præ nimio calore depravantur. qua etiam ex causa, ut modo dicebam, crispī etiam pili: nempe blævi & ipsi, contracto à calore vitio. Atque in id sermocinatiōis rediens offendit Nardus. quem simul
atque

atque vidi; Ubinam tu interea? Et ille: Ubi? super
 ficum illam aſinaſtram atram, quæ in extremo hor-
 ti angulo eſt, quò agricola non facilè divertit: meque
 ficis ad ſatietatem uſque ſaginavi. Cui ego: Bellè tu
 quidem: nimirum ut pingueſcas alienis jaſturis. non
 tu iſtuc religioni ducis? Ille verò: Non me mordet
 hic ſcrupulus: tanta fame torquebar, ut in ipſum agri-
 colam imperum ſeciſſem. Næ tu lupus famelicus, in-
 quam ego. Ille vero: Neſcis equidem, mi poëtaſ,
 quantam remus famem excitet. Age, cedo ſi quid de
 prandio mihi repoſuiſti. nam hic dies lautus tibi fuit.
 Repoſueram, tum ipſe, ſcutellam paſtillis caſeatis be-
 nè plenam: illam quando tu ſatur ficis eſ, puero con-
 cedam. Ille vero: Ne dubites ne mihi ilia rumpan-
 tur: ficus jam decoxi: eamus tandem: jam enim con-
 tenebraſcit. Hic Lucil: Benè monet Nardus, eamus.
 Dum autem redimus, advertit Lucil: ſub magna ca-
 ſtanea calyces quosdam echinatos, qui è ſinu matu-
 ras jam caſtaneas promebant: quare jubet Nardum
 caſtaneas illas carpere. ad me verò amor eſt, Parthe-
 nie, hoc veſpere caſtaneas aliquot comedere. guſtabis
 tu etiam nonnullas: ſcio quippè illas tam tibi gratas
 eſſe, quam quæ gratiſſimæ. Fateor, tum ego, me Sar-
 diana glaude delectari. Tum Lucil: Cedo, cur Sar-
 dianas glandes vocaſti? Quia, inquam ego, Sardibus
 primùm provenire: atque ob id Sardonios balanos
 Græci appellant. Tum Lucil: Toſtas ne faciemus, an
 elixas? Tum Nardus: Furnacea eſt ſapidiſſima. At
 ego: Mihi placet ſubcinericia, quæ enim cineribus
 obrutz torrentur, innocentiores reliquis ſunt. præci-
 pue ſi pipere, & ſale, vel ſaccharo condiantur. Hic
 Lucil: Quid iſtuc ſcitamenti eſt? nunquam ita noſtri
 condivere. Cui tum ego. Idcirco tot inteſtinorum
 flatibus, crepitibusque obnoxii, ut vix ferri queant.

At

At Lucil: Vera narraſ: ſed age, conferunt ſtomacho, necne? multi enim ab illis tanquam noxiis ſe continent. Ego vero: Conferunt plurimum. nam, ut ait Plinius, ſiſtunt ventris, & ſtomachi fluxiones, aluum cient, ſanguinem excreantibus proſunt, carnes alunt. Dum Nepetiæ admodum adoleſcens humaniores litteras docebam, novi hominem octogenarium grandi ſtatura, vegetum, & ſucci plenum. qui, ut narra- bat, optima ſemper uſus fuerat valetudine. quem cum rogarem, quo cibo uſus eſſet, ad valetudinem conſervandam: reſpondit ſe ſingulis diebus loco cenæ veſpertinæ, caſtaneis ſubcinericiis paſtum, & frigidam bibiſſe. atque huiusmodi cibo pinguem factum, & optima ſemper fuiſſe valetudine. Tum Lucil: Iſte homo, inquit, ſuario more craſſeſcebat. ut qui eodem cibo uteretur. tibi verò id non contigit: non enim multum opimus evaſiſti. Cui ego: Hem! nugæ agis, an vis dicere me caſtaneis ſæpe veſci? verum rarò admodum apponuntur. Sed omittamus jocos: Heus tu, Fabiole, accipe paſtillos, & huic dato. ille verò (ſedebat enim ad januam peristylii, in quod jam ingrediebamur) Paſtillos? jam illos canis concoxit. etenim vix repoſui, cum hic in hypocaustum inſiliens, illicò devoravit. Tum ego ſubiratus: Trifurcifer, tu illos certò devoraſti. ſed faciam, ut verſuram ſolvas. incænatus cubitum ibis. Hic Nardus: Si paſtillos comedit, haud ibit incænatus. vis ut illum pugnis probè exoſſem. Minimè, inquam: corripiam ego illum ſine ſuſte. Nardus verò: Verbone? at hic tanti verba facit, quanti digituli crepitum. Heri mihi dixit, hic poëta multa minatur, extricat nihil. Ego tum, Faciam proſectò, ut ſentiat, ſi extricare valeam. atque hæc dicens peristylium ingredimur.

C A P U T III.

Amicis convenientibus, convivium adornatur, cujus occasione de quibusdam cibis praparandis tractatur: mox inter convivandum de variis vini generibus disputatum: plurimaeque scitu digna quaesita.

Primo manè cum in hypethram deambulatum, aurasque matutinas captatum exivissem, quod tuendæ valetudini plurimum confert, me Lucilius aggreditur, &, Salve, inquit, amicum Musis caput. Cui ego: Salve mi ocelle, dormisti placidè hac nocte? Et ille: Placidissimè: & somnium item habui amœnissimum. Cedo, inquam ego, cujusmodi illud fuerit. Somniatus sum, inquit Lucil: venisse Balbum, & M. Junium, atque à te comiter exceptos, cōvictuq. perquam hilari. Cui ego: Ut bellè commentus es. argutulus tu quidem, & totus poëticus. nimirum, ut sic ego de prandio videam. errasti: non ego simplex, quem tu facilè capias. Ille verò: Non certè commentus sum, sed revera somniatus. non me planè nosti? nonne meum animum in sinu geris? Credo equidem, tum ego; nam quia istuc tu magnopere optabas, facile somniatus. non tenes poëtam?

Credimus, an qui amant ipsi sibi somnia fingunt.
Et ut bellè Theocritus.

Εχω δέ τοι ὅσσ' ἐν ὀνείρῳ
φαίνονται, πολλάς μὲν οἷς, πολλάς δὲ χιμάρας.

Ita enim verò, ut tu eruditè, non oppedo ait Lucil: verū age, amici, & quidè charissimi sunt, quocirca omnibus prosequi officiis te decet. adornemus igitur prandium, quod

quod sit tua liberalitate, tuo magisterio dignum. Cui ego: Nunnam intellexisti unquam in me officium erga amicos desideratum? Et ille: Minimè verò. scio quippe te nihil antiquius habuisse, quàm amicis inservire. & quod magis mirum est, in illos præcipuè tua constant officia, qui impares tibi vices reddiderunt: imo abusi sæpenuerò ipsis beneficiis sunt. nempe tibi sic est animus, ut benè facias etiam immerentibus. Ego tum: Fateor complusculos non respondisse meo erga ipsos amorì. sed quid facies? sic est hominum natura, ut beneficiorum facillè obliviscantur. multorum item genius versatilis, inque eam partem facillè vertuntur, ubi majus commodum sperant. uno verbo, ut ventus est, ità velum vertunt. Tum Lucil: Vera prædicas. istiusmodi ego homines ventorum indici, quem petalum vocant, comparare soleo, qui pyramidibus, turribusque præfixus, in eam partem convertitur, in quam ventus spirat. Cui ego: Facis aptè: & sic sanè sunt. venales homines, inconstantes, adulatores, quorum amicitia mercatura quædam est suarum utilitatum. quibus illud bellè cadit, Chius, non Cius. Hos ego concoquere nunquam potui; quamquam officiis nunquam defuerim, ni me fallo. sed redeamus ad institutum: haud enim hisce in questibus libenter immoror. Heri vesperi lusi potius, quàm iratus fui: etsi factum minimè laudem. non probè novit Balbus ingenium meum? Hic Lucil: Nolebat ille tibi negotium præstare occupatissimo. quamvis sciret unum tibi negotium, curam unam esse, præ tuo amicorum habere commodum, præcipue eorum, quos tu ab unguiculis educaisti; ut ita dicam. At ego: Ut sit, nolo ut eat dies: videamus de prandio. Primum apponemus ficus. Hic Lucil: Jussisti asservari? Et ego Silvius quasi divinaret, fore ut id illi manderem,

rem plurimas, & mitissimas reposuit. cum ficis apponemus petasone Samniticum exquisitissimum, quo nos Purpuratus ille antistes donavit. vir in quo quid prius laudes nescias, adeo in illo omnia magna. Hoc loco Lucil: Novi Principem beneficentissimum, cuique amantissimum. Et ego: Adjungam petasoni anisum saccharo confectum, ut appetentiam præstet. Deinde leucophagum delicatissimum. Tum Lucil: Jam jocularis. nam tu neque leucophagum scis adornare, neque necessaria in promptu habes. At ego subiratus: Tot habes documenta nostræ artis, nostræ providentiæ, & adhuc ambigis. Accipe postquam tu cubitum concessisti, ego caponem occidi, depilarique jussi, & nunc elixatur, oryæ farinam attulit in vidulo Nardus. quo vero conficiatur modo tenero. primo capipectusculum decoctum, in tenuissima filamenta solvitur, inque frigida reponitur. mox sumam unam, aut alteram lactis heminam: admisceam oryæ farinam; singulis lactis heminis binas uncias. Hæc in testudine ad prunas lentè coquuntur. est autem opus, ut continuò lac versetur. ubi jam incipit ebullire caponem immisceam, & duas sacchari uncias singulis heminis: spargam item aquam odoratam ex aurantii floribus extillatam. ubi tandem materies concreta in lancem ingeritur, ut verò sciam quandonam materies sit scitè cocta, & coagulata, ita periculum faciam: accipiam cochleari illius tantillum, inque lancis margine ponam: deinde inclinata lance, video divellatur, necne? si divellitur, jam cocta: sin minus, versanda iterum ad prunas est. Hoc loco Lucil: Proh Deum immortalem! quanta scit hic homo. alter mihi videtur Elæus Hippias, qui, ut ait Cicero, cujus verba recito, cum Olympiam venisset, maxima illa quinquennali celebritate ludorum, gloriatus est, cuncta pene audiente

Græ-

Græcia, nihil esse ulla in arte rerum omnium, quod ipse nesciret, nec solum has artes, quibus liberales doctrinæ, atque ingenue continerentur, Geometriam, Musicam, Literarum cognitionem, & poëtarum, atque illa, quæ de naturis rerum, quæ de hominum moribus, quæ de Republica dicerentur: sed annulum, quem haberet, pallium, quo amictus, soccos, quibus indutus esset, se sua manu confecisse. Hic ego subridens: Imo amplius (juvat aliquid more senum gloriari) scio, & mihi panem pinsere, condire cibos, & dissutos pannos assuere. Sed relinquamus Fabiolo nuces. Apponemus item ficedulas scitè præparatas. Videlicet et tum Lucilius. Et ego: Arque audi: fici foliis involvam, faciamque globum, quem junco revinciam: mox cineribus obruam. sic tostæ sunt perquam delicatissimæ. maximè si pipere, & sale condiantur, complusculi aurantii succum infundunt. verum istiusmodi succus non est mei stomachi & mihi etiam dentes obstupefacit. At Lucil: cui Chrysomalum in deliciis erat. Istic, inquit, succus nimiam illam avium illarum pinguedinem temperat: itaque fit innocentior. Ego vero: Hoc ipsum præstat piper. sed pergamus reliqua. postea apponemus brassicas apianas cum bove elixo: ut verò lepidè sapiant, glandium adjungam, & insicium. Hic Lucil: Vide, quæso, ne sint subrancia: nam sic pulcem perdes. Cui ego: Hui! sumne ego fungus? quoties ego te admonui hac in re supinos admodum coquos esse, qui salitam porcina tantò rancore affectam cum polenta admiscent, ut nullo modo gustari possit. nonne melior, salubriorque pura, putaque puls foret, quàm carne prærancia admista? Et ille: Quis id non videat? Et tamen illi cecutiunt. Sed jam prandium satis dapule, addito præcipuè Gallo Numidico, quem se

allacuros scripserunt . Tum ego : Mane , nondum ,
addam pastillos esculentos , quos condiam scitissimè .
Tum Lucil : Tu vis illos excipere quàm lautissimè . sed
quo pastillos pasto condies ? Et ego : Hoc , in scobrem
atteram radula cæcaria bubalum cæcum Aterta-
num , item Parmensem , & Batavicum , permiscen-
tam mox florem butyri recentis , hisce pastillos imbuam ,
mittamque in hypocaustum . mihi crede , nihil deli-
catius edi potest . Tum Lucil : Credo facilè . verùm
est ne ampliùs . Etiam , tum ego . nempe quod Surren-
ti est optimum . Et ille , intelligo , vitulam dicis . at
illam non comparasti : Cui , inquam , Lucili , tu me-
nò probè nosti / nisi antequam albica sceret Sylvium ,
ut illam , una cum ficedulis præstinares . Tandem pro
secundis mensis faciam crustula multifolia , leuco-
phago , & dulcibus tunsis infarta , tuberosa . Ille ve-
rò : Istiusmodi crustula nunquam te alias fecisse me-
mini . Ita enim verò , tum ego . at erunt non illepida .
Ille tum . Accedo , ni id tibi grave sit , quo fiant mo-
do . Cui ego : Dicam compendio : nam ni fallor ,
phaselus ille , qui recta ad nos velificat , amicos de-
vehit . Tum Lucil : Verissimile quippe . verum vix post
horam appellet . distat enim v milliariis circiter ,
quantum ego oculis rationem capio . Ego vero : Vix
sunt quatuor , & fertur secundis auris ; quare intra
tres quadrantes perveniet . sed veniamus ad crustula .
Hæc vespere posteaquam tu ad somnum profectus
es , ego (vide hominis diligentiam) in culinam con-
cessi cum puero . hic in abaco mundo , & levigato bi-
nos farinæ siliaginæ pugnones posui , inque craterem
conformavi . addidi mox pauxillum salis tunsæ , pu-
rissimi . Hoc loco me sic Lucil : interpellat : Cur nam
salem adjunxisti ? Quia sic , tum ego , inrita farina-
cea in tenuissimas nebulas extenditur . quam facillimè .

mè . mox aquam in fontem infundo , atque loricant
 subigo . interea jubeo puerum butyrum liquare in
 testudine . ego mox intritam instrumento orbiculato
 extendo quoad possam . manibus deinde ipsis expli-
 co , expandoque per totum penè abacum , quoad te-
 nuissimæ instat bracteolæ evasit . his factis , inter ,
 quatuorve fascias dissecō , inungo butyro primam fa-
 sciam , atquè convolvo . Hic Lucil : Cur butyrum po-
 tius , & non suillum adipem adhibuisti ? Cui ego :
 Quia nimirum suillus adeps noxius stomacho , quippe
 qui non facilè concoquitur : butyrum non ita . Si sic ,
 tum ille , quæ de causâ nostri sumine utuntur ? Tum
 ego : Næ tu pinguis Minervæ , qui id non tenes ? Tum
 ille : Jam intelligo , butyrum carò emitur , sument vi-
 li vñit . Cui ego : Tetigisti rem acu . Est etiã il-
 lud , fateor , imus plerumque , quâ consuetudo ducit .
 Sed pergamus porro , phaselus jam properat . una fa-
 scia plicata , aliam super convolvo , butyro prius inun-
 ctam , tertiam deinde , & super hanc denique quar-
 tam : facioq. veluti cylindrum multifoliū .
 Λυφῶν . οὐ Græci dicerent . mox butyro benè im-
 butum , frigido in loco , ut mollesceret , repono . Tum
 Lucil : Cedò , inquit , (vide quantiste interrogantium-
 culis vexo) cur butyrum infunditur ? Et ego , ne unam in
 massam folia coitent : & ut mox , cum furno coquuntur ,
 separatæ resiliant singulæ crustæ . sic enim friabile sic
 edulium , & delicatissimum . Interea loci dum hæc di-
 cerem Sylvius venit . quem simul ac vidi , emisti , in-
 quam , vitulam ? Et ille : Maximè . at lumbos habere
 non potui , accepi pectusculum , quod scio à te proba-
 xi . Bene est , cum ego : minoris venit , minus habet
 ossium , & meo judicio perquam delicatum . comparasti
 scedulas ? Et ille : Ne plumam quidem inveni . om-

nes Neapolim prima luce deportatz. Hic Lucil: Id certe ægre fero, volebam hanc amicis præstare gratiam. Cui ego. Per nos non stetit. Vix hæc cum puer adest, nunciatque venisse quendam cursorem cum tabella, & surpiculo. Cui ego: I, cito, & illum ad me adducito. mox Lucilium intuens, Hic certe à Vespulo missus cum munusculo. si ficedulæ, nihil opportunius. Ut cursor introductus, rogo qui se misisset Et ille Vespulus: iussitque adferri quæ illum hunc, ubi ficedulæ undeviginti, coturnices verò duodecim. Tum ego: Divinavi, Lucili; & ille: Nihil sanè gratius mitti poterat. sed paucæ admodum. At ego: Imo quot necessariæ erant, nonne sex ficedulæ, & quatuor coturnices singulis vobis satis sunt? nam ego, ut scis ab illis me libenter contineo. mox cursore cum tabella, & præmio dimisso, in scopulum descendimus, ut amicos jam propinquantibus exciperemus. Vix dum descendimus, cum phaselus ad scopulum applicuit. Ut exiliere, Itane, inquam, me ex improvviso adorti estis? in vos damnum recidet. Illi verò: Præ te cupimus nihil admodum. Neque huc venimus convivii gratia, sed ut te inviseremus, & Musas tuas, quæ tam gratæ nobis sunt, quam quæ gratissimæ. quid jucundius expectas præter illas? Quibus ego: Bona verba. Musæ non pascunt. Tum illi: Corpus non pascunt, quippe: sed animum, & quidem abundè. Nec fas est eruditos quidquam appetere, quo nō satur fiat animus. Quibus ego: Laudo studium vestrum. verum si ita, feretis profectò, quod poscitis: namque hic præter Musas, nihil est. Sed agite, valetis ne rectè? Et illi: Planè benè, & ut dicitur pugilicè. vales tu cum Lucilio isto tuo? Valemus, tum ego, & nos bellissimè. At Balbus Lucilium intuens, Parcus admodum verborum es hoc mane. vidisti lupum? Tum ille: Me de-

et tacere cū Parthenius loquitur: nempe silent
 ræ, cum tonat Olympus. Cui tum ego: Argutulus
 tu quidem, & blandis re moribus induisti. verū
 omittamus istæ, & quoniam multum die est, eamus
 domum. Tum Balbus: Est hic, Parthenie, Gallus
 Afer, & capsula itē cum quibusdam bellariis, quæ ami-
 cus dono dedit: jube domum deferri. Cui ego: Con-
 sultò nimirum factum, & benè, ne jejuni sederetis.
 Heu tu puer, accipe hæc, & nos sequere, reliqui nau-
 tæ in speluncam phaselum subducant. non enim hic
 tutum est stare in anchoris. siquidem à meridie ve-
 hementior sufflat Zephyrus, & plurimi hic circum
 scopuli. mox ire pergimus: cumque verò modico per-
 clivum gradu scanderemus Balbum rogo, numquid
 novi Neapoli circumferretur? Et ille: Ex Africa, ut
 vetus adagium est, novum monstrum allatum. Ce-
 do, inquam ego. nam si lepidum in Autumnos meos
 infarciam. Et ille. Imo lepidissimum, & insolens:
 Camelus est. Cui statim ego: Atqui Camelus haud
 insolens monstrum est, an tibi fortè monstruosus, quia
 gibbus? Tum Balbus: Ne, quæso, tam rudem me pu-
 rato, audi modo: Gibbus est, verū tanta mole exu-
 berat illiusmodi tumor, ut altior sit, quam Camelus
 ipse. turritum diceret elephantum. est præterea bi-
 ceps. Tum ego: Id sanè monstruosum est, atque in-
 solens. Ille verò: Ex ima cervice gemina educuntur
 colla satis producta, quibus duo præfixa capita sunt.
 bicipitem hydram merito appellarem: sed de hoc
 plura per otium. habesne tu hic aliquid novi? Tū ipse:
 Nihil admodum. hic enim loci monstra non gen-
 rantur, nec afferuntur aliunde: neque turbæ ullæ sunt,
 nec rumores seruntur. indigenæ pacis amantissimi:
 quasque locus delicias affatim suppeditat, fruuntur
 ipsi bona pace. quocirca meo genio haud scio an al-

Iam deinde veru infigo: veruque apto ad rotatum instrumentum, quod versando veru mea tandem industria comparaveram. stratisque subter prunia per se lentè movendum relinquo. Hæc inter adest puer ex hortu cum foliis sculneia, illis ego siccudulas depilatas, pedibusque, & rostro dimittuntæ cum lauri foliis, & sale involvo, cineribusque ferventibus obruo. Incendi subinde farnum, purgarique brassicas jubeo. ipse peralsonem ligneo super orbe, & lucanica in segmina tenuissima dissecor, inque geminis catillis expando. sparsim anisum saccharo imbutum super spargo, inque arcula repono, ac illa vespæ, ac mulæ devorarent.

Interea amici ex hortulo, quem lustrando cursaverant, superveniunt, simul atque lineæ me præinctum mantili vident: Operosus tu certè negotiis occupatus: & ne nostra nos fallit sententia, basilicum tu prandium adornas. haud enim vulgari Musæ tuæ patiuntur, quippe heroum induere cothurnum solite, non vero plebejum. Quibus ego: Erratis toto eglo, perquam sobrium erit, & Musæ ipsæ, quas digitis dignum. humiles enim illæ muscum, myrtumque decerpere consueverunt. Illi tum: Atqui heroem nunc laurum affectant, cum bella sonent? Et ego: Utuc sit, platonicum paro. Sed si ita, tum illi, cur tantum occuparis? Nam non tu ex illis es, qui nihil agnos. Quibus ego: Ve illud quod meditor sit saltem elegans, si non opiparum, utque gallum vestrum recalciciam, elibanum succendi jussi. Et illi: Vix credimus, utpote qui tuum ingenium planè novimus. Sed via manus porrigamus? Quibus, tum ego. Ne, queso, is ego sum, qui sine canibus, & retibus prædam assequor. Sedeto ad magnam fenestram, prospectuque illo per amœno fruimini. Tu verò, Lucili, mentem instrue.

Et ille: Curatum, factumque dabo. Cui ego, Ornato stulosculis. vide ne quid desideretur. Quiesce, tum ille. meum id erit. Statimque acceptum torale mantile super mensam explicuit: Exin orbes binos hinc, inde disposuit, quibus culcellos fuscinulas, & cochlearia apposuit. in ipsis verò orbibus panes collocavit: similagineos, pumicosos; supra verò plicata mantilia. media in mensa hypocraterem, cum suis scyphis, salinum, & acetabulum. in extrema verò mensa foculum mensarium, trulleum, & guttum. tandem totam mensam Gelsimino, & Leucojo candido, & luteo, quos ex horto inter deambulandum decerpserat flores, largè consperxit, atque exornavit. Cui mox ego, apponi scutulas cum perna, farcimineque jubeo: corbiculam item cum fructibus, catinumque cum caseo Campano laudatissimo, quem mihi Cn: Bellus Capua rediens attulerat. Vix dum hæc, cum puer nivem detulit. quocirca geminas præcipio phialas nivari, unam hiberni Nolani, alteram Stabienfis rufi: aquam item, versarique vascula identidem. Ego vero in culinam redeo: quoniamque purgatum jam à puero furnum crustula submitto, ut torrerentur, & gallum ut recalesceret: coturnices assari jubeo verrunculis, admoris è furno prunis. Postea verò quam brevi cocta sunt crustula polyphylla, iofarta educo. inque trulla satis ampla impono, sparso desuper melle calamino purgatissimo. Vitulam jam probè assatam ingero in megidem, ficedulas, & coturnices minorem aliam in megidem, inque ipso præfurnio colloco ne tepescerent. Sub hæc me Lucil: convenit, rogatque si omnia in promptu essent? Cui ego: Cuncta adornata præter pulstem oleraceam. Et ille: Sed istec non debet excoqui, si duriuscula, & viridans adhuc, gratior. Tum ego: Anne Aquilam volare doceas?

non teneſ quam benè iſtæ ego percaleam? Age, educ
ficus è puteo, inque megide illa ex nobiliori argilla
accomoda, exornaque floſculis, ut Balbum tuum
meumque Junium honeſtius excipiamus. Ego inte-
rea puerum voco, doceoque quo edulia eſſent appo-
nenda ordine. Sylvio verò mando, ut hoſpites in-
vitaret ad lavandas manus. ille ſtatim guttum, &
trulleum, ego mantile accepi. lotis poſt manibus, ad-
morisque ſedeculis hoſpites in primis, tertia Lucilius,
ego quarta conſedi, ut moris eſt. Mox factum à fi-
cis initium. quas dum comedimus, ità me Balbus ro-
gat: Curnam, Parthenie, uſus obtinuit, ut ficus una
cum petafone, & lucanicis edantur? At Lucil: Balbe,
inquit, tu mihi videris haud leſtitaiſſe, quod Parthe-
nius in æſtatibus ſcripſit de harmonia ſaporum. Cui
Balbus: Æſtates legi: verùm hæc harmonia mihi ex-
ciditè memoria. quare, quaſo, ut iterum inducas.
Faciam libens animo, tum ille. Ficus pingues ſunt,
perna verò, & inſicium ſalfa: ſaluſ autem ſapor cum
pingui benè copulatur, inque harmoniam ambo con-
ſpirant. Nonne ita, Parthenie? Cui ego: Ita enim
verò. Imo ego, cum non eſt ad manus petafone, vel in-
ſicium utor caſeo, præcipue ovillo, qui ſaliuſculus
eſt. qui quidem caſeus, cum ego adoleſcens, appone-
batur apud nos frequenter, nunc verò rarò admodum.
Hic Lucil: Complures ab illo ſe continent, quod no-
xium putent. At interea, tum ego, plurima, quæ no-
centiora, quia palato ſapiunt, devorant cum ipſo vel
ſcrupulo. Heus, puer, infunde frigidam. At M. Ju-
nius: Curnon merum? Cui tum ego: Quia ficus ca-
lidæ ſuapte natura cum ſint, frigida temperantur, &
ſic coquuntur facilè. quod ego ex me expertus ſum.
Si ita, tum ille, frigida ficus citius decoquuntur, quam
calida. Et ego: Rectè conjectas. Imo poma omnia

enjusquemodi sunt generis, frigida minus noxia: etenim cum illorum humores faciliè depraventur, ut sæpe antequam stomachus concoquat, corrumpantur: frigore illo diutius servantur, ne putrescant. quod quidem vel hic videre licet: siquidem poma omnia frigidis in locis reposita diu ab interitu se vindicant: in calidis quam citissime vitium faciunt, ac putrescunt, Tum ille: Verisimilia sanè prædicat. At Balbus: Age quæso sis, ostensa quoniam occasio est, teneamus: Cur plurimi, tot tantasque ficus devorant: & brevi, ac si ab hesterno jejuni, quasi lupi in cibos istrunt? Tum ego: Quam affers, Jui, de controversia sententiam? Et ille: Lucilio tuo, trado hanc lampadam. Tum ipse, Quid tu igitur? Lucili. ago dic ab experita. Ille vero: Nimirum ficibus indulgeo supra modum. Cui tum. Junium accusa, inquam ego, cujus perspicax ingenium, quæ cum dicerem, puer apianam brassicam cum elixo bove intulit. Cui Junius: Bene est, Fabiole, sed ubi oxyporum? Hic ego: Fateor id me latuisse. verum laborasne tu stomachi fastidio, ut egeas intinctu, quo expectantiam pervellas? Haud equidem, inquit ille. At Fabiolus: Manere hic, asseram ego herbaceum embamma: inque culinam convolvam. Ego vero: Certò hic puer nugatur. At ille statim rediens herbosum moretum in mensam intulit. Quod ut vidi, Vade nam inquam, habuisti. Et ille: Confeci ego ipse, dum vos eratis in horto, æquum enim est ut cum tot annos tua in schola fuerim, incipiam tandem manum ferule subducere. Ut video, inquit Lucil: hic puer lepide se hoc manè exornavit. Dignus te præceptore discipulus, quippe arte certat, & sententiolis. Ego verò, quando id didicisti, cum ego illud rarissime admodum conficiam. Ille verò: Sexta ab hac die, cum tu illud adornabas, ego animum ad-

ver-

verti intentissimum, meosque in tuis manibus oculos habui: nempe diligentia opus est, ut calleas artem: & ut tritum illud. Qui è auge nucleum vult, frangat nucem. Hic omnes: Euge, euge, puer, tu es oppidò facetus. Et ego, inquit Lucil: te ob argutum dictum donare volo hisce ficis, accipe. Et ille: Nempe quas durasculas despexisti, de illis mihi facis gratiam. At ego: Nimirum seponamus tibi mitissimas: ni majus modestum specimen præteferas, lente alam, & fabam. At Balbus: Intercedam ego pro Fabiolo: desunt hic ficus: illum meliore donemus munere: sed age, cedo, quo intinctum modo composuisti? Et ille: Geram morem, quando sic jubes. In mortario mundissimo geminas alii spicas bene tussidi, mox petroselinum permiscui, & crucã quibus simul tussis, pulpam panis aquo imbutam adjuxi, diluique cuncta, promiscue inq. scutellam ingessi. non scire confectum? Scitissime, tum Junius. At ego: Age, si quid aliud est, adducito: nam nimis cito pultem apposuisti. & ille: Feci nostro more, culinamque concessit. At Balbus: Redeamus, inquit, ad quæsitum de ficis. quid censes, Parthenioe Promam, inquam ego, quando sic jubes, sententiam meam. Imo rogo, atque obsecro, inquit ille. equum enim, ut à te non minus cibus hisce exquisitissimis, quàm eruditis etiam sermonibus pascamur. Atque audite, inquam ego. In istiusmodi hominibus ajo vim quandam inesse salinæ, quæ ficus statim solvat, solutas stomachus coquat: seque illis statim expediat, ut liber ad alia qbitiona excipienda evadat. Hic Balbus: Probabile quidem certò. nam secus fieri haud posset, ut tam citò vacuus ab illis, atque expeditus stomachus esset. Tum ego: Comprobare id etiam hoc argumeto licet: quo & aliud scies mixtum oppidò. undenam est, quod radices tum herbarum, tum arborum, & ole-

& olerum, præcipuè tenerimæ admodum cum sint, adco fortirè, & suavitè in silices viam sibi durissimos tam facilè sternant, inque imas fibras perrumpant? Tum Balbus: Age causam sis, reddas, quæso. id enim ex longo scire aveo. Imo cum sæpe sæpius quosdam, qui se magnificè circumspiciunt, plenisque buccis philosophos jactitant, sententiam hæc de re rogaverim, nihil omnino ad rem reddiderunt; quod meo judicio, planè quadraret. Cui tum ego: Ità sæpenu-mero usuvenit, ut qui frivola quædam sectentur, utiliora ignorent omnino. Ajo igitur in radicibus tenuissimis herbarum quendam humorem esse erodendi vi præditum: illoque lapides sensim, lentèquædendo, viam secare, ut ait Virgilius, ut sese penitus agant, infigantque altius. istuc verò, ni me fallo, confirmari liquido ex illis aquis potest, quas acres novi, quorum inventum est, vocant. quæ illiusmodi vi præditæ, æs erodunt, & aurum ab argento separant. etenim si id artis magisterio fieri compertum est, cur non à Natura primum præstitum esse concedamus? Hic Balbus: Concedimus, ut etiam pro M. Junio, & Lucilio spondeam. Et illi: Damas ultrò, res enim ad liquidum demonstrata. Sub hæc Fabiolus dextra lancem cum avibus, læva cum leucophago lancem alteram apposuit. quæ simul ac vident hospites, Tu inquirunt nostrum gratia festum diem agis? Hactenus, inquam, nihil quod festum subolet. quid enim parcius? At Balbus. Quis hoc delicatissimo te leucophago donavit; nam subita confici opera non potuit? Hic ego subridens; Ad me illud amicus, quo nullus mihi amicior, transmisit. Age, cedo, tum ille, quisnam? num Vespulus? Et ego Ficedulas, mihi, & coturnices Vespulus. Quo loco cum se à risu minimè contineret Lucilius, ille rem suspicatus. Intelligo, inquit,

quit, quis ille fuerit artifex. Heus, puer, infunde merum. Et puer: Album ne amas, an rufum? Album, inquit, Balbus. Tum ille læva hypocraterem cum cyatho, tenens dextra vinum infudit. Tum Balbus sumpto cyatho, M. Juni, inquit, hoc ego te poculo invito, & Partheniis Musis libo. Ille nihil cunctatus: Infunde, inquit rufum Stabienſe; quadrat illud meo ſtomacho: cumque puer verſaſſet, ille, adde, inquit pluſculum, vereris ne labris eſſuat? mox, Lucili, te ad potum invito hoc cyatho, quem tam ſcienti artifice totis animis propino. rorumque continenti ſpiritu exhaulit. Tum Lucil: Næ ego inurbanus, qui ab eo propinationem recuſem, à quo honore affectus ſum: accede huc Fabiole cum albo: infunde. adde etiam pluſculum: ne ſis avarus. Et ille: Vide ne diſſuat. Tum Lucil: Hanc mihi curam, inquit, relinquito. meque mox intuens, plenum hunc ego calycem Purpurato tuo libens propino. hic omnes honoris gratia caput operuerunt, plaudentes Lucilio, quod tanto principi debitum illud obſequium præſtitiffet. Tum ego ſcyphum ruſo impleri jubeo, & ad amicos, hunc ego omnibus vobis propino, nam ſingulis ſingulos Græcis relinquo, vel iis, qui bibunt Græco more. Vix exhaulſi, cum Balbus; Cur, inquit, Parthenie, Neapoli abſtemius, Surrenti non ita? Et ego: Quoniam hic vinum habeo delicatum, & quod literatorum ſtomacho accomodum eſt. Neapoli quo noſtri utuntur fuuſum, & robuſtum tum ſtomachum, tum cerebrum lædit. Et ille: Non igitur Veſuvianum probas? Cui ego: Duplex Veſuvianum, unum Soſianum dicimus à noſtro rure, & hoc in campeſtribus naſcitur, alterum quod ad editiora loca in monte gignitur, & Malateſtidi ab altero rure noſtro ei nomen impoſitū, primū oppidō nigrum, dulce nimium, & prævalidum, ſecundum

dum album dulcius, & validius. utrumque vix haustum mentem obfuscat vapore suo nimis denso. & ut robustus, ac vegetus sit stomachi valor, qualis in rusticis operis, ac bajulis, in Germanis item, ac Sarmatis, concoqui vix potest. indeque sicut vel crudum egeratur, vel ucescat, universamque cibi massam depravet, atque corrumpat. Hic ille: Intelligo, sed quid, de Græco? Idem judicium, tam ego. etenim & satis vaporosum, & robustum. Ille vero: Quod dignetur probas? Collivum, inquam ego, gustu mordens quale in collibus circa Anianum nascitur ruri nostro, cui à Campestribus nomen, quæ supra Anianum sunt, nempe delicatum, & minime fugax. Passilypæum item tum heluolum, tum nigellum, quod quidem pungens est, & colore gratissimum. tandem Stabien- se rubellum, præcipue quod superioribus collibus insolaris nascitur optimū omnium nostræ regionis puro. Si ego festucam geretem, exquisitissimum vinum fieri curarem, ea adhibita diligentia, quæ necessaria ducitur, quam quia negligunt, publico bono male cavetur. male autem? imo pessimè. Hæc loco Balbus: Proh Deum immortalem, ac summa ingenia in occulto latent. qualis hic prætor esset, qui nunc privatus est. Cui statim ego: Bona verba, quæso. Tum illi uno ore: Si penes vos facultas esset, tibi festucam traderemus. Ego autem: Gratias vobis ago, quod vestro me suffragio ornatis, verum istæ lepidè dicta; nam secus me de ambitu accusabunt. Tum Balbus: Ne dubites scimus te esse philosophum: neque in Platonis cui republica sumus, in quæ philosophi præsideant. Sed jam puer vitulam, & passillos apposuerat. Quæ ut vidit Junius: Non te cerò inopinantem oppressimus. Balbus verò in Lucillum intuens, Lucili, inquit, tu illum de nostro adventu docuisti, quip-

quippe. Ille verò: Ita se res habuit, ut celare illum non potui, & sanè nec decebat. Ego tum: Adeo ne me fastidiosum putabaris, ut vestrum adventum ægte ferrem? non vobis benè perspectum me nihil antiquius habuisse, quam amicis morem gerere? Quod si ergas omnes mecum non desideratur officium, quo pacto erga vos deesse poterat, quos unicè amo. Tum Balbus: non id fecimus, quo veniret in dubium, tua erga nos benevolentia, animique tui magnitudo; sed volebamus tibi negotium facessere ostupato. semper contenti eramus prandiolo extemporario, & frugali. quibus ego: Sed quæ hæcenus lautities? nempe vos nimis sobrii. ceterum Surrenti vitulam, & aves desiderari piaculum erat. Imò nihil est, quod magis hic desideratur. Tum Lucil: Ita enim verò. nam hinc Neapolim deferunt, ut sine magno labore vix istæ vitula comparari possit. aves Massa ad Delabrum ab amico dono missæ. At ego: Fabiole, est ac aliud quod tuo magisterio confectum sit? nam embamma illud fuit non illepidum. Et ille: De hoc cogitabam. inferam igitur, quando jubes. ac vereor ne delicatissimi isti homines me derisui habeant, & quod in oxyporo comparavi plausum, nunc perdam, capramque illam gloriolam, cachinno corrumpam. Cui ego: Adeo tu delicatus es, cito. Ille statim abiit, acceptaque megide illico rediit: Istæ, inquit, crustula sunt multifolia infarta. Hic M. Junius: Puer, hæc certe, ex tua officina non prodierunt. Et ille, perquam festivè, Nonne tantum me magistri discipulum scitist? Scimus profectò, tum ille, sed tantum te profecisse, neutiquam credimus nam ut video, hæc crustula artifices manus subolent. Mox cum delicatissima, & suavissima gustarent, Junius. Age, inquit, puer, infunde rubellum istuc oppidò bonum, & bimum, infusoque Lucili,

cili, inquit, genialem hunc calycem horum artificii propino. At Balbus: Da, inquit, heluolum, quod quidem honorarium est optimæ notæ, Juni, eidem libro. Tum ego, Lucili, tuum est propinationibus respondere. & ille, nihil moratus rursi poculo benè pleno illis meo nomine vices reddidit. Hic puer, Vultin⁹, inquit, gallum apponam? an mihi de illo facitis gratiam? Cui ego: Fabiole, es graphicè facetus. cāculus es, & gallum Numidicum comesse potes. At Balbus: Nobis, inquit, (idem scio placere Junio) cunctam istam fac gratiam, illique gallum concedi-
to. Et ego: Si ita jubetis, geratur vobis hic mos. I, igitur offer bellaria. Ille tum è penu megidem eduxit cum salgami; erant autem thyrsi lactucacei, & pyra saccharo condita, Genuense salgatum, & globuli saccharei cum nucleis, & amigdalæ Indico melle incrustatis. Tum Balbus: Placent magis, inquit, hi fructus mites & frigidi, quam saccharo imbuti, laudavitque pyrum falernum; at Junius uvam corniculatam pergulanam. Lucilius præcoqua odorosissima, ego pruna sera herbacea, quæ mistam quandam habent acritudinem palato perquam sapidam. Dum in secundis mensis versamur, ita Balbus: Cur, inquit, Parthenie, Nauticorum iv sic cecinisti?

I tu Nauta, duo spumanti pocula lacte,

Et Surrentino duo pocula plena Lyao

Dona ferens: nam mitis amat sibi talia Glaucus
Dona geri.

Etenim cum Surrentinum sit austerum infimæ notæ: imo & deterius Atellano; ut meritò illud Tiberius Cæsar vini nomine minimè dignaretur, sed generosum acetum vocabat. Cajus verò, qui illi successit, nobilem vappam. idcirco non videtur dignum honorarium, quod Deo offerri possit. An Glaucus marinus.

rinus cum sit, rudi, ineruditoque est palato? Scio enim nautas rudes, & feros habitos. ex quo facta illa adagia, quæ feritatem, & asperitatem vitæ indicant. Cui tum ipse: Non huc spectavit mea oratio: verum ad priora tempora, quibus etsi asperum Surrentinum; erant tamen illi vires præcipuæ, ac pungentes palatum, ut ait Plinius, adeoque nautis gratissimum, utpote quod validum. Tum ille: cur id temporis deterius evasit? cæline vitio, an terræ? an aliunde propagines non adeò felices huc translata? Haud equidem hisco ex causis factum arbitror, tum ego. idem enim cælum, eadem terræ conditio, etsi hæc veluti consenescat; sed quia olim omnis hæc regio, tum campestris, tum clivosa aprica erat, atque insolata: itaque fiebat, ut uvæ maturescerent. ex quibus mox expressum mustum prævalidum erat: neque huic admiscebant vinitoses mustum tortivum circumcidaneum, quo sit magis asperum: nunc verò regio arboribus passim constita, & his tam proceris, tam frondosis, ut subter vites Solem vix videant. quocirca prius putrescunt, quam maturescant. hinc agricolæ uvis adhuc acerbis vindemiant. itaque fit, ut vinum proveniat pessimæ notæ. Hoc loco Lucilius, qui jam caput identidem inclinare ceptaverat, Quidni, inquit, ad meridiandum concedimus, ut hi tempestivè Neapolim redire possint? Optimè mones, tum ego. statimque ad somnulum profecti sumus.



CAPUT IV.

A somnulo cucumis, & mulsa scitè adornata hospitibus data: mox multa de Camelis scitu digna quaesita, & disputata.

Vix brevi somnulo dormitaveram, cum experiretus puerum voco: Heus tu, Fabiole. Et ille, praesto adsum. Cui tum ego: Pergito Surrentum, ibique emito tria nivis pondo. i, grandi gradu, non verò grallatorio illo tuo. cave ne cum pueris per viam vel nucibus ludas, vel lamellis. Et ille: Volabo, actutum redibo. ludam verò cum veniam mox. nunquid enim nec nuces habeo, nec nummum, quem deponam. Et ego: Dabo tibi nummum postquā redieris, quem tu deponas in ludo: nolo te honesta voluptate fraudare. Ut verò ille discessit, ego ad mulsam adornandam, ut amicos æstuosis horis recrearem, me confero. arculam igitur aperio, ut calaminum mel acciperem: verum vix paucillūm repertum; quocirca angere animo, discruciarique cepi. verso igitur cuncta tulque deque, arculasque trusaciles omnes introspectio, si quid sacchari invenirem. video tandem in interiore quadam arcula alveolum conditura ex buglossi floribus benè plenum. quem statim arripui, & quidni, mecum aiebam, compositionem hanc ipsam saccharo immisceam? imo cum buglossi flores sint cardiaci, erunt ad fovendam animi hilaritatem perquam aptissimi. totum igitur alveolum in aquam verso; inquam & saccharum eliquatum addo: èque limoniis expressum succum infundo. tandem pastillos saccharcos odoratos, ex moscho nimirum, atque ambare confectos, in pulverem redigo; mulsæque adjungo: quo

quo odoreſa, utiliſque foret. illiuſmodi enim odores cerebrum fovēt, ac roborant.

Interea amici à ſomnulo in deambulacrum egreſſi me accerſunt. Tum ego: Dormiſtin' aliquantulum? Et illi: Placidiſſimè, tu verò, ut conieciſimus dormitaſti tantum. Quibus ego: Rectè conjeſtaris: verùm ſic mihi natura eſt, ut ſim levis ſomni. Agite, ſedete hic; namque magnam hanc Zephyrus fenestraſt jam perſtare incipit auristaſt placidaſt, quàm quæ maximè. Tum illi: Quidni maximè ſedeamus? quoniamque in promptu ibi ſedea erant, conſedimus. Vix dum ſedimus, cùm Lucilius adhuc dormiſcens cubiculo pedem extulit: & Audiſtin', inquit, corniciſ crepituſ? Cui ego: Somnariſ, mi Lucili. Illi verò: Haud ſomnior. ibo ut videam quiſ pulſet foreſ. cumq. inſpexiſſet de fenestra, puer, inquit, cum cucumi ſatiſ magno. Cui ego: Jube illum ad me venire. Tum ille, reſeratiſ foribuſ, puerum introduxit. Qui cùm ad me propiùſ accceſſiſſet, Dominuſ, inquit, vicini turis, quicum ſumma tecum familiaritaſ, juſſit hunc ad te cucumerè deſerre, quem biduo ſua in ſpeùlca aſſervaviſ, quociſcirca erit frigidiffimuſ. rogat præterea, ut illi parcaſ ſi adeo tenue manuſculum ad te miſit, cui ſe pluribuſ nominibuſ ſatetur implicatiſſimuſ: id enim ſe feciſſe aiſ, ut ſuum erga te obſequium teſtaretur. Cui tum ego: Illi renunciato mihi munuſ fuiſſe acceptiſſimuſ, & eo poſituſ loco, quo theſaurum poſuiſſem; atque adeo plurimaſ me illi gratiaſ habere. Poſtea verò quàm puer diſceſſit, ego ad hoſpiteſ: Id veſtrum gratia ſactuſ, quociſcirca faciaſ pericuſluſ an revera ſit frigiduſ. videtur mihi etiaſ optimuſ, nam, ut ex illiſ, quos mihi Acerraruſ Dominuſ mittere ſolituſ, conjeſturam facio, hic indidem venit. mox jubeo Sylviuſ aſſerre cultroſ, & mantile. ille ſtatim

advolans culiros, lineumque attulit mantile mundissimum, & villosum. Tum ego cucumerē incido geminas in patres; qui tam purpureus inventus, quàm qui maximè. & quoniam color argumentum saporis est, fuit sapidissimus. quare mirum in modum illo hospites delectati. Tandem deterfis manibus confabulari cœptum est. Age, inquit Balbus, quoniam de Camelo hoc mane, dum è scopulo in hortum ascenderemus sermo inter nos habitus, patere, quæso, ut hac de bestia te plurima interrogem. nam etsi nonnulla in Geographicis scripsisti, sunt tamen quædam alia, quæ ego scire magnopere aveo. Cui ego: Cedo quæ tibi scire est animus: contendam pro viribus factis quàm brevissimè facere. Et ille: Suntne tantæ pernicitatis, quantam illis in Geographicis attribuisi? & si ita, undenam illis tanta pernicitas? Tum ego: Miræ oppidò velocitatis perhibentur: quocirca Dromedarii appellati, græco vocabulo, nimirum cursores. Intellego, inquit Balbus. Et ego: Hoc autem cognomen Arabici præcipuè, qui minores sunt, meruere. Nam duplex genus Camelorum est, primum eorum, qui in regionibus, quæ ad Austrum sunt, generantur; secundum eorum est, qui in Septentrionalibus gignuntur. primi minores delicati, frigorisque impatientissimi, nec tantum robusti, quantum reliqui. secundi non adeo delicati, frigora patienter ferunt majores corpore, robustissimique, ut supra mille, & quingentas libras gestent: qui etsi non tantæ pernicitatis, superant tamen equos Nissanos, ut author est Aristoteles, qui quidem pernicissimi omnium habiti sunt. Cur verò adeo veloces, docet idem Aristoteles: Etenim cum latius pedes glomerent, sit ut ex illa ampliori glomeratione velocissimè incedant. quod quidem manifestum ex eo est, quo cuncta animalia,

quæ

quæ latiore currunt glomeratione, velociora sunt. Hic Balbus: Assentior, sed pergamus porrò. Verumne sua sponte subidere, cum onerandi? Tum ego: Imò vetissimum, etenim signo dato, promptissimi accedunt, seque inter onera accomodant miro modo. inque pedes flexi, tamdiu manent eo situ, quoad iustum dorso pondus impositum, mox illico assurgunt. non secus, cum deonerandi, faciunt. siquidem in gymnasium cuncti se locant, acciduntque in genua, ut sic faciliè onera deponant. quibus jam liberi, sua sponte consurgunt, & mirum oppidò est quàm placidè, nulloque negotio, accidunt, & assurgunt vel cum ipsis oneribus, ut nihil supra. liberi emittuntur in pascua: è quibus ex se redeunt, antequam Sol occidat: si qui deviant, certo signo, quamfacillimè revocantur. Ut rediere singulis bini intritæ ordeaceæ globi non admodum magni in cibum præbentur. Hic Balbus: Non amplius? Et ego: Nihil admodum, nam etiam grandes corpore, & laboribus frequenter exerciti, nihilo tamen minus paratissimi. interdum per paucis radicibus, cardui vel in primis, quas illi in deliciis habent, contenti sunt. Sitis tolerantissimi; ut nonnunquam per totos decem dies non bibant. Imò cum proli indulgent, dies xl à cibo, potuque abstinere perhibentur. id verò alternis annis, cum Septembri in Arabia, Majo mense in reliquis regionibus, commiscuntur. Atque hic mirum illud est, & quod magnum modestiæ specimen præferebat: cum habendæ proli dant operam, deserta, & solitudines quærant. neque tutum id temporis ad illos accedere. sunt verò tam salaces, quam qui maximè. Hoc loco Balbus: Miras quidem modestia in bestia tam salace. Cui ego: Memini me legisse apud Aristotelem camelum mare, matrem minimè supervenire. refertque hanc histo-

riam, si benè recordor: Accidit semel, ut admissarius gregi deesset, qui fēminas comprimeret; quocirca stabularius pullo uti constituit. quoniamque planè novērat suam pullum ne invitū quidem matrem super-venturum, illam operuit: opertæque mox marri pul- lum admisit, qui dum generationi incumbere, for- te delapso operimento, matrem agnovit: tantaque verecundia, furoreque ob commissum, & si innocen- ter, crimen, exarsit, ut auctorem morsu discerneret. insigni documento ne bestias quidem ad crimen cogi debere. Hic Lucil: Imo ego memini eodem loco ad- mirabilem alteram legisse historiam, dignissimam quidem scitu. Aristotelem ego verso non raro admo- dum; quod haud scio an faciant, qui plenis se buccis Peripateticos jactant. Cui ego: Pauci sunt, mihi crede, qui auctorem hunc fecundissimum Naturæ pe- nu, ne dum Philosophiæ evolvant, sed quæso, ut hi- storiam illam mihi in memoriam inducas quod, & Balbus, & M. Junius (ut pro his etiam spondeam) ma- gno te orant opere. Tum ille: Scytharum regi equa erat perquam egregia, ex qua mares generosissimi pro- creabantur. Hoc loco ego: Jam redit in memoriam. petge, quæso, ut cepisti. Ille verò: Ex his, qui cete- ros indole, & forma anteibat delectus, regis jussu fuit, ut ex illo equa conciperet. admissus nullo modo co- gi potuit, ut matrem superveniret: & si equi sint fa- lacissimi. mox verò illam opertam insciens oppressit. at ubi à concubitu matrem cognovit, de repente fugam arripuisse ferrur, seseque in præceps actum mi- serabiliter confecisse. utinam tantus commissi cri- minis pudor in homine reperiretur: qui interdum brutis ipsis inverecundior, petulantiorque est. Tum ego: Ita enim verò: Nonnunquam ratio in homine, ita obtenebratur præ immodicis cupiditatibus, ut
bru-

brutis deterior evadat. Sed redeamus ad camelos. ferunt antequam fontes libent pedibus aquam turbare, quam limpida nunquam hauriunt. interdum adeo turbidam reddunt, ut nonnisi ad plures dies, illimis, perlucidaque fiat. Hic M. Junius: Cur ita limosam potant? Haud sane ad manus, inquam, ratio est. crediderim vero id eo fieri, quia limpida noceat, quippe frigidior: & animalia fere cuncta frigidam non bibunt. & si biberint illico torminibus torquentur. At Balbus: Curnon id evenire dicamus ne ipsi se veluti in speculo videant, si admodum verecundi? Ingeniosè tu quidem, tum ego. Et ille: Age, verumne, inquit, Camelos pilos deponere, quemadmodum serpentes pellem exuere perhibentur? Cui tum ego: Ita verò. primo enim vere intra triduum pilis omnibus denudantur, & ne tum à muscis vexentur, illos picant. Durum remedium, tum Balbus. Sed quid facias, ex malis præ minus eligendum. At eo tempore adeo intolerantes, ac rabiosi sunt, ut vix sine periculo tractari possint. illos non strigile confricant, ut nos equos: sed virga pellem percutiunt: ut nos in rapetis facimus, cum pulverem excutimus. Neque hic mihi illud reticendum quod mirum, & perridiculum est. Mercatores cum illos distrahant, qui graciliores, exsuccique sunt, instant hoc modo, quo pinguiores videantur: juxta caudam eutem incidunt, factoque foramine, ut lanii cum occisis bobus, aliisque exculentis animalibus facitiant, illos, immisso calamo, instant. mox foramen diligentissimi occludunt. poteratne excogitari, fraus vel magis ridicula, vel astutior? At Balbus: Caudata quidem industria. Risimus hic cuncti ob verbum facetia conspersum. Atque in hosce risus rediens cum nive Fabiolus incidit. Cum verò nivim Junius vidit, quid, in me intuens,

opus est frigida? abundè exquisitissimo illo cucumi
 facis tui factum. Cui ego: Dies æstuosus, ut haud
 sciam, an alius hoc anno. Zephyrus vix exortus in-
 terit; quocirca, cōmoda huic ætui mulla erit. mane-
 te, quæso hic: ego mox revertar. Ita, inquit, quæsu-
 mus, tum Balbus: id enim scio & hos magnopere de-
 siderare. Cubiculum igitur ingressus citrinum corti-
 cem saccharo imbutum, quem jam minutatim conci-
 deram, iniicio in mullam. dum verò cochleari aquam
 verso, animadverto blugossi flores è cæruleis, Circeō
 veluti poculo, purpureos factos. quod mihi primum
 oppidò mirum, atque instar portentis visum est, mox
 rem maturè pensitans, id limonii factum succo certò
 duxi. nive igitur contrita, saleque admisto, vas sube-
 reum picatum impleo, cæptoque versatile intus vs
 vertare, quoad mulla coagulati cæpit. tum primam
 crustulam, quæ spissè ad latera congelaverat, divello,
 versoque mullam, ut tota arenosa fieret. quod, ut
 brevi effectum est, panno vas intego, ne frigus eva-
 poraret, meque ad amicos restituo. Ut sedi, quan-
 tum inquit Balbus, & Janius, tibi debemus, qui tan-
 tum, laborem nostrum gratia suscipere non dedigna-
 ris, tanta nos liberalitate, comitateque complexus
 es, tanta lautitie tractasti, ut meritis tibi referre gra-
 tias possimus nullo modo. certè implicatos habebas
 nos beneficiis plurimis, nunc verò implicatissimos.
 Quibus tum ego: Vellem, ut plures mihi vires, essent,
 quo meliore vobis modo inservirem verum ego gra-
 tias vobis habeam quamplurimas, quando vestras
 me præsentia cobonestastis. Hic Lucil: Redeamus ad
 Camelos: nam tu, scio quippe ingenium, istiusmodi
 officiorum parcissimus. Estne verum, quod ajunt,
 Camelum apud Persas sacrum esse? Cui tum ego: Ita
 enim verò. Fabulantur enim Abrahamum non ovem,

ut sacræ literæ tradiderunt, sed camelum sacrificasse.
 & hunc Ismaëlis, à quo Arabes progeniti, non vero
 Isaci vice, ex quò electæ gentes procreatæ. Quapro-
 pter quotannis summa pompa camelum immolant hoc
 modo: Optimum quemque eligunt, quem more gen-
 tium, graphicè, miraue concinitudine exornant: in-
 duuntque dorsuali auro, argentoque intertexto, ador-
 natum ad principis templi fores ducunt. ubi rex cum
 immensa penè populi multitudine præstolatur. Sisti-
 tur verò ab urbis regiæ præfecto, qui regias vices ge-
 rit. mox sacerdotes in genua deflexi preces funditant
 Arabico more. quibus intra dimidiatam horam ab-
 solutis, Rex, qui summi Pontificis in hujusmodi
 sacro vicem obit, sagittam in camelum vibrat. qui, etsi
 vulnus minimè lethale, cadit tamen illicò; nam fune
 ligati pedes à ministris perterantur. simul, atque
 cecidit sacerdotes jugulant, occisumque duodecim in
 partes concidunt. quæ duodecim tribus singulæ sin-
 gulis distribuuntur, saleque conditæ in sequentem
 annum reponuntur. caro autem quæ superiore anno
 sale condita, repositaq. fuerat, cum oryza coquitur, in-
 que festivis diei illius conviviis apponitur, & beatus
 ducitur, qui vel micam illius gustaverit. Sed guste-
 mus nos mulsam nostram, & barbaris barbarum hunc
 morem relinquamus. Rectè tu quidem, inquit Bal-
 bus. At Lucil: cui illa gratissima erat potio: Colamus,
 inquit, nos mores nostros, qui humaniores sunt, mul-
 samque libemus: nam ut fatear latinè, gestio illam
 exhaustire, ut calorem, quo depereo, temperem ali-
 quantulum. Tum ego expositis in mensa vasculis, il-
 la affatim impleo. Ut verò purpureos illòs flores con-
 spexerunt, Cedo, inquiunt, quinam hi flores? Qui-
 bus tum ego: Divinate qui tandem illi. Qui cum diu
 se mutuo intuiti essent, rogassentque invicem unus,
 alium,

alium, Nescimus tandem, inquirunt. Tum ego: Buglossi flores, qui non minus præcordia, ut qui cardiaci, quàm ipsos oculos colore hoc purpureo foveant, ac recreant, At illi: Numnam ludere instituisti? certe jocandi gratia, tibi nobis animus est imponere. Laudamus factum. laxandus enim nonnunquam arcus est, quem si nimium intendas, franges. Ego verò: Nugas non ago: neque joculari mens mihi in præsentia est. Tum Lucil: Parthenie, hos non esse buglossi flores, in quodcumque te ego pignus vocarem. Cui ego. Perderes quidem certè. inspicite formam floris. Quam cum sedulò inspicerent, Forma quidem buglossi; et color formæ non consentit. An fortè, inquit Junius, purpureus hic buglossus flores generat? Minimè, tum ego, sed cæreos: neque hic alio in Orbe sumus, ubi alias formas, alios colores habere flores perhibentur. Tum Balbus: Sed si ita, cur colorem mutavit? an ejusdem naturæ, ac polypus? an tu id medicamento aliquo, & ut ajunt, circæo poculo effecisti? nam poëtis, & mathematicis, commentis illis, his verò machinis cuncta præstare concessum est. Tum ego: Rem in pauca conferam, nam sitiunt, qui sedent, id, ut de me conjecturam facio, ideo evenisse puto, quod limonii succus admixtus sit. vidi enim sæpe apud pharmacopolam nostrum, ex humorum mixtione colores immutari. Hic Balbus: Credo equidem; nam id ipsum sæpenuerò animadverti. Verùm quo pacto id fieri potuit? si enim, ut ajunt physici, ex unius interitu oritur alterum, neque interitum haberi sine vi causæ, qui hic interitus? quæ nova productio? quæ causa? Tum ego: Id videant, quibus hæc otium est pertractare. Ego ex una tantum admixtione humorum, imo ex ipsa figura mutari colores ajo. nonne in spumam dum abit aqua, è cærealea fit alba?

ba? Nonnulli id ex sympathia, vel antipathia, odio nimirum, vel amore, quæ potentissimæ causæ sunt, oriri autumant. quædam enim contraria inter se sunt, quædam amico nexu copulantur. verum quid in rebus inanimis istæ sympathia, quid antipathia sit, non satis liquet. Hoc loco Lucil: Sed cur citrium non etiam colorem immutavit? Quia, ego, non eadem mixtio provenit. vel, ni me fallo, quia non adeo tennes cortices illius sunt, quemadmodum flores. qui, quoniã alio modo affecti, alio etiam modo opaca lux redditur: neque enim color diversum quidquam à luce est. Hæc verò, ut variè opacitatem induit, in varios colores immutatur, ac pingitur. Interea exhausto jam primo cyatho alterum subministro. Tum illi: Beasti nos istis, Parthenie. Ut scitè factum, ut delicatum, ut fragrantissimum istuc sorbetum est. ita tu à sorbendo, latine dicis. quàm accomodè citrium corticem admiscuisti. nam hic calidus suapte natura, cum sit, stomachum fovet, ne præ nimio mulsæ frigore incomodi aliquid acciperet. paucos admodum habes, qui tibi componi possunt. & tamen, qui te ex habitu, ex aspectu, ex ingressu æstimat, fungum putat. id tua bona venia dictum sit. Nunquam versùs locuti estis, inquam tum ipse. tanti enim sum, quanti fungus. Et illi: Sed modestia te facit fungum, quem magnum natura fecit. At Lucil: Da veniam, dicam enim pace tua, quod vel ab invito risum extorqueat. Cum tu Soteria illa tua recitasti, coram tribus Cardinalibus, tui amantissimis, insulatis decem, & innumera nobilium primi ordinis, & eruditorum corona, tanto plausu, ut nunquam aliàs, quidam dum te adeo egregiè declamàrem, gestuq. tam mirabili, tantaq. vocis suavitate, ac tanta itè felicitate memoriæ vidisset, petiit à me quis esset poëta cum te ego esse affirmare:

Ille:

Ille: Ludis, inquit, ò quam diversus hic est ab illo. Cui tum ego: Homines non ab exteriori habitudine æstimari oportere: neque externos cultus homines facere, sed interiores animi dotes, quæ quo majores sunt, eo magis latent. tandem vix & ægre induci potuit, ut crederet. quid hic, si istæ tam scitè à te adorari conspexisset? Tum ego: Mittamus ridicularia. tu semper saltas extra chorum. Ad hospites verò: Manete, quæso, apud me hoc vespere, crastina die Neapolim redibitis. Et illi: Hac in re tibi morem gerere non possumus. nam prætor hac conditione facultatem abundi dedit, quatenus eadem die Neapolim rediremus. Tum ego: Si ita est, penulam non scindam: nimirum Prætori parendum. tempus autem est, ut de reditu cogiteris, ne per vesperi domum veniatis. Et illi: Optimè mones. cum autem assurrexissent, ad scopulum profecti sumus. Hic postquam rogassent, Numquid Neapolim vellem, abierunt.

C A P U T V.

Cum mane reficiendi animi causa orientalem Surrenti oram perlegerem quadam scitu digna observata.

POST continentem solidi mensis laborem, quo nunquam domo pedem extuleram, nunquam me è mensula divelleram, tantus me capitis dolor corripuit, tantum stomachi fastidium invasit, tam item solitudinis tædium oppressit, ut jam me Musarum pœniteret, & nihil propius factum est, quàm illis vale dicto, me domesticarum rerum procurationi addicerem. quo in munere fortasse expectationem superavissem, altius enim figere obtutum nec possum, nec de-

debeo . Quocirca jubeo navicularium , cui Cotæ nomen , evocari , navimque deducere . ego interea sine erudito libello , præter morem (tantum literarum fastidium conceperam) in scopulum descendo , ut aliquid levamenti caperem , & facta , licet exigua , à studiis inrecapedine , vires instaurarem . mirum oppidò quantum me marinus aër reficiat . inest enim in illo nescio quid nativi , quo animus recreatur . Ut igitur descensum per clivum est , naviculam subeo : jubeoque navicularium expenso remo , & secundum oram Vicum Æquensem versus contendere . dum autem pergitus , Cota mitis homo indolis , & perquam diligentissimus : cui plurimum me debere profiteor ; nam ferme quotidie Neapolim navigat , meosque literarum fasciculos ad amicos defert : vespere autem rediens , quæ ad me rescribuntur literæ , & quod ad alendam parcè admodum vitam , deportat : tum ita me interpellat : Quid premis animo ? nam te præter solitum dejecto vultu , animoque tristi animadverto : plenum item tædii , & fastidiosum . Nunnam iratæ tibi Musæ ? nunnam Apollo silet ex cortina ? nescio enim numquidnam acerbius tibi accidat . verùm si ita , faciam ut redeas in gratiam . Hic ego , etsi non hilaris , tenere risum non quivi : & Quo tu , inquàm , facies modo ? Ille verò : Excipiemus illas convivio in aliquo ex his scopulo , tu fercula adornabis , ego mensam instruam , subiboque vices magistri convivii . atque ita , mihi crede , redibis illicò in gratiam . amant enim illæ liberio rem interdum convictum , & actuosas relaxari ex intervallo virgines æquissimum est . Tum ego : Lepidum certè commentum , nimirum , ut sic te ingurgites meis jacturis . Et ille : Quidni secus faciam ? tu liberalis homo , & ad benè merendam natus ; ego ex illis sum , qui omnem substantiam sunt induti : quid igitur

igitur mirum si tuis expensis vivere cupiam. Sed age, quando nihil tua salute mihi charius, qui te morbus corripuit? quis angit dolor? quæ vexat ægreditudo? Cui tum ego: Doleo à capite, stomachique fastidio non leviter laboro. Quid mirum, tum ille, si semper ego Neapoli rediens te ad literariam mensulâ, vel scribentem, vel lectitantem invenio. cōtinuò me Neapoli tui familiares, præcipue postici janitor, senex admodum benevolus, etsi interdum in stomachum erumpat, ac tanto lepore, ut id ipsum sit in homine ad gratiâ: & juvenis ille, qui tuas res procurat, comis ipse, & liberalis, interrogant, Quid agit Parthenius? Quibus ego: Quid? futoriam exercet. Tum ego: suariam rectius dixisses, at quid illi? Et Cota: Risere primum. mox cum à me cognovissent te mensulæ usquequaque inhaerere, dictum excepere cum plausu, laudaruntque ingenium meum. Hic ego: Rectè quidem illi. est enim asperum sale verbum. sed quid præterea? Quid? inquit ille, vereri omnes ne in morbum incidas, antequam Autumnis Surrentinis ultimum fastigium imponas. Et ego: At his brevi summam manum addam. quos simul ac ad umbilicum duxero, me Neapolim restituum ad osium, & amicos. quamquam fateor ægre animo pacatissimas hic Musas, & sacrum hoc silentium relinquam. Hic ille: At te modò Musarum penitebat. Cui ego: Nescis illud Comici, Amantium rixæ redintegratio amoris sunt? Verum age est ne plus, quod illic accepisti? Tum Cota: Quidam, qui ibi erat adolescens, dixit se te hoc mane oppressurum, addidit quæ hæc verba: Divellam ego illum à suo Musæo. velit, nolit, mecum saltem triduo occupabitur. Cui ego: Tenes ne adolescentis nomen? Nequaquam, inquit, nunquam enim audiivi illum nominatim compellari. Describam: tamen si vis. ab ungue ad summum capillum.

lum. Tum ego: Imo jubeo, ut facias. Ille vero: Accipe, statura est mediocri, pectore lato, humeris pauxillum prominentibus. quod vitium in plerisque vestrum animadverti. idque, ni me fallo, idcirco contrahitur, quod sedentes, atque incurvi literarum mensæ ad studium incumbitis. Cui ego: Vera prædicas. sed perge, ut cepisti, contedam illico, inquit ille: Lacertis brevibus, digitis delicatissimis, ore non illiberali, at dentes nonnihil detrahunt, ut qui decolores, & cariosi: capillo aquilo, naso grypho, & prominenti, in quo paucæ admodum vibrissæ, genis ex rubro albicantibus, in quarum dextra subniger cum pilo nervus est. Tum ego: Nihil plura: pinxisti ad vivum hominem mihi in primis charum. si venerit, ut dicis, excipiemus Musas convivio perquam lauto. Hic Cotta: Verum hoc in scopulo, cui navi, à similitudine, nomen factum est. & sanè dignus est locus, ut qui Regine olim Neapolitanæ convivio insignitus: nunc te poetæ & tuis Musis celebrior evadat. Cui ego: Vndenam id accepisti? Et ille: Tota hac nostra regione dissipatissimus sermo, quem nobis senes ab aliis acceptum senibus tradiderunt, hic olim Neapolitanam reginam cum primis regni proceribus convivium celebrasse. delectabatur illa nostra hac ora Surrentina, per quam cum semel animi gratia deveharetur: inque altam hanc rupem (Scutalum dicimus: Caurus olim, æquanorū jugorum prorumpens in mare ramus) cum venisset, scopulumque hunc cerneret, ut sunt semineæ extemporaneæ indolis, Quid ni, inquit, hic cenam adornemus? nihil amplius opus fuit, ut illico dubias, basilicaque cœna instrueretur. certatum terra, marique est: nec pecuniæ, nec diligentiae paritum. quid vidisses? allati momento sunt temporis, capones, perdicæ, turdi, palumbes, artocreata, intrita, facta, scrib-
litæ

litæ salgamariz, mulli, acipenseris, solez, pagri synodontes, Glacui, & quæ famem pervelletent, ostrea, solenes, dactyli, echini. bellaria verò generis universipenè infinita. panes similaginei, candidi, pumieosi: vinum helvolum, rutum, album delicatissimum. tandem, ut brevi præcidam, quidquid comparari potuit, in mensam illatum est. Sed quid? Regina (ajunt enim sic fuisse) pastillis cascadeis, atque aphyis eodem loci vestigio, & temporis captis, oleoque frixis quadrienio mirificè delectata est. Quoniamque in aula adulatio primas obtinet, procures omnes præter pastillos, & frixos pisciculos, nihil omnino gustarunt. ceteras servi, nautæ, coqui, purgatores lancium, reliquæque hujusmodi quisquilæ devorant. Nos quando nasci principes fortunæ non placuit, missam faciemus tantam lautitiem: quæ plerumque stomacho nocet, lancem adornabimus pastillorum edulium quam amplissimam, quos illo Calabro condiemus cascadeo, quem tuus ille juvenis dono misit, & illum ego tibi detuli nudius tertius. erant autem duodecim cylindri, quæ forma illiusmodi cascadeum coagulant. & nihil propius factum est, quam in nervum à telonariis conticeret. sed de hoc postea. frigemus aliquot pisciculos, aliquot grandiusculos arundini infixos assabimus piscatorio more. afferemus phyalam Stabiensis rufi, quod te illius domus præses donavit, vir quotquot vivunt liberalissimus. quippe jussit me tum diem frangere: deditque pernz fructum, fructumque casei ovilli cum pane recenti secundario: illius verò vini vitrum amplissimum, quo vos utimini, nos lampada vocamus. Cui tum ego. Hos tu liberales vocas. atque idcirco juvenem illum, janitoremque laudas, quod sæpe jentare te faciant. cave ne id œconomus resciat, vel jentantem comprehendat. Tum Cota. Had mihi
ab

ab hoc timeo, nam præfecti, Priorem vos dicitis. Hic statim ego. Errasti, insolens apud nos huiusmodi verbum. Et ille: Da veniam, inquit, insciens lapsus sum. Rectorem volebam dicere. huius, inquam, viri humanissimi, & tam liberalis, quàm qui maximè, gratiam inivi. quem cum Surrento Neapolim devexissem, grandi me strena donavit. Cui ego: Gratulor tibi equidem, Cota. At age, infudit aquam? Minimè, tum ille: secus vinum perdidisset. Tum ipse: Ex illis tunc, qui Polyphæmum imitantur? qui ita apud Homerum Ulysses exprobat, quod vinum aqua didiluisse: *Ἀπώλεσας τὸν οἶνον ἐπιχέας ὕδωρ*. Hic Cota: Græcum ego haurire malim, quàm audire: At ego: Lepidè sapis. verùm quid amplius? Et ille. Nihil omnino desidero. Ego verò: Huit tam sobtio, atque vulgari apparatu Musas excipiemus? addemus etiam ficus aliquot cum latufculo Campano, & Nolanæ tomacina, leucophagum ex caponis pectusculo, lacte, Indico sale, oryzæque confectum farina. magnum item panis, carnisque edulium: in quo pullos, vitulam, turtures infarciemus. Ne, quæso, hic Cota; nam infarciemus etiam stomachum, quo majus tibi fastidium creetur. pauca desidero, non vero solidos è libano boves, ut dicitur. vereor enim ne dum plurima adoraentur, convivium prolatetur ad Kalendas Græcas. Tum ego: Anne tibi ego sumus? quo cognomento Theagenes dictus, qui cùm pauper esset magnifica pollicebatur. Tum Cota: Non ita verò. at timeo ne nimis amplæ pollicitationes ex iis sint, quas Caretis vocant. Sed quid nocet promittere, inquam ego? tu certè non tenes illud Nasonis,

Promittas, facito: quid enim promittere ladis?

Promissis dives quilibet esse potest.

Tum Cota: Rectè tu quidem cum Nasone tuo isto:

Q

sed

sed ego promissis non impleo ventrem. Interea, scopulo transmissis, in mirabilem visu locum, & peramœnum deventum est. Rupes illa præcellsa, cujus modo mentio facta est, quæque recta ad lineam ab imo ad summum usque fastigium assurgit, paucillum ad radicem prominet, pulchrum veluti præsepe efficit. Est enim cava sinum, marique pervia, superius in geminam quasi testudinem fornicata: quarum una minor altera, atque interior est. convexam fornicis partem frutices, herbulæque convestiunt miro prospectu. interius majori sub fornice, in saxo è viva silice quasi mensa instructa est per amplissima. quam fornix contegit, undæque præterluunt. lusus certè Naturæ mirandus, & ad voluptatem unicè factus. dum autem specum subiremus. Hic, inquit Cota, cum Musis cenabimus. viden' ut amœnus, ut pulcher, ut facilis, atque ab interventoribus vacuus: idcirco Musis tuis, quæ quidem modestiores, quàm illa reginae. sunt, futurus erit tam gratus, quàm qui maximè. Cui ego: Arridet locus. hic cenabimus quidem certè. verum flecte jam cursum; multum enim die est.

Dum vero, suspenso remo, scopulosque propter, ut majorem perciperemus animi voluptatem, domum rediremus: Numnam, inquam, lepida illa regina scopulum hunc (rursus illum trans mittebamus) quem illa tanto honore dignata est, aliquo regis munificentis titulo insignivit? Tum Cota: Non omisit certè. iussit enim si qua mulier hoc in scopulo peperisset, ut immunis partus à tributo foret: qui verò in eo contraxissent, res eorum, rationesque contractæ liberæ à quovis onere essent. Lepidè, tum ego, & festivè factum. sed quæ nudum in hunc scopulum veniat partitura? Et ille: Certè id temporis fermè, nulla. superiori ævo complures venisse fama est. de contractibus non irà:

conveniunt enim quàmplurimi. Tum ego: Verissimile id quidem. Sed age, pergamus porro, qui nam illud, quod tibi cum publicanis accidit? Ille verò: Quid? cum cistam introspicerent exploraturi, si quid foret, quo de solvendum vectigal esset, caseum illum calabrum animadvertunt, statim interceptam cistam conclamant: imò publicandum totum phaselum, ne rutis quidem, & cœsis receptis, ut ajunt forensi verbo. meque in nervum mittere aggrediuntur. Hoc ego loco, Oh miserum Cota! in quantum malum incideras mei causa. sed cedo, quid tum ipse? Quid? tum ille, Improbi, ac nequam, hic caseus redemptus est, cum donatus est civitate. ane redimendus iterum? Et ille: Non immunis, inquiunt nam tu non extrahis urbe, sed inferis: Hic, etsi non facilè stomachum detegam, vix tamen me ab ira continui: & Quo pacto, inquam, infero, si Surrentum defero? Et illi: Debueras, inquiunt, id prius nobis aperire. Hoc ego loco: Quid tu, inquam, ad hoc? videtur enim justa causa. At Cota: Quid opus id erat, quando ex urbis porta egrediebar, meque deprehendistis in pomœrio ad litus festinantem? Hic ego: Bonam attulisti excusationem. sed quid tum postea? Quid? ille, Stentorea voce, ut dicitur, hæc fermè pronunciavi, Quid agitis, attentè considerate: hunc ego caseum ad Parthenium poëtam defero, hominem domesticè notum: viderit ille quo caseum modo redimat, quo me vindicet ab injuria. Hic ego non sine risu, Quid tum illi? At Cota; Quid? audito tuo nomine, quasi numine alicujus derepentè mutati, mitigatique sunt. Et si poëtæ, inquiunt, caseus est habeto, atque abito. imo si redimendus esset, illi vectigal donaremus. multum illi debet Parthenope nostra, cujus opera sit, ut nunquam illa careat vate sacro. Hoc loco: Nugaris, inquam, Cota. an-

ne comminisceris, ut mihi cauda blandiatis? verum ego non trahor verbis coquinarum. Ita me dii ament, tum ille, ut non mentior, nam licet pauper sim, si cum tamen non cupio. Imò addiderunt: Scimus hominem, qui in omnium ore, atque oculis est. Tum ego: Nempe eruditi inter se noti. estne amplius? Rogarunt. Tum ille: quid tu hic mediteris? nam, aiebat, ille in Surrentino suo non feriatu sedet, nec genio indulget, sed erudito se labore exercet, ut patriam illustret: Imo, ut obfuscem, tum ego. non enim ipse is sum, qui nobilissimæ urbi ornamento esse possum. imo & si Brasidas essem, multos tamen præstantiores Lacedæmon habet, ut olim dicebatur. Hic Cora: Unus illorum, aiebat se, te magistro, Capuæ Rhetoricam didicisse; deinde nescio quo Circeò poculo publicanum derepentè factum. Tum ego: Dignus profectò præceptore discipulus. At quid tu interea? Quid? ille, exclamavi, Tanti est poëtam esse! utinam edidicissem grammaticam, alphabetum enim tenebam sic sic, usque ad Q: quæ sequitur, literam nunquam expedite pronunciare potui: fortasse & ego poëta evasissem. Age, tum ego, quoniam Capuæ mentio facta est, accipe quod mihi adolescenti accidit: nam operæ auribus est audire, adeò ridiculum est, & tibi etiam documento esse poterit. Docebam Capuæ Rhetoricam. Hic me Cora interpellat: Non igitur publicanus ille mentiebatur: neque ego commentus sum, ut à te pastillos cascadeos extorquerem. Et ego: Credo facile: ne te amplius vexes. atque audi modo. sed insiste remigio paulò tortius. nam nimium attentum te video ad fabulam: & vereor ne prius pulmo ad scopulum, quam nos veniamus. viden' ut dies non multum absit ab umbilico? Tum ille: Ne dubites hos lentè, ut perbibent. canè jam fabulam: ego aures attri-

arrigam: spero illam futurum lepidissimam. Doccebam, tum ego, inquam, Caput Rhetoricam, & domestica item procurabam; quocirca veniebam sæpe Neapolim equo vectus. non dum enim apud nostros cisiorum usus erat, qui nunc adeo pervulgatus, ut etiam cisum sine umbella ad manus sit. ferebamque vidulum ad ephippii pomum appensum. cum vero prope Atellas veniebam illicò publicani occurrebant, jubebantque cursum inhibere, quod ni statim fecissem, apprehensis ipsi frenis equum sistebant. ut si quid in bulga esset, ex quo exigendum foret vectigal, inspicerent. cum vero illis affirmarem me nihil ferre contra edictum prætoris; idcirco sinerent, quæso, me progredi; neque vellent illo me incommodo afficere. at surdo fabulam canebar. & hoc modo exploratores illi nequissimi me quotidie vexabant. Cum verò semel profectionem de more adornarer, me quidam & poeta ipse, & bonus vir, rogat, ut ne gravarer Neapolim ad amicum virum optimum, & nunc magni nominis, tum Neapoli Humaniores literas profitebatur, duo bubuli cornua deferre. ut ex illis atramentarium cum arenario vasculo fieri curaret, Cui tum ego. Næ ego simplex, qui cornua deferam. quid hominis in via? quid Neapoli dicent domestici, cum me cornutum viderint? Et ille: Næ tu scrupulosus, qui quid dicat, quidve sentiat vulgus, labores. Ego sic in animum induxi meum, ut dummodo sinant me facere, quod honestum ducam, ceteris facultatem dicendi, quæ velint, relinquam. iniquum enim quorundam institutum semper duxi, qui cum sibi omnem agendi, quidquid ipsis lubitum, potestatem arrogent, interdicare aliis libertatem loquendi velint: æquissimum enim est, ut cum tu facias quod velis, dicam ipse, quæ sentiam. Hic ego: Æquum tu quidem loqueris. at mihi non

videtur honestum cornua circumferre . Et ille : Ità vero, si in fronte gereres, imo id tibi esset ad gratiam. dicerent enim tibi esse cornu copiarum . Tum ego : Ista ego phaleras libenter tibi remitto . Et ille : Omittamus jocos : dicito tum rogaverint, ad quid deserviant . Tum ego : Occinam igitur identidem, cornua pro attamentario . Ille verò instat, atque urget, (est enim aliquanto molestus) atqui feras, inquit, occulsa in vidulo . Hic mihi cum in mentem publicani venissent, Morem geram, inquam. nolo poetam tam insignem egritonia afficere . ne fortè dicas turpe esse hanc figulo figulum gratiam non præstare . Accepis igitur in vidulo cornibus, in equam insilio, & me in viam do Neapolim versùs & faciam, inquam, ut hac vice cornutam bestiam publicani perant. Cùm verò ad postremum ab Atella lapidem, ubi telonarii sedent pervenissem, illi pro more assurgunt, occurrunt, sistunt equam, & quid esset in vidulo interrogant ? Tum ego caperata fronte, gestu perquam gravi, & quassa voce, sinite me, quæso, inquam, abire : quod in hac bulga est non facit pro domo vestra. Tum illi audaces, atque importuni : Volumus, inquiunt, introspicere. Et ego : Omittito, inquam, istum laborem : quod hic est à vestigali immune omnino. Instant illi, atque urgent, ut quid esset in vidulo palam facerem . Tum ego quasi abruptens patientiam : En clavis, inquam, ferulæ : referate, & quid in vidulo sit inspicite : non vos operæ penitebit quidem certè . Hoc loco Cora. Expecto, inquit, fabulæ catastrophem, & ridiculam quidem illam . Rectè cojectas, tum ego : sed accipe. Publicani accepta clave, vidulum aperiunt, manus inferunt. cùmque durum quid, & tortuosum attrectarent, quid hoc? inquirunt . Et ego : Numnam manus, numnam oculos non habet, sed educite, atque inspicite.

te. cùm vero illicò eduxissent, se cornua habere deprehendunt. Hic Cora, non sine ingenti risu, Quid tum illi? Quid? ego: verecundia magis, quam iras perciti: Imposuisti nobis, inquiunt, cum tuis istis cornibus. Tum Cora: Habeant; meriti quippe. haud enim illis certandum erat cum poëtis, qui lepidè comminiscuntur. Sed quid inde factum? Et ego: Quod volebam: nunquam me amplius vexarunt. cùmque me prætereuntem conspicabantur, alter in alterum intruens. Hic ille, ajebant, à cornibus frater: sinamus eum abire; ne quid magis ridiculum commentus sit. Tum Cora: Festivum sanè, factum, & haud scio aliud. imitabor certè, cum se dederit occasio, quamquam poëta non sim. Interea dum hæc diceret, phaselum ad scopulum properantem video; quare illuc iter acceleravimus.

C A P U T VI.

Statii quidam locus in III Sylvarum explicatus: cujus occasione quasitum, quid essent illa faces in marum verticibus videri solita, quas Tyndaridas vocant.

Diverterat aq̄d me Cn: Bellus, ut restitutū ex parte valetudinem, melius confirmarer. Juvenis indole mitis, moribus niveus, atque officiis perurbanus: mihi verò veteris amicitia jure (dilexeram enim à puero) devinctissimus. in quo præter enumeratas virtutes, singularem animi candorem adamavi: & eo magis, quod hujusmodi dotem in paucis reperies. adeo hac ætate ea invaluit opinio, simulationem in numero virtutum esse. quam qui magis callent, prudentiores videntur. quare sic ego animum induxi, ut

& crescente sensim æstu, obsopta undarum vi, inque altum navicula abrepta: ad scopulos tandem allisa, atque conminuta est: & tabulæ, scalmi, interscalmia, armamenta hæc illac dispersa; ut vix tandem recuperari potuerint. Hoc loco Bellus: solabor, inquit, istam jacturam versuculis tuis, quos habes vix Nauticorum.

*Chara magis sit vita tibi; præstantior omni
Illa auro, regumque opibus, sceptrisque superbis.
Quin fato variante, fluunt resluuntque vicissim
Nescia stare loco mortalibus addita dona.
Si superest nobis animus, nec dextera cesset,
Qua modò Fata ferunt, referent cito diuise consue.*

Sed nescio quo æstro agitor: nempe tui me versuculi calore accendunt. Accipe, quæso, si placent. et si, ut tritum adagium, aliud noctua, aliud cornix sonat.

*Tantum ergo, Neptune, tuas audere procellas,
Et tantum Thetis est edere passa nefas:
Non vates hic ille, suo qui carmine tantum
Reddidit insignes, & super æstra tulit:
Audio. sic mediis fatur Neptunus ab undis,
Et Thetis è vitreis sic sonat ima vadis.
Lusimus, & medio dispersimus aquore cymbam:
Haud equidem tantum digna tulisse virum.
Illum ego carulea ducam per carula concha:
Atque illum in curru Testhys agat vitreo.
Tritones rauco pulsantes marmora cornu
Præcurrent: plausu pulsa sonabit aqua.
Circùm Nereides, circùm Sirenes, & omnes
Carulea venient ad sua jussa dea.
Atque unà alternis certantes carmina dicent,
Et ducent festos per vada falsa choros.*

Tum ego: Bona verba. interea ego ne scalmum quidem video. Ille verò: Viden? ut ex illo scopulo navicula incipiat apparere? Cui ego: Video proram.

Et

Et Bellus: Neptunus est: video item spumam, annæ circum Nereides ludunt? Tum ego: Næ tu vigilans somniaris. ni fortè jocularis. vah, ah, ah! scis tu qui ille est senex, qui solus cymbam agit penè dissutam? Et ille: Num pro Neptuno quispiam Charon? Et ego: Numnam tu vates, qui divinas? capularis ille senex cognomento Charon appellatur, duodenonaginta annos numerat. homo adcò facetus, ingenique extemporanei, ut sine persona, atque extempore quamvis posset agere comœdiam. Accersamus, quæso, illum, tum Bellus; ut ad extremum usque Surrenti promontorium ducat. recreabit nos ille hodie suis facetiis. Cui tum ego: Accersamus. statimque hominem nominatim inclamo. dumque ille applicaret nos in scopulum descendimus. inque naviculam mox ingressi ad occidentem oram ire jubco. Tum Bellus. Navicularium intuens, Quæso, inquit, mi Charon, ut suspensio eas remo: volumus enim hodie abundè frui vacatione, atque ad satietatem recreari. At tum ego: Non est opus, ut moneas, expendit ille singulos remi ictus, ut non tam remis, quàm grallis ferri navicula videatur. quare sic tecum statue, ut hic hodiè sit de pernecitate cum testudine pugnaturus. At Charon: Mi juvenis, ne, quæso, huic poëtæ aures adhibeas, nam plerumque suo more comminiscitur, cumque meam invehitur navicula, nihil nisi verba importat, quasi alter Hermadorus. sæpe promittit mihi se jentaculum allaturum, optimum caseum, & secundarium panem: candidum depsticum servat sibi. quoties verò redit, & ego illum de promissis interrogo, ille statim se oblitum fingit. Tum Bellus: Bona sis animo, meum erit, ut suggeram. Ego verò: Tu Helluo nunquam satur. Ille verò: Qui me parcior, aut continentior, qui duodenonaginta annos, pane, caseo, & aqua, ut plu-

plurimum vixi? Hic Bellus: Itane Charon? Et ille: Maximè verò . imo hoc cibo nunquam mihi quidquam suavius, nec salubrius fuit . hoc ego optimas semper usus valetudine, neque unquam, vel leviter quidem dolui à capite . Mirum oppidò, tum Bellus, usque adèò verum est paucis contentam esse naturam . & ut à teneris assuescimus, ita vitæ totius est cursus . mox ad navicularium: Heustu, Charon, quid istuc est? navicula multam accipit aquam . sumus ò satin? salui? Tum Charon: Sumus . habeo spongiam, quas aquam egeram . habeo nauricam cochlidem, qua citius, si opus sit, eiciam . Imo neque tota anthlia hauries, tum Bellus . Egeram quamecitissimè, tum Charon . audite intereà lepidam fabellam, ne odiosa vobis sit mora . & dum ego aquam, vos voluptatem aliquam hauriatis . Vhebam hac ipsa navicula hominem quendam divitem, ac splendide indutum, qui pileum obversum tenebat in sinu, ipse verò vinum, erat remulentissimus, altè edormiebat, ego dum aquam egero, cum illam in ligneum vas ansatum versare vellem, in obversum pileum insciens immisi . ille tandem cum è remulento sopore inciperet expergisci, & quoniam tum à Sole, tum à vino ei caput incaluerat, pileo se cooperuit . sed quid, inverso pileo, totus bene madefactus est . quia verò vinum ructabat, totusque olebat vinum . Quis me, inquit, aspersit vino? Cui statim ego: Bacchus, qui tibi cordi, & in corde est . Bene est, inquit ille, placet . atque illicò dimittit caput, cepitque iterum dormire . Nonne lepidum factum? Cui nos: Imò lepidissimum . Atque hausta jam aqua propter scopulos ire pergitur . Tandem cum ad sinum, quem durus siliæ collis discissus hinc, atque hinc aperit, perventum est, Descendamus, inquit Cui Bellus, tantisper in amœnam hanc

hanc oram : oblector illius situ, atque opacitate. & sic interea Charon aquam hauriet iterum. plurimam enim rursus ebibit; adeò per vetus, ac penè dissuta, cymbula est. Cumque ego annuissem, in terram exilivimus: sedimusque in scopulo prope arenam, quæ è proxima descendens rupe tenuis aqua præterfluebat. Hic ille: Quoniam, inquit, Stacius est in manibus (qui tamen nec mihi, nec tibi crebrò teritur; quamquam ingenium viri popularis tui plurimùm laudes) sine, quæso, ut te unum interrogem. cum ex docto olim ceteroque homine illud exquisivissem, nihil ad rem, sit pace illius dictum, respondit; ut ego non immeritò, mecum tamen, ne auctoritatem viri offenderem, quid, inquam, ad Mercurium? Est tamen quod illi condonem, quippe non astrologo. tu verò, qui hisce in artibus instructus, & varia lectione eruditus, nodum solvere, meque dubio eximere potes. In Sylv. III post Herculem Surrentinum, quem modo legimus. est Propempticon Metio Celeri, in quo hæc habet acutus hic poëta.

Grande tuo, rarumque damus, Neptune, profundo

Depositum, juvenis dubio committitur alto

Metius; atque anima partem super aquora nostra

Majorem transferre parat: proferre benigna

Sydera, & antenna gemino confidite cornu

Oebalii fratres: vobis pontusque, polusque

Luceat. Iliac longe nimbofa sororis

Astra fugate, precor, totoque excludite ponto.

Oebalii fratres, teneo enim, sunt Castor, & Pollux. Castor quidem Tyndari, & Leda filius; Pollux Leda, & Jovis. Ex duobus enim ovis, ut mythologi perhibent, quæ Leda emisit, ex uno quod ex Jove conceperat, Pollux, & Helena excusi; idcirco immortales. ex altero, quod conceperat ex Tyndaro conjuge, qui

Oeba-

Oebalix rex fuit, Castor, & Clytemnestra mortales. Castore è vivis sublato, Pollux ab Jove impetravit, ut liceret sibi cum fratre immortalitatem commutare, hac lege, ut alternis viverent. tantus erat fraternus inter hos amor. ob quam insignem charitatem ambo à Jove in cælum translati, inque signifero inter lfidem, & Carcinum positi: Geminique ab astrologis appellati. sunt autem ita collocati, ut uno occidente alter adhuc supra Finitorem extet, unde locum fabulæ factum esse verisimile oppidò est. hæc autem didici, te præceptore, cum cælestem nobis orbem describerbas, radioque illo tuo, quo astris legem præscribis, demonstrabas. audiebam te tum ego summa attentione cum mentis, tum aurium, summaque animi voluptate. At Helenam nunquam audiavi, legi nunquam, in cælum translata, neque unam esse ex imaginibus, quas etiam constellationes vocatis, stellati orbis. *σεπέωπα* Græcis memini appellari. cur igitur doctus hic poëta, nec certè falsus, nimbo sa astra sororis vocat? Age sis, prome, quod sentis: dumque Sphingem tibi præstiti, sis tu mihi Oedipus. Tum ego: Acutè tu quidem, & eruditè, ut multa. miror certè memoriam tuam, atque discendi cupiditatem, præcipuè has artes, quas reliqui negligunt. qui nisi altè clamitare, suggestumque percutere probè norint, nihil se didicisse putant. Sed ne septa transiliam, quemadmodum hæc se res habeat, numeris dicam. scis enim me brevitate quammaximè delectari: quam tamen in paucis invenies. adeò hæc ætas luxurie frondium abundat. Compertum [pautis est in summis antennarum verticibus] (cornua nautæ vocant; unde illud poëtæ:

Cornua velatarum obvertimus antennarum.

Et funes, qui hæc cornua tenent, ceruchos nuncupant,
græ-

græco vocabulo) atque in summis malis geminas interdum faces, interdum solitariam unam apparere: quas quidem faces stellas dicunt. sunt autem ex earum genere, quæ sereno cælo noctu videntur transcurrere, ac veluti conflagrare, cadentes idcirco physici nominant. Atque huc respiciens poëta astra vocavit. nimboſa verò; quia cum duo ignes collucent Tyndaridas esse putant, faustum omen, & prosperum felicis navigationis auspicium, ac solitarius unus cum ardet ignis, Helenam credunt, infaustum omen, & calamitosum. nempe cujus raptu Europa, & Asia conflagravit. Idcirco Tyndaridas vult insistere cornibus, quippe lætos, & felices auspices. arceri verò Helenam, ut quæ mali, infausti que cursus prænuncia sit. Hic Cn: Bellus: Rem omnem habeo à te dilucidè expostitam. quam quidem non absque Thesæo, ut dicitur, obtinere facile poteram. Verum age, si stellæ non sunt, sed faces quædam noctu in aëre apparentes, sunt veri ignes, necne? Cui tum ego: Verum esse ignem non arbitror. quod si rogas quo id argumento? habeo in promptu: non enim comburunt. compertum quippe, ita antennis, malisque insidere, ut eos lædant ullo modo: atqui læderent, imò in favillas redigerent, si ignis te vera essent; non igitur ignis sunt. Quin imò, addit Plinius huiusmodi faces, Tyndaridas veteribus appellatas, interdum circa hominum capita collucere, nec tamen lædere: innoxie ergo sunt; atque idcirco ab igne diversæ. Sed quid tandem erunt? tum Cn: Bellus. Ego verò: Crassa quædam materies collucens. idque ex eò existit manifestè, quod albo colore niteant, qui viscosæ index materię est. Plinius, si ad ima descendant, ait, comburere. at id minimè exploratum. Confundit, ni me fallo, has cum fulmine faces. hoc enim in ima pertrumpit, adurit, devorat

vorat quidquid illi obviam venit. Hic Bellus: At quædam flamma est, quæ ob nimiam raritatem non comburit; cur igitur istiusmodi has esse faces non dicemus? Cui tum ego: Quia illa et si non comburit, sursum tamen enititur: nec eadem omnino perseverat: at hæ faces nec sursum evolant, & totæ simul collucent. Tum ille: Hæ igitur faces ejus erunt naturæ, cujus illi sunt ignes, quos fatuos physici vocitant? Ego: Itaenimverò. sunt enim pinguis quædam exhalatio subalbida, minimèque accensa. nempe plurima sunt corpora, & albida, & viscosa, noctuque lucentia, quibus nihil prorsus ignis subest: qualia nitedulæ, putrida quædam ligna. qualia item ostrea quædam oblonga, aulisque simillima, quæ si noctu comedas, & simul expuas, stellas te expuere in pavementum credas. imo si saliva manus, vel facies intringas, totus collucere videre. plurima istiusmodi tum in Anconitato, tum Tarentino in portu repiuntur. id ego utroque in loco expertus sum. Tarenti primum, cum extremam Italiam peragravi: mox Anconæ, cum multis post annis omnem penè Italiam circuivi. Imò Tarenti lepidum oppidò factum accidit, quod quidem audire operæ est auribus: juvat, dum otiamur, joculari tantisper: quippe miscenda nonnunquam seria jocos sunt. levantur ita animi, ut ad labores tolerandos fortiores evadant. Erat Tarenti vir quidam, qui cum ego Nepetæ admodum adolescens vixeram, facie adeo illiberali, ut cum Therſite, atque Æſopo de pulchritudine certare potuisset; ea tamen laborabat infania, ut præ se pulchrum putaret neminem. quod in istiusmodi hominibus fermè cadit. unum tamen non negabat, esse se colore subcroceo. quod ille vitium non naturæ, cui plurimum se debere fatebatur, sed morbo ascribebat. totusque

erat,

erat, ut hunc colorem, qui unus tantum suæ formæ obstat, quin absoluta omnibus numeris esset, adhibitis medicamentis exueret. vexabat igitur medicos, pharmacopolas, unguentarios, & quod prædici maximè displicebat, rem domesticam decoquebat, & eò magis, quod ære alieno premeretur. quocirca hunc hominem nullo modo quibat concoquere. Cum igitur plurimos istiusmodi dactylos in foro piscario emissem, domumque tulissem (conquirebam tum ista scripturus Halieutica) ille me de illius ostrei vi mirabili admonet, reliquique, una quæstum erant, ita esse affirmabant. Tum ego: Faciamus periculum. Extincto igitur lumine, jam enim ad vesperaverat, dactylum comedo: mox saliva pulcherrimam illius faciem ungo sic, inquires, colorem tandem istum exues. illico collucere visus aspectu tam sèdo, ac terro, ut quasi dæmonem omnes consalutaverint, tanto risu, ut nunquam aliàs. At ego: Habes inquam, quod volebas, totus pro croceo, nitidus es, sed meis jacturis. habero igitur gratias mihi, cui restitutam in integrum formam debes. Hic Bellus, magno & ipse risu; ò factum benè! ò festivè, argutèque dictum! mox ad aures Estne? inquit. Cui ego: Ipsissimus. nonne ridiculus? Et ille: Quàm qui maximè. At nos interea, inquam ego, ex equis delapsi ad aënos, redeamus igitur in viam.

Observatum præterea noctu est tranquillo mari, si navis cursu feratur perceleri, undasque dividat, inque spumas abire faciat, scintillas quasdam evibrari, & grandiusculas quidem illas, ut percussum stellarum lumen arbitreris, ni id nubilo etiam cælo sæpe eveniret. Est autem lux illa à spuma emissæ: vacare autem igne quis neget? Hic Bellus: Assentior prorsus: res est, ut dicis. Verum redeamus ad Tyndaridas: si exha-

exhalationes quædam sunt crassæ, & viscosæ, & ignes fatui, ceteraque istiusmodi, undenam procreantur? Tum ego: E navibus ipsi: & potissimum, cum tempestates posuerunt. Harum enim vi plurimi halitus in naves detruduntur, qui mox erumpentes conflant, atque ignes hosce in malorum verticibus exhibent. Est etiam & alia causa: in navium sentinis tot, tantæque sordese ex tantorum colluvione hominum, quibus naves habitantur, continuo adunantur, ut plurimæ deinde exhalationes evaporent, eo prorsus modo, quo è locis uliginosis putridi erumpunt halitus, atque accenduntur. Hic Bellus: Probabile quidem istuc. At age, pergamus porro. Cur si duo intermicant fausti, fortunatique sunt, si unus malè ominosus? an id ex gentium vanitate absque ulla ratione jactatur? Cui ego: Ita verò, mea quidem sententia. sunt tamen complusculi, qui id ex eo evenire arbitrati sunt, quod si duo appareant, exhalationem non adeo crassam esse significant, si unus, crassiorem, ac densam, ex qua tempestas oriatur. In Mediterraneo mari duo tantum apparent, ac in Oceano tres etiam, an quia majora navigia, pluresque sordes sunt? Sed ut ut sit, res non adeo facilis indagatu est. Hoc loco Bellus occipit dextra pervellens, Næ, inquit ego immemor, qui te diu vexavi. habes id tu in Naut: III: & nunc tandem versiculi redeunt in memoriam:

*Si summo antenna flammæ lumine cornu
Sola Helena insidat, Divos, Palinure, vocato,
Supplicibus votis; ventorum prælia, & iras
Accendet dea sæva, omnemque à gurgite pontum
Quassabit ventis, & tempestatibus æris:
Ut quondam bellis Asiam vastavit, & armis:
At si Tyndarida gemino splendore corusci
Navibus ex imis surgant (quia navibus imis*

R

Sul-

*Sulphurgi erumpunt piceo nidore vapores)
Et gemino antenna pacati in vertice fidant,
Pone metum: rapidos turbato ex aëre ventos
Pulsabunt, setras & amica luce procellas.*

Quas ut recitavit; Mirabar, inquam ego, quod illorum in te memoria occiderat. scio enim meos te libellos (quæ summa est tua in me benevolentia) frequenter evolueret. Atque hæc ut dicta, in naviculam ingredimur: inque scopulum Garon ire occupat.

C A P U T VII.

C. Manlii in Surrentinum adventus, cujus occasione, multa de piscibus condendis strictim notata; mox occasiuncula à medicina dedita, quæsitum quid esset manna, quid pix, quoque tempore, ac modo utraque conficiatur.

Post Idus Septembris, cum more majorum quadripartita tempora sacro jejunio celebramus: ut illa nimirum tum animi, tum corporis castigatione, debitum Numini obsequium præstemus, proque tot, tantisque in nos muneribus divina beneficentia collatis, vices, quamvis impares, rependamus, dies amœnitatis amœnus, facilis, ac luculentus illuxerat. quocirca benè manè in scopulum descendo, ut illa animi diei amœnitate, & matutina maris aura, mihi quavis porione medicatissima, recrearer. cum enim complurium dierum, quibus cum Musis fueram amplexer occupatus, continenti exercitatione, jam penè defatigatus essem, opus erat, ut aliquam à nimio studio cessationem facerem. volebam etiam è piscatoriis cymbulis mihi perpauxillum piscium comparare. Etenim cum in Surrentino ipse mihi consulim, ipse sena-

senatus, necesse est, ut ad singula quæque unus descendam: & modò promus sum, modò emptor obsonii, modò etiam, imò semper, mihi cequum fingo. Et quamquam pervulgatum illud Platonis εἷς ἀνὴρ εἰδὲς ἀνὴρ nimirum unus vir, nullus vir: tamen unus ego, multorum vice fungor.

Vix dum in cymbam pedem intuli, cùm è proxima quadam horia, quam porrò incitatissimè impellebat, quidam piscator me nominatim, sum quippe illis benè notus, altius inclamat, jubetque navicularium cursum inhibere. Tum ego: Age, puer, subiste. hic certè, jaculator ille est, fusci filius, qui suam vult mihi mercedem obtrudere. verùm quia ut plurimum, carò admodum indicat; & me præterita hebdomada tetigit tribus assibus; idcirco illum bellè uram hoc manè; & quam meditatur in me, adornare tragulam, iniiciam in illum. Mox ut propiùs accessit, quid sibi vellet? interrogo. Et ille: Nonne tibi subolet? Tum ego quasi insciens, Videlicet? Tum ille: Selectissimos tibi pisces reposui. qui usui esse possunt, in hisce quatuor temporum jejuniis. Ego verò: Cujusmodi sunt? Tum ille cistulam protulit, & hi sunt, inquit, verùm scito illos recentissimos esse: quales nunquam Neapoli habetis ubi diales nulli apponuntur. viden' ut palpitant? Ego tum fastidienti supercilio inspiciens, Istæ, inquam, muræna perparula est, atque adeò spinosa: cephalus ille fluviatilis, quare non sanus: nulli hi lutarii, non barbatuli. salpa illa mollicula, & insipida. tandem, ut compendium faciam, ne te pluribus morer, omnes neutiquam, ut seabas, recentes sunt; quocirca meo stomacho non, quadrant, utqui fastidii delicatissimi. non tenes notissimum illud, Piscis nequam, nisi recens? quapro-

R 2

pter

pter illos nè cassa quidem nuce præstinarem . Hic ille non sine indignatione: Videris tu certè, inquit, è poëta medicus derepentè factus, neque adhuc, conspicilio, ut soles, nasum induisse . muræna hæc trilibris, pinguißima, cephalus marinus, qui si depsticæ Cerere incrustabitur, erit suavissimus: nulli saxatiles, & barbati . non vides barbam? salpa recentissima, quam si exenteratam citriis tunsis, uva passa, nucleisque infarcies, atque inter assandum oleo, acetoque asperges, ac benè imbues, erit delicatissima . sunt etiam soleæ, quas si Apicio jure condias, servare in tri-duum potes . nam hæc cæli serenitas, mollities hæc maris ephimera est . ut ne aphyam posthac, imò ne squamam quidem sperare possis . Tum ego: Ne labores; manum ferulæ subduximus: neque tu adeò scitus, qui Aquilam volare doceas . istæ enim ego magis calleo, quam aprugnum callum callet, ut dicunt . Verùm utur sunt (sciebam enim pisces & optimos esse, & recētissimos . sed ut illum torquerē, & ut scivilius, distraberet quasi fastidiens contemnebā: equum quippe, ut quisque ad suum quæstum sit percallidus) quanti, inquam, indicas? Et ille: Sex nummis argenteis . Cui ego non sine stomacho, Vix tantivales cum rota horia . utinam Prætor essem! edicto caverem ne quis piscator suo arbitrato pisces venderet, sed tanti quanti Cerealis ædilis extimasset, & nullibi, nisi piscario in foro prostant . ibique sub lance signatis ponderibus venderentur . Verùm summa ego stultus, qui euro rem publicam, cùm magistratus sint, quos oportet curare . Hic ille flagitioso digito superiorem explicans barbam, quæ plurima homini pubescebat; Ut video, inquit, te non nihil agit intemperiei: fortasse tibi, & Musis tuis sinister hic dies est . Cui ego: At tibi non succedit sub manus negotium . adcone me-

sim .

simplicem arbitraris, ut in transfennâ induceres? Et ille: Ne prædices, scio qualis vir sis: nimirum percallidus, cuique negotii benè gerens, atque ad rem attentissimus. Imò tu callidus, inquam ego, qui non multis ab hinc diebus tribus me assibus tetigisti. An tu me potius? tàm ille. non enim ego adeo dexter sum, qui pulchrè vulpem fallam. Sed quid hic mihi cello, cumque fastidioso isto operam frustra contero? atque hæc dicens naviculam intorquet. Tum ego: Mane parumper, nolo, ut tu hùc frustrâ venisse conqueraris. en tibi pauxillum Brasiliæ pulveris, quem scio tibi esse gratissimum. Hunc ego pulverem et si angue pejus, & cane odio habeam, ut ne odorem, odorem autem? imo fetorem feram. nam præterquamquod totum hominem, nedum nares conspurcet, non leviter cerebrum lædit, pecuniamque decoquit sine lucro: tamen, ut illo pisces alliciam, inescemque perpauxillum in pyxidula gestare soleo. quem vel ab amicis peto, vel ab eo, qui domesticas rationes procurat, viro amicissimo, & in me haud illiberali. nam pecunia comparare semper piaculi loco duxi. sed ego de curru delapsus nimium aberravi; quocirca in viam me tempestivè deducam. Ut Nicotianum pulverem sibi oblatum piscator intellexit, illicò substitit, inflexaque cymbula: Des, inquit, mihi quæso veniam, si te duriusculo incesso verbo: nam tu me etiam pervelle-re volebas fastidienti illo tuo supercilio. Usque adeò vel exiguis munusculis irati flectuntur animi, imo & ab avergissimis extorqueas quidquid velis. Ut pulverem affatim prorrexisti; & ille admotum naribus probasset: erat enim acor, ac prævalidus; Distrahes, inquam, tribus nummulis argenteis? Et ille præter morem liberalis, Accipe, inquit, quanti voles. res transigatur arbitrato tuo: ut intelligas me ità tecum agere,

re, ut nullam mei commodi rationem habeam. At ego, cum advertissem mihi pecuniam non esse ad manus; Dabis, inquam, fide interposita? thecam enim nummariam oblitus sum domi; quocirca sine premio sum. Tum statim ille: Credam lubentissimè, non enim tu is es, quicum transigam græca fide. id verò cum ceteris minimè facio. sunt namque complures, quibus si semel credas, nunquam nomina ipsorum expunges. etenim cum creditam illis pecuniam effragitaveris, tot prætextus affertunt, tot formas induunt, tot comminiscuntur causas, ut versutiores videantur, quam rota figularis. uno verbo, non solvunt, nisi ad Kal. Græcas. Cui tum ego: Gratias ago, quod ita de me sentias: faciam ut illam accipias cum usura. addam enim, ut meridies, merendam non inelegantem: nimirum operarium panem, & frustum casei ovilli veteris, atque exquisitissimi. ceterum laudo prudentiam tuam, qui adeo solerter præcaves. Et ille: Ità factò opus est. mea quippe res agitur, & par est, ut suæ quisque utilitati sine alterius injuria serviat. verùm etsi velim gratis meam tibi operam præstare, nō ego inurbanus, qui elegans illud respuam antecœnium. Sed quæso, ut des etiam vinum. non enim ex unis lapidibus, verùm etiam cémento fit fabrica. Cui ego subridens: Rectè quidem, & argutè. ne, labores faciam libenter. Interea loci me puer è scopulo altæ voce compellat, nunciatque venisse hospitem quendam. jubeo igitur navicularium reflexa prora ad litus applicare. Ut verò applicuit, puerum rogo, Vnde hospes veniret, & quid sibi vellet? Tum ille: Vnde veniat ignoro, quid verò sibi velit, de te conjecturam facito. Cui tum ego: Numnam ut curet cuticulam? Ille verò: Opinor. juvenis enim est macilentus, ac pallidus, ut ex nosocomio venire videatur. Tum ego:

Cut-

Curnamnon dixisti me profectum Stabias ? Quia, inquit ille, id non erat in mandatis. neque ego divinus sum, ut quid sentias conjectem. Et ego? At non vides, inepte, quanto ego operi incumbo? Et hic sextus annus est, & mihi jam ætas adfecta, canique nitent non pauci. Tum puer: Tu adhuc juvenis, non enim, ut ex te nudius tertius audivi 1 annum attigisti. Ego tum: Ità enim verò. sed non vides, quàm imbecillæ vires, quàm malè affecta valetudo? Et ille: Quid mirum si te continuò literis involvis, & parè admodum te tractes. Verùm jam operi fastigium imposuisti, audivi enim te postremos versus festivissimè cantitantem, quos etiam in memoria habeo. Cui ego: Recita illicò. Et ille: Dabis mihi præmium? Dabo, inquam. Ille tum: Cedo, quid mihi dabis? Tum ego: *καὶ γὰρ πλεον* nonne est quàm pulcherrimum, Hic ille: Ludis certè Parthenie. amabo, loquere vernacule: græca enim nō audio. Cui tum ego subridens: Dicam latinè, sed novitia denominatione, nucifragium. Ille verò: Hem! jocularis certè. siquidem istiusmodi in via sexcenta sunt. Tum ego: Recita tandem: faciam ut non te peniteat. Et ille: Dicam tua fide. Postquam autem diu occipitiū scalpisset, At me, non ità? inquit. Et ego: Ità enim verò. sed citò. Tum ille: Sine quæso, ut respirem, & reminiscar. jam veniunt.

*At me doctum post tot certamina Martis,
Phæbo*

Tum statim ego: Quid dicis? non vides, ut non rectè pronuncies? Et ille: Hui! tam citò me vis perdoctum? ane ut ferulæ manus subducam. Ego verò: Papæ! ut es argutus. Tum puer: Audi modo: incipiam à capite.

At me doctum post tot certamina Martis

Phaëto & totum refluentem rore, paterni
 Non rectè fluunt? Cui ego: Rectissimè. euge, euge.
 Et ille: Pergam ad reliqua. Ohe! oblitus sum. hènè
 jam redeunt. dicam cirò, ne iterum fugiant:

Invisant colles ad gaudia nota: sinumque
Ipsa suum Siren venienti expandit alumno:
Viq. humili quondã Musco, & mea tēpora Myrto,
Sic nunc heron gestit pracingere Lauro.
Hinc Nesis, Megareq. & Olympia Mergellina,
Hinc & Seberbus festivo murmure aquarum,
Ac virides plaudunt horti, campique beati.
Et procul hinc Prochyte circumsonat, Inarimeq.
Hinc & bellaci subsultat Vespheus igne.
Et Vicus contrà, Stabiaeque, & saxa Minervæ,
Ac Surrentini resonant à vertice colles.

Sed tibi, fors varium maneat quacumq. per Orbem
Sex mihi, sed vacuis sudatus mensibus, annos,
Parthenius Marvora, sat erit si clarus ab ostro
Romuleo, & patria praeulgens tempora mitra,
Cantelmus legat interdum, Crateris ad undam
Dum concessa capit, sepositis otia curis,

Et plausu, ut semper solitus, dignetur amico.

Jò triumphè, da mihi prēmium. Tum ego: Bellissi-
 mè. dabo tibi pulcem ex fufure, & brassicarum jure
 pinguisimo. Ille verò: De ista tibi facio gratiam; non
 ego pullus gallinaceus. Age, tum ipse, bono sis animo,
 Tiburtinis te bellariis donabo Et ille: ah, ah, ah, vah,
 ista servato tibi, quadrant certè quidem dentibus tuis.
 Et ego: Fabiole, es graphicè facetus. sed relinqua-
 mus nuces. Accipe, si quis posthac hospes advenerit,
 dicito apertissimis verbis, dominus est Musis occu-
 patissimus, ut vacui temporis nihil habeat. Ne, quæ-
 so, faciant, ut inter sacra, & porrecta mihi aliquid, vel
 oneris addatur, vel ponderis. sinant præterea me vi-

vere

vere meis Musis, præ quibus habeo neminem. Intellexisti? Et ille: Etiam; curatum, factumque dabo. imo, si id tibi potius videtur (cauto quippe opus est) præ foribus domus, inque hoc postico antri ostio scribamus hanc uncialibus literis epigraphen. Musæum hoc adeat nemo præter Apollinem, poeta est intus cum Musis negotiis operosissimis implicatus. placeat? Cui ego: Rectè excogitasti. haud equidem tantum tibi inesse salis arbitrabar. Et ille: Quid mirum? tinctus est famulus elegantia domini. Lepidè sapis, tum ego. Sed age, nolo aburi tempore, i præ cum piscibus hisce, & grallatorios istos tuos gradus grandito: nam antiquum hoc obtines, ut tardus sis. pisces caute asservato, ne è via irrumpens canis nostro prandio funus faciat. Curram illico, inquit ille, atque spiritu continenti unum curriculum faciam. quid plura? hic sum, atque illic sum. mox ego modico gradu ire pergo.

Vbi verò in domum peristylum venio, hospitem obviam habeo. erat hic C. Manlius. mihi non ingratus, & futurus alias acceptissimus, qui ut me vidit, salve, inquit, vir humanissime, mihi que, & Musis oculissime. quæsoque, ut mihi des veniam, si te studio occupatissimum venerim occupaturus: valetudo enim, cum qua constitor, in causa fuit, ut id tibi negotii facerem. ceterum id æqui, bonique consulas, velim: nam tibi dissentissimo remittere interdum animum opus est. ut enim accepi à Lucilio tuo, hic tu quotidie ad mensulam claudus veluti sutor sedens, vitam ducis perquam laboriosam. Ego postquam, salutem illi comiter propinassem, jubeo bono animo esse, mihi que futurum gratissimum ipsius adventum: imò ejus gratia me res ceteras posteriores facere, quæque cum Musis seria mihi essent, tollere in alios dies. id
cui

etsi non omnino ex animo, faciebam tamen comiter. scio enim, quæ sunt hominis ingenui officia: & dissimulare interdum prudentia est. sunt enim nonnulli, qui animi ægritudinem premere, ac tempori inservire nequeunt ullo modo: quippe affectuum suorum impotentissimi; ut ex ipsorum vultu, quid in sinu gestent, internoscere facile sit.

His igitur officiis mutuò exhibitis, in superiorem deambulationem ascendimus. Hic posteaquam ad hypæthræ vestibulum, quo nihil amœnius, nihil aliud, confedimus, rogo, Numquid ab amicis attulisset? Et ille: Omnes, ut plerumque fit, te salvere jubent, cuius desiderio maximè torquentur. Tum ego: At non certè illi, qui Hebraicis literis initiandi sunt; quibus nihil ingratus esse potest adventu meo. Tum ille latine, ut solebat, Opinor, nam, ut planè fatear, odiosa illa est occupatio. Hic statim ego in stomachum erumpens: ad vivum enim ille me pupugerat, & jam animus in proclivi erat, Odiosane vobis divinarum literarum occupatio? Estne quidquam vel honestius viro Catholico, vel magis Theologo necessarium? illis enim in divinarum ædium antithalamum admissus, cum Superis jungere commercia potes, imò Deum ipsum alloqui, ac sine interprete coram affari. Ergone pluris vobis est de frivolis quibusdam, quæ nihil admodum sunt, nisi meræ nebulæ in quorundam mente depictæ, tanto animi conatu, tanta nervorum contentione, tanto verborum conflictu disputare, inque illis solidos annos insumere, ne dum menses, quàm sacras literas addiscere; quibus quasi Alexandri gladio difficillimos, ac verè Gordianos sacrarum scripturarum nodos solvere quàm facillimè possis, atque explicare? præstatne piscari in aëre, in arena ferere, quam secundo in mari rete, inque uberi solo semina-

mentem jacere? Sed nolo loqui vitia, ut plus in ore,
alôes, quam mellis habere videar. Hoc loco ille:
Ne, quæso, mihi irascaris, si verbo prolapsus sum:
nec serio prævertas, quod joco dictum est. ceterum
ego omnem operam in Hebraicis literis figam, ac lo-
cabo. Cui ego: Benè facis. præstat enim feriis rebus
vacare, quam iis, quæ ne exiguum quidem lucelli
habent. Sed omittamus istæc. Hic ille cum assurre-
xisset, sine, inquit, quæso tuum cubiculum, sacratissi-
mum illud Musarum Elysiûm, invisem: par enim est,
ne id in me officii desideretur, avco ibi illas inhabitâ-
tes salutare. Vix pedem intulit, cum salvet, inquit,
Musæ omnes Partheniæ. vos hic ego, feliciore, quàm
in Parnasso, Pindove loco veneror, atque adoro. mox
verò affixas parieti imagines quasdam elegantissimas
contemplatus, sunt hæ certò, inquit, quæ singulis Bel-
licorum libris præfigentur. Cui ego: Rectè conje-
ctas. atque hic est Mars Parthenius, qui operis fa-
ciem occupabit hac cum epigraphe,

Hæc iter ad laudes, immortalesque triumphos.

Has tu contemplare, dum ego intecà de prandio vi-
deam, revertar mox. Et ille: Ita, quæso. verùm de
prandio non multum labores: satis est puls candida,
cui momentum sacchari super spargas, & cinnamo-
mi, & binas ficus mitissimas. nam mullos, soleas, bo-
letos, tuberos, nihil moror. Cui ego: Benè facis:
sic enim valetudinem facilè recuperabis. mane jam;
brevis pedem huc referam. Postea verò quàm in cu-
linam ingressus sum, jubeo puerum afferre pisces. il-
le statim ex arca eduxit, inque abaco exposuit. Tum
ego: Mullos assabimus: salpam frixam condiemus
dulci embammate: cephalum verò incrostabimus.
Hic Fabiolus: De muræna quid? Cui ego: Faciemus
ex illa jus concretum: & sic in perendinum asserva-
mus.

mus. Et ille: Si frigeremus, esset delicatissima. Viden' ut præpinguis? Helluo, tum ego, cunctane una vice vis devorare? necesse est, ut simus in futurum providi. Et ille: Sed dandum hoc hospiti: par enim, ut paulò hilariori convivu excipiat. Ut bellè argutaris inquam ego. satis sunt, quæ apponuntur, quin imò ille valetudinarius, & valetudinarios non decet amplè nutrire. intelligis, inepte? Ille tum: Intellego, inquit. verum quo fiat modo concretum jus, non teneo. Accipe, inquam ego: doccam te, aſine. Primò murænam sic exossato: illam ad collum funiculo alligatam suspendito: mox geminis fustibus, sive duobus calami frustis premito versùs caudam, idque itera semel, iterum, ac sæpius. sic spinæ cogentur ad caudam. mox in hūc modum exossatam in frustra concidito. Hic me ille interpellat, Proiciam caudam? Minimè, tum ego: tu illam, cui fortissimi dentes, obsonabis adverte animum; Adverto animum, & aures: sed nolo fieri caudatus, tum ille: At ego: Tace, surcifer: albo mox aceto elixato. utque benè elixa, in ollam recentem una cum juscule mittito, frigidoque in loco collocato, ut ibi jus concreseat. teneo? Et ille: Teneo enim verò. sed restat adhuc videndum de soleis: quæ reponi minimè possunt. At tum ego: Ita condiam, ut etiam per totum triduum servare possim. Quo, quæso, condies scitamento? inquit ille. Ego vero: Jure Tarentino. Et ille: Cedo, inquit, quo modo fiat istiusmodi juscule? Tum ego: Adeone tu immemor, inepte? nonne ego feci alias? in te erudiendo ego operam perdo, & oleum. Ille, tum, Animum, inquit, non applicui: advertam nunc attentissimum, quem ad frugem applicare mihi certum est: efficiamque brevi, ut sentias te non lavare Æthiopem. Accipe, inquam. & ille: Cedo, aures arrigo. At ipse: Tace

Tace jam, atque audi. In ollula illa ex creta Sinves-
fana recenti mel, acetum misce: adde pinæ nucleos
quamplurimos, astaphidem item, & tritum allium: mox
leviter coque. frixas deinde solcas in ampla patella
ponito, sparges super rorem maris plurimum, coctum-
que jus versato, aptoque in loco lancem reponito.
habes jam? Et ille: Propemodum. verum de pulce,
non vidisti. Cui ego: Vidi, asine. tace. neque mihi
præpedimentum obicias. Mundastin' brassicas illas
Apianas, ut præceperam? Et ille: Crispas vis dicere?
Illas ipsissimas, inquam. Tum ille: Admodum. nam
non ego conchas, neque umbilicos legi. Tum ego:
Benè est, scitule. coquito nunc: sed vide ne excoquas.
caveto tamen, ne sint nimis duriusculæ; ut faciant
plerumque coqui, qui nesciunt servare modum. De-
inde extrahe cacabum: statimque frigidam infundito.
Hic ille: Cur ita? Et ego: Quia sic viridem il-
lum, & nativum colorem retinent unà cum sapore. Si
coqui hanc adhiberent diligentiam, non comedere-
mus herbaceas pulres adeo insipidas, & squalidas:
quas si famēs, optimus intinctus, non condiret, nun-
quam gustaremus. Mox in testudinem oleum defæ-
catum trimum, salemque, & tunsum allium, vel mi-
nutatim comminutum frigito. tandem brassicas, co-
lato prius jure cribrario cocleari, in testudinem jace,
utque aliquantisper frixæ, seponito. atque hæc erit
nobis puls oleracea. hospiti faciemus candidam ex
vermiculis cerealibus. curato jam cuncta diligenter,
ego mox revertar. Et ille jam operi manus admove-
bo. Egressus igitur è culina in subdialem ambulationem
venio, videoque ibi hospitem deambulantem;
cui illicò. Quid hic C. Manli? Et ille: Obsono famem
deambulando. Benè facis, tum ego. sic comedes
majori appetentia. Sed age (hic me pungit stimulus,
atque

atque inter malleum tenet, & incudem) quomodo valet Cn Bellus? Tum Manlius: Non planè benè, atque hoc ipso mane medicinam hausit: faxint Superi, ut illi sit profutura. Et ego: Cujusmodi fuit potio? Et ille: Et liquata in rore manna, quam meus mirum quantum fastidiat stomachus. At ipse: Verùm quidam sunt, quos ego, cum Consentiz essem, cognovi, qui illam, cum ex arbore legitur, quasi cibum comedunt. Hic Manlius: Ex arbore igitur manna legitur. verùm ex qua? quo pacto? quo tempore? De hoc aliàs, inquam ego, nunc de amicis. Et ille: De amicis postea: qui quidem paucissimi admodum. age igitur, scire hos enim avco, ne & in præsentia omittamus, occidat memoria. Tum ego: Si ità tibi placet, morem geram: & ut apud Calabros, ubi plurima, atque probatissima provenit, observavi, non multis exponam. Et ille: Gratiā mihi facies, daboque aurium operam intentissimam. Tum ego: Manna ex ornīs educitur. quæ quidem arbores, ut mannā exudent, calidis in locis, ac maritimis sint, oportet. in his enim aptæ ad hujusmodi humorem procreandum educantur. hæc verò loca solis ornīs obumbrata sint, necesse est. & enim aliæ arbores plantatæ, manna ex illis non elicitur. mirum equidem, & cujus causa, fateor, mihi in promptu non est. At Manlius: Fortasse quia reliquorum umbra huic liquori nocet: & noxiam quarundam arborum umbram esse pro comperto est. Atque hinc poëta,

Juniperi gravis umbra nocet.

Imò quasdam arbores in America esse perhibent, quarum umbra non solum noxia, sed etiam lethalis. Vel quia tellus aliarum plantarum qualitatibus depravata, minus apta ad mannā producendam efficitur. vel illarum sic est natura, ut externarum con-

for-

sortium non admittat plantarum . Cui ego: Ingeniosè tu quidem , ut semper Manli . verùm istæ ex illis sunt , quorum causæ physicos latent . Præterea necesse est , ut omni omnibus ramis , frondiumque luxurie denudentur : nec nisi nudus truncus cum tribus circiter palmis supremæ coronæ relinquatur . viduaris hoc modo arboribus , Julio mense , die sereno , atque æstuoso (frigus enim , & pluviz mannæ procreandæ obsunt) arbores incidentur . Quæ incisio quotidie fit quoad usquè manna non amplius exudet . cavendum tamen , ne primæ incisioni secunda noceat . Modus incidendi est huiusmodi : cultro falcato orbiculatim incidentur in corticibus trunci . Verùm si loca montana , & paulò frigidiora , incisio fit Augusto mense circiter Nonas . Cum ex incisis arboribus liquor rectus profluit , in planos lapides , vel regulam excipitur . collectus cum fuerit ligneis in vasis , vel cacinabris reponitur conservandus . Verùm si pluvius dies incidat , illicò colligitur , atque expanditur sub rectis , ut purior illius pars ab impuriori separetur , atque in fistulas concreseat . Orni è quibus manna elicitur , ad XII annos vivunt . quo tempore quatuor in lateribus truncorum à I ad XII annum sensim incidentur . Atque hic primus modus est legendæ è corticibus ornorum mannæ . Est alter , alterius generis , quæ cælestis appellatur , ex eodem arbore , eodemque tempore elicitur , at diverso modo . neque hominum arte , sed uno ipsius naturæ cicadam usæ magisterio . Siquidem cicadæ ornorum frondes mordent . juxta morsus vascula è frondibus facta collocantur in hæc è morsibus humor exudat , diffluit , & concrescit . Atque hæc est manna , quæ apud Brutios provenit : apud quos etiam pix creatur magna copia , ut per totam Italiam distrabatur . Hic Manlius : Sed age , quando in hac resu-

sumus, dic, ut soles numero, quibusnam ex arboribus, quoque modo pix conficiatur, ut deinde ad nostras redeamus. Cui tum ego: Accipe, dicam compendio, ut postulas; In Sila, quæ ingens sylva est apud Brucios. Hic Manlius: Teneo planè benè, tu enim illā descripsisti. Naut. perquam graphicè, & versiculos etiam recitatem, ni id grave tibi fututum scirem. Tum ego: Omitte illos: non est tempus jocandi pergā ad ea, quæ scire desideras. In Sila, inquam, sylva quæ magnam extremi Apennini partem occupat, ingens pinorum copia nascitur: ex his autem pix generatur. Pinos igitur primis annis corticibus exuunt: quibus spoliatae arbores albam picem, quam græcam nuncupant, emittunt. deinde ex illis nigra educitur hoc modo. E pinis modo jam dicto decorticatis, interiores fibræ, cor Calabri dicunt, educuntur, quæ ex partes arboris istiusmodi sunt, quas tædas nuncupamus. quæ mox in frustra concisæ in fornacem mittuntur. quæ fornax in ovum conformatur, duobus ostiis, uno infra, superius verò altero. collocatis jam tædis, inferius ocluditur, è superiore ignis excitatur. interea dum tædæ ardent pix liquatur: perque canalem minorem alteram in fornacem excipitur, quoad tota defluerit intra horas xxiv: liquata hoc modo pix in minori fornace iterum accenditur, ardetque ad horas x quibus exactis, ignis extinguitur, frigida circum effusa, vel palis ignem supprimentibus. Atque hæc cum dixissem, sine, inquam, ut in culinam eam, utque edulia, esui matura fiant, accurem. jam enim mihi viscera murmurant inanitate. Et ille: Itā, quæso. statimque discedo.

F I N I S.







